
MORMONPA
QELQANMANTA
AQLASKA
T'AQAKUNA

HOQ JESUCRISTOMANTA WILLAKOQ

MORMONPA QELQANMANTA AQLLASKA T'AQAKUNA

HOQ JESUCRISTOMANTA WILLAKOQ

Kay qelqapiqa kan, Mormonpa Qelqanmanta Aqllaska T'aqakuna. Runa Simiman hunt'asqa Mormonpa Qelqan t'ikrakuspa runakunaman reqsichisqa kanankamallan kay aqllaska t'aqakunaqa runakunaman reqsichikun. Chhayna ruwasqa kaqtintaq ka aqllaska t'aqakunayoq qelqa qollunqa.

Mormonpa Qelqanpiqa, Jesucristoq hunt'asqa yachachiyninkunan kan. Kay qollanan qelqamanta ancha sumaq yachachiyninan kay aqllaska t'aqakunapi kan, purispa-yachacheqkunapaq, Jesucristoq Iglasian Qhepa P'unchaw Iñiqkunaq kaqkunapaq, yapamanta hatarichisqa Jesucristoq yachachiyninkuna yachay munaqkunapaq ima.

*Jesucristoq Iglasian Qhepa P'unchaw
Iñiqkunaq*

Runakunaman reqsichisqa

Salt Lake City, Utah, E.U.A.

© 1979 por Intellectual Reserve, Inc.

Derechos reservados

Printed in the United States of America 7/2011

Translation of Selections from the Book of Mormon
Quechua (Peru)

ISBN 978-1-59297-602-7 Softcover (33568 061)

MORMONPA QELQAN

RAPHIKUNA PATAPI
MORMONPA MAKINPA
QELQASQAN WILLAY
NEPHIQ RAPHINKUNAMANTA HORQOSQA

Chhaynaqa, Nephiq Ilaqtanpa lamanitakunaqpiwan willayninmi. Israelpa wasinpa puchun lamanitakunaman, judiokunaman, hawarunakunamanwan qelqasqa. Kamachisqa kaqtin qelqasqa, unanchaypa, rikuyqa ima nunanwan qelqasqa. Qelqasqa, intuykusqa, Wiraqochapaq pakasqapiwan, mana chinkachisqa kanankupaq; sut'inchasqa kananpaq, yayaq qoyninwan, atiyinpiwan lloqsimunanpaq. Moroniq, intuykusqa Wiraqochapaq pakasqa, chanin pachapi hawarunakunaq makinkuwan lloqsimunanpaq, Yayaq qoyninwan sut'inchasqa kananpaq.

Etherpa Qelqanmanta horqosqa huch'uyyachisqa willaypiwan, kaytaq Jaredpa Ilaqtanpa willaynin; kay Ilaqtataq ch'eqechisqa karqan, hanaqpachaman chayanankupaq huk rumi qolqata ruwashaqtinku, runakunaq siminkuta Yaya chharqoshaqtin—kaytaq rikuchin Israelpa wasinpa puchunman, imayna hatun imaymanakunata taytankunarayku Wiraqochaq ruwasqanta; mana wiñaypaqchu qarqosqa kanankupaq Wiraqochaq rimanakuyninkunata yachanankupaq. Judiokunata hawarunakunatawan konvensinapaq, WIÑAY YAYA JESUS CRISTO kasqanta llapa Ilaqtakunaman pay kikin qhawachikuspa. Kunantaq, pantaykuna kan chayqa, runakunaq pantayninkun; chhaynaqa ama condenaychischu Yayaq imankunata, Jesucristoq taripana-tiyananpa ñawpaqenpi mana ima qheliiyoq rikhurinaykichispaq.

INGLES MAN JOSE SMITH (CHURIQ) T'IKRASQAN

*Jesucristoq Iglesias Qhepa P'unchaw Iñiqkunaq
Runakunaman reqsichisqa
Salt Lake City, Utah, E.U.A.*

MORMONPA QELQAN

IMAYNA ALLICHASQA KASQAN

Kinsa laya Raphi Qelqakunamanta rimarikun Mormonpa Qelqanpa qallareq raphinpi, kaymi chaykuna:

1. *Nephiq Raphinkuna*, Qelqaq rimasqan hina, ishkaymi karqan— (a) Hatun Raphikuna; (b) Huch'uy Raphikuna. Hatun Raphikunaqa rimarqan runakunaq imayna kayninkumantan astawanqa, Huch'uy Raphikunataq qollanan willaykunamanta astawan.

2. *Mormonpa Raphinkuna*, Nephiq Raphinkunamanta huch'uyyachisqa qelqakuna, Mormonpa ruwasqan, askha rimaykunapiwan, pay kikinpa willayninpiwan qatisqa; qhepaman hinataq Mormonpa churin Moromi chayman yapan.

3. *Etherpa Raphinkuna*, jareditakunaq willaynin, chay willaytataq Moroni huch'uyyachirqan, pay kikintaq chaypi rimarin, Etherpa Qelqan nispataq wakin qelqakunaman yapan.

Kaykunamantaq huk raphikuna yapasqa kanman, pasaqllataq kay qelqamanta Mormonpa Qelqanpi rimakun, kaytaq kay qelqqa:

4. *Labanpa Bronse Raphinkuna*, Lehiq Ilaqtanmi kayta apamurqanku Jerusalemanta, kaypitaq karqan Hebreo qelqakuna, ayllu-saphikunapiwan; chaymanta askhataq nephita qelqapi rikhurin.

Chunka pishqayoq t'aqakunan kan Mormonpa Qelqanpi, kaykunataq—hukllataq mana—Qelqakuna nispa reqsisqa kanku, sapanka qelqataq apan qelqaqpa sutinta. Kaykunamanta soqta qelqakunaqa Nephiq Huch'uy Raphinkunamanta t'ikrasqan kanku, kay qelqakunataq kanku: Ñawpaqqaq Nephi, Ishkay kaq Nephi, Jakob, Enos, Jarom, Omnipiwan. Omniq Qelqanpa pataman Mosiahq Qelqanpa ñawpaqenpiwan tarinchis *Mormonpa Rimayninkunata*; kay rimaykunataq ratachin Nephiq qelqankunata Huch'uy Raphikunamanta qelqasqata hina, qateq pachakunapaq Hatun Raphikunamanta Mormonpa huch'uyyachisqan qelqakunawan. *Mormonpa Rimayninkunapiqa* kan ña qelqasqa qelqakunamanta hamut'achiy, qateq qelqakunapaq ñawpaq simi ima.

Kay qelqapiqa, Mosiahmanta Mormonpa 7 t'aqankamaqa, Nephiq Raphinkunamanta Mormonpa huch'uyyachisqanmanta t'ikraymi. Mormonpa Qelqanpa qhepa kaqninga, Mormonpa 8 t'aqanpa qallariyninmanta qelqaq tukukuyninkamaqa, churin Moroniq qelqasqanmi; paytaq qallariypi taytanpa kawsayninpa qelqanta tukurqan, chay patamantaq Jareditakunaq qelqanta huch'uyyachiyta qallarirqan, Etherpa Qelqanta hina. Qhepamanñataq pay yaparqan Moroniq Qelqan nispa reqsisqanchista.

Mormonpa Qelqanqa mast'arikun 600 B.C watamanta 421 A.D. watakaman. Qhepa watakunapi hinataq nefitakunaq qhepa kaq willaynin qelqaq Moroni, qollanan qelqakunata intuykurqan; Wiraqochapaqtaq pakarqan, qhepa p'unchawkunapi rikhurimunpaq, ñawpa unanchaqkunawan Yayaq arunpa nisqanman hina. Kay kikin Moronillataq 1827 A.D. watapi kawsarinpusqa kaspaña, kay qelqayoq raphikunata Jose Smithman qorqan.

MORMONPA QELQAN

IMAYNA RIKHURIMUSQAN

Jose Smith—payninta Yayaq qoyinwan atiyinpiwan MORMONPA QELQAN nispa reqsisqa ñawpa qelqa rikhurimusqa karqan, ingles simimantaq t'ikrasqa karqan—kay imaymanakunamanta qelqarqan. Cheqaqtapunin pay willarqan, setiembre killaq 21 p'unchawpa tutanpi, 1823 watapi, tukuy songowan yayaman-rimarikuypi Wiraqochata mashkarqan, ñawpaqtaraq hanaqpachamanta ancha hatun visitayta chashkispa. Khaynan willaynin:

“Chhayna, Yayaman rimarikuspa kashaqtiytaq, kuartuyi rikhurimuq k'anchayta rikurqani, astawantaq yapayukurqan chawpi p'unchawmanta aswan k'anchayniyoq kuartuy kanankamaraq; hinataq qonqayllamanta puñunaypa qayllanpi huk runa rikhurimurqan, mana panpapi sayaqla, manataqmi panpata chakinkuna tuparqanchu.

“Ancha yuraq kacharisqalla unkuwan p'achayusqan pay karqan. Hallp'api imapas rikusqaymanta aswan yuraqmi karqan; manataqmi kay pachapi imapas kanmanchu, chay hina k'anchayniyoq ni yuraqniyoqpas. Makinkunapas mak'ankunapas q'alallan karqan, makinpa tunpa wichayninkama; chay hinallataqmi chakinkunapas, chakankunapas, wich'unpa tunpa wichayninkama. Chhayna q'alallataqmi umanpas karqan, hinataq yacharqani mana kay unkumanta aswan p'achayyoq kasqanta, kicharisqa kaqtiytaq qhasqonta rikuyta atirqani.

“Manan unkullanchu kay hina ancha sumaq yuraqniyoqqa karqan, llapan kayninmi mana rimariy atinata k'ancharqan, uyantaq kawsaq illapa hina karqan. Kuartuqa ancha k'ancharisqan karqan, ichaqa manan kaynin muyureqninpi hina k'anchariywanchu. Qallariypi payta rikuqtiyqa mancharisqan karqani, asllamantaqmi ichaqa, mancharikuyniy chinkapurqan.

“Sutiyanta waqyawaspataq, Yayaq ñawpaqenmanta kachamusqa kamachin kani Moronitaqmi sutiy, Yayan ruwanaykipaq ruwayniyoq, llapan llaqtakuna, ayllukuna, simikuna ima purapiytaq, allinta utaq mana-allintapas qanmanta rimarikunqa, nispa.

“Hinataq niwarqan, qori raphikunapi qelqasqa qelqa kasqanta, chaytaqsi riman kay hallp'api ñawpa runakunamanta, maymanta

hamusqankumantawan. Niwallarqantami, chay qelqapi wiñay-wiñaypaq yayaq-yachachiyninkuna hunt'asqa kasqanta, chay ñawpa runakunaman Qespicheq imayna qosqan hina.

“Nillarqantaqmi, chay raphikunawan kushka, qolqe siwikunapi ishkay rumikuna kasqanta, kaykunataqsi huk qhasqo raphikunaman wataykusqa kaspá, Urim Tummim nisqata wakichirqan; kay imaymanakunayoq kay llank'achiypiwantaqsi *Rikuqkuna* nispa reqsisqa runakunata wakichirqan ñawpa pachakunapi; Yayataqsi chaykunata allichasqa karqan, chay qelqa t'ikrasqa kananpaq. . . .

“Yapamantataq niwarqan, paypa rimarisqan raphikunata chashkiqtiyqa—manaraqmi chayamusqaraqchu karqan chay raphikuna hap'ikunan pacha—manas pimanpas qhawachinaychu, nitaq Urimwan Tummimpiwan kaq qhasqo raphikunatapas, ichaqa, pikunaman qhawachinaypaq kamachiwasqa kasqanman hinalla; ruwayman chayqa, qolluchisqas kayman. Chay raphikunamanta noqawan rimashanankama, umaypi huk rikuyta rikurqani, hinaspataq rikuyta atirqani maypi chay raphikuna kasqan hallp'ata; allin ch'uyatapuni rikuqtiyqa, chayman reqtiy chay hallp'ata reqsirqanipacha.

“Kay rimanakuy patamantataq, kuartuypi k'anchay, rimariwaq runaq muyureqnintinman huñunakusqanta rikurqani, hinataq qatillarqan yapamanta tutayaqmi kuartuy qhepanankama, ichaqa, manan paypa muyureqninpiqa; hinataq qonqayllamanta rikurqani hanaqpachaman kicharikuq ñanta hina, paytaq chayninta hanaqpachaman wichayapurqan lliwtapuni chinkayunankama; kay hanaqpacha k'anchay manaraq rikhurimushaqtin hinataqmi kuartuyqa qhepakapurqan.

“Kay rikusqaymanta yuyaymanaspa qhepakapurqani, kay ancha sumaq hanaqpacha kamachi nisqanmanta anchatapuni utirayaspay; khayna yuyaymanasqaypa chawpinpitaq, yapamanta kuartuy k'ancharimusqanta rikurqani, huk ch'illmiriypi hinataq, yapamanta chay kikin hanaqpacha kacha rikhurimurqan puñunaypa qayllanpi.

“Qallarispatataq yapamanta niwarqan, ñawpaq hamuyninpi kikin niwasqan imaymanakunata, mana imatapas t'ikraspa; chay patamantataq niwarqan pachaman askha taripaykunata chayamunanmanta, yarqaypa, q'anchinaq, onqoykunataq ima wakichisqan muchuchiynawan; chay llakichikuq taripaykunataqsi kay hallp'aman

hamunan kay miraypi. Kay imaymanakunata niwaspataq, ñawpaq ruwasqanta hina yapamanta hanaqpachaman seqayapurqan.

“Chaypaqñaqa, yuyayniypi ancha p’uytu chay imaymanakuna kaqtin, ñawiykunamanta puñuy ayqepurqan, chay rikusqaypa uyarisqaypa ima utirayachiyninpa atipasqantaq chutarayarqani. Ichaqa, hayk’araqmi utirayayniy karqan, yapamanta chay kikin kachallataq puñunaypa qayllanpi rikuqtiy, yapamanta ñawpaq nisqan imaymanakunata niwaqtin; chaymantaq hukta yaparqan, saqraq wateqawayta munanman (taytaypa ayllun wakcha kasqanrayku) qhapaqyanaypaq chay raphikunata hap’inaypaq. Kaytataq pay hark’awarqan, chay raphikunata hap’eqtiykiqa, manan huk imaymanakunataqa yuyanaykichu, ichaqa, Yaya yupaychallayta, nispá; manataqsi huk imaymanakunapas noqata llank’achiwanchu, ichaqa, Yayaq suyunta hatarichinallaypaq. Mana chayqa, manas chay raphikunata chashkiymanchu.

“Kay kinsa kuti hamusqan patamanqa, yapamantan ñawpaq ruwasqanta hina hanaqpachaman seqayapurqan, yapamanatataq qhepakapurqani chaykunaq hukniraq kayninmanta yuyaymananaypaq; hinataq, chay hanaqpacha kacha kinsa kutita seqayapusqanman hinalla wallapa waqamurqan, pacha paqarimusqantataq rikurqani; chhaynaqa, chay rimayniykuqa chay llapan tutantinchá karqan.

“Asllamantaq puñunaymanta hatarirqani, yachasqayta hinataq, chay p’unchawpa ruwanankunata ruwanaypaq rirqani; ichaqa, huk kutikunapi hina llank’ayta munashaqtiy, kallpay lliwtapuni ch’umarikuwarqan, chaytaq mana imatapas ruwayta atirqanichu. Sispaypi llank’aq taytaytaq, susidiwasqanta rikuspa wasiman ripunaypaq kamachiwarqan. Wasiman rinaypaq hina chaymanta lloqsirqani, ichaqa, chay kasqayku kanchamanta lloqsinaypaq perqanta wasapanay kashaqtiy, lliwtapuni kallpay tukukurqan; wañusqa hina panpaman urmayuspaytaq, mana imamantapas yuyayniyoqchu karqani.

“Qallariypiqa yuyarirqani, sutiymanta waqyawaspa rimariwaq arutan. Wichayman qhawarispataq, umay hawapi ñawpaq hina k’anchaywan muyurisqata, chay kikin hanaqpacha kachallatataq rikurqani. Ñawpaq tuta llapan niwasqantataq yapamanta niwarqan, taytayman kutirispá chay rikuyman, chashkisqay kamachiykunamantawan willanaypaqtaq kamachiwarqan.

“Kasuspataq, chakrapi taytay kasqanman kutirqani, hinaspataq

llapanta payman willarqani. Yayamantan, chay hanaqpacha kacha kamachisqasuykitataq ruwamuy nispataq pay niwarqan. Chakramanta lloqsiypaytaq, maypi chay raphikuna kasqanman chay hanaqpacha kacha niwasqanman rirqani, chay hallp'amanta ancha ch'uyapuni rikuyta rikusqayraykutaq, chayman chayaspay hina reqsirqanipacha.

“Manchester huch'uy llaqtapi, Ontario huch'uy suyupi, Nueva York suyupi, huk allin sayayniyoq orqo kan, chay hallp'api llapan orqokunamanta aswan hatun kaqnin. Orqoq intiq haykuna qayllanpi, orqoq mukukunmanta mana ancha kharupichu, allin sayayniyoq rumi sikipi, rumimanta ruwasqa rakipi raphikuna kashasqaku. Kay rumiqa, chawpinpa mukukunpi hinaqa muyun rakhutaqmi karqan, kantunkunapitaqmi ichaqa, aswan llapsa kasqa; chayraykutaqmi chay rumiq chawpinqa hallp'a patapi rikukurqan, kantunkunaman hinataq hallp'awan pakasqa karqan.

“Hallp'ata picharispataq, huk wanqanata tarispa, rumiq kantunman chayta suskhuchirqani, tunpallata kallpacharikuspata rumita hoqarirqani. chay rakita qhawaykuqtiytaq, chaqaytapuni raphikunata, Urimta, Tummimta, qhasqo raphikunatawan rikurqani, chay hanaqpacha kacha nisqanta hina. Chay rakiq pachanpi ishkay chakasqa rumikuna kasqan karqan, chay patapitaq raphikuna chay huk imaymanakunapiwan churasqa kasqa.

“Chaykunata horqoyta munaqtiytaq chay kacha hark'awarqan; yapamantataq niwarqan chaykuna horqanaypaq p'unchaw manaraq chayamusqanta, manataqsi chayamunmanchu, ichaqa, chay pachamantapacha tawa wata pasasqan patamanña; ichaqa niwarqanmi, chayman huk watapi rinaypaq, paytaqsi chaypi rikhuri-muwanman; chhaynallatataqsi ruwanay chay raphikunata chashkinaypaq p'unchaw chayamunankama.

“Kamachiwasqanman hinataq, sapa wataq tukukuyninpi chayman rirqani, chay kutikunataq chay kikin kachata tarirqani; sapanka rikunakuyniykupitaq, yachachiykunata, Wiraqochaq ima ruwanankunamanta, imaynata suyun qhepa p'unchawpi apasqa kananmantawan yachaykunata chashkirqani. . .

“Hinamantaq qhepatapuniqa, raphikunata, Urimta, Tummimta, qhasqo raphikunatawan chashkinaypaq p'unchaw chaymurqan. Setiembre killaq 22 p'unchawninpi, 1827 watapi, huk wataq tukukuyninpi yachasqayman hina chay imaymanakunaq kasqanman rispay, kikin hanaqpacha kachallataq chaykunata qowarqan, kay-

ta niwaspa: Noqas chaykunamanta kutichinay; mana allin qhawasqayrayku chinkananta kachariyman chayqa, qolluchisqas kayman; ichaqa, chaykunata qhепachinaypaq allinta kallpachakuyman pay (chay kacha) chay imaymanakunarayku hamunankama chayqa, waqaychasqas chaykuna kanman.

“Asllamantaq yacharqani, imanaqtin chaykuna waqaychanaypaq chay rimaykunata chashkisqaymanta, imanaqtin chay kacha—qanmanta mañakusqan imaymanakuna tukukuqtinqa, noqan chaykunarayku hamusaq nispa niwasqanmantapas. Chay imaymanakunayoq kasqayta yachakusqanman hinallanan, anchatapuni runakuna kallpachakurqanku chay imaymanakunata qechuwankupaq. Llapa atikusqan imaymanakunatan ruwarqanku chayta ruwanankupaq. Ñawpaqmanta aswan millayraqmi noqa qatika-chawayqa wakipurqan, askha runakunataq qhawallashaqku, atikunman chayqa chay imaymanakunata qechuwankupaq. Yayaq yachaysapa kayninwanmi ichaqa, chay imaymanakunaqa allin waqaychasqa makiypi karqan, noqamanta mañakusqan hunt’akunankama. Hinamantaq chay hanaqpacha kachaqa, rimasqaykuman hina chay imaymanakunarayku hamurqan, paymantaq chaykunata qopurqani, paytaq chaykunata hap’inshan kunan 1838 wataq mayo killaq 2 p’unchawninkama.”

Hunt’asqa willaypaqqa, *Pearl of Great Price*, 50-54 rr., *History of the Church of Jesus Christ of Latter-day Saints*, volume 1, chapters 1 to 6 qhawaychis.

Hallp’amanta khaynata apamusqa ñawpa qelqaqa, hallp’amanta rimarimuq runakunaq arun hina, Yayaq atiyinwan kunan p’unchaw simiman t’ikrasqa, Hanaqmanta rimarimusqa hina, 1830 watapin qallariypi runakunaman reqsichisqa karqan, MORMONPA QELQAN hina.

KINSA SUT'INCHAKUNAQ SUT'INCHAYNINKU

Llapa llaqtakunaman, ayllukunaman, simikunaman, runakunaman, piman kay ruway chayaqmanpas yachachisqa kachun: Noqayku, Tayta Yayaq grasiawan, Wiraqocha Jesucristoq grasiapiwan kay willayniyoq raphikunata rikusqaykuta; kaytaq Nephiq llaqtanpa, wawqenku lamanitakunaq, ña rimasqaña rumi qolqamanta hamuq Jaredpa llaqtanpa ima willaynin. Yachaykutaqmi Yayaq sumaq goyninwan munayninpiwan kay raphikuna t'ikrasqa kasqanta, chhaynatan arun yachachiwarqanku; chhaynaqa, cheqaqtapunin yachayku kay ruway cheqaq kasqanta. Sut'inchallaykutaqmi raphikunapi kaq qelqakunata rikusqaykuta; Yayaq atiyinwantaq manataq runaqwanchu noqaykuman qhawachisqa karqan. Ancha allin yuyayniyoq rimaywantaq willayku hanaqpachamanta Yayaq huk kachan urayamusqanta, paytaq apamurqan ñawiykuq ñawpaqenmantaq churarqan, rikurqaykutaqmi raphikunata, chaypi kaq qelqakunatawan; yachallaykutaqmi Tayta Yayaq grasiawan, Wiraqochanchis Jesucristoq grasiapiwan rikusqaykuta; sut'inchaykutaqmi kay imaymanakuna cheqaq kasqanmanta. Ancha sumaqmi ñawiykupi. Chaypiwanpas, Wiraqochaq arunmi kamachiwarqanku kaymanta sut'inchanaykupaq, chhaynaqa, Yayaq kamachiyninkunaman uyakuq kanaykupaqmi kay imaymanakunamanta sut'inchayku. Yachallaykutaqmi, Jesucristopi iñiyasapa kasaqku chayqa, llunp'aqmi p'achayku kanqa llapa runakunaq yawarninmanta, mana ima qhelliyoqtaq tarikusaqku Jesucristoq taripanampa ñawpaqenpi, Paywantaq wiñaypaq hanaqpachapi tiyasaqku. Taytapaq, Churipaq, Qollanan Nunapaqwan yupaychay kachun, paykunata huk Yayalla kanku. Hinataq kachun.

Oliver Cowdery
David Whitmer
Martin Harris

PUSAQ SUT'INCHAQKUNAQ SUT'INCHAYNINKU

Llapan llaqtakunaman, ayllukunaman, simikunaman, runakunaman, piman kay ruway chayaqmanpas yachachisqa kachun, kay ruway t'ikraq Jose Smith, churi, rimasqa raphikunata qhawachiwashankuta; kaykunataq qoriman rikch'akurqanku, makiykuwantaq llamirqayku nisqa Smithpa llapa t'ikrasqan raphikunata, chaypi kaq qelqakunatapas rikurqaykun, kaykunataq ñawpa ruwasqaman rikch'akurqan, ancha sumaq ruwasqataqmi. Ancha allin rimaywanmi kayta sut'inchayku, nisqa Smith rimasqayku raphikunata noqaykuman qhawachiwashankumanta; rikurqaykun llamirqaykutaqmi, cheqaqtapunitaqmi yachayku, nisqa Smith hap'isqanta. Sutyikutataq runakunaman qoyku, rikusqaykumanta runakunaman sut'inchanaykupaq. Manataqmi llullakuykuchu, Yayan sut'inchaqniyku.

Cristian Whitmer
Jacob Whitmer
Peter Whitmer, churi
John Whitmer

Hiram Page
Joseph Smith, tayta
Hyrum Smith
Samuel H. Smith

Jesucristo Wiraqocha
Del Parsonspa seq'en

Jose Smith profeta nisqa
Alvin Gittinspa seq'en

Lehiqmi tarin Liahona nisqata
Arnold Fribergspa seq'en


Lehi runankunantin tarin suyasqa allpata
Arnold Fribergspa seq'en

Alman ununchan mormonpa ununpi
Arnold Fribergspa seq'en


Samuel el Laminita nisqa hamuykunata rimaran
Arnold Fribergspa seq'en


Jesucristo yayanchis America suyuman hamuran
John Scottspa seq'en

Moronin registro nefita nisqata p'amparan
Tom Lovellspa seq'en


















MORMONPA QELQANPI

QELQAKUNAQ SUTINKUNA

<i>Suti</i>	<i>Kay akllasqa qelqapi t'aqakuna</i>
Nephiq Ñawpaqkaq Qelqan	1-7, 16-18
Nephiq Ishkaykaq Qelqan	1-4, 5:1-20, 9, 29, 31-33
Jakobpa Qelqan	Mana kaypichu
Enospa Qelqan	Hunt'asqa
Jarompa Qelqan	Mana kaypichu
Omniq Qelqan	Mana kaypichu
Mormonpa Rimayninkuna	Mana kaypichu
Mosiahq Qelqan	2-5, 17, 18
Almaq Qelqan	5, 11, 12, 32, 34, 39-42
Helamanpa Qelqan	13-16
Kinsakaq Nephi	1, 8, 11-30
Tawakaq Nephi	Hunt'asqa
Mormonpa Qelqan	1, 4, 6-9
Etherpa Qelqan	Mana kaypichu
Moroniq Qelqan	Hunt'asqa

NEPHIQ ÑAWPAQKAQ QELQAN

KAMACHIYNIN YACHACHIYNIN IMA

Lehiq, warmin Sariahq, tawa churinkunaq (kurakmanta qallarispa) Lamanpa, Lemuelpa, Sampa, Nephiqpiwan willayninku. Lehi-man Wiraqocha willan Jerusalen Ilaqtamanta Iloqsinanpaq. Millay ruwayninkurayku kay Ilaqtaman Lehi unanchan, hinaspataq payta wañuchiyta munanku. Kinsa p'unchaw purunpi aylluntin purin. Nephi wawqenkunapiwan Jerusalen hallp'aman kutinku, judiokunaq qelqankunarayku. Ñak'ariyninkuq willaynin. Ismaelpa ususinkunawan sawakunku. Ayllunkuta apayukuspanku purunman Iloqsinku. Purunpi muchuyninku ñak'ariyninku im. Purisqanku ñan. Hatun unukunaman chayanku. Nephiq wawqenkuna pay kontra hatarinku. Paykunata upayachin, huk wanputataq ruwan. Chay hallp'ata Waleq nispa sutichanku. Hatun unukunata chinpanku prometisqa hallp'aman. Nephiq willasqanman hinan kay, hukniraq rimaypiqa, noqa Nephin kay willayta qelqarqani.

1 T'AQA

Ninamanta saywata unanchayog qelqatawan Lehi rikun. Jerusalen Ilaqtaq usqhay tukukuyninmanta Hawisqa hamunanmantapas rimasqan. Judiokuna payta wañuchiyta munanku.

1. Noqa Nephi, allin tayta-mamamanta paqarisqa kaspas, taytaysa llapan yachayninpi chikallantapas yachachisqa kargani; kawsayniypa puriyinpi askha muchuykunata rikuspapas, llapan p'unchawniykunan Wiraqochaq yanapasqan kargani; ari, Yayaq sumaq-sonqo kayninmanta pakasqa imankunamantawan ancha hatun yachayniyoq kaspan, p'unchawniykunapi ruwayniykunamanta huk willayta ruwani.
2. Ari, taytaysa rimayninpin qelqani, kaytaq judiokunaq yachayninku egipsiokunaq rimayninkupiwan.
3. Yachanitaqmi ñawpa-kasqanmanta qelqasqay cheqay kas-

1 NEPHI 1

qanta, kikiy makiywantaq kayta qelqani; kaytataq ruwani yachayniyman hina.

4. Hinaspataq Judaq inkan Sedekiaspa kamachiyninpa ñawpaqqaq watanpi, askha unanchaqkuna chay kikin watapi chaya-murqanku, yuyayninkuman kutirimunankupaq runakunaman unanchaspa; mana chayqa, Jerusalen hatun llaqtan thuñikunan nispa. (Taytay Lehitaq llapan p'unchawninkuna Jerusalenpi tiyarqan).

5. Hinaspataq taytay Lehi risqanman hina llaqtanrayku Wiraqochaman tukuy sonqonwan rimarikurqan.

6. Chhaynataq Wiraqochaman rimarikushanankama ñawpaqenpi kaq qaqa patapi nina saywa rikhurimurqan, askhataq uyarisqan rikusqanpas karqan; rikusqanrayku, uyarisqanrayku imataq, anchatapuni manchakurqan khatatatarqan ima.

7. Hinataq Jerusalenpi wasinman kutispa, puñunan pataman wikch'ukurqan, Nunaq, rikusqan imaymanakunaqpiwan atipasqa kaspera.

8. Khaynataq, Nunaq atipasqan kaspera, huk rikuyipi apasqa karqan, hanaqpachataq kichakuqta rikurqan; Yayankuman takispa yupaychaspapiwan kashaqta hina, mana yupay atina kachakunawan muyurisqatataq Yayata tiyananpi tiyashaqta rikusqanpaq yuyarqan.

9. Huknin kaqta hanaqpachamanta urayamuqta rikurqan, kay kachaq k'anchaynintaq chawpi p'unchaw intiq k'anchaynintamanta aswan k'anchayniyoq karqan.

10. Huk chunka ishkaayniyoqtawanmi payta qatikushaqta rikurqan, k'anchayninkutaq atiparqan hanaqpachapi qoyllurkunaqta.

11. Urayamuspataq pachaq patanta rirqanku; ñawpaqqaqtaq hamuspa taytaypa ñawpaqenpi sayaspa huk qelqata payman qorqan, ñawinchananpaq kamachispa.

12. Hinataq qelqata ñawinhashanankama Wiraqochaq Nunanwan hunt'asqa karqan.

13. Ay! Ay, Jerusalenmanta! Rikurqanin millay-millanaykikunata, nispan pay ñawincharqan. Ari, askha imaymanakunatan jerusalenmanta taytay ñawincharqan— runakunantin qolluchisqa kanaanmanta; askha, q'anchinawan wañunankumanta, askhataq Babiloniaman piñaschasqa apasqa kanankumantawan.

14. Hinaspataq, taytay askha ancha sumaq imaymanakunata ñawinchaqtin rikuspan ima, kusikuypi askha imaymanakunata Wiraqochaman khaynata qaparirqan: ancha hatun, ancha sumaqmi ruwayniykikuna, Wiraqocha llapa atiyniyoq Yaya! Hanaqpachaq hanaqninpin tiyanayki; atiyniyki, sumaq-sonqo kayniyki,

1 NEPHI 2

khuyapakuyniykipiwantaq hallp'aq llapa runankuna patapi; khu-yapakuyniyoy kaspaykitaq qanman hamuqkunata mana wañunankuta saqenkichu, nispa.

15. Khaynatan taytay rimarqan Yayanta yupaychaspas, nunantaq anchatapuni kusikurqan. Tukuy sonqontaq hunt'a karqan rikusqan imaymanakunarayku, ari, payman Wiraqocha qhawachisqan imaymanakunarayku.

16. Kunantaq noqa Nephi, mana llapantachu willani taytaya qelqasqankunamanta. Ashkha imaymanakunatan qelqarqan, rikuyipi mosqokuypiwan rikusqanmanta; askha imaymanakunatawantaq qelqarqan churinkunaman unanchasqanta, rimasqantawan, manataq llapantachu kaykunamanta rimasaq.

17. Ichaqa, p'unchawniykunapi ruwayniykunamantan qelqasaq. Hinaqa, taytaya qelqankunatan huch'uyyachini, kikiy makiywan ruwasqay raphikunapi; taytaya qelqankunata huch'uyyachisqay patamantaq kawsayniypa willayninta qelqasaq.

18. Chay hinaqa, yachanaykichistan munani taytay Lehiman chhaytukuy ancha sumaqkunata Jerusalenpa thuñikuyninmanta Wiraqocha rikuchisqan pataman runakuna chawpiman rispa, uyarisqanmanta, rikusqanmanta ima unanchayta willaytawan qallarirqan.

19. Hinaspataq judiokuna paymanta asikurqanku, paykunamanta sut'inchasqan imaymanakunarayku; cheqaqtapunin rimarqan huchallikuyninkunamanta millay-millay kayninkumantawan; sut'incharqantaqmi rikusqan, uyarisqan, qelqapi ñawinchasqanpiwan ch'uyatapuni Hawisqa hamunanmanta willasqanta, kay pachakutichikapusqa kananmantawan.

20. Kaykunata uyarispataq judiokunaqa paywan phiñarikurqanku, ari, ñawpa unanchaqkunata qarqosqankuta, rumikunawan chanqaspa sipisqankuta hinan pay wañuchiyta munarqanku. Ichaqa noqa Nephi, qhawachisaykichis Wiraqochaq sumaq khu-yapakuynin iñiyninkurayku Pay akllasqan runakunawan kasqanta; paykunata kallpachaspa, qespiypaq kallpayoq kanankukamaraq.

2 T'AQA

Ayllunwan Lehi lloqsin Puka Mamaqochaq patanpi kaq purunman. Kurak churinkuna Laman Lemuelpiwan pay kontra rimapakunku. Nephi Sam ima rimayninkunapi kreyinku. Nephiman Wiraqochaq promesankuna.

1. Hinataq taytayman Wiraqocha rimarqan, ari, mosqokuy-ninpin khaynata nirqan: Saminchasqan kanki, Lehi, ruwasqaykikunamanta. Ancha iñiysapa kasqaykimanta, kamachisqaykunata

1 NEPHI 2

kay runakunaman willasqaykimanta imataqmi wañuchiyta munasunkiku, nispa.

2. Chhaynataq, mosqokuyninpi taytayman Wiraqocha kamachirqan, ayllunta apayukuspa purunman lloqsinanpaq.

3. Hinataq Wiraqochaq rimayninman uyakuq kaspera, Wiraqochaq kamachisqanman hina ruwarqan.

4. Hinaspataq purunman lloqsirqan. Wasinta, chashkikuyninpa hallp'anta, qorinta, qolqenta, ancha sumaq imankunatawantaq saqerqan. Manataq imatapaspaywan aparqanchu, ichaqa ayllunta, mikhunakunata, karpakunallatawan; purunmantaq lloqsirqan.

5. Puka Mamaqocha pataq sispallantataq pay hamurqan; Puka Mamaqochaq aswan sispayninpi kaq kantukuna purunpin pay purirqan; aylluntinwantaq chay purun hallp'api purirqan. Paykunataq qarqanku: Mamay Sariah, kurak wawqeykuna Laman, Lemuel, Sam ima.

6. Chhaynataq, kinsa p'unchaw purunpi puriqtin huk qheshwapi karpanta hatarichirqan, huk mayu patapi.

7. Hinataq rumimanta huk usnuta ruwarqan, huk aypaytataq Wiraqochaman munachirqan, Wiraqocha Yayanchistataq añaycharqan.

8. Puka Mamaqochaman haykuq mayutataq Laman nispa suticharqan, chay hatun wayq'otaq qarqan mayoq siminpa kantunpa sispayninpi.

9. Puka Mamaqochaman mayuq unun haykusqanta rikuspataq taytayqa Lamanta nirqan: Ichapas kay mayu hina kawaq, llapa chaninchaypa pukyunmantaq mana samaspa haykuwaq, nispa.

10. Lemuelmanpas rimarillarqantaqmi: Ichapas kay qheshwa hina kawaq, qaqa, allin takyasqa, mana-kuyoq ima Wiraqochaq kamachiyninkuna waqaychaypi! nispa.

11. Khaynatataq rimarqan Laman, Lemuelpiwan k'ullu uma-yoq kasqankurayku. Askha imaymanakunapin taytanku kontra rimapakurqanku: Yanqa imaymanakunata rikukun runan, Jerusalem hallp'amantan lloqsichiwanchis, chashkikuyninchis hallp'ata, qorinchista, qolqenchista, ancha sumaq kapuwasqanchiskunatawan saqespanchis purunpi wañunanchispaq; kaytataq pay ruwarqan sonqonpa waq'a yuyayninkunarayku, nispa.

12. Khaynatataq Laman, Lemuelpiwan, kurakkuna kaspanku, taytanku kontra rimapakurqanku. Kamaqninku Yayaq ruwayninkunata mana reqsispankutaq khaynata rimapakurqanku.

13. Manataqmi kreyirqankuchu, haqay hatun Jerusalem llaqta unanchaqkunaq rimayninkunaman hina thufnikunanta. Jerusalemipi

1 NEPHI 3

taytayta sipiy munaq Judiokuna hinan paykuna karganku.

14. Chhaynataq, taytayqa Nunawan hunt'a kaspá, wapu kallpawan paykunata anyarqan Lemuel qheshwapi, ñawpaqenpitaq khatatatarqanku. Paykunata tutayacheqtintaq, mana pay kontra rimayta qhariykacharqankuchu. Chhaynataq, paypa kamachisqanman hina ruwarqanku.

15. Taytaytaq huk karpapi tiyarqan.

16. Hinataq noqa Nephi, waynallaraq kargani chaypas, hatun runan kargani. Yayaq pakasqa imaymanakunata yachayta munaspataq Wiraqochaman rimarikurqani, Paytaq watukamuwarqan, songoyta llanp'uyacheqtintaq taytaypa llapan rimasqan simikunata kreyirqani; chayraykutaq mana pay kontra ankallikurqanichu, imayna wawqeykuna ruwasqankuta hina.

17. Samtataq rimarirqani, Qollanan Nunanwan Wiraqocha yachachiwasqan imaymanakunata payman willaspa. Hinataq rimayniykunapi kreyirqan.

18. Ichaqa Laman, Lemuelpiwanqa manan rimasqaykunata uyariyta munarqankuchu. Rumi songoyoq kasqankumanta llakikuspataq paykunarayku Wiraqochata waqyakurqani.

19. Hinataq khaynata Wiraqocha rimariwarqan: Saminchasqan kanki, Nephi, iñiykiykirayku; k'uchiy-k'uchin mashkawarqanki k'umuykukusqa songowan.

20. Kamachiyniykunata waqaychankichis chayqa, t'ikarinkichismi, prometisqa hallp'aman pusasqataq kankichis; ari, qankunapaq allichasqay hallp'aman, llapa hallp'akunamanta akllasqa hallp'aman.

21. Wawqeykikuna qan kontra ankallikunqaku chaytaq, Wiraqochaq ñawpaqenmanta t'aqasqa kanqaku.

22. Kamachiyniykunata waqaychanki chaytaq, wawqeykikunaq kamacheqninku yachacheqninkupiwanmi kanki.

23. Noqa kontra ankallikunanku p'unchawpitaq, nanaq ñakaywan paykunata ñakasaq, manataq ch'awchuyki patapi kallpayoqchu kanqaku, ichaqa, noqa kontra ch'awchuykipas ankallikuqtillan.

24. Noqa kontra qhepa wawaykikuna ankallikunqaku chayqa, hasut'in ch'awchuykipaq paykuna kanqaku, allin yuyayman paykunata kutirichimunankupaq.

3 T'AQA

Lehiq churinkuna Jerusalemman kachasqa kanku, bronsemanta raphikunata apamunankupaq. Laban raphikunata mana qoyta munanchu. Laman Lemuelpiwan huk kachaq anyasqan kanku.

1 NEPHI 3

1. Chhaynataq noqa Nephi, Wiraqochawan rimasqaymanta, taytaypa karpanman kutirqani.

2. Hinataq taytay rimariwarqan: Huk mosqokuytan mosqokurqani, chay mosqokuyпитаq Wiraqocha kamachiwarqan, qan wawqeykikunapiwan Jerusalemman kutinaykichispaq.

3. Labanmi judiokunaq qelqanta, ñawpaykikunaq ayllusaphintawan hap'in; chaykunataq bronsemanta ruwasqa raphikunapi qelqasqa kanku.

4. Chayraykutaq Wiraqocha kamachiwarqan, qan, wawqeykikunapiwan Labanpa wasinman rinaykichispaq, chay qelqakunata hap'ispa kay purunman apamunaykichispaq.

5. Kunantaq wawqeykikuna rimapakunku, ancha sasan kamachiasqaykiku, nispa; ichaqa, manan noqachu kayta paykunaman kamachirqani, Wiraqochaq kamachiyninmi.

6. Chhaynaqa riy, churiy, Wiraqochaq yanapasqanmi kanki mana rimapakurqaykirayku, nispa.

7. Hinataq noqa Nephi taytayta nirqani: risaqmi, ruwamusaqtaq Wiraqochaq kamachisqanta. Yachanin runakunaq wawankunaman Wiraqocha mana ima kamachiytapas qosqanta, paykunaman kamachisqanta hunt'anankupaq ñanta mana allichaspaqa, nispa.

8. Kay simikunata uyarispataq, anchatapuni taytay kusikurqan, Wiraqochaq saminchasqan kasqayta yachaspa.

9. Noqa Nephitaq, wawqeykunapiwan, karpaykuta apayukuspa purunpi puriyta qallarirqayku Jerusalem hallp'aman rinaykupaq.

10. Hinaspataq Jerusalem hallp'aman chayaspayku rimanakurqayku.

11. Mayqen kaqniyku Labanpa wasinman haykunaykupaqtaq watuypi choqarqayku. Hinataq Lamanpi watuy chayarqan, Lamantaq Labanpa wasinman rispa, wasinpi tiyashanankama paywan rimarqan.

12. Lamantaq Labanmanta mañakurqan bronse raphikunapi qelqakunata; chay raphikunapitaq karqan taytaypa ayllusaphin.

13. Hinataq, Laban phiñarikuspa ñawpaqenmanta qarqorqan, manataq qelqakunata qoyta munarqanchu. Hinaspataq Laban payta nirqan: suwan kanki, sipisaykin, nispa.

14. Ichaqa, ñawpaqenmanta Laman ayqekurqan, noqaykumantaq willawarqanku Labanpa ruwasqan imaymanakunata. Anchatapunitaq llakikurqayku, wawqeykunataq purunpi taytayman kutipunankupaq hinaña kasharqanku.

15. Ichaqa, khaynata paykunata nirqani: Imanan Wiraqocha

1 NEPHI 3

kawsan noqanchispas kawsanchis chhaynan, mana purunpi taytanchisman kutisunchu, Wiraqochaq kamachiwasqanchiskunata hunt'ananchiskama.

16. Chhaynaqa, hakuyá iñiysapa kasun Wiraqochaq kamachiyninkuna waqaychaypi. Haku taytanchispa chashkikuyninpa hallp'anman, chaypitaq qorita, qolqeta, imaymana qhapaqyaykunatawan saqerqan chayqa. Kay llapantataq ruwarqan Wiraqochaq kamachiyninkunarayku.

17. Yacharqantaqmi runakunaq millay-ruwayninkurayku Jerusalem thuñisqa kananta.

18. Unanchaqkunaq rimasqankunataq mana munasqakuchu karqan; chhaynaqa, chay hallp'api taytay tiyanman, chay hallp'amanta lloqsinanpaq kamachisqa kasqan pataman chayqa, paypas wañunmanmi. Chayraykun chay hallp'amanta lloqsinan karqan.

19. Yachaysapa kaymi Yayapi kan kay qelqakunata hap'inanchispaq, taytanchiskunaq rimayninta wawanchiskunapaq qhepachinanchispaq;

20. Llapa qollanan unanchaqkunaq siminkuq rimasqan rimayninkunata; kay pachaq qallariyninmanta kunan p'unchwakama, Yayaq atiyinwan Nunanpiwan paykunaman qosqan rimaykunata ima paykunapaq qhepachinanchispaq.

21. Khaynata rimaspataq wawqeykunata uynichirqani, Yayaq kamachisqankuna waqaychaypi iñiysapa kanankupaq.

22. Chhaynataq, chashkikuyniyku hallp'aman rirqayku, qoriykuta, qolqeykuta, ancha sumaq imaymanaykutawantaq huñuka-purqayku.

23. Kaykunata huñuqtiykutaq, yapamanta Labanpa wasinman rirqayku.

24. Labanpa kasqanman haykuqtiykutaq, bronse raphikunapi qelqakunata qowanankupaq mañakurqayku, chay rantitataq qoriykuta, qolqeykuta, ancha sumaq imaymanaykutawan payman munachirqayku.

25. Kapuwaqniykuta rikuspa, ancha askha kasqantawan rikuspa imataq, Labanqa chaykunata munapakurqan; chayraykutaq qarqowarqanku. Kapuwaqniykuta hap'ikunanpaqtaq sipiwanankupaq warmankunata kamachirqan.

26. Hinataq Labanpa warmankunaq ñawpaqenkuta ayqekuspayku, kapuwaqniykuta saqenayku karqan, chayraykutaq Labanpa makinman qhapaq kayniykuta chayarqan.

27. Purunman ayqekuqtiykutaq Labanpa warmankuna mana aypawarqankuchu; huk mach'aypitaq pakakurqayku.

28. Lamantaq noqawan taytaypiwan phiñarikurqan, chhayna-

1 NEPHI 4

llatataq Lemuelpas phiñarikurqan, Lamanpa rimayninkunawan apachikusqanrayku. Hinataq Laman Lemuelpiwan k'ireq rimaykunawan rimawarqanku sullk'a wawqenkunaman, huk k'aspiwantaq noqaykuta p'anawarqanku.

29. K'aspiwan p'anawashaqtinkutaq, Wiraqochaq kachan ñawpaqeykupi rikhurimurqan, khaynatataq paykunata nirqan: Imanaqtinmi sullk'a wawqeykichista k'aspiwan p'anankichis? Manachu yachankichis qankunaq kamacheqniykichispaq payta Wiraqocha akllasqanta, kaytaq millay-ruwayniykichiskunarayku? Yapamantan Jerusalemman rinkichis, Wiraqochataq makiykichispi Labanta churanqa, nispa.

30. Rimariwasqanku patamantaq kachaqa ripurqan.

31. Kachaq ripusqan patamantaq, Laman Lemuelpiwan yapamanta rimapakuyta qallarirqanku: Imaynatataq Wiraqochari Labanta makinchisman churanman? Labanqa kallpasapa runan, pishqa chunka runakunataq kamachiyta atinman; ari, pishqa chunka runakunatan sipiyta atinman, chayri imanaqtintaq mana noqanchistari? nispa.

4 T'AQA

Nephi raphikunata hap'inku. Laban kikin q'anchinanwan sipisqa. Zoram, Nephiwan wawqenkunawan ima purunman rin.

1. Hinaspataq wawqeykunata nirqani: Hakuchis yapamanta Jerusalemman, iñiysapaqtaq Wiraqochaq kamachiyninkuna wawaychaypi kasun. Llapan pachamanta aswan atiyniyoqmi Pay, chhaynari imanaqtintaq mana Labanmanta, pisqa chunkanmanta ima aswan kallpasapari, ari, utaq chunka waranqankunamanta aswan imari?

2. Chhaynaqa hakuchis, Moises hina kallpasapa kasunchis. Cheqaqtapunin Puka Mamaqochaq ununkunata rimarqan, kayman haqaymantaq t'aqakurqanku, taytanchiskunataq chayninta ch'aki panpanta chinpamurqanku, hark'asqa kasqankumanta. Faronpa awqasuyunkunataq qatikurqanku, Puka Mamaqochaq ununkunapitaq wañurqanku.

3. Hinaqa, yachankichismi cheqaq kay kasqanta, yachankichistaqmi huk angel rimasqasuykichista, chhaynari ishkayata atiwaqchischu? Hakuchis, taytanchikunata hina noqanchis qespi-chiytaqa atinmi Wiraqocha; Laban sipiytataq egipsiokunata hina, nispa.

4. Kay rimaykunata rimaqtiyqa phiñasqaraqmi kasharqanku, rimapakullasharqankutaqmi; chaypiwanpas qatikuwarqankun Je-

1 NEPHI 4

rusalenpa perqankunaq hawanman chayamunaykukama.

5. Tutañataq karqan, perqa qhepapitaq paykunata pakachir-qani; pakakusqanku patamantaq, noqa Nephi, Ilaqta ukhuman haykuspa, Labanpa wasinneqman rirqani.

6. Nunaq pusasqantaq karqani, ñawpaqtaraq imaymanakuna ruwanayta mana yachaspa.

7. Chaypiwanpas rillarqanin, Labanpa wasinman achhuyoqtiytaq huk runata rikurqani, vinowan machasqa kaspataq, ñawpaqeypi panpaman urmasqa karqan.

8. Payman achhuyoqtiytaq, Laban kasqanta rikurqani.

9. Q'anchinanta rikuspataq, waqaychananmanta horqorqani. Q'anchinaq hap'inantaq qorimanta ancha sumaq ruwasqa kasqa, kikin q'anchinataq aswan allin asiromanta kasqa.

10. Hinaspataq Nuna niwarqan Labanta sipinaypaq, ichaqa sonqoypi nikurqani: Manan hayk'aqpas runaq yawarninta sut'uchirqanichu, nispa; ayqerikuspaytaq mana payta sipita munarqanichu.

11. Yapamantataq Nuna niwarqan: Wiraqochan makiykipi payta haywasunki, nispa. Ari, yacharqanitaqmi sipiway munasqanta; manataqmi Wiraqochaq kamachiyninkunata uyariyta munarqanichu, kapuwaqniykunatawantaq hap'ikurqan.

12. Hinataq, Nuna yapamanta niwarqan: Sipiway, Wiraqochan makiykipi payta haywasunki.

13. Huchasapakunataqa sipinmi Wiraqocha, chanin munayninkuna ruwasqa kananpaq. Aswan allinmi huk runa wañunan, huk Ilaqta millayaspa mana ima kreyiypi wañunankumantaqa, nispa.

14. Hinaspataq noqa Nephi, kay rimaykunata uyarispa, purunpi Wiraqocha rimariwasqan simikunata yuyarirqani: Kamachiyniykunata ch'awchuyki waqaychanqa chayqa, t'ikarinqakun akllasqa hallp'api, nispa neqta.

15. Ari, yuyayukullarqanitaqmi Wiraqochaq kamachiyninkunata Moisespa kamachisqa-siminman hina paykuna mana waqaychayta atinankuta, mana chay kamachisqa-simiyuq kaspankuqa.

16. Yacharqanitaqmi chay kamachiykuna bronse raphikunapi qelqasqa kasqanta.

17. Yacharqanitaqmi, kayrayku Labanta makiypi Wiraqocha churasqanta, kamachiyninman hina qelqakunata hap'inaypaq.

18. Chhaynaqa, kasurqanin Nunaq arunta, Labantataq chukchanmanta hap'ispa, kikin q'anchinanwan umanta wit'urqani.

19. Kikin q'anchinanwan umanta wit'usqay patamantaq, Labanpa p'achankunata hap'ispa chaykunawan p'achakurqani, Ila-

panta churakuspa; maqanankunataq churakurqani.

20. Kayta ruwasqay patamantaq Labanpa qhapaqyaykuna-waqaychanaanman rirqani. Labanpa qhapaqyaykuna-waqaychanaan-neqman rispaytaq, qhapaqyaykuna-waqaychanaq llavin hap'iq Labanpa warmanta rikurqani. Labanpa kunkanpi hinataq payta kamachirqani noqawan qhapaqyaykuna-waqaychana kasqanman rinanpaq.

21. Patrunnin Laban kanaypaqtaq pay yuyayukurqan, p'a-chankunawan q'anchinanpiwan churaykusqa kasqayta rikuspa.

22. Judiokunaq kurakninkunamantataq rimariwarqan, patronnin Laban paykunawan chay tuta kasqanta yachaspa.

23. Noqataq paywan rimarirqani Labanpas kayman hina.

24. Paytataq nirqani, bronse raphikunapi qelqakunata, perqa qhepapi kaq kurak wawqeykunaman apanaypaq.

25. Qatikuwananpaq ima payta kamachirqani.

26. Paytaq, iñeqkuna-huñuq wawqenkunamanta rimasqaypaq, cheqaqtapuni wañuchisqay Laban kasqaypaqwan yuyayukuspa qatikuwarqan.

27. Ashkha kutitataq rimapayawarqan judiokunaq kurakninkunamanta, perqa hawapi kaq wawqeykunaman rishanaykama.

28. Chhaynataq, rikuwaspa Lamanqa anchatapuni mancharikurqan, Lemuelpas, Sampas. Paykunataq ñawpaqeymanta ayqekurqanku; Laban kasqaypaq yuyayukuspankutaq sipiwasqan pataman paykunatapas sipiq hamusqanpaq yuyayukurqanku.

29. Hinamantaq paykunata waqyarqani, uyariwaspankutaq ñawpaqeymanta ayqekuyta tatirqanku.

30. Labanpa warmantaq wawqeykunata rikuspa khatatatayta qallarirqan, ñawpaqeymanta ayqekuspataq Jerusalem Ilaqtaman kutikapunanpaq hinaña kasharqan.

31. Kunantaq noqa Nephi, hatun runa kaspas, Wiraqochamanta ancha kallpatawan chashkispay, Labanpa warmanta hap'irqani, mana ayqenanpaqtaq hark'arqani.

32. Hinaspataq paywan rimarqani, rimayniykunata uyarinman chayqa, Wiraqochaq kawsasqanman hina, noqa kawsasqayman hinapiwan, chay hinallatataqmi rimayniykuta uyarinman chayqa, manan payta wañuchiymanchu.

33. Sullullchaywantaq payta rimarirqani mana manchakunanpaq, noqaykuwan purunman rinman chayqa, noqayku hina qespi runa kananpaq.

34. Khaynatawantaq payta nirqani: Cheqaqtapunin Wiraqochaq kamachiwarqanku kayta ruwanaykupaq. Manachu Wiraqochaq kamachiyninkuna waqaychaypi k'uchiy-k'uchi kaswan?

Chhaynaqa, purunpi taytayman rinki chayqa, kanqan qanpaq noqaykuwan maypi kanaykipaq, nispa.

35. Rimasqay simikunawantaq Zoramqa kallpacharikurqan. Zorammi chay warmaq sutin karqan, prometirqantaq purunpi taytaypa kasqanman rinanpaq. Chay p'unchawmantapacha noqaykuwan kananpaqtaq noqaykuwan sullullchakurqan.

36. Purunman ayqekusqaykuta judiokuna mana yachanankupaqtaqmi noqaykuwan Zoram kananta munarqayku, judiokuna qatiwaspanku mana sipiwanankupaq.

37. Noqaykuman Zoram sullullchakuqtintaq, paymanta manchakuyniyku qollurqan.

38. Hinataq, bronse raphikunata, Labanpa warmantawan apayukuspa purunman lloqsirqayku, taytaypa karpanman rispa.

5 T'AQA

Sariah rimapakun Lehi kontra. Ishkayninku kusikunku wawankuna kutimusqankumanta. Bronse raphikunapi ima kasqan. Lehi Joseq ch'awchun; Labanpas chay ch'awchumanta. Lehiq unanchayninkuna.

1. Hinataq, purunpi taytayku kasqanman hamusqayku pataman, anchatapuni pay kusikurqan, mamay Sariahpas anchatapuni kusikurqan. Paytaq cheqaqtapuni noqaykumanta llakikusqa karqan.

2. Purunpi wañusqaykupaqmi yuyayukusqa karqan; taytay kontrataq pay rimapakusqa karqan: Rikupakuq runan kanki, chashkikuyninchispa hallp'anmantan horqowarqankiku, manañataq wawaykuna kankuñachu, purunpitaq noqanchispas wañusun, nispa.

3. Khayna rimaywantaq taytay kontra mamay rimapakusqa karqan.

4. Hinataq, khaynata payta taytaq nirqan: Yachanin rikupakuq runa kasqayta, rikuyipi Yayaq imaymanankunata mana rikuymanchu karqan chayqa, manan Yayaq sumaq kayninta reqsiymanchu karqan, ichaqa Jerusalem pin qhepayman karqan, wawqeykunawantaq chaypi wañuyman karqan.

5. Ichaqa akllasqa hallp'atan chashkini, chay imaymanakunapitaq kusikuni; ari, yachanitaqmi Labanpa makinkunamanta churiykunata Wiraqocha qespichinanta, yapamantataq noqanchisman paykunata purunman apamunqa, nispa.

6. Khayna rimaywantaq taytay Lehi mamay Sariahta noqaykumanta sonqocharqan, judiokunaq qelqanta apamunaykupaq purunpi purispa Jerusalem hallp'aman rinaykukama.

7. Taytaya karpanman kutimuqtiykutaq kusikuyninku hunt'asqa karqan, mamaytaq songochasqa karqan.

8. Khaynatataq mamay rimarqan: Cheqaqtapunin kunanqa yachani, qosayta purunman ayqekamunanpaq Wiraqocha kamachisqanta; ari, cheqaqtapunitaqmi yachani, wawaykunata Wiraqocha amachasqanta, Labanpa makinkunamanta qespichimusqanta, kallpatataq paykunaman qorqan paykunaman Wiraqocha kamachisqanta hunt'anankupaq. Khayna rimaywanmi pay rimarqan.

9. Hinataq anchatapuni paykuna kusikurqanku, arpayta rufhasqa munachikuykunata imataq Wiraqochaman munachirqanku, anchatataq añaycharqanku Israelpa Yayanta.

10. Israelpa Yayanta añaychakusqanku patamantaq, taytay Lehi bronse raphikunapi qelqakunata hap'ispa, qallariyninmantapacha ñawincharqan.

11. Moisespa pishqantin qelqankuna chaypi kasqanta rikurqan, chaykunataq kay pachaq imayna kamasqa kasqanmanta willarqan, ñawpaqkaq tayta-mamanchis Adanmanta Evamantapas;

12. Judiokunaq willayninkupas qallariyninmantapacha, Judaq inkan Sedekiaspa kamachiyninpa qallariyninkama.

13. Qollanan unanchaqkunaq unanchayninkunapas qallariyninmantapacha, Sedekiaspa kamachiyninpa qallariyninkama; askhallataq Jeremiaspa rimasqan unanchayninkunamantapas.

14. Chhaynataq taytay Lehi, bronse raphikunapi taytankunaq ayllusaphinta tarirqan; chayraykun pay yacharqan Joseq ch'awchun kasqanta; ari, chay Jakobpa churin Jose, Egiptopi rantisqa kaq; taytan Jakobta tukuy wasintawan yarqaymanta horqomunanpaqtaq Wiraqochaq makinpa waqaychasqan pay karqan.

15. Hark'asqa kasqankumanta, Egipto hallp'amantapas paykuna waqaychaq kikin Yayaq horqomusqanmi karqanku.

16. Chay hinatataqmi taytay Lehi, taytankunaq ayllusaphinta tarirqan. Labanpas Joseq ch'awchunmi kasqa, chayraykutaqmi pay taytankunapiwan qelqakunata waqaychasqaku karqan.

17. Kay imaymanakunata rikuspataq, Nunawan hunt'a kasper, ch'awchunmanta unanchayta taytay qallarirqan—

18. Kay bronse raphikuna ch'awchunmanta kaq llapa llaqtakunaman, ayllukunaman, simikunaman, runakunamanwan rinanta.

19. Hinaspataq pay nirqan, kay bronse raphikuna manan hayk'aqpas chinkanamanta, manataq watakunapas qhellichanamanta ima. Ashkha imaymanakunatatataq ch'awchunmanta unancharqan.

1 NEPHI 6

20. Chaykaman noqa taytaypiwan, Wiraqochaq kamachiwasqanku kamachiykunata waqaycharqayku.

21. Wiraqochaq kamachiwasqanku qelqakunataq hap'ikurqayku; ñawinchaspaykutaq ancha sumaq kasqanta tarirqayku. Ari, noqaykupaq ancha chaninniyoc, hinaspataq Wiraqochaq kamachiyninkunata wawaykupaq waqaychayta atiykuman.

22. Chhaynaqa, yachaysapa kaymi Wiraqochapi karqan kaykunata noqaykuwan apanaykupaq, prometisqa hallp'aneqman purunpi purinaykukama.

6 T'AQA

Nephiq ruway munasqan. Yayapaq sumaq kasqanta qelqan.

1. Kunantaq noqa Nephi, mana taytaykunaq ayllusaphinkuta gonichu qelqasqaypa kayninpi, manataqmi hayk'aqpas qosaqchu kay qelqashasqay raphikunapiqa, taytaya waqaychasqan qelqakunapi qelqasqa kaqtin; chayraykun mana kaypi qelqanichu.

2. Allinñan Joseq ch'awchunmanta kasqayku nisqay.

3. Manataqmi ancha chaninniyocchu noqapaq, taytaya llaipan imaymanankunamanta qelqay; manataqmi kay raphikunapi qelqakunmanchu, Yayaq imaymanankunamanta maypi qelqanaypaq ch'usaq kananpaq.

4. Llaipan munayniyqa, Abrahampa, Isaakpa, Jakobpa ima Yayankuman hamuspa qespichisqa kanankupaq runakunata inkitaymi.

5. Chhaynaqa, runakunapaq sumaq imaymanakunataqa mana qelqanichu; ichaqa Yayapaq, mana kay pachamanta kaqkunapaqwan sumaq kasqantan qelqani.

6. Hinaqa, ch'awchuymänmi huk kamachiyta qosaq, kay raphikunapi runaq wawankunapaq mana chaninniyoc imaymanakunata mana qelqanankupaq.

7 T'AQA

Lehiq churinkuna yapamanta Jerusalemman kachasqa kanku. Ismael, ayllunpiwan Lehiq ayllunwan huñunakunankupaq ari ninku. T'aqanakuy. Nephi, waskhakunawan watasqa, iñiypa atiyinwantaq kacharisqa. Ankallikuq wawqenkuna yuyayninkuman kutirinku.

1. Kunantaq qankuna yachanaykichista munayman, taytay Lehi ch'awchunamanta unanchayta tukuqtin, yapamanta payman Wiraqocha khaynata nisqanta: Manan allinchi qan, Lehi, sapan ayllullaykita purunman apasqayki, ichaqa churiykikunaqa

1 NEPHI 6

sipaskunatan warminkupaq hap'inanku, prometisqa hallp'api ch'awchuta Wiraqochapaq hatarichinankupaq, nispa.

2. Hinataq, payta Wiraqocha kamachirqan, noqa Nephi, wawqeykunapiwan yapamanta Jerusalem hallp'aman kutinaykupaq, Ismaelta aylluntawan purunman apamunaykupaq.

3. Chhaynataq, noqa Nephi, wawqeykunapiwan yapamanta purunpi purirqayku Jerusalemman rinaykupaq.

4. Ismaelpa wasinmantaq rirqayku, paytaq sumaq sonqoyoq chashkiwarqanku, chayraykutaq Wiraqochaq rimayninkunata payman willarqayku.

5. Wiraqochataq Ismaelpa sonqonta ayllunpatawan llanp'uyachirqan, noqaykuwantaq purunman hamurqanku taytaykuq karpaman.

6. Purunpi purishanaykukamataq, Laman, Lemuel, Ismaelpa ususinkunamanta ishkay, Ismaelpa ishkaynin churinkuna ayllun-kunapiwan noqayku kontra ankallikurqanku; ari, noqa Nephi, Sam, taytanku Ismael warminpiwan, wakin kinsa ususinkuna kontrapiwan ankallikurqanku.

7. Hinataq chay ankallikuypi, Jerusalem hallp'aman kutiripuyta munarqanku.

8. Kunantaq noqa Nephi, rumi sonqo kasqankurayku llakikuspay, paykunata (Lamanta Lemueltawan) nirqani: Kurak wawqeykunan kankichis, hinari imaynataq rumi sonqoyoq, ñawsa yuyayniyoq imari kankichis, noqa sullk'a wawqeykichis qankunaman rimanaypaq nesitaspaykichis; ari, qankunaman allin ñanta qhawachinaypaq?

9. Imaynataq mana Wiraqochaq rimayninta uyarirqankichischu?

10. Imaynatan qonqarqankichis Wiraqochaq huk kachanta rikusqaykichistari?

11. Ari, imaynatataq qonqarqankichis noqanchispaq hatun imaymanakunata Wiraqochaq ruwasqanta, Labanpa makinmanta qespichiwasqanchista, qelqakunata tarinanchispaq ruwasqantawanri?

12. Ari, imaynatataq qonqarqankichis kay llapan imaymanakunata, runakunaq wawankunapaq munayninman hina Wiraqochaq ruway atisqanta, Paypi iñiyoyq kankuman chayri? Chhaynaqa hakuyá iñiyosapa kasun.

13. Paypi iñiyosapa kasun chayqa, prometisqa hallp'atan chashkisun; hamuq pachapitaq yachankichis Jerusalem thuñisqa kananmanta Wiraqochaq rimaynin hunt'akusqanta. Jerusalem thu-

ñikunanmanta Wiraqochaq llapan rimasqan imaymanakunaqa hunt'akunanmi.

14. Wiraqochaq Nunanqa usqhayllan paykunawan churana-kuyta qollunqa. Alqocharqankun unanchaqqunata, watana wasi-mantaq Jeremiasta churarqanku; taytaypa kawsayninta qechuyta munarqanku, hinaspataq chay hallp'amanta payta qarqorqanku.

15. Kunantaq qankunata nisaykichis, Jerusalemman kutinkichis chayqa, paykunawanmi wañunkichis. Munaspaykichisqa chay hallp'aman riychis, yuyariychistaq rimasqay simikunata; rinkichis chayqa, qankunapas wañunkichismi. Khayna rimanaypaqmi Wi-raqochaq Nunan niwan, nispa.

16. Hinataq noqa Nephi, kay simikunata wawqeykunaman ri-mareqtiy, noqawan phiñarikurqanku. Hinaspataq nishu phiñaris-qa kaspanku hap'iwaraqanku, washkhakunawan watawaspankutaq wañuchiwayta munarqanku, purunpi salqa uywakunaq mikhus-qan kanaypaq saqewanankupaq.

17. Ichaqa Wiraqochaman khaynata rimarikurqani: Wiraqo-cha, qanpi iñiyini kasqanman hina, wawqeykunaq makinkuna-manta qespichiykuway, ari, kallpata qoykuway kay chaqnakunata t'ipinaypaq, nispa.

18. Kayta rimareqtiytaq, makiymanta chakiymantawan was-khakuna pashkarikurqan, wawqeykunaq ñawpaqenkupi sayaris-pataq yapamanta paykunata rimarirqani.

19. Chhaynataq yapamanta noqawan phiñarikuspanku hap'i-wayta munarqanku; ichaqa, Ismaelpa huknin kaq ususin, ma-manpas, Ismaelpa hukninkaq churinpas, wawqeykunata nishuta-puni mañakurqanku, hinataq wawqeykunaq sonqonku llanp'u-yarqan; sipiway atipakuytataq qollurqanku.

20. Hinataq, millay ruwayninkumanta anchatapuni llakikur-qanku, ñawpaqeypi k'umurikuspankutaq, noqa kontra ruwasqan-kumanta panpachanaypaq nishutapuni mañakuwarqanku.

21. Hinaspataq allin sonqowan paykunata llapa ruwawasqan-kumanta panpacharqani, Wiraqocha Yayankuman panpachayray-ku rimarikunankupaqtaq paykunata anyarqani. Khaynatataq pay-kuna ruwarqanku. Wiraqochaman rimarikuyta tukusqanku qhe-pamantaq, yapamanta taytaykuq karpanneqman purirqayku.

22. Hinataq taytaykuq karpanman hamurqayku. Noqa, waw-qeykuna, Ismaelpa ayllunpiwan, taytaypa karpanman chayamus-qayku patamantaq, anchatapuni añaychakurqanku Wiraqocha Yayankuman, arpayta, ruphasqa munachiytawantaq Wiraqocha-man munachirqanku.

16 T'AQA

Lehiq churinkuna Ismaelpa ususinkunawan sawakunku. Puriyninku qatillan. Sinku, utaq qhawacheqta chashkikun. Ismaelpa wañuynin.

1. Hinaspataq noqa Nephi, wawqeykunaman rimayta tukusqay pataman, paykuna niwarqanku: Ancha k'ireq rimaykunatan niwarqankiku, apay atinaykumanta aswan k'ireqta, nispa.

2. Noqataq kutichirqani—yachanin cheqaqman hina huchallikuqkuna kontra k'ireq imaymanakunata rimasqayta; chaninkunataq chanincharqani, qhepa p'unchawpi hoqarisqa kanankuta sut'inchaspa; chhaynaqa, huchallikuqkunaqa k'ireq kananpaqmi cheqaq kaqta tarinku, chawpinkukama paykunata k'ireqtin.

3. Kunantaq wawqeykuna, chanin kawaqchis, cheqaq kaqta uyariyta munawaqchis, chaytataq kasuwaqchis Yayaq ñawpaqenpi ch'uya purinaykichispaq chayqa, manan rimapakuwaqchischu cheqaq kaqrayku—k'ireqtan noqayku kontra rimanki, nispa.

4. Hinataq noqa Nephi, wawqeykunata anyarqani llapa k'uchi kaywan, Wiraqochaq kamachisqankunata waqaychanankupaq.

5. Hinataq Wiraqochaq ñawpaqenpi ullpuykukurqanku; chayraykutaq chaninchaypa ñanninkunapi purinankumanta ancha hatun kusikuyniyuq, hatun suyakuyniyuq ima paykunarayku karqani.

6. Kay imaymanakunataq nikurqan ruwarkurqan ima, Lemuel nispa sutiyaqan qheshwapi kaq karpapi taytay tiyashanankama.

7. Hinataq noqa Nephi, Ismaelpa hukninkaq ususinta warmiypaq akllarqani, wawqeykunapas Ismaelpa ususinkunamanta warminkupaq akllarqanku; Zorampas Ismaelpa kurakkaq ususinta warminpaq akllarqan.

8. Khaynatataq taytay, payman Wiraqochaq qosqan llapa kamachiykunata hunt'arqan; noqa Nephipas Wiraqochaq ancha saminchasqanmi karqani.

9. Hinataq Wiraqochaq arun tutapi taytayta rimarirqan, tutamantanpi purunpi puriyta qallarinanpaq kamachispa.

10. Taytaytaq tutamantanpi hatarisqanman hina, karpaq punkunman rispa utirayayninpaq panpapi huk muyu sinkuta rikurqan, bronsemanta ancha sumaq ruwasqata. Sinkuq ukhunpitaq ishkaq t'oqpinakuna karqan, hukninkaqtaq purunpi may rinaykuta qhawachirqan.

11. Hinataq purunman apanayku imaymanakunata huñurqayku, Wiraqochaq qowasqanku imaymanakunaq puchunkunatawan; imaymana muhukunataq huñurqayku, purunman apanaykupaq.

12. Karpaykuta apayukuspataq purunman rirqayku Laman mayuta chinpaspa.

13. Hinataq tawa p'unchaw purirqayku intiq lloqsimunan kin-ray qheparinaneqman rispayku, yapamantataq karpaykuta sayachirqayku, Shaser nispatay chay hallp'ata suticharqayku.

14. Hinaspataq, peqtaykuta wach'iykutawan apayukuspataq, purunman lloqsirqayku mikhuyta aylluykupaq sipimunaykupaq. Aylluykupaq mikhuyta sipimusqayku patamantataq, purunpikaq Shazerpi aylluykuman kutirqayku. Yapamantataq purunpi purirqayku kikin risqayku ñanta qatipayku, Puka Mamaqochaq qayllanpi kaq aswan allinnin hallp'anta purispa.

15. Ashkha p'unchawkunataq purirqayku, peqtaykuwan wach'iykupiwan, rumiykuwan wark'aykupiwan purisqaykupi mikhunaykupaq sipispayku.

16. Sinkuq qhawachiwaspankutan purirqayku, kay sinkutay purunpa aswan allinnin hallp'anta pusawarqanku.

17. Ashkha p'unchaw purisqayku patamantataq, karpaykuta sayachirqayku huk pachallaqa samanaykupaq, aylluykupaq mikhunata tarinaykupaqwan.

18. Hinataq noqa Nephi uywakuna sipiq rispay, allin asiro-manta ruwasq; peqtayta p'akirqani; peqtay p'akisqay patamantataq, noqawan wawqeykuna phiñarikurqanku peqtay p'akisqa kasqanrayku; manan mikhunata tarirqaykuchu.

19. Hinataq mana mikhunayoq aylluykuman kutirqayku. Purisqankurayku ancha sayk'usqa kaspankutay, anchatapuni ñak'arirqanku mana mikhuna kaqtin.

20. Hinataq Laman, Lemuel, Ismaelpa churinkunapiwan an-chata rimapakuyta qallarirqanku, purunpi muchuyninku, ñak'ariyninkuraykupiwan. Taytaypas Wiraqocha Yayan kontra rimapakuyta qallarirqan; ari, anchatapuni ñak'areqtinkutay llapanku Wiraqocha kontra rimapakurqanku.

21. Hinaspataq noqa Nephi wawqeykunawan llakikurqani peqtay p'akikusqanrayku; paykunaq peqtankuq chutarikuynin chinkaqtintay, ancha sasapuni kayta qallarirqan, ari, chayraykutay mana mikhunata tariyta atirqaykuchu.

22. Hinataq noqa Nephi, askhata wawqeykunaman rimarirqani, yapamanta sonqonkuta rumiyachispanku Wiraqocha Yayanku kontra rimapakusqankurayku.

23. Noqa Nephitay, k'aspimanta peqtata ruwarqani, huk siwk k'aspimantataq wach'ita; chhaynatay peqta-wach'ita, wark'akunata rumikunatawan apayukurqani. Taytaytatay nirqani: Maymanmi mikhuna tarimunaypaq risaq? nispa.

24. Hinataq Wiraqochata taytay tapurqan. Rimasqaykunaraykun ullpuykukusqaku karqan; askha imaymanakunata paykunaman nunaypa llapan atiyinwan rimasqayrayku.

25. Wiraqochaq aruntaq taytayman hamurqan, Wiraqocha kontra rimapakusqanraykutaq cheqaqpuni anyasqa karqan, chayraykutaq ancha llakikuymán apamusqa karqan.

26. Hinataq Wiraqochaq arun payta nirqan: Sinkuta qhawariy, ñawinchaytaq chaypi qelqasqa kasqanta, nispa.

27. Sinkupi qelqasqa kasqanta rikuspataq taytayqa anchatapuni manchakurqan khatatarqantaq, hinallatataq wawqeykunapas, Ismaelpa churinkunapas, warmiykupas.

28. Hinataq noqa Nephi, sinkupi kaq t'oqpinakuna iñiyman hina, k'uchiy-k'uchi kasqaykuman hina, chaykunaman kasukuq kasqaykuman hinallamanwan kuyusqanta rikurqani.

29. Kallarqantaq huk ch'uya ñawinchana mosoq qelqa, kaytaq hamut'achiwarqanku Wiraqochaq ñanninkunamanta; chay qelqataq mayninmanta mayninman qelqasqa t'ikrasqapiwan karqan, chaypi iñiykuman k'uchiy-k'uchi kayniykumanwan hina. Khaynaqa, rikunchismi huch'uy imaymanakunawan hatun imaymanakunata Wiraqocha ruwayta atisqanta.

30. Hinataq noqa Nephi, orqo pataman rirqani, sinkupi qhawachisqa kasqanman hina.

31. Noqataq salqa uywakunata sipirqani, hinaspataq aylluykupaq mikhunata tarimurqani.

32. Karpaykumantaq kutirqani sipisqay uywakunata apayukuspay; kunantaq, mikhuyta tarisqayta rikuspanku, ancha hatunpuni kusikuyninku karqan. Hinataq Wiraqochaq ñawpaqenpi ullpuykukurqanku, Payta añaychakuspanku.

33. Hinataq yapamanta purirqayku, qallariypi hina yaqa kikin ñanneqta purispayku. Ashkha p'unchaw purisqayku patamantaq yapamanta karpaykuta hatarichirqayku, chaypi huk pachallaqa qhepakunaykupaq.

34. Ismaeltaq wañurqan, Nahom waqyasqa hallp'apitaq p'apasqa karqan.

35. Hinataq Ismaelpa ususinkuna anchatapuni waqarqanku, taytanku wañusqanrayku, purunpi ñak'arisqankurayku ima; taytay kontrataq rimapakurqanku, Jerusalem hallp'amanta paykunata pusamusqanmanta: Wañusqan taytayku, ari, askhatataq purunpi puripakurqayku, anchatataq ñak'arirqayku, yarqaymanta, ch'akiymanta, sayk'uymantawan; kay llapan ñak'ariykuna patamantaq yarqaymanta purunpi wañusun, nispa.

36. Hinataq taytay kontra, noqa kontrapiwan rimapakurqan-

ku, yapamanta Jerusalemman kutiripuyta munaspanku.

37. Lamantaq, Lemuelta, Ismaelpa churinkunatawan nirqan: Haku, taytanchista, kurak wawqenkunata kamachinanpaq yachachinanpaqwan churakuq wawqenchis Nephitawan wañuchisun;

38. Wiraqochan noqawan rimarqan, angelkunapas serviwarqankun, nispan nin. Ichaqa yachanchismi llullakuwasqanchista, kay imaymanakunataq niwanchis, askha imaymanakunataq ruwan yachaysapa kayninwan, ñawinchispi q'otowananchispaq, hukniraq purunman apawananchispaq yuyayukuspa. Pusawasqanchis patamantaq payqa yuyayukurqan, noqanchis patapi inkanchis, kamacheqninchispiwan kananpaq, munayninman hina noqanchiswan ruwananpaq, nispa. Khaynatataq wawqey Laman sonqonkupi phiñarikuyta hatarichirqan.

39. Hinataq, Wiraqocha noqaykuwan karqan, ari, Wiraqochaq arunpuni hamurqan, askha simikunataq paykunaman nirqan, anchatapunitaq paykunata anyakurqan. Wiraqochaq arunpa anyasqan kaspankutaq, phiñakuyninku thañirirqan, huchankumantataq kutirimurqanku; chayraykutaq, yapamanta mikhuywan Wiraqocha saminchawarqanku, mana wañunaykupaq.

17 T'AQA

Irreantum utaq askha unukuna. Nephiman Wiraqocha kamachin huk wanputa ruwananpaq. Wawqenkuna pay kontra kanku, tutayachisqataq karqanku.

1. Hinataq, yapamanta purunpi puriyta qallarispayku, chay pachamanta ñawpaqman intiq lloqsimunanneqman hina purirqayku. Purirqaykutaq, askha ñak'ariykunataq purunpi atiparqayku, warmiykutaq purunpi wachakurqanku.

2. Wiraqochaq saminchayninkuna noqaykupaq ancha hatun kaqtintaq, purunpi hanku aychawan kawsarqayku chaypas, askha ñukñuyoq wawankupaq warmiyku karqan, kallpasapataq karqanku, ari, qharikuna hina; mana rimapakuspataq puriyninkuta awantayta qallarirqanku.

3. Chhaynaqa, rikunchismi Yayaq kamachiyninkuna hunt'akunanta. Runakunaq wawankuna Yayaq kamachiyniykunata waqaychanqaku chayqa, Paymi paykunata mikhuchin, kallpachan, kamachisqankunata hunt'ayta atinankupaqtaq ñanta allichan; chhaynaqa, nesitasqaykutan Wiraqocha qowarqanku purunpi kaykukama.

4. Askha watakuna chaypi karqayku, ari, pusaq watan purunpi karqayku.

5. Askha ruruyoq, askha lachiwayoqpiwan kaqtin Waleq nis-

pa sutichasqayku hallp'amantaq chayamurqayku; kay imaymanakunataq mana wañunaykupaq Wiraqochaq allichasqan karqan. Mamaqochatataq rikurqayku, Irreantum nispataq suticharqayku, t'ikrasqa kaspataq askha unukuna ninanta nin.

6. Hinataq mamaqocha patapi karpaykuta hatarichirqayku, askha ñak'ariytaña, sasa imaymanakunata imaña pasarqayku chaypas—ari, ancha askhata, manataq llapantachu qelqayta atiykuman—anchatan kusikurqayku mamaqocha pataman chayamuqtiyku; Waleq nispataq chay hallp'ata suticharqayku, askha ruru-yoq kasqanrayku.

7. Hinataq, Waleq hallp'api askha p'unchawkuna kasqay pataman, noqa Nephiman Wiraqochaq arun chayamuwarqan: Hatariy, orqoman wichay, nispa. Hatarispataq orqoman wicharqani, Wiraqochatataq waqyakurqani.

8. Hinaspataq, khaynata Wiraqochataq rimariwarqan: Huk wanputa ruwanki qhawachisqayman hina, llaqtaykita kay unukunata chinpachinaypaq, nispa.

9. Noqataq nirqani: Maytan risaq Wiraqocha, qhawachiwassqaykita hina wanpu ruwanaypaq ruwanakunata ruwanaypaq mineralkunata tarispa chulluchinaypaq? nispa.

10. Hinaspataq Wiraqocha niwarqan, ruwanakunata ruwanaypaq mineral tarinaypaq mayman rinayta.

11. Hinaspataq noqa Nephi, uywakunaq qaranmanta phukunakunata ruwarqani sansata phukunaypaq; nina phukunaypaq phukunakunata ruwasqay patamantaq, ishkay rumikunata takarqani nina horqonaypaq.

12. Kunankamaqa manan Wiraqocha kachariwarqankuchu purunpi purinaykukama askha ninayoq kanaykupaq. Kaytan Pay nirqan: Misk'iyachisqami mikhunaykichista, mana wayk'unaykichispaq;

13. K'anchayniykichispiwantaqmi purunpi kasaq, ñantataq allchasaq ñawpaqeykichispi, kamachiyniykunata waqaychankichis chayqa; chhaynaqa, kamachiyniykunata waqaychankichis chayqa, pusasqan kankichis prometisqa hallp'aman; yachankichistaqmi noqaq pusasqan kasqaykichista, nispa.

14. Ari, nillarqantaqmi Wiraqocha: Prometisqa hallp'aman chayasqaykichis patamantaq qankuna yachankichis noqa Wiraqocha Yaya kasqayta; noqa Wiraqocha qankunata wañuymanta qespichisqayta; ari, Jerusalem hallp'amanta qankunata horqomusqayta, nispa.

15. Chayraykun noqa Nephi, Wiraqochaq kamachiyninkunata waqaychanaypaq kallpachakurqani; wawqeykunatataq anyarqani,

iñiysapa, k'uchiy-k'uchi ima kanankupaq.

16. Hinataq, rumikunamanta chulluchisqay mineralkunamanta ruwanakunata ruwarqani.

17. Wanputa ruwanaypaq hinaña kasqayta rikuspankutaq noqa kontra rimapakuyta wawqeykuna qallarirqanku: Waq'an wawqenchis, wanpu ruway atinanpaqmi yuyayukun, ari, yuyayuku-llantaqmi kay hatun unukunata chinpay atinanpaq, nispa.

18. Khaynatan wawqeykuna noqa kontra rimarqanku, manataq llank'ayta munarqankuchu, wanpu ruwayta mana atinayta yuyayukuspanku; manataqmi kreyirqankuchu Wiraqochaq kama-chisqan kasqayta.

19. Kunantaq noqa Nephi anchatapuni llakikurqani rumi sonqonkurayku; llakikusqayta rikuspankutaq sonqonku ukhupi kusikurqanku; noqamanta khaynata nispa anchatapuni kusikurqanku: Yacharqaykun wanpu ruwayta mana atisqaykita, yacharqallaykutaqmi mana allin yuyayniyoq kasqaykita; chhaynaqa, manan atiqwachu chay hatun llank'ay ruwayta.

20. Taytanchis hinataq kanki, sonqonpa waq'a yuyayninkunaq apasqan; ari, Jerusalem hallp'amantan pay pusamuwarqanchis, kay askha watakunataq purunpi puripakurqanchis; warminchiskunataq llank'arqanku wiksayoqña karqanku chaypas, purunpitaq wawakunata wachakurqanku imaymanakunata ñak'arispanku, wañuyllatataq mana. Aswan allinmi kanman karqan paykunapaq wañupuy Jerusalem hallp'amanta manaraq lloqsimushaqtinku, kay ñak'ariykunata llakinankumantaqa.

21. Kay askha watakunan purunpi ñak'arirqanchis, kay llapan watakunapitaq kapuwaqinichiskunamanta, chashkikuyninchis hallp'amantawan ancha kusikuyniyoq kaswan karqan; ari ancha kuisqataqmi kaswan karqan.

22. Yachaykutaqmi Jerusalem hallp'api kaq runakuna chanin runakuna kasqankuta; waqaycharqankun Wiraqochaq yuyaqankunata, taripayninkunata, llapan kamachiyninkunatawan, Moisespa kamachisqa-siminman hina; chhaynaqa, yachaykun chanin runanakuna kasqankuta. Taytanchistaq paykunata tariparqan, noqanchistataq pusamuwarqanchis rimayninkunata uyarisqanchisrayku, ari, wawqenchistaq pay hina, nispa. Kay hina rimaykunawanmi wawqeykuna noqayku kontra rimapakurqanku.

23. Noqa Nephitaq khaynata paykunata rimarqani: Kreyinkichischu Israelpa wawankunamanta kaq taytanchiskuna egipsiokunaq makinkumanta horqosqa kanankuta, Wiraqochaq rimayninkunata mana uyarinkumanchu karqan chayri?

24. Ari, yuyayukunkichischu hark'asqa kasqankumanta hor-

qosqa kanankuta, hark'asqa kasqankumanta paykunata horqomunanpaq Moiesta Wiraqocha mana kamachinmanchu karqan chayri?

25. Yachankichismi Israelpa wawankuna hark'asqa kasqankuta, yachankichistaqmi ancha sasa ruwana ruwanakunawan q'epipasqa kasqankuta; chhaynaqa, yachankichismi hark'asqa kasqankumanta lloqsimusqanku ancha sumaq paykunapaq kasqanta.

26. Yachankichismi chay hatun ruway ruwananpaq Wiraqochaq kamachisqan Moises kasqanta; yachankichistaqmi, Puka Mamaqochaq ununkuna rimayninman hina kayman haqayman t'aqakusqanta, ch'aki hallp'antataq paykuna chinparqanku.

27. Yachankichismi Puka Mamaqochapi egipsiokuna wañusqankuta, paykunataq Faraonpa awqasuyunkuna karqanku.

28. Yachallankichistaqmi Israelpa wawankuna maná sutiyoq mikhunawan purunpi mikhuchisqa kasqankuta.

29. Ari, yachallankichistaqmi paypi kasqan Yayaq atiyinman hina, rumita rimayninwan Moises k'irisqanta, unutaq lloqsimurqan, ch'akiyninkuta Israelpa wawankuna thañichinankupaq.

30. Pusasqaña karqanku chaypas, Wiraqocha Yayanku, Kutichikapuqninku paykunaq ñawpaqenkuta rispa, paykunata p'unchawpi pusaspa, tutanpitaq paykunaman k'anchayta qospa, runaq chaskiy nesitasqan llapan imaymanakunata paykunapaq ruwarqan chaypas rumiyachirqankun sonqonkuta, ñawsayachirqankutaq yuyayninkuta, kutipakurqankutaq Moises kontra, kawsaq cheqaq Yayanku kontrapiwan.

31. Hinataq rimayninman hina paykunata Yaya wañuchirqan, rimayninman hinataq paykunata pusarqan, rimayninman hinataq imaymanakunata paykunapaq ruwarqan, manataq imapas ruwasqan karqanchu, ichaqa rimaynillanwan.

32. Jordan mayuta chinpasqanku patamantaq, kallpasapata paykunata ruwarqan, chay hallp'aq runankunata qarqonanpaq; wañunankukama ch'eqerichinanpaq.

33. Kunanri yuyayukunkichischi chay hallp'aq wawankuna, taytanchiskunaq qarqosqan, prometisqa hallp'api kaqkuna, yuyayukunkichischi chanin paykuna kasqankuta? Manan niykichismi.

34. Yuyayukunkichischi taytanchiskuna aswan akllasqa kanankuta, chay runakuna chanin kankuman karqan chayri? Manan nisaykichismi.

35. Kaqllatan llapa runakunata Wiraqocha munakun; chanin kaqqa Yayaq yanapasqanmi. Ichaqa, kay llaqtaqa Yayaq sapanka rimaynintan alqochasqaku karqan, millay ruwaypi poqosqataq karqanku; Yayaq phiñakuyninpa hunt'aynintaq paykunapi karqan.

Wiraqochataq chay hallp'ata paykuna kontra ñakarqan, taytanchiskunapaqtaq samincharqan; ari, paykuna kontran ñakarqan qollochisqa kanankupaq, taytanchiskunapaqtaq samincharqan, chay hallp'api atiyuniyoq kanankupaq.

36. Runakuna tiyanankupaq kay pachata Wiraqocha kamarqan, kay hallp'ata hap'inankupaqtaq wawankunata kamarqan.

37. Chanin llaqtatataq Pay hatarichin, huchasapakunaq llaqtankunatatataq chinkachin.

38. Ancha sumaq hallp'akunamantaq chanin kaqkunata pusan, millay ruwaqkunatatataq qolluchin, paykunapaqtaq hallp'ata ñakan paykunarayku.

39. Hanan hanaqpachapin Pay kamachin, chaytaqmi tiyanan, kay pachataq chakinkunaq sarunan.

40. Yayankupaq Payta kachiqkunatatataq munakun. Munakurqanmi taytanchiskunata, paykunawantaq rimanakurqan; ari, Abrahamwan, Isaakwan, Jakobwan ima; yuyarirqantaqmi ruwasqan rimanakuyninkunata, chayraykun Egipto hallp'amanta paykunata horqomurqan.

41. K'aspinwanmi paykunata purunpi pucharqan; qankuna hinan paykunapas sonqonkuta rumiyachirqanku, millay ruwayninkuraykutaq paykunata Wiraqocha muchuchirqan. Nina hina phawaq mach'aqwaykunata paykunaman kachamurqan, muk'usqa kasqanku patamantaq, hanpisqa kanankupaq ñanta allicharqan; llapa ruwanankutaq qhawananku karqan; mana ancha sasa kay kaqtin, ruwanalla kaqtinpiwantaq askha paykunamanta wañurqanku.

42. Mayninpitaq sonqonkuta rumiyachirqanku, millaytataq rimarqanku Moises kontra, Yaya kontrapiwan; chaypiwanpas yachankichismi mana imawanpas tupachina atiyinwan prometisqa hallp'aman pusasqa kasqankuta.

43. Kunantaq kay llapan imaymanakuna pataman, millay-ruwaqman tukupuspanku pacha chayamun, ari, yaqa poqosqa kanankukamaña; manataqmi yachanichu ichapas kunan p'unchaw qolluchisqa kanankupaq hinaña kasqankuta; yachanin qolluchisqa kanankupaq cheqaqtapuni p'unchaw chayamunanta, huk chikallantaq mana, hark'asqa apasqataq paykuna kanqaku.

44. Chayraykun taytayta Wiraqocha kamachirqan purunman lloqsimunanpaq; judiokunapas payta sipiyta mashkarqanku; ari, qankunapas payta wañuchiya munarqankichis; chhaynaqa runa wañucheqmi sonqoykichispi kankichis, paykuna hinataq kankichis.

45. K'uchin kankichis millaykaqta imaymanakuna ruwaypaq,

qellataq kankichis Wiraqocha Yayaykichis uyariypi. Rikurqankichismi huk angelta, rimarirqasunkichistaqmi, ari, mayninpitaq arunta uyarirqankichis, Paytaq rimarirqasunkichis llanp'u huch'uy aruwan, mana uyariypaq hinaña kaqtiykichistaq rimayninkunata mana uyariyta atirqankichischu; chayraykutaq qhaqyaq kunkanwan hina rimarqasunkichis, chaytaq kay pachata chhapchirqa ch'eqtakunanpaq hinañapas kanman hina.

46. Yachankichistaqmi tukuy kallpayoq rimariynin kay pachata chinkachiyta atinanta; ari, yachankichismi rimayninwan wank'a-wank'a hallp'akunata panpaman tukuchinanta, panpakunata-taq p'akichisqa kananta. Chhaynari, imaqtinmi chhayna rumi sonqoyochu kankichis?

47. Qankunaraykun nunay p'akillikun, nanantaqmi sonqoy; wiñaypaq qarqosqa kanaykichismanta manchakuni. Yayaq Nunanwan hunt'an kashani, chayraykutaq runa-kurkuy mana kallpayochu, nispa.

48. Hinataq, kunan kaykunata rimareqtiy noqawan phiñarikurqanku, mamaqochaq ukhunkunamantaq choqaykuwayta munarqanku. Hap'iwankupaq noqaman hina hamuqtinkutaq paykunata nirqani: Llapa atiyniyoq Yayaq sutinpi kamachiykichis ama llamiwanaykichispaq, Yayaq atiyinwan hunt'an kashani aychaypa ruphayninkamaraq; noqa llamiwaqtaq ch'aki soqos hina ch'akinqa; mana ima hinataq Yayaq ñawpaqenpi kanqa, Yayan payta k'irinqa, nispa.

49. Noqa Nephitaq paykunata nirqani amaña astawan taytan-ku kontra rimapakunankupaq, yanapawayta mana mananchakunankupaqwan; Yayataq wanpu ruwanaypaq kamachiwarqaqan chayqa.

50. Paykumatataq nirqani: Llapan imaymanakuna ruwanaypaq Yaya kamachiwanman chayqa, atiymanmi chaykuna ruwayta. Kay unukunata—hallp'aman wakiy nispa ninaypaq Pay kamachiwanman chayqa, hallp'an kanman; kayta niyman chayqa, chhayna ruwasqaqan kanman.

51. Kunanri, chhayna atiyniyoqtaq Wiraqocha, askha utina ruwaykunataq runakunaq wawankunaq chawpinpi ruwarqaqan chayri, imaqtintaq mana yachachiwanmanchu huk wanpu ruwaytari?, nispa.

52. Hinaspataq noqa Nephi askha imaymanakunata wawqeykunaman nirqani, tutayachisqa kaspankutaq mana noqa kontra rimayta atirqankuchu p'unchawkuna; manataq hap'iwayta qhariykacharqankuchu, ni ruk'anankuwan llamiwaytapas askha p'unchawkuna. Manan kay ruwayta qhariykacharqankuchu, ñawpa-

qeypi ch'akiyta manchakuspanku. Chhayna atiyniyoqmi Yayaq Nunan karqan, chay hinataq paykunawan ruwasqa karqan.

53. Hinaspataq Wiraqocha niwarqan: Yapamanta makiykita wawqeykikunaman chutariy, manan ñawpaqeykipi ch'akingakuchu, ichaqa, paykunatan chhapchiykachasaq, nispan Wiraqocha nin; kaytataq ruwasqa Wiraqocha Yayanku kasqayta yachanankupaq, nispa.

54. Hinataq makiyta wawqeykunaman chutarirqani, manataq ñawpaqeypi ch'akirqankuchu, ichaqa, rimayninman hinan paykunata Wiraqocha chhapchikacharqan.

55. Paykunataq nirqanku: Cheqaqtan yachayku qanwan Wiraqocha kasqanta, yachaykun Wiraqochaq atiyin chhapchiwasqankuta, nispa. Ñawpaqeypitaq urmarqanku, noqa yupaychawanankupaq hinañataq kasharqanku, ichaqa manan noqa kacharirqanichu: Wawqellaykichismi kani, ari, sullk'a wawqeykichis; chhaynaqa, Wiraqocha Yayaykichista yupaychaychis, tayta-mamaykichistataq hatunchaychis, Wiraqocha Yayaykichis qonasuykichis hallp'api p'unchawniykichis hatunyananpaq, nispa.

18 T'AQA

Wanpu tukusqa. Jakob Josepiwan. Mamaqocha chinpayta qallarinku. Qhancha-kusikuy ankallikuy ima. Mamaqochapi wayra-para. Prometisqa hallp'aman chayanku.

1. Hinaspataq Wiraqochata yupaycharqanku, noqawantaq rirqanku. Ancha allin yachaywantaq kurkukunata llaqllarqayku. Maynillanqa Wiraqochan qhawachiwarqan, imaynata wanpupaq kurkukunata llank'anaypaq.

2. Kunantaq noqa Nephi kurkukunata llank'arqani mana runakunaq yachasqankuman hinachu, nitaq wanputapas runakunaq ruwasqankuman hinachu ruwarqani; ichaqa Wiraqochaq qhawachiwasqanman hinan ruwarqani, chhaynaqa manan runakunaq ruway yachasqankuman hinachu karqan.

3. Noqa Nephitaq orqoman pasaqla rirqani, pasaqlataq Wiraqochaman rimarikurqani, chayraykun ancha hatun imaymanakunata Wiraqocha rikuchiwarqan.

4. Wiraqochaq rimayninman hina wanputa ruwasqay pata-mantaq, wawqeykuna ancha allin kasqanta rikurqanku, ruwayninpas ancha sumaq kasqantawan; chayraykutaq yapamanta Wiraqochaq ñawpaqenpi ullpuykukurqanku.

5. Hinataq Wiraqochaq arun taytayman chayamurqan, hatarispa wanpuman haykunaykupaq.

6. Tutamantanpitaq llapan imaymanakunata allichasqayku pataman—askha ruruta, purunmanta aychata, askha lachiwatawan, Wiraqochaq kamachiwasqankuman hina imaymanakunata—wanpuman haykurqayku llapan q’epiykuwan, muhuykuwan, noqaykuwan imaña apamusqayku imaymanakunapiwan, sapan kayku hayk’a watayoq kasqaykuman hina; chhaynataq llapayku wanpuman haykurqayku, warmiykuwan, wawaykupiwan.

7. Taytayaq ishkay churikunata purunpi churiyarqan. Kurak kaqpa Jakob sutin karqan, sullk’a kaqpataq Jose.

8. Hinaspataq llapayku wanpuman haykuqtiyku—noqaykuwantaq mikhunaykuta kamachikuwasqankutawan apayukuqtiyku—mamaqochaman haykurqayku, wayraq ñawpaqentataq apasqa karqayku prometisqa hallp’aneqman.

9. Ashkha p’unchawña wayraq apasqan kasqayku patamantaq, wawqeykuna, Ismaelpa churinkuna warminkunapiwan anchatapuni q’ochukuyta qallarirqanku; hinaspataq, tusuyta, takiyta, millay simiwan rimaytawan qallarirqanku, ari, kaykama ima kallpawan apamusqa kasqaykuta qonqaspanku; ari, mana tupuy atina millay kaymantaq qokurqanku.

10. Noqa Nephitaq anchatapuni manchakuyta qallarirqani, noqaykuwan Wiraqocha phiñarikuspa, mamaqochaq p’uytuyayninpi millp’usqa kanaykupaq huchallikuyniykurayku muchuchiwankumanta; chayraykutaq noqa Nephi allintapuni paykunaman rimayta qallarirqani, ichaqa, noqawanmi phiñarikurqanku, manan sullk’a wawqeyku kamacheqniyku kananta munaykuchu, nispa.

11. Hinataq, Laman Lemuelpiwan hap’iwaspanku waskhakunawan chaqnawarqanku, anchatapunitaq ñak’arichiwaraqanku; chaypiwanpas chhaynatan Wiraqocha kacharirqan kallpanta qhawachinanpaq, huchasapakunamanta rimasqan hunt’akunanpaq.

12. Hinataq, mana kuyuy atinaykama watawasqanku pataman, Wiraqochaq ruwasqan sinku mana purirqancho.

13. Chhaynataq mana mayneqmanpas wanpu pusayta yacharqankuchu, hinamantaq ancha hatun wayra-para hatarirqan; ari, ancha hatun, ancha manchakuna sallallallay. Kinsa p’unchawtaq qhepaman pusasqa karqayku; paykunataq mamaqochapi wañunankumanta anchatapuni manchakuyta qallarirqanku. Chaypiwanpas manan pashkawarqankuchu.

14. Qhepaman tawakaq p’unchawpi pusasqa kasqaykupitaq, ancha manchakuypuni sallallallay tukurqan.

15. Hinataq, mamaqochaq p’uytuyayninkunapi millp’usqa hinapaqña kasharqayku. Tawa p’unchawña unukuna patapi qhepa-

man pusasqa kasqayku patamantaq, Yayaq taripaynin paykunapi kasqanta wawqeykuna rikuyta qallarirqanku, wañunkunantaqmi huchankumanta mana kutirimunkumanchu chayqa; chayraykutaq noqaman hamuspanku, makiypi chaqnakunata pashkarqanku. Anchatapunitaq makiykuna punkisqa karqan, chaki-moqochuykunapas anchatapunin punkisqa, manchaytataq nanawarqan.

16. Chaypiwanpas Yayaypin kunfiyarqani, p'unchawnintintaq Payta yupaycharqani; manataqmi Wiraqocha kontraqa rimapakurqanichu ñak'ariyniykunarayku.

17. Taytay Lehitaq askha imaymanakunata paykunaman, Ismaelpa churinkunamanwan nirqan; ichaqa manchachirqankun noqarayku rimareqkunata; tayta-mamaytaq ancha machuña kaspanku, wawankunarayku anchata ñak'arispankupiwan onqoywan urmarqanku; ari, puñunapitaq kananku karqan.

18. Llakikuyninku, ñak'ariyninku, wawqeykunaq huchallikuy-ninkunaraykupiwantaq kay pachamanta Yayankuwan tupanankupaq yaqamanta apasqa karqanku; ari, soqo chukchankun yaqaña hallp'api churasqa karqan; ari, yaqamantan tayta-mamay mamaqochapi p'anpasqa karqanku.

19. Jakob Josepiwantaq, erqellaraq kaspanku, mikhunata nesitasqankupiwan muchurqanku mamankuq ñak'ariyninkunarayku; warmiypas wegenkunawan yayaman-rimarikuyninkunapiwan, waykunapas, manan wawqeykunaq sonqonkuta pashkawanankupaq llanp'uyachirqanchu.

20. Manataqmi imapas karqanchu sonqonkuta llanp'uyachinanpaq, ichaqa Yayaq atiywillan, paykunata wañuchiywan manchachispa; hinataq mamaqochaq ukhunkunapi millp'usqa kanankupaq hina kaqtinkuña, ruwasqankumanta yuyayninkuman kutirimuspanku pashkawarqanku.

21. Hinaspataq pashkawasqanku pataman sinkuta hap'irqani, munasqayman hinataq purirqan. Hinataq Wiraqochaman rimarikurqani, rimarikusqay patamantaq wayra thañirqan, wayra-parapas thañirqan, sumaq qasilla karqan.

22. Hinataq noqa Nephi, wanputa pusarqani, prometisqa hallp'amantaq yapamanta rirqayku.

23. Ashkha p'unchawkuna tuytusqayku patamantaq prometisqa hallp'aman chayarqayku; hallp'a pataman rispataq karpaykuta hatarichirqayku, prometisqa hallp'a nispataq suticharqayku.

24. Hinataq hallp'ata yapuspayku muhukunata tarpuyta qallarirqayku; ari, Jerusalemanta apamusqayku llapan muhukunatan tarpurqayku; anchatapunitaq wiñayta qallarirqanku; chhaynataq ancha saminchasqa karqayku.

2 NEPHI 1

25. Prometisqa hallp'apitaq purunpi purispayku, imaymana uywakunata sach'a-sach'akunapi tarirqayku—wakakunata, torokunata, asnokunata, kaballukunata, kabrakunata, salqa kabrakunata, imaymana salqa uywakunatawan, runaq allinninpaq. Hinallatataq, imaymana mineralkunata tarirqayku—qorita, qolqeta, antatawan.

NEPHIQ ISKAYKAQ QELQAN

Lehiq wañuyninpa willaynin. Nephiq wawqenkuna pay kontra ankallikunku. Purunman rinanpaq Nephita Wiraqocha kamachin. Purunpi puriyninkuna.

1 T'AQA

Qespi-kay hallp'a, saminchasqa chaninkunapaq, ñakasqataq millay ruwakunapaq. Lehiq anyaynin.

1. Kunantaq noqa Nephi, wawqeykunaman yachachiyta tukusqay pataman, taytayku Lehipas askha imaymanakunata paykunaman rimarirqan—imayna hatun imaymanakunata Jerusalem hallp'amanta paykunata horqospa paykunarayku Wiraqochaq ruwasqanmanta.

2. Unukuna patapi ankallikusqankumanta paykunata rimarirqan, mamaqochapi millp'usqa kanankumanta kawsayninkuta qespichiypi Yayaq khuyapakuyninmanta.

3. Chaskisqanku prometisqa hallp'amantawantaq paykunata rimarirqan; Jerusalem hallp'amanta ayqenanchispaq niwaspanchis imay ña khuyapakuyniyuq Wiraqocha karqan, nispa.

4. Huk rikuytan rikurqani, chayraykutaqmi yachani Jerusalem thuñisqa kasqanta; Jerusalempi qhepaswan karqan chayqa, noqanchispas wañuswanmi karqan, nispan pay nirqan.

5. Ichaqa nirqanmi, ñak'arirqanchisña chaypas, huk promitಿಸqa hallp'atan chaskirqanchis, llapan hallp'akunamanta aswan akllasqa hallp'ata; ch'awchuyqa chaskikuyninpaq kananpaq Wiraqocha Yaya noqawan rimanakusqan hallp'ata. Ari, huk rimankuypin kay hallp'ata Wiraqocha, noqaman wawaykunamanwan wiñaypaq qowan, huk llaqtakunamanta Wiraqochaq makinpa llapan pusamusqan runakunapaqwan.

6. Chhaynaqa, noqa Lehi unanchani noqapi kaq Nunaman hina, Wiraqochaq makinpa mana pusasqan kaspaga, mana pipas kay hallp'aman hamunanmanta.

7. Chhaynaqa, Paypa pusamusqan runakunapaqmi kay hallp'a willkachasqa. Paypa qosqan kamachiykunaman hina Payta ser-

2 NEPHI 1

vinqaku chayqa, qespi-kay hallp'an paykunapaq kanqa; hinaqa, manan hayq'aqpas harkasqa kayman apamusqachu kanqaku; chhayna kanqa chayqa, millay ruwayninkunaraykun kanqa. Millay ruwaykuna askhayanqa chayqa, ñakasqan hallp'a paykunarayku kanqa; ichaqa, chaninkunapaqqa wiñaypaqmi saminchasqa kanqa.

8. Hinaqa, ancha allinmi huk llaqtakuna kay hallp'amanta mana yachananku; askha llaqtakunan kay hallp'ata pakankuman, hinaspataq manaña maypi chaskikuy kananpaq kanmanchu.

9. Chayraykun noqa Lehi, huk promesata chaskirqani, Jerusalem hallp'amanta Wiraqocha Yaya apamusqan runakuna kamachiyninkunata waqaychanqaku chayqa, t'ikarinankun kay hallp'api; huk llaqtakunamantataq pakasqa kanqaku, paykuna kikinkupaq kay hallp'ata hap'ikunankupaq. Kamachiyninkunata waqaychanqaku chayqa, saminchasqan kay hallp'a patapi kanqaku, manataq pipas kanqachu paykuna manchacheq, nitaq chaskikuy-ninku hallp'a qechuqpas; wiñaypaqtaq qasilla tiyanqaku.

10. Ichaqa, mana kreyiypi urmasqanku p'unchaw hamuqtin, Wiraqochaq makinmanta ancha hatun saminchaykunata chaskisqanku pataman—pachaq, llapan runankuna ima kamasqa kasqankumanta yachaspanku, kay pachaq kamasqa kasqanmantapacha Wiraqochaq ancha sumaq hatun ruwayninkunata yachaspanku; iñiywan llapan imaymanakunata ruwanankupaq atiyuniyoq kaspas, qallariymantapacha llapan kamachiynikunayoq kaspas, kay ancha sumaq prometisqa hallp'aman mana tukukuyniyoy sumaq kayninwan apamusqan kaspankupiwan—noqa nini, Israelpa Qollananta, cheqaq Hawisqata, Qespicheqninkuta Yayankutawan pisi- chanankupaq p'unchaw chayamunqa chayqa, chanin kaqpa tari- payninmi paykunaman chayamunqa.

11. Ari, huk llaqtakunatan paykuna pataman apamunqa, paykunamantataq atiyta qonqa, paykunamantataq chaskikuyninku hallp'ankuta qechunqaku; paykunatataq ch'eqechinqa, maqachinqa ima.

12. Ari, huk miraymanta hukmanmi yawar sut'uchiy, ancha hatun ñak'ariy ima kanqa; chhaynaqa churiykuna, yuyarinayki- chistan munayman, ari, rimayniykunata uyarinaykichistan munayman.

13. Alliyá rikch'ariwaqchis, qaqa puñuymanta rikch'ariychis, ari, supay wasi puñuymanta, watasuqniykichis millay chaqnaku- namantataq chhapchirikuwaqchis; chay watanakunataq runaku- naq wawankunata chaqnan, wiñay muchuy, wiñay ñak'ariy qo- chamanwantaq hark'asqa apasqa kanku.

2 NEPHI 1

14. Rikch'ariychis! ñut'u hallp'amanta hatariychis, khatatataq taytaq rimayninkunata uyariychis. Chay taytaq runakurkuntataq asllaman upallan kaq chiri ayapanpaman churankichis, manataqmi ni pi pureqpas chaymanta kutirimuyta atinmanchu. Huk chikan p'unchawkunallamanmi llapan hallp'aq ñanninta risaq.

15. Ichaqa, Wiraqochan nunayta supay wasimanta qespichirgan. Kusiqellpuntan rikurqani, wiñaypaqtaq munakuyninpa makinwan muyurisqa kani.

16. Wiraqochaq yuyaqankunata, taripayninkunatawan waqaychanaykichistan munani; kaymi qallariymantapacha nunaypa munaynin karqan.

17. Muchuchisqan sonqoy maynillan karqan. Manchakurqanin sonqoykichispa rumiyayninrayku, Wiraqocha Yayaykichis hunt'a phiñakuyninwan qankunaman hamuqtin, wiñaypaq kuchusqa chinkachisqapiwan kanaykichismanta;

18. Utaq qankunaman askha miraykunakama huk ñakay hamunanmanta, q'anchinaq utaq yarqaypa muchuchisqanpas kanaykichismanta, cheqnisqa kanaykichismanta, saqraq munayninman hina hark'asqa apasqa kanaykichismantawan.

19. Churiykuna, amayá kay imaymanakuna qankunaman hamuchunchu; aswanmá Wiraqochaq akllasqan yanapasqanpiwan llaqta kawaqchis. Ichaqa munaynin ruwasqa kachun; wiñaypaqmi chanin ñanninkuna.

20. Nirqantaqmi Pay: Kamachiyniykunata waqaychankichis chayqa, t'ikarinkichismi kay hallp'api; ichaqa, kamachiyniykunata mana waqaychankichischu chayqa, qarqosqan ñawpaqeymanta kankichis, nispa.

21. Kunantaq qankunapi nunay kusikunanpaq, sonqoytaq qankunarayku kay pachata kusikuypi saqenanpaq, muchuypi llakikuypiwan ayapanpaman mana apamusqa kanaypaq, ñut'u hallp'amanta hatariychis churiykuna, qharitaq kaychis, huk sonqollataq huk yuyayllapiwantaq kaychis, tukuy imaymanakunapi huklla kaspa, hark'asqa kayman mana urmanaykichispaq;

22. Ancha millay ñakaywan mana ñakasqa kanaykichispaq, qolluchiypaq chanin Yayaq phiñakuyninta qankuna pataman mana hamuchispa; ari, runa-kurkuq nunaq ima wiñay qolluchiyman.

23. Rikch'ariychis churiykuna, chanin-kaypa p'achawan p'achakuychis. Chhapchirikuychis watasqa kasqaykichis chaqnakunata, tutayaqmanta lloqsimuychis, ñut'u hallp'amantataq hatariychis.

24. Amaña astawan ankallikuychischu wawqeykichis kontra. Ancha kusiqellpuyoqmi rikuyninkuna karqan; Jerusalemanta

2 NEPHI 1

lloqsimusqanchismantapachan kamachiykunata pay waqaycharqan; Yayaq makinpi ruwanan karqan, prometisqa hallp'aman apamusqa kananchispaq; mana pay kanmanchu karqan chayqa, purunpin yarqaymanta wañuswan karqan; chaypiwanpas pay si-piytan mashkarqankichis, ari, anchatataqmi pay ñak'arirqan qankunarayku.

25. Anchatapunin manchakuni khatatatanitaq, qankunarayku yapamanta astawan pay ñak'arinanmanta. Noqanchis patapi atiy-niyuq, kamachiyniyuq ima kaytan munan, nispan rimapakurqan-kichis; ichaqa, yachanin mana qankuna patapi atiyta, ni kama-chiytapas mashkasqanta; ichaqa, Yayaq kusiqaellpunta, wiñaypaq allin kanaykichistawanmi mashkarqan.

26. Qankunawan sut'in kaqtintaq, pay kontra rimapakurqan-kichis. K'ireq simiwanmi rimariwanichis, noqanchiswantaqmi phi-ñarikun nispan ninkichis; ichaqa, k'ireq rimayninga, paypi kaq Yayaq rimayninpa atiyinpa k'arayninmi karqan; phiñarikuy nis-qaykichistaq Yayapi kasqanman hina cheqaq karqan, manataqmi chayta hark'ayta atinmanchu karqan, mana manchakuspa millay ruwasqaykichismanta rimaspa.

27. Nesitakuntaqmi Yayaq atiyin paywan kanan, kasunayki-chiskama kamachinanpaq. Ichaqa manan paychu karqan, paypi kaq Wiraqochaq Nunanmi rimarinanpaq siminta kicharirqan, ma-nataq upallachiyta pay atirqanchu.

28. Kunantaq churiy Laman, Lemuelpas, Sampas, Ismaelpa churinkunaq churiy kunapas, Nephiq rimasqanta uyarinkichis chayqa, manan qollunkichischu. Payta uyarinkichis chayqa, huk saminchaytan qankunawan saquesaq, ari, qallariyqaq saminchay-niyta.

29. Ichaqa payta mana uyarinkichischu chayqa, qallariyqaq saminchayniytan hitirichisqa, ari, saminchayniyta, pay patapitaq qhepanqa.

30. Kunantaq Zoram, qanman rimarisaq—Lapanpa warmanmi kanki, chaypiwanpas, Jerusalem hallp'amanta horqosqan karqanki; yachanitaqmi churiy Nephiq wiñaypaq cheqaq qochun kasqaykita.

31. Chayraykutaq iñiysapa kasqaykirayku, paypa ch'awchun-wan kushka ch'awchuyki saminchasqa kanqa, kay hallp'apitaq unaypuni t'ikariypi tiyanqaku; manataq imapas—ichaqa, paykuna purapi millay huchallikuykunalla—kay hallp'api wiñaypaq t'ikariy-ninkuta tatichinqachu utaq k'irinqachu.

32. Hinaqa, Wiraqochaq kamachiyninkunata waqaychanki chayqa, Wiraqochan kay hallp'ata willkacharqan, churiy ch'aw-chunwan kushka ch'awchuykiq sumaq kayninpaq.

2 NEPHI 2

2 T'AQA

Lehi, churin Jakobman riman. Nesitakunmi imaymanakunapi kontra kanan. Hark'asqa ruru kawsaq sach'apiwan. Runa kananpaq Adan urmarqan. Hawisqa ancha hatun Chawpichaq, runakunata kutichikapunqa.

1. Kunantaq Jakob, qanta rimarisayki: Purunpi ñak'ariyniypa ñawpaqkaq churiymi kanki. Erqe kayniykipin ñak'ariykunata ancha llakikuytawan muchurqani, wawqeykikunaq millay kayninku-rayku.

2. Chaypiwanpas Jakob, purunpi ñawpaq paqariq churiy, yachankin Yayaq hatun kayninta; allin kayniykipaqmi ñak'ariyniyki-kunata Pay saminchanqa.

3. Chhaynaqa, saminchasqan nunayki kanqa, sumaqlataq wawqeyki Nephiwan tiyanki; Yayayki serviypitaq p'unchwaniyki-kuna tukukunqa. Chhaynaqa, yachanin Kutichikapuqmiyki allin-puni kasqanrayku, kutichikapusqa kasqaykita. Rikurqankin pachakunaq hunt'akuyninpi runakunapaq qespichiyta apamunanpaq Pay hamunanta.

4. Waynakayniykipin kusiqellpunta rikurqanki; chhaynaqa, saminchasqan kanki aychapi Pay servinan runakuna hina. Nunaqa kaqllan qaynap'unchwapas, kunanpas, wiñaypaqpas. Runaq urmasqan pachamantataq ñan allichasqaña, qespitaq qespiy.

5. Allintataqmi runakuna yachachisqa kanku, allinta mana-allinmanta reqsinankupaq. Runakunamantaq kamachisqa-simi qosqa kan. Manataq ima aychapas kamachisqa-simiwan chaninchasqachu; utaq, kamachisqa-simiwanmi runakuna wit'usqa kanku. Ari, kay pachapi kamachisqa-simiq wit'usqanmi karqanku, nuna-pi kaq kamachisqa-simiq qarqosqantaq sumaq kaqmanta kanku, usuritaq wiñaypaq kanku.

6. Chayraykutaqmi Qollanan Hawisqapi, Qollanan Hawisqa ukhunta qespiy hamun; Yayaq-munakuyninwan cheqaqwan ima hunt'a Pay kasqanrayku.

7. Pay kikintaq munachikun hucharayku arpay hina, kamachisqa-simi munasqanta hunt'ananpaq, p'akillisqa sonqoyoyq p'akillisqa nunayoq ima kaqkunapaq; manataqmi pimanpas kamachisqa-simiq munayninkuna kutichisqa kanmanchu.

8. Chhaynaqa, hayk'a chaninniyoqmi hallp'api tiyaqkunaman kay imaymanakuna yachachiy, Yayaq ñawpaqenpi mana ima aychapas tiyayta atinanta yachanankupaq, ichaqa, Qollanan Hawisqaq chaninninkunawan, khuyapakuyinwan, yayaq-munakuyninwan ima. Paytaq aychapi kawsayninta qon, yapamantataq kawsayninta hoqarikapun Nunaq atiyinwan, wañusqakunaq kawsari-

nankuta wakichinanpaq; Paytaq kawsariqkunamanta ñawpaqkaq.

9. Chhaynaqa, ñawpaqkaq ruru Yayapaq, Paytaq runakunaq llapan wawankunarayku rimaringa, Paypi kreyiqkunataq qespi-chisqa kanqaku.

10. Llapa runakunarayku rimarisqanraykutaq, llapan runakuna Yayaman rinku. Chhaynaqa, Paypa ñawpaqenpin sayarinku, Paypa taripasqan kanankupaq, Paypi kaq cheqaqman hina, qollanan kayman hinapiwan. Chhaynaqa, Qollanan kaqpa qosqan kama-chisqa-simiq munayninga, chaywan kushka muchuchiypa hunt'ayninmi; kay kushka kaq muchuchiyaq kusikuywan kushka kaq kontra, ñak'ariypa munaynin hunt'akunanpaq.

11. Kananpunin llapan imaymanakunapi kontra. Mana chhayna kaqtinqa, purunpi ñawpaq paqareq churiy, manan chaninchay kanmanchu ni millay ruwaypas, ni qollanan kaypas, ni ñak'ariypas, ni allinpas, ni mana-allinpas. Chhaynaqa, llapan imaymanakunapas hukllapin kanman. Hukllapi kanman chayqa, wañusqa hinan kanman, mana kawsayniyoq mana wañuyniyoq, mana waqlliyiyoq ni mana-waqlliqniyoq; mana kusikuyniyoq ni ñak'ariyniyoqpas; mana allin yuyayniyoq ni mana-allin yuyayniyoqpas.

12. Chhaynaqa, yanqapaqmi kamasqa kanman karqan, manataq ima rasonpas kanmanchu karqan kamasqa kanapaq. Chhaynaqa, Yayaq yachaysapa kaynintan, wiñaypaq munayninkunatapaspas, atiyntapas, khuyakuynintapas, Yayaq chaninchaynintapas qolluchisqa karqan.

13. Manan kamachisqa-simi kanchu ninkichis chayqa, manan hucha kanchu nillankichistaqmi. Manan hucha kanchu ninkichis chayqa, manan chaninchaypas kanchu nillankichistaqmi. Mana chaninchay kanchu chayqa, manan kusikuypas kanchu. Mana chaninchay ni kusikuypas kanchu chayqa, manan muchuchiy ni ñak'ariypas kanchu. Mana kay imaymanakuna kanchu chayqa, manan Yayapas kanchu. Mana Yaya kanchu chayqa, manan noqanchispas ni pachapas kanchu; manan imaymanakuna kamay kanmanchu karqan, ni ruwanapaqpas, nitaq ruway chaskinapaqpas; chhaynaqa, llapan imaymanakunan ch'usaqyanman karqan.

14. Kunantaq churiykuna kay imaymanakunata qankunaman niykichis, allin kayniykichispaq, yachanaykichispaqwan. Kanmi Yaya, llapan imaymanakunataq kamarqan, hanaqpachatapaspas, pachatapaspas, chaykunapi kaq llapan imaymanakunatapaspas; ruwanapaq imaymanakunatapaspas, ruway chaskinapaq imaymanakunatapaspas.

15. Runarayku wiñay-wiñaypaq munayninkuna ruwananpaq, ñawpaq tayta-mamanchis kamasqan pataman, uywakunata, urpi-

2 NEPHI 2

kunata, huk rimaypiqa, llapan kamasqa kaqkuna patamanqa, nesitakunmi kontra kanan; hark'asqa ruru kawsaq sach'aq kontranpi; huknin misk'i kasma, hukninkaqtaq p'oshqo.

16. Chayraykun runaman Wiraqocha Yaya qorqan, pay kikinmanta imatapas ruwananpaq. Chhaynaqa, manan runa pay kikinmanta imatapas ruwanmanchu, mana mayqen kaqpas payta inkitanmanchu chayqa.

17. Noqa Lehitaq, ñawinchasqay imaymanakunaman hina yu-yani, qelqasqa kasqanman hina Yayaq huk angelnin hanaqpachamanta urmasqa kasqanta; chhaynataq saqraman tukurqan, Yayaq ñawpaqenpi mana-allin kaqta mashkasma.

18. Hanaqpachamanta urmasqanrayku, wiñaypaq usuri kaspanaq, llapan runakunaq ñak'ariyninkuta mashkarqan. Chhaynataq chay ñawpa mach'aqway, saqra, llapan llullakuykunaq taytan, Evata nirqan: Hark'asqa rurumanta mikhuy, manataqmi wañunkichu, ichaqa, Yaya hinan kanki, allinta mana allintawan yachaspa, nispa.

19. Hark'asqa rurumanta Adan Evapiwan mikhusqanku patamantaq, Eden pawqarmanta qarqosqa karqanku, hallp'ata chakanankupaq.

20. Wawakunataq apamurqanku, ari, pachaq llapan ayllunta.

21. Runakunaq wawankunaq p'unchawninkunataq hatunyachisqa karqan, Yayaq munayninman hina, aychapi kanankukama huchankumanta kutirimunankupaq. Chhaynataq kawsayninku probasqa kanapaq tukurqan; p'unchawninkunataq hatunyachisqa karqan runaq wawankunaman Wiraqocha Yayaq qosqan kamachiykunaman hina. Kamachiykunatan Pay qorqan, llapan runakuna huchankumanta kutirimunankupaq; llapan runakunamanmi Pay qhawachirqan, taytamanankuq huchankunarayku chinkasqa kasqankuta.

22. Adan mana kamachita p'akinmanchu karqan chayqa, manan urmanmanchu karqan, ichaqa Eden pawqarpin qhepanman karqan. Llapan kamasqa imaymanakunataq kamasqa kasqanku pataman imayna kasqallankupi qhepankuman karqan, wiñaypaqtaq qhepankuman karqan mana tukukuyniyuq kasma.

23. Mana wawayoqtaq kankuman karqan; chhaynataq llunp'aq-kaypi qhepankuman karqan, ñak'ariyta mana reqsisqankurayku mana kusikuyniyuq kasma; huchallikuyta mana yachasqankurayku allin kaqta mana ruwaspa.

24. Ichaqa, llapan imaymanakuna yachaq yachaysapa kayninpil llapan imaymanakunapas ruwasqa karqanku.

2 NEPHI 3

25. Runakuna kanankupaq Adan urmarqan, runakunataq kanku kusikuyniyog kanankupaq.

26. Hawisqataq hamunqa pachakunaq hunt'akuyninpi, urmaymanta runakunaq wawankunata kutichikapunanpaq. Urmaymanta kutichikapusqa kasqankuraykutaq, wiñaypaq qespi tukunku, allinta mana-allinmanta reqsispanku; paykuna kikinkumanta imatapas ruwanankupaq, manataq paykuna patapi llank'asqa kanankupaqchu, ichaqa, chay hatun p'unchawpi kamachisqa-simiq muchuchiyllanwan, Yayaq qosqan kamachiykunaman hina.

27. Chhaynaqa, qespin runakuna aychaman hina kanku, paykunapaq llapan allin kaq imaymanakunataq paykunaman qosqa kan. Qespitaq kanku, qespi-kayta wiñay kawsaytawan akllanankupaq, llapan runakunaq hatun chawpichayninrayku; utaq hark'asqa kayta wañuytawan akllanankupaq, saqraq hark'ayninman atiyinmanwan hina. Llapa runakuna pay hina usuri kanankutan pay mashkan.

28. Kunantaq churiykuna, hatun Chawpichaqta qhawanaykichista, ancha hatun kamachiyninkunata ima uyarinaykichistan munani; iñiysapataq kaychis rimayninkunawan, wiñay kawsaytataq akllaychis Qollanan Nunanpa munayninman hina;

29. Amataq wiñay wañuyta akllaychischu aychaq munayninman hina, chaypi mana-allin kasqanman hina; chaytaq saqraq nunanman atiyta qon hark'ay atinanpaq, supay wasiman apanasuykichispaq, kikin suyunpi qankuna patapi kamachinanpaq.

30. Kay chikan rimaykunataq llapaykichisnman rimarirqaykichis churiykuna, probasionniypa qhepa p'unchawninkunapi; allin kaqnintataq akllarqani unanchaqa rimayninman hina. Manataqmi imatapas munanichu, ichaqa wiñaypaq nunaykichispa allin kaynillanta. Hinataq kachun.

3 T'AQA

Lehi, churin Joseman rimarin. Egiptopi Joseq unanchaynin. Akllasqa unanchaqmanta ñawpaqtaraq rimakun. Moisespa imaruwaynin. Hebreo qelqakuna nefita qelqakunapiwan.

1. Kunantaq qanman rimarisayki qhepa paqariwaqniy Jose. Ñak'ariyniypa purunninpin paqarirqanki; ari, ancha hatunpuni muchuyniypa p'unchawninkunapin mamayki wachakurqasunki.

2. Wiraqochayá kay hallp'ata qanpaqpas qollanachichun—kaytaq awan sumaq hallp'a, chaskikuyniykipaq, ch'awchuykiq chaskikuyninpaq, wawqeykikunawan, wiñaypaq sumaq kayniykichispaq, Israelpa Qollananpa kamachiyninkunata waqaychankichis chayqa.

2 NEPHI 3

3. Kunantaq qhepa paqariwaqniy Jose, ñak'ariyniypa puruninmanta apamusqay, wiñaypaqyá qanta Wiraqocha saminchachun; manan lliwtapunichu ch'awchuyki qollochisqa kanqa.

4. Wasaypa rurunmi kanki, Egiptoman hark'asqa apasqa Joseq ch'awchuntaqmi kani. Ancha hatuntaqmi Josewan Wiraqochaq ruwasqan rimanakuyninkuna karqan.

5. Chhaynaqa, cheqaqtapunin p'unchawninchiskunata Jose rikurqan. Wiraqochamantataq huk promesata chaskirqan, wasanpa rurunmanta huk chanin palqata Israelpa wasinman Wiraqocha Yaya hatarichinanpaq; mana Hawisqatachu, ichaqa, p'akisqa kanan palqata, chaypiwanpas, Wiraqochaq rimanakuyninkunapi yuyarisqa kananpaq, qhepa p'unchawkunapi paykunaman Hawisqa rikhurinanpaq, atiyniyoq Nunapi, tutayaqmanta k'anchayman paykunata apamunanpaq; ari, pakasqa tutayaqmanta hark'asqa kaymantawan qespi kayman.

6. Cheqaqtapunin khaynata Jose cheqaqcharqan: Huk unanchaqtan Wiraqocha Yayay hatarichinqa, akllasqa unanchaqtan ch'awchuykunapaq pay kanqa, nispa.

7. Ari, cheqaqtapunin Jose nirqan: Khaynatan Wiraqocha niwan: Akllasqa unanchaqtan ch'awchuykimanta hatarichisqaq, ancha munasqataq pay kanqa ch'awchuykikuna purapi. Paymantaq kamachiyta qosaq, wawqenkuna wasaykiq rurunpaq huk ruwayta ruwananpaq, chaytaq ancha hatun chaninniyoq paykunapaq kanqa, taytaykikunaman ruwasqay rimanakuykuna yachayman apamusqa kanankupaq.

8. Paymantaq huk kamachiyta qosaq, mana hukniraq ruwayta ruwananpaq, ichaqa, noqa kamachisqallayta. Ancha hatuntan payta ruwasq ñawpaqeypi. Ruwayniytan pay ruwanqa.

9. Llaqtayta kacharichimunapaq qankunaman hatarichimunay nisqay Moises hina ancha hatunmi pay kanqa, o Israelpa wasin.

10. Moisesataq hatarichisqaq llaqtaykita Egipto hallp'amanta horqomunanpaq.

11. Ichaqa, huk rikuqtan wasaykiq rurunmanta hatarichisqaq, paymantaq atiyta qosaq wasaykiq rurunman rimayniykunata apamunanpaq; manataq rimayniykunata apamunallanpaqchu, ninmi Wiraqocha, ichaqa, rimayniykunamanta paykunata kunbinsinanpaqmi, chay rimaytaq ña paykuna chawpipi rirqanña.

12. Chhaynaqa, qelqanqan wasaykiq rurun; Judahq wasanpa rurunpas qelqanqan; wasaykiq rurun qelqasqantaq Judahq wasanpa rurunpa qelqasqanwan kushka wiñanqaku, pantasqa kaq yachachiykunata tutayachinankupaq, churanakuykunata qolluchi-

2 NEPHI 3

nankupaq, wasaykiq rurunkuna purapi sumaq kawsayta hatarichinankupaq; taytanku reqsiyman qhepa p'unchawpi paykunata apamunankupaq, rimanakuyniykunatawan yachanankupaq, nispan Wiraqocha nin.

13. Mana ancha kallpayoq kaymantataq kallpachasapa ruwasqa kanqa, llapan llaqtay purapi ruwayniy qallarinan p'unchawpi, qanta yapamanta hatarichinanpaq O Israelpa wasin, nispan Wiraqocha nin.

14. Khaynatataq Jose unancharqan: Chay unanchaqtan Wiraqocha saminchanqa, pay sipiy munaqkunataq tutayachisqa kankaku. Wiraqochamanta wasaypa rurunpaq chaskisqay promesaqa hunt'asqan kanqa. Sut'inpunin kashani kay promesa hunt'akunanmanta.

15. Noqaq sutiy hinataq sutin kanqa, taytanpa sutin hinataq sutin kanqa. Noqaman rikch'akuqtaq kanqa; paypa makinwan Wiraqochaq apamunantaq, Wiraqochaq atiyinwan llaqtayta qespiyman apamunqa, nispa.

16. Ari, khaynatan Jose unancharqan: Sut'inpunin kaymanta kashani, Moisespa promesanmanta kasqayta hina. Wiñaypaqmi ch'awchuykita qhepachisqa, nispan Wiraqocha niwarqan.

17. Wiraqochataq nirqan: Huk Moiestan hatarichisqa; huk k'aspipitaq payman atiyta qosaq, qelqaypitaq allin umata payman qosaq. Ichaqa, manan qallunta pashkarisqachu askhata rimanampaq; manan rimaypichu payta kallpachasaq. Ichaqa, kikiy makiypa ruk'ananwanmi payman kamachisqa-simiyta qelqasaq, huktataq paypa rantinta rimanampaq ruwasaq, nispa.

18. Niwallarqantaqmi Wiraqocha: Wasaykiq rurunmanmi hatarichisqa, paypa rantinta rimanampaqtaq huk runata ruwasaq. Noqataq, wasaykiq rurunman wasaykiq rurunpa qelqankunata qelqananpaq payman qosaq, cha'wchuykiq rimareqnintaq kayta willanqa.

19. Qelqanan rimaykunataq, ch'awchuykikunaman chayanampaq yachaysapa kayniypi allin kasqan rimaykuna kanqa. Ñut'u hallp'amantapas paykunaman ch'awchuykikuna rimarimunman hinan kanqa; yachanin iñiyninkuta.

20. Ñut'u hallp'amantataq paykuna qaparimunqaku; ari, huchamanta kutirimuytapuni wawqenkunaman, askha miraykunaña ñawpaqenkuta pasarqan chaypas. Hinataq qapariyninku ringa rimayninkuq sut'in kayninman hinapuni.

21. Iñiyninkuraykutaq simiyanta rimayninku lloqsimunqa, wasaykiq rurunmantakaq wawqenkunaman; mana ancha atiyniyoq rimayninkunatatataq iñiyninkupi kallpachasaq, taytaykikuna-

2 NEPHI 4

man ruwasqay rimanakuykunata yuyarinankupaq, nispa.

22. Kunantaq churiy Jose, khaynatan ñawpa taytay unancharqan.

23. Chhaynaqa, kay rimanakuyraykun saminchasqa kanki, manan chinkachisqachu ch'awchuyki kanqa, qelqaq rimayninkunatan uyarinqaku.

24. Paykuna purapitaq huk ancha atiyniyoq runa hataringa, paytaq askha allinkunata ruwanqa, rimaypipas ruwaypipas; Yayaq makinpi warman kaspas, hatun iñiyniyoq, ancha sumaq utinakunata ruwananpaq, Yayaq ñawpaqenpi ancha hatun kasqanta ruwaspa; Israelpa wasinman, wawqeykikunaq ch'awchunmanwan askha yapamanta sayarichiyta ruwaspa.

25. Kunanqa, saminchasqan kanki Jose. Huch'uyllaraqmi kanki, chhaynaqa, wawqeyki Nephiq rimayninkunata uyariy, rimasqay rimaykunaman hinataq kanpaq ruwasqa kanqa. Yaqa wañuqña taytaykiq rimayninkunata yuyariy. Hinataq kachun.

4 T'AQA

Lamanpa, Lemuelpa ima churi-ususinkunata Lehi saminchan. Ismaelpa wasinkaqninkunaman, Samman ch'awchunmanwan saminchaykuna. Lehiq wañuynin. Astawan ankallikuykuna.

1. Kunantaq noqa Nephi rimarini Egiptoman apasqa Josemanta taytaypa rimasqan unanchaykunamanta.

2. Cheqaqtapunin llapan ch'awchunmanta pay unancharqan. Manataqmi askhachu qelqasqan unanchaykunamanta aswan hatun unanchaykuna kan. Noqaykumanta, hamuq mirayniykumantawantaqmi pay unancharqan. Bronse raphikunapitaq chaykuna qelqasqa kashan.

3. Joseq unanchayninkunamanta taytay rimayta tukusqan patamantaq, Lamanpa wawankunata waqyarqan, churinkunata ususinkunatawan, hinaspataq paykunaman nirqan: churiykuna, ususiyykuna, phiwi churiypa churi-usinkuna, rimayniykunata uyarinaykichistan munayman.

4. Wiraqocha Yayan nirqan: Kamachiyniykunata waqaychasqaykichisman hinan kay hallp'api t'ikarinkichis, ichaqa, kamachiyniykunata mana waqaychasqaykichisman hinataqmi ñawpaqeymanta qarqosqa kankichis, nispa.

5. Ichaqa churi-ususiyykuna, manan aya-panpayman urayuymanchu huk saminchayta qankunaman mana saqespayqa; yachanin apamusqa kanaykichis ñanpi apamusqa kankichis chayqa, manan chaymanta ayqerinkichischu.

6. Chhaynaqa, ñakasqa kankichis chayqa, saminchayniyta

2 NEPHI 4

qankunaman saqesaq, qankunamanta chay ñakay horqosqa kanaanpaq, tayta-mamaykichispa umankuman urmananpaq.

7. Hinaqa saminchayniyraykun mana chinkanaykichista Wiraqocha angelringachu, chhaynaqa, khuyapakuyniyuqmi qankunawan ch'awchuykichispiwan wiñaypaq kanqa, nispa.

8. Lamanpa churi-ususinkunaman taytay rimariyta tukusqan patamantaq, ñawpaqenman Lemuelpa churi-ususinkunata apachimurqan.

9. Paykunamantaq rimarirqan: Churiykuna, ususiykuna, ish-kaykaq churiypa churi-ususinkuna; Lamanpa churi-ususinkunaman saqesqay kikin saminchaykunallatataqmi qankunaman saqeni; chhaynaqa, manan lliwtapunichu chinkachisqa kankichis; ichaqa, saminchasqan ch'awchuykichis tukukuypi kanqa, nispa.

10. Paykunaman rimayta taytay tukusqan patamantaq, Ismaelpa churinkunaman rimarirqan, ari, llapan wasinpi kaqkunaman.

11. Paykunaman rimay tukusqan patamantaq Samta nirqan: Saminchasqan kanki, ch'awchuykipas; wawqeyki Nephi hinan kay hallp'ata chaskikunki. Ch'awchuykitaq ch'awchunwan yupasqa kanqa; qantaq kanki wawqeyki hinapuni, ch'awchuykitaq ch'awchun hina, saminchasqataq kanki llapan p'unchawniykikunapi, nispa.

12. Hinataq, llapan wasinman sonqonpi kasqanman hina, paypi kaq Wiraqochaq Nunanman hinapiwan rimay tukusqan pataman taytay Lehi machuyarqan. Hinataq pay wañurqan, p'anasqataq karqan.

13. Hinataq, wañusqanmanta chikan p'unchawkunallaman, Laman, Lemuel, Ismaelpa churinkunapiwan noqa kontra phiñarikurqanku, Wiraqochaq anyayninkunarayku.

14. Paypa rimayninman hinan noqa Nephi, paykunaman rimarinaypaq kamachisqa rikukurqani. Imaymanakunatan paykunaman rimarqani, taytaypas manaraq wañushaqtin paykunaman rimarillarqantaq. Ashkhataq kay rimaykunamanta hukkaq raphikunapi qelqasqa kashan; aswan historia kaqmi hukninkaq raphikunapi qelqasqa kashan.

15. Kay raphikunapitaq nunaypa imaymanankunata qelqani, bronse raphikunapi qelqakunamantawantaq askhata qelqani. Qelqakunapin nunay kusirikun, chaytataq sonqoy yuyaymanan; wawaykunaq yachayninkupaq allin kayninkupaqwantaqmi qelqani.

16. Kusikunmi sonqoy Wiraqochaq imaymanankunapi; sonqoytaq pasaqlla yuyaymanan rikusqaykunapi, uyarisqaykunapi ima.

2 NEPHI 4

17. Chaypiwanpas, ancha sumaq ruwayninkunata sumaq kaynipi Wiraqocha qhawachiwarqanña chaypas, sonqoy qaparin: O noqa usuri qhari! Ari aychayraykun sonqoy llakikun; huchaykunaraykun nunay llakikun.

18. Muyurisqan kashani, ruwanalla p'isturiwaq wateqaykunarayku, huchakunarayku ima.

19. Kusirikuyta munaqtiytaq huchaykunarayku sonqoy waqan; chaypiwanpas yachanin pipi konfiyasqayta.

20. Yayaymi yanapaqniy karqan; Paymi ñak'ariyniykuna chawpinta purunpi pusawarqan, Paytaqmi ancha hatun p'uytuq ununkuna patapi waqaychawarqan.

21. Aychay rupharinankaman munakuyninwan hunt'ariwarqan.

22. Ñawpaqeypi khatatatanankukaman awqaykunata tutayachirqan.

23. P'unchawpin waqayniyta uyariwarqan, tutapitaq yachayta rikuykunapi qowarqan.

24. P'unchawpin ñawpaqenpi kallpachakurqani ancha allin yaya-rimarikuypi; ari, hanaqmanmi aruyta seqariyachirqani; angelkunataq urayamuspanku serviwarqanku.

25. Nunanpa raprankunapitaq ancha suni orqokuna pataman runa-kurkuy apasqa karqan. Ancha hatun imaymanakunataq ñawiykuna rikurqan, ari, runakunapaq sinchi hatunta; chayrayku-taq, chaykunata mana qelqanaypaq kamachisqa karqani.

26. Chhayanaqa, chay ancha hatun imaymanakunata rikurqani chayri, runakunaq wawankunaman urayamuyninpi ancha hatun khuyapakuywan paykunaman Wiraqocha hamurqan chayri, imanaqtintaq sonqoyri waqan, imanaqtintaq nanay wayq'opi nunayri sayan, aychaytaq chinkarin, kallpaytaq ch'usaqyan llakikuy-niykunaraykuri?

27. Imanaqtintaq aychayraykuri huchawan atipachikuyma? Ari, imanaqtintaq wateqaymanri pachata qoyman sumaq kawsayniyta chinkachinanpaq, nunaytawan ñak'arichinanpaq, sonqoypi saqra tiyananpaqri? Imanaqtinmi phiñarikuni awqayraykuri?

28. Rikch'ariy nunay! Amaña huchallikuypi urmayñachu. Kusirikuy sonqollay, amaña nunaypa awqan maypi kananpaq qoychu.

29. Amaña yapamanta phiñarikuychu awqaykunarayku, amaña kallpayta pisipachiychu ñak'ariyniykunarayku.

30. Kusirikuy sonqollay! Wiraqochaman khaynata waqyarikuy: O Wiraqocha wiñaypaqmi yupaychasayki, ari, qanpin nunay kusirikunqa, Yayay, qespiyniypa qaqan.

2 NEPHI 5

31. O Wiraqocha kutichikapunchu nunayta? Qesouchiwankichu awqaykunaq makinkunamanta? Khatatatachiwankichu huchaq ñawpaqenpi?

32. Wisq'asqalla ñawpaqeypi kachun supay wasiq punkun, sonqoypas nunaypas p'akillisqa kasqanrayku! O Wiraqocha, amayá chaninchayniykiq punkunta ñawpaqeypi wisq'aychu, llanp'u wayq'oq ñanninta purinaypaq, sumaq panpa ñanpi mana pantay kanaypaq.

33. O Wiraqocha, chaninchayniykiq mantanwan p'isturiway! Allicharipuway ñanta O Wiraqocha, awqaykunamanta ayqenaypaq! Ñawpaqeypi ñanta cheqaqcharipuway! Ama imatapas ñanniypi mushk'akunaypaq churaychu, ichaqa, ñawpaqeypi ñanniyta picharipuway; amataq ñanniyta qenchaychu, awqaykunaq ñannintayá aswanqa.

34. O Wiraqocha qanpin konfiarqani, wiñaypaqtaq qanpi konfiasaq. Manan konfiasaqchu aychaq makinpi; yachanin aychaq makinpi konfiansan churaq runa ñakasqa kasqanta. Ari, ñakasqaq runapi konfiansan churaq utaq aychata makinta hina churaq runa.

35. Ari, yachanin mañakuqman askhata Yaya qonanta. Ari, qowanqan Yayay chanin kaqta mañakuqtiy; chhaynaqa, qanmanmi aruyta hoqarisaq; ari, qantan waqyarikusayki Yayay, qespiyniypa qaqaq. Wiñaypaqmi qanman aruy seqarinqa, qaqaq, wiñay kawsaq Yaya. Hinataq kachun.

5 T'AQA

Nephi, Yayaq willasqa kawsaynin qechuy munaqkunamanta t'aqakun. Zoram, Sam, Jakob, Jose, hoqkuna ima paywan rinku. Labanpa q'anchinan. Wiraqochaq Wasin ruwakun. Nephi inkanku utaq amachaqninku. Ankallikuqkuna tunpa-yana aychaqarawan ñakasqa kanku. Kurakkuna, yachacheqkunapiwan sapaqchasqa kanku.

1. Hinataq noqa Nephi, Wiraqocha Yayayman anchatapuni waqyakurqani, wawqeykunaq phiñarikuyninkurayku.

2. Ichaqa, astawanmi noqa kontra phiñarikuyninku yapakurqan, chayraykutaq sipiwayta munarqanku.

3. Ari, noqa kontran rimapakurqanku: Noqanchista kamachiytan sullk'a wawqenchis yuyaykukun, payraykutaq askhata ñak'arirqanchis; chhaynaqa, haku sipirusun, rimayninkunarayku manaña astawan ñak'arinanchispaq. Manan kamacheqninchis pay kanta munanchischu, noqanchis kurak wawqenkunaqmi kay runakuna kamachiy, nispa.

2 NEPHI 5

4. Manan kay raphikunapichu qelqani noqa kontra llapan rimapakusqanku rimaykunata. Ichaqa, allinñan kawsayniy qechuy munasqanku nisqay.

5. Hinataq Wiraqocha niwarqan, noqa Nephi paykunamanta ayqenaypaq, noqawan llapan riy munaqkunapiwan purunman rinaypaq.

6. Chhaynataq noqa Nephi, aylluyta aparqani, Zoramta aylluntawan, kuraq wawqey Samta aylluntawan, sullk'a wawqeykuna Jakobta, Joseta, panaykunatapas, noqawan llapan riy munaqkunatawan. Noqawan riy munaqkunataq karqanku, Yayaq anyayninkunapi willayninkunapiwan, kreyiqkuna; chayraykutaq rimayniykunata uyarirqanku.

7. Karpaykutataq apakurqayku, imatapas apay atisqaykuta- wan; askha p'unchawkunataq purunpi purirqayku. Ashkha p'un- chawkuna purisqayku patamantaq karpaykuta hatarichirqayku.

8. Llaqtaytaq munarqan chay hallp'ata Nephi nispa sutichanaykupaq; chhaynataq, Nephi nispa suticharqayku.

9. Noqawan llapan kaqkunataq paykuna kikinkuta: Nephiq llaqtan nispa waqyakurqanku.

10. Kallpachakurqaykutaq Wiraqochaq taripayninkunata, yu- yaqankunata, kamachiyninkunatawan waqaychanaykupaq, Moisespa kamachisqa siminman hina imaymanakunapi.

11. Noqaykuwantaq Wiraqocha karqan, anchatapunitaq t'ikarirqayku. Muhukunata tarpuspaykutaq askhata pallarqayku. Uywakunata imayamana uywakunatawantaq uywayta qallarirqayku.

12. Noqa Nephitaq apamurqani bronse raphikunapi qelqasqa qelqakunata; taytaysaq Wiraqochaq makinpa ruwasqan sinkuta utaq kompastapas chay qelqasqata hina.

13. Hinataq anchatapuni t'ikariyta miraytawan chay hallp'api qallarirqayku.

14. Noqa Nephitaq Labanpa q'anchinanta hap'ispay, chayman rikch'akuqta askha q'anchinakunata ruwarqani, imaynapas lamanita nispa kunan waqyasqa runakuna noqaykuman hamuspa mana wañuchiwanankupaq; yacharqanin, noqata, wawaykunata, llaqtay waqyasqa runakunatawan cheqnikusqankuta.

15. Wasikuna ruwaytataq llaqtayman yachachirqani, imaymana kurkukunapi llank'ayta, killaypi, antapi, bronsipi, asiropi, qoripi, qolqepi, ancha sumaq metalkunapiwan; chaykunataq askhapuni karqan.

16. Noqa Nephitaq Wiraqochaq Wasinta ruwarqani, Salomonpa Wiraqochaq Wasinman rikch'akuqta; ichaqa manan ancha sumaq imaymanakunayoqtachu, manataq kay hallp'pi tari-

2 NEPHI 9

kurqanchu chayqa; chayraykun mana Salomonpa Wiraqochaq Wasinta hinatachu ruwayta atikunman kargan. Ichaqa, Wiraqochaq Wasinpa ruwayninqa, Salomonpa Wiraqochaq Wasinmanmi rikch'akurqan, ancha sumaqtaq ruwaynin kargan.

17. Hinataq noqa Nephi, llank'aysapa llaqtay kananta ruwarqani, makinkuwan llank'anankupaqwan.

18. Inkanku kanaypaqtaq munarqanku, ichaqa manan noqa Nephi munarqanichu inkayoaq kanankuta; chaypiwanpas atiyiniypi llapan kasqantan paykunapaq ruwarqani.

19. Hinan, wawqeykunawan Wiraqochaq rimayninkuna hunt'akurqan, paykunaq yachacheqninku, kamacheqninku kanaypaqwan paykunamanta Wiraqochaq rimarisqan. Chhaynataq kamacheqninku yachacheqninku ima kargani, Wiraqochaq kamachiyinman hina, wañuchiwayta munasqanku chay p'unchawkama.

20. Chhanaqa, hunt'akurqanmi Wiraqochaq rimayninkuna: Rimayniykikunata mana uyarinqakuchu chayqa, qarqosqan kanqaku Wiraqochaq ñawpaqenmanta, nispa Pay niwasqan. Hinataq ñawpaqenmanta qarqosqa karganku.

9 T'AQA

Jakobpa yachachiyininkuna qatillan. Mana tukukuynioq ñak'ariy. Qespi-cheqpa ñak'ariyninkuna ñawpaqtaraq rikukun. Kamachisqa simi mana kasqanpiqa, manan muchuchiy kanchu.

1. Kunantaq ancha munasqay wawqeykuna, kay imaymanakunataqa ñawincharqani, Israelpa llapan wasinwan Wiraqochaq rimanakusqan rimanakuykunata yachanaykichispaq—

2. Qollanan unanchaqkunaq siminkuwan judiokunaman rimasqanta, qallariymantapachapuni miraymanta mirayman, Yayaq cheqaq iñeqkuna-huñunman cheqaq t'aqanmanwan yapamanta huñusqa kanankupaq pacha hamunankama; chaytaq huñusqa kanqaku wasinkupi, chashkikuyninkuq hallp'ankupi, llapan promesankuq hallp'ankupitaq yapamanta sayarichisqa kanqaku.

3. Kusirikunaykichispaqmi kay imaymanakunata rimariykichis, ancha munasqay wawqeykuna, umaykichista wiñaypaq hoqarinaykichispaq, wawaykichiskunaman Wiraqocha Yaya qonqa chay saminchaykunarayku.

4. Yachanin ashkha qankunamanta, hamunan imaymanakunamanta yachanaykichispaq maskamusqaykichista; chhaynaqa, yachanin aychanchis wañunanta yachasqaykichista; chaypiwanpas aychanchispin Yayata rikusun.

5. Ari, yachanin hamusqanchis Jerusalenpi kaqkunaman, Pay

kikin runa-kurkunpi qhawachikunanta yachasqaykichista; nesitakunmi paykunaq chawpinkupi chhayna kanan, allinmi ancha hatun Kamaq aychapi runaq atiyinpi kanan, llapan runakunarayku wañunanpaq, llapa runakuna Paypa atiyinpi kanankupaq.

6. Wañuychu llapa runakunaman haykurqan, ancha hatun khuyapakuyniyuq Kamaqpa ruwanankuna hunt'akunanpaq, chhaynallatataqmi nesitakun kawsariypaq atiy; chay kawsariytaq runakunaman hamunan urmayrayku; urmaytaq hamurqan kama-chi-p'akiyrayku; runakuna urmasqa wakisqankuraykutaq, Wiraqochaq ñawpaqenmanta qarqosqa karqanku.

7. Chhaynaqa, nesitakunmi mana tukukuyniyuq ñak'ariy kanan; mana mana-tukukuyniyuq kanman chayqa, kay waqlliqaqqa manan mana-waqlliqa churakuyta atinmanchu. Hinaqa, runaman ñawpaq kaq taripay chayamusqanqa, wiñaypaqmi kanman karqan. Chhayna kaspataq kay aychaqa, ismunanpaq, khakukunanpaqwan pacha mamanman urmanman karqan, mana hayk'aqpas hatarimunanpaq.

8. O Yayaq yachaysapa kaynin, khuyapakuynin, munakuyninpas! Aycha mana hayk'aqpas hatarinmanchu chayqa, Wiñay Yayaq ñawpaqenmanta urmaspa saqra wakiq angelman watasqan nunanchis kanman, mana hayk'aqpas hatarinanpaq.

9. Nunanchistaq pay hina tukupunman karqan, noqanchistaq saqra kaswan, saqraq angelninkuna, Yayanchispa ñawpaqenmanta t'aqasqa, llullakuykunaq taytawan qhepaspa, pay hina mu-chuypi; ari, ñawpaq tayta-mamanchiskuna q'otoqman rikch'arikuq; paytaq rikhurichikun yaqa k'anchaq angel hina, runakunaq wawankunataq munachin pakallapi huñunakuykunaman, runakuna sipiyman, imaymana tutayaqpi pakallapi ruwaykunamanwan.

10. Hayk'a hatunmi, kay ñak'aqpa makinmanta ayqenanchispaq huk ñanta allchaq Yayanchispa sumaq kaynin! ari, chay ñak'aqmanta, wañuy, supay wasimanta ima; chaytataq noqa waqyani runa-kurkuq wañuynin, nunaq wañuynin ima, nispa.

11. Yayanchispa, Israelpa Qollananpa qespichinanpaq ñanraykutaq, kay rimarisqay wañuy, kay pachapi wañuy, wañusqankunata haywanqa; chay wañuytaq ayawasi.

12. Nunapi wañuy rimasqay wañuytaq, wañusqankunata haywanqa; kay nunapi wañuytaq supay wasi; chhaynaqa, wañuytas supay wasipas haywanankun wañusqankunata; supay wasitaq hark'asqa nunankunata kacharinan, ayapanpataq hark'asqa runa-kurkunkunata kacharinan; runakunaq runa-kurkun nunanpiwan-taq huk huknikaqman yapamanta churasqa kanqa; kaytaq Israel-

pa Qollananpa kawsariyninpa atiyninwan.

13. Ancha hatunmi Yayanchispa ima ruwanankuna! Hoq niraqmantaqa Yayaq kusipawqarninqa, chaninkunaq nunankunatan haywanan, ayapanpataq chaninkunaq runa-kurkunkunata kacharinan; nunataq runa-kurkunman yapamanta churasqa kanqa, llapan runakunataq mana waqlleq mana wañoq ima wakinku; paykunataq kawsaq nunakuna kanku, aychapi noqanchis hina hunt'asqa yachayniyoq, ichaqa, hunt'asqan yachayninchis kanqa.

14. Chhaynaqa, llapan huchanchiskunamanta, qhelli kayninchismanta, q'alalla kasqanchismantawan hunt'asqa yachayniyoqmi kasun. Chaninkunataq kusikuyninkumanta, chaninchayninkumantawan hunt'asqa yachayniyoq kanqaku, ch'uyakaywan p'achasqa kaspanku; ari, chaninchaypa p'achanwan.

15. Hinataq, kay ñawpaq wañuymanta kawsayman llapan runakuna reqtinku, mana wañuq wakispanku, Israelpa Qollananpa taripana-tiyananpa ñawpaqenpi rikhurinanku. Hinamantaq taripana hamunqa, chaytaq Yayaq qollanan taripananman hina taripasqa kananku.

16. Yayaq kawsasqan hina cheqaqpunitaq kayta Yaya rimarqan, Paypa wiñay rimaynintaqmi, manataqmi chinkanmanchuchanin kaqkunaqa chaninmi qhepanqaku, qhelli kaqkunataq qhelli qhepanqaku; chhaynaqa, chay qhelli kaqkunaqa saqra angelninkuna iman kanku, paykunapaq allichasqa wiñay ninamantaq ringaku; muchuyninkutaq huk sallurumiyoq nina qocha hina kanqa, chaypa nina qallunkunataq wiñaypaqpuni wicharimun, mana tukukuyniyoqtaq.

17. O Yayanchispa hatun kaynin chaninchayninpiwan! Paymi llapan rimayninkunata ruwan, siminmantataq chaykuna lloqsimurqan, hunt'akunantaqmi kamachisqa-simin.

18. Ichaqa, chaninkunaqa, Israelpa Qollananpa qollanankunaqa, Israelpa Qollananpi kreyiqkunaqa, runakunaq muchuchiyninkunata atipaspa chaypa p'enqakuyninkunata atipaqqunaqa, pachaq qallariyninmantapacha paykunapaq allichasqa Yayaq qhapaq suyuntan chashkinqaku, wiñaypaqtaq kusikuyninku hunt'a kanqa.

19. O Israelpa Qollananpa, Yayanchispa khuyapayakuyninpa hatun kaynin! Paymi qollanankunata qespichin chay millay-millana ñak'aqmanta, supaymanta, wañuymanta, supay wasimanta, mana tukukuyniyoq ñak'ariy chay sallurumiyoq nina qochaman-tawan.

20. O Yayanchispa ancha hatun qollanan kaynin! Llapan imaymanakunatan Pay yachan, manataq imapas kanchu Paypa

2 NEPHI 9

mana yachasqan.

21. Paytaq kay pachaman hamun, llapan runakunata qespi-chinanpaq, arunta uyaringaku chayqa; Paymi llapan runakunaq nanayninkunata ñak'arin; ari, llapan kawsaqkunaq nanayninkunata, Adanpa ayllunmanta kaq qharikunaqta, warmikunaqta, wawakunaqta ima .

22. Paytaq kayta ñak'arin, llapan runakunaman kawsariy chayanpaq, hatun taripana p'unchawpi ñawpaqenpi sayarinankupaq.

23. Llapan runakunataq kamachin huchankunamanta kutirimunankupaq, Israelpa Qollananpi hunt'asqa iñiyoyok kaspasutimpi unuchakunankupaq; mana chayqa, manan Yayaq qhapaq suyunpi qespichisqa kayta atinkumanchu.

24. Mana yuyayninkuman kutirimunqakuchu, nitaq sutinpi kreyinqakuchu chayqa, nitaq unuchakunqakuchu, manataq tukukuykamachu takyanqaku chayqa, kondenasqan kanqaku; Wiraqocha Yaya, Israelpa Qollananmi khaynata nin.

25. Chhaynaqa Paymi huk kamachisqa-simita qon, mana kamachisqa-simi qosqa kasqanpitaq mana muchuchiy kanchu; mana muchuchiy kasqanpitaq mana kondenasion kanchu; mana kondenasion kasqanpitaq, Israelpa Qollananpa khuyapakuyinkuna paykunata mañakun ñak'ariyayku; Paypa atiyinwan qespichisqa kasqankurayku.

26. Ñak'ariymi hunt'an chaninchayninpa mañakusqanta, llapan mana kamachisqa-simi chashkiqkunata, qespichisqataq paykuna kanku chay ancha millay ñak'aqmanta, wañuymanta, supay wasimanta, saqramanta, sallurumiyoq nina qochamantawan, chaytaq mana tukukuyniyoyok ñak'ariy; yapamantataq Yayaman kutichisqa kanku, paykunaman kawsay qoq Israelpa Qollanan Yayaman.

27. Ichaqa, ay kamachisqa-simi qosqa kaq runamanta, ari, noqanchis hina Yayaq llapan kamachiyninkunayoyok kaspachay kamachisqa-simi p'akiqmanta, probasion p'unchawninkuna usuchiymanta, ancha millaypunin chay runaq kaynin!

28. O chay saqraq atoqrayay ruwayninkuna! O runakunaq anchayayninku, usphu kayninku, upa kayninkupiwani! Yachayniyoq kaspanku hamawt'a kanankupaq yuyakunku, manataq Yayaq kunsejunta uyaringakuchu, huk qayllamantaq churanku, paykuna kikinkumanta yachasqankuta yuyaspanku; chhaynaqa, yanqapami yachaysapa kayninku, manataq imapipas paykunata sirvinchu. Wañunqakun paykuna.

29. Ichaqa allinmi yachayniyoq kay, Yayaq kunsejunta payku-

na kasunku chayqa.

30. Ichaqa, ay kay hallp'aq imaymanankunaman hina qhapakunamanta! Qhapaq kasqankuraykun wakchakunata alqochanku, llanp'u songokunayoqta qatikachanku, songonkutaq qhapaqyayninkunapi churasqa; chhaynaqa, qhapaqyayninkunan Yayanku. Paykunawanmi qhapaqyayninkupas chinkanqa.

31. Ay mana uyariy munaq upakunamanta! Wañunqakun.

32. Ay mana rikuy munaq ñawsakunamanta! Paykunapas wañunqakun.

33. Ay mana p'akillisqa songoyoqkunamanta! Huchallikuyninkumanta yachaymi paykunata qhepa p'unchwapi k'irinqa.

34. Ay llullakuqmanta! Supay wasiman choqasqan kanqa.

35. Ay munashaspa wañucheq runa-wañucheqmanta! Wañunqan pay.

36. Ay map'akuykuna ruwaqkunamanta! Supay wasiman choqasqan kanqaku.

37. Ari, ay rikch'aykuna yupaychaqkunamanta. Llapan saqrakunaq saqranmi paykunapi kusikun.

38. Qhepatapuniqa, ay huchankupi wañuqkunamanta! Yayamanmi kutiringaku, uyantataq rikunqaku, huchankupitaq qhepanqaku.

39. O ancha munasqay wawqeykuna, yuyariychis chay Qollanan Yaya kontra huchallikuy ancha millay kasqanta; chay atoqrayaq saqraq wateqayninkunapi urmay millay kaynintawan! Yuyariychis—aycha kaq yuyayniyoq kayqa wañuymi; nuna yuyayniyoq kaytaq wiñay kawsay.

40. O ancha munasqay wawqeykuna, uyariychis rimayniykunata. Israelpa Qollananpa hatun kayninta yuyariychis. Ama niychischu: k'araq imaymanakunatan rimariwanchis, nispa; chhaynata ruwankichis chayqa, cheqaqkaq kontran rimankichis. Kamaqniykichispa rimayninkunatan rimarirqaykichis. Yachanin, cheqaqniyoq rimaykuna llapan qhellikaykuna kontra k'araq kasqanta; ichaqa, chaninkunaqa manan chaykunata manchakunkuchu, cheqaqtan munakunku manataq pantachisqachu kanku.

41. Chhaynaqa ancha munasqay wawqeykuna, hamuychis Wiraqochaman, Qollanan kaqman. Yuyariychis ñanninkuna chanin kasqanta. Runapaq ñanqa k'ikllullan, ichaqa siwkllan ñawpaqenpi mast'arikun, punku waqaychaqtaq Israelpa Qollanan; manataq ima warmatapas chaypi llank'achinchu, nitaq hukniraq ñan kanchu, ichaqa punkullanta. Manan Payqa yukasqa kayta atinmanchu, Wiraqocha Yayan sutin.

42. Waqyakuqmantaq Pay kicharinqa; hamawt'akunata, ya-

2 NEPHI 9

chayniyoqkunata, yachayninkurayku anchayaq runakunata, yachaysapa kayninkurayku, qhapaqyayninkurayku ima anchayaq qhapaqkunata—ari, paykunatan Pay alqochan; kay imaymanakunata mana choqanqakuchu, Paypa ñawpaqenpitaq upa kasqankuta mana yuyanqakuchu chayqa, nitaq ullpuykukuypichu hamunqaku chayqa, manan paykunaman Pay kicharinqachu.

43. Ichaqa yachaysapaq, allin umayoqpa ima imaymanakunapaq wiñaypaqmi paykunamanta pakasqa kanqa; ari, qollanan-kunapaq allichasqa kusikuy.

44. Ancha munasqay wawqeykuna, rimayniykunata uyariychis! P'achaykunatan horqokuni, ñawpaqeykichispitaq chhapchini; llapan rikuy ñawinwan qhawariwananpaqtaq, qespiyniypa Yayanmanta mañakuni. Chhaynaqa, qhepa p'unchawpin yachankichis, llapan runakuna ruwasqankuman hina taripasqa kaqtinku, Israelpa Yayan, nunaymanta huchaykichiskunata chhapchirisqayta rikusqanta, k'anchayniyoq ñawpaqenpi sayasqayta, yawarniykichismanta chhapchirikusqayta.

45. Ancha munasqay wawqeykuna, kutiriyichis huchaykichiskunamanta. Usqhaylla watay munasoqniykichispa chaqnankunamanta chhapchirikuyichis. Qespiyniykichispa qaqaq Yayaman hamuyichis.

46. Chaninkunaman chaninchay qokunan k'anchayniyoq p'unchawpaq nunaykichista allichaychis, taripana p'unchawpaqpuni, millay manchakuypi mana khipuchakunaykichispaq; ch'uyatapuni huchaykichismanta mana yuyarinaykichispaq, hinaspaqtaq kayta niwaqchis: Qollanan, qollanan taripayniykikuna O Llapa Atiyniyoq Wiraqocha Yaya—ichaqa, yachanin huchaykunata; kamachi-simiykikunatan p'akirqani, noqaqmi huchaykuna, saqrataqmi atipawarqan, ancha millay muchuyninpa hap'ikusqantaqmi kani, nispa.

47. Ichaqa wawqeykuna, nesitakunchu kay ancha millaykuna imayna kasqanmanta qankuna yuyarichinay? Manchachiymanchu nunaykichista yuyayniykichis ch'uya kaqtin? Sut'inchu qankunawan kayman, cheqaqpa sut'in kayninman hina, mana ima huchayoq kawaqchis chayri?

48. Qollanan kawaqchis chayqa, qollanan kaymantan rimariykichisman; ichaqa, manataq qollananchu kankichis, yachacheqniykichista hinatataq qhawariwankichis chayqa, nesitakunmi imata hucha qosqanta qankunaman yachachinay.

49. Anchatapunin huchata nunay cheqnin, anchatapunitaq songoy kusikun chaninchaypi; Yayaypa qollanan sutintataq yuyachasaq.

50. Hamuychis wawqeykuna, llapan ch'akichikuqkuna hamuychis unukunaman; mana qolqeyoqtaq hamuspa rantikuy, mi-khuytaq; ari, rantikuy vinota ñukñutawan, mana ima qolqewan, mana ima chaninwan.

51. Chhaynaqa, ama qolqeta tukuychischu mana ima chanin-niyoc kaqpi, nitaq llank'ayniykichistapas mana saksachiy ateqpi. K'uchillaña uyariwaychis yuyariychistaq rimarisqay simikunata; Is-raelpa Qollananmantaq hamuychis, k'uchikuychistaq mana wa-ñuqpi mana waqlleqpiwan; wapu kaqpi nunaykichis kusikunanta-taq saqeychis.

52. Ancha munasqay wawqeykuna, yuyariychis Yayaykichispa rimayninkunata, pasaqla Payman p'unchawpi rimarikuychis, tu-tanpitaq qollanan sutinta añaychaychis. Sonqoykichis kusikunanta saqeychis.

53. Qhawariychis Wiraqochaq rimanakuyninkuna imayna ha-tun kasqanta, imayna hatuntaq runakunaq churinkunawan ha-muyninkuna kasqanta. Ancha hatun kaynin, khuyapayakuynin, munakuyninrayku imataq noqanchisman prometiwarqanchis ch'awchunchis mana llapanpunichu kay aychaman hina chinka-chisqa kanankumanta; ichaqa, Paysi paykunata qhawanman; qhepa p'unchawkunapitaq Israelpa wasinpi cheqaq palqaman wakipunqaku.

54. Kunantaq wawqeykuna, astawanmi qankunaman rimariy-man, ichaqa paqarinña rimayniykunaq puchunta rimarisaykichis. Hinataq kachun.

29 T'AQA

Nephiq unanchayninkuna qatillan. Hawarunakuna Rimanakuykuna Qelqa ima. Huk qelqakuna. Yayaq rimayninkuna hukllapi huñusqa kanqa.

1. Ichaqa, ashkhan kanqaku, paykuna chawpipi ancha sumaq ruwanata ruwayta qallariday p'unchawpi, runakunaq wawankuna-man rimanakuy ruwasqayta yuyarinaypaq; makiyta ishikay kutita chutarispa, Israelpa wasinmanta kaq llaqtayta yapamanta pallaka-munaypaq;

2. Qanman Nephi, taytaykimanwan ch'awchuyki yuyarinay-paq promesa ruwasqayta yuyarinaypaqwan; ch'awchuykiq rimay-ninkuna ch'awchuykipaq simiyanta lloqsimunanta; rimayniytaq pachaq tukukuyninkama qaparinqa, Israelpa wasinmanta kaq llaqtaypa unanchanpaq.

3. Rimayniykuna qapareqtintaq, hawarunakunamanta ashkha ninqaku: Huk Rimanakuy Qelqa huk Rimanakuy Qelqa! Kapu-

wanchismi huk Rimanakuy Qelqa, manataqmi astawan Rimanakuy Qelqa kanmanchu nispa.

4. Ichaqa, khaynatan Wiraqocha Yaya nin: Upakuna, kanqan paykunapaq Rimanakuy Qelqa, ñawpa rimanakusqay llaqtay judiokunamantataqmi lloqsimunqa. Ima añaychaytataq judiokunaman paykuna qhawachinku, paykunamanta Rimanakuy Qelqa chashkisqankumanta? Ari, ima ninankutan hawarunakuna ninku? Yuyarinkuchu judiokunaq purikachayninkuta, llank'ayninkuta, ñak'ariyninkuta, noqapaq mana sayk'uspa hawarunakunaman qespiyta apamusqankumanta?

5. Hawarunakuna, yuyarirqankichischu ñawpa rimanakusqay llatay judiokunamanta? Manan, aswanmá paykunata ñakarqankichis, cheqnikurqankichis, manataq paykunata yapamanta hatari-chiyta yuyarirqankichischu. Ichaqa, kikin umaykichismanmi kaykunata kutirichisaq; noqa Wiraqochaqa manan llaqtayta qonqarqanichu.

6. Huk Rimanakuy Qelqa, kapuwanchismi huk Rimanakuy Qelqa, manataqmi nesitanchischu astawan Rimanakuy Qelqata, nispa niq upakuna; kanmanchu qankunapaq Rimanakuy Qelqa judiokuna mana kankumanchu chayri?

7. Manachu yachankichis hukmanta aswan ashkhararaq llaqtakuna kasqanta? Manachu yachankichis noqa Wiraqocha Yayaykichis llapan runakunata kamasqayta, mamaqochaq wat'ankunapi kaqkunamanta yuyarisqayta; wichay hanaqpachapi, pachanpi kaq pachapi ima kamachisqayta; runakunaq wawankunaman rimayniy apamusqayta; ari, pachaq llapan llaqtankunamanpas?

8. Imanaqtinmi rimapakunkichis rimayniykunamanta astawan chaskinaykichismanta? Manachu yachankichis ish kay llaqtakunaq sut'inchayninku noqa Yaya kasqaymanta qankunapaq sut'inchaq kasqanta? hoq llaqtata hinallataq hoq llatataq yuyarisqayta? Chhaynaqa, hoq llaqtaman rimasqay kikin simikunallatataqmi hoq llaqtamanpas rimarini. Ishkaynin llaqtakuna kushka puriqtinkutaq, ish kaynin llaqtakunaq sut'inchayninkupas kushkalla purinqaku.

9. Kaytataq ruwani, ashkha runakunaman kaqla qayna p'unchawpas, kunan p'unchawpas, wiñaypaqpas kasqayta qhawachinaypaq; rimayniykunatatataq rimarini munayniyman hina. Huk rimayta rimasqayraykuqa, manan yuyanaykichischu manaña astawan rimayta atinayta; ruwayniyqa manan tukusqaraqchu, manataqmi tukusqachu kanqa runaq tukukuyninkama, nitaq chay pachamantapas, ni wiñaypaqpas.

10. Chhaynaqa, huk Rimanakuy Qelqayoq kasqaykichisrayku-

qa, manan yuyanaykichischu llapan rimayniykunayoq kasqanta; manataqmi yuyanaykichischu mana astawan qelqachisqaytaqa.

11. Llapan runakunatan kamachini, intiq lloqsimunan qayllapi-pas, intiq haykunan qayllapipas, qayllarinapipas, qheparinapipas, mamaqochaq wat'ankunapipas paykunaman rimasqay simikunata qelqanankupaq. Qelqasqa kanan qelqakunamantan runakunata taripasaq, sapanka runata ruwasqanman hina, qelqasqa kasqan-man hina.

12. Rimarisaqmi judiokunaman, paykunataq chayta qelqanqa-ku; rimarillasaqtaqmi nefitakunamanpas, paykunataq chayta qel-qanqaku; Israelpa wasinmanta huk hallp'aman pusasqay hukkaq ayllukunamanpas rimarillasaqtaq, paykunataq chayta qelqanqaku; kay pachamanta kaq llapan llaqtankunamanpas rimarillasaqtaqmi, paykunataq chayta qelqanqaku.

13. Hinataq, judiokuna nefitakunaq rimayninkunayoq kanqa-ku; nefitakunataq judiokunaq rimayninkunayoq kanqaku; nefita-kuna judiokunapiwantaq, Israelmanta chinkasqa ayllunkunaq ri-mayninyoq kanqaku; Israelmanta chinkasqa ayllukunataq nefita-kunaq judiokunaqpiwan rimayninkunayoq kanqaku.

14. Israelpa wasinmanta kaq llaqtaytaq, wasinkuman huñusqa kanqaku, paykunaq kaq hallp'ankuman; rimayniypas hukllapin huñusqa kanqa. Israelpa wasinmanta kaq llaqtay kontra, rimayniy kontrapawan maqanakuqkunamantaq qhawachisaq, Yaya kasqay-ta, ch'awchunta wiñaypaq yuyarinaypaq Abrahamwan rimanakus-qayta.

31 T'AQA

Nephiq unanchayninkuna qatillan. Imanaqtin Qespicheq unuchasqa kanan. Siwkneq llañu ñan.

1. Kunantaq noqa Nephi, ancha munasqay wawqeykuna, qankunaman unanchayta tukuni. Manan qelqayta atinichu, icha-qa, huk chikallanta, yachanin cheqaqtapuni chaykuna kananta; manataqmi qelqayta atinichu, ichaqa huk chikallanta wawqey Ja-kobpa rimayninkunamanta.

2. Hinaqa, allinñan qelqasqaykuna; ichaqa, huk chikantawan-mi rimarinay Cristoq yachachiyninkunamanta; chhaynaqa, sut'ita-puni rimarisaykichis, unanchayniykuna sut'i kasqanman hina.

3. Anchatapunin nunay kusikun sut'in kaqpi; khaynatan Wira-qocha Yaya llank'an runakunaq wawankuna purapi. Wiraqocha Yayaqa hamut'anapaqmi k'anchayta qon; runakunamantaq rima-rin siminkuman hina, hamut'anankupaq.

4. Chhaynaqa, yuyarinaykichistan munayman, Wiraqocha qhawachiwasqan unanchaqmanta qankunaman rimarisqayta; paytaq Yayaq Chitanta unuchanqa, Paytaq runakunaq huchankunata horqonqa.

5. Kunantaq Yayaq Chitan qollanan kaspa, llapa chaninchayta hunt'akunanpaq un unuwan unuchasqa kanan chayri, hayk'atawanraqmi noqanchis nesitanchis mana qollanan kaspa unuchakunanchispaq, ari, unuwanpuni?

6. Kunantaq qankunata tapusaykichis ancha munasqay wawqeykuna, imaynatan Yayaq Chitan llapa chaninchayta hunt'arqan unuwan unuchakuspa?

7. Manachu yachankichis qollanan kasqanta? Qollananña Pay kargan chaypas, runakunaq wawankunamanmi qhawachirgan, Taytaq ñawpaqenpi Pay kikin aychaman hina ullpuykukusqanta; Taytamantaq sut'inchan, kamachiyninkunata waqaychananpaq kasukuq kananta.

8. Unupi unuchasqa kasqan patamantaq Qollanan Nuna Pay pataman urayamurqan urpi phurmapi.

9. Runakunaq wawankunamantaq qhawachin, ñanpa siwkneq kayninta, punkuq k'ikllu kaynintawan; chaynintataq paykuna haykunanku, ñawpaqninkuta imayna ruwanata Pay qhawachispa.

10. Paytaq runakunaq wawankunaman nirqan: Qatikuwaychis, nispa. Chhaynaqa ancha munasqay wawqeykuna, Jesus qatikuyta atiswanchu, Taytaq kamachiyninkunata waqaychananchispaq mana munayniyoq kaspa?

11. Taytataq nirqan: Kutiriyichis, kutiriyichis huchaykichiskunamanta, Ancha Munasqay Churiypa sutinpitaq unuchasqa kaychis, nispa.

12. Khaynatan Churiq arunpas hamuwarqan: Sutiypi unuchakuqmanqa, Qollanan Nunatan payman Tayta qonqa noqaman hina; chhaynaqa qatikuwaychis, ruway rikuwasqaykichistataq ruwaychis, nispa.

13. Hinaqa, ancha munasqay wawqeykuna, yachanin, Churita qatikunkichis tukuy sonqowan, mana ishkay uya kaspa, Yayaq ñawpaqenpi mana q'otuspa ima chayqa, ichaqa, cheqay munaywan, huchaykichismanta kutirimuspa, unuchakuywan Cristoq sutinta hoqariyta munasqaykichista Taytaman sut'inchaspa; ari, Wiraqochaykichista, Qespicheqniykichista rimayninman hina unukama qatikuspaykichis chayqa, chaymi Qollanan Nunata chashkinichis; ari, chay patamanmi ninawan, Qollanan Nunawan ima unuchay hamun; hinamantataq angelkunaq siminwan rimayta

atinkichis, Israelpa Qollananmantaq yupaychaykunata qapariyta atinkichis.

14. Ichaqa ancha munasqay wawqeykuna, khaynatan Churiq arun chayamuwarqan: Huchaykichismanta kutirimusqaykichis pataman, Taytamantaq sut'incharqankichis kamachiyniykunata wawaychay munasqaykichismanta, unupi unuchakuspa, hinaspataq chashkirqankichis ninawan, Qollanan Nunawan ima unuchayta, hoq mosoq simiwantaq rimayta atiwaqchis chayqa; ari, angelpa siminwan, chay patamantaq noqata mananchawankichisman chayqa, aswan allinmi qankunapaq kanman karqan mana reqsiwanaykichis, nispa.

15. Khaynatataq huk aruta Taytamanta uyarirqani: Ari, Ancha Munasqaypa rimayninkunaqa cheqaqmi, iñiysapataq. Tukukuykama takyaqmi qespichisqa kanqa, niqta.

16. Kunantaq ancha munasqay wawqeykuna, kayraykun kayta yachani, kawsaq Yayaq Churinpa qhawachisqan qatikuypi mana tukukuykamachu runa takyanqa chayqa, manan qespichisqachu kanqa.

17. Chhaynaqa, Wiraqochaykichispa, Kutichikapuqniykichispa ima ruwanan rikusqayta qankunaman nisqayta ruwaychis; kayraykun kaykuna qhawachiwasqa karqan, mayqen punkunta haykuyta yachanaykichispaq. Haykunaykichis punkuqa huchamanta kutirimuy, unupi unuchakuypiwami; hinamantaq ninawan Qollanan Nunawan ima huchaykichiskunapaq panpachay hamun.

18. Hinamantaqmi kay wiñay kawsayman pusaq siwk Ilañu ñanpi qankuna kankichis; ari, punkuntan haykurqankichis; Taytaq, Churiq ima kamachiyninkunaman hinan ruwarqankichis; Qollanan Nunatataq chaskirqankichis, paytaq Taytamanta Churimantawan sut'inchan, Paypa ruwasqan promesa hunt'akunanpaq—ñanninta haykuqtiykichisqa chashkinaykichista.

19. Kunantaq ancha munasqay wawqeykuna, kay siwk Ilañu ñanman haykusqaykichis pataman tapuykichisman—llapanñachu ruwakurqan? Noqataq nisaykichis, manan nispa; manan kaykama hamuwaqchischu karqan, Cristoq rimaynin mana kanmanchu karqan chayqa, Paypi mana kuyureq iñiywan, qespichiypaq atiy-sapaq ruwayninkunapi k'irarikuspa ima chayqa.

20. Chhaynaqa ñawpaqmanmi rinaykichis Cristopi allinta sayapakuspa, suyakuypa hunt'asqa k'anchariyniyok kaspas; Yayaq munakuyninwan, runakunaq munakuyninkuwan ima kaspas. Chhaynaqa, ñawpaqman qatikunkichis chayqa, Cristoq rimayninpi kusikuspa, tukukuykamataq takyaspa chayqa, khaynatan Tayta nin: Wiñay kawsayniyoqmi kankichis, nispa.

2 NEPHI 32

21. Kunantaq ancha munasqay wawqeykuna, kaymi ñan; manataqmi hukniraq ñan kanchu, nitaq huk sutipas hanaqpachaq urayninpi qosqa kanchu, chaywan runakuna Yayaq qhapaqsu-yunpi qespichisqa kanankupaq. Kunanqa, kaymi Cristoq yachachiyin, kay sapallantaqmi Taytaq, Churiq, Qollanan Nunaqpiwan (kaytaq huk Yayalla, mana tukukuyniyog) cheqaq yachachiyiniku. Hinataq kachun.

32 T'AQA

Nephiq unanchayninkuna qatillan. Angelkunaq siminku. Qollanan Nunaq kamaynin.

1. Kunantaq ancha munasqay wawqeykuna, ñanninta haykusqaychis pataman ima ruwanaykichismanta chikallantapas sonqoykichispi yuyayaymanasqaykichistan yuyayni; ichaqa, imanaqtinmi kaykunata sonqoykichispi yuyaymanankichis?

2. Manachu yuyarinkichis—Qollanan Nunata chashkisqaykichis patamanqa angelkunaq siminkuwanmi rimawaqchis, nispa nisqayta? Kunanri, imaynatataq kachakunaq siminkuwanri rimayta atiwaqchis, mana Qollanan Nunawanri?

3. Qollanan Nunaq atiyinwanmi angelkunaqa rimanku; chhaynaqa, Cristoq rimayninkunatan rimanku. Chhaynataq qankunata nirqaykichis, kusikuychis Cristoq rimayninkunapi, nispa; Cristoq rimayninkunan nisunkichis llapan ima ruwanaykichistapas.

4. Kay simikunata rimasqay pataman kaykunata mana hamut'ankichischu chayqa, mana mañakuspaykichisrayku, mana takasqaykichisrayku iman chay hina kanqa; chhaynaqa, manan k'anchaymanchu apamusqa kankichis, ichaqa, tutayaqpin wañunaykichis.

5. Hinaqa, yapamantan nisaykichis—ñanninta haykunkichis, Qollanan Nunatataq chashkinkichis chayqa, paymi qhawachisunkichis llapan ruwanaykichiskunata.

6. Cristoq yachachiyinmi kay, manataq astawan yachachiy qosqachu kanqa, ichaqa, qankunaman aychapi Pay kikin qhawachikusqan patamanña. Aychapi Pay kikin qankunaman qhawachikusqan patamantaq, qankunaman nisqasuykichiskunata ruwanaykichispaq kallpachakunkichis.

7. Kunantaq noqa Nephi, mana astawan niyta atinichu, Nunan rimayniyta hark'an; runakunaq mana kreyiyninkurayku, huchallikuyninkurayku, mana yachayninkurayku, ch'ila umankuraykupiwanataq llakikunaypaq saquesqa kani. Manan yachayta mash-

kankuchu, manataqmi ancha hatun yachayta hamut'ankuchu, paykunaman sut'intapuni qosqa kaqtin, rimay hina ch'uyaña kanman chaypas.

8. Kunantaq ancha munasqay wawqeykuna, rikushanin sonqoykichispi yuyaymanasqaykichista, nanawantaqmi kaymanta qankunaman rimanay. Yayaman-rimarikuyta runaman yachacheq Nunata uyariwaqchis chayqa, yachawaqchismi Yayaman rimarikunaykichista; millay nunaqa manan runataqa yayaman-rimarikuyta yachachinchu, Yayaman mana rimarikunanpaqmi ichaqa payta yachachin.

9. Ichaqa, qankunata niykichis pasaqlla yayaman-rimarikunaykichista, amataq sayk'uychischu; amataq imatapas Wiraqochapi ruwaychischu, ichaqa, ñawpaqtaraq Taytaman Cristoq sutinpi rimarikuqtiykichisña, ruwayniykichista qankunapaq qollanachinapaq, nunaykichispa allin kayninpaq ruwayniykichis kananpaq.

33 T'AQA

Ripuspan Nephiq sut'inchaynin. Qelqaypiqa manan rimaypi hina ancha atiyniyoqchu. Llaqtanrayku mana-qasilla kasqan.

1. Kunantaq noqa Nephi, mana llapantachu qelqayta atini llaqtay purapi yachachisqa kasqanta; manataqmi rimaypi hina kallpasapachu qelqaypi kani. Qollanan Nunaq atiyinwan runa riman chayqa, Qollanan Nunaq atiyinmi chayta apan runakunaq wawankunaq sonqonkuman.

2. Ichaqa, askhan kanku Qollanan Nuna kontra sonqonku rumiyachiqkuna, hinataq mana paykunapi maypi kanan kanchu; chhaynataq ashkha qelqasqa imaymanakunata choqanku, yanqapaqtaq chayta kachinku.

3. Ichaqa, noqa Nephi qelqasqayta qelqarqani, ancha hatun chaninniyoqtataq kachini, llaqtaypaqpuni astawanqa. Pasaqllan paykunarayku p'unchawpi yayaman-rimarikuni, ñawiykunataq tutanpi sawnayta paykunarayku apiyachin; Yayaymantaq iñiypi rimarikuni, yachanitaqmi waqyakuyniyta uyarinanta.

4. Yachanitaqmi Payman rimarikuyniykunata, llaqtaypa allin kayninpaq Wiraqocha Yaya qollanachinanta. Usphu kayniypi qelqasqay rimaykunataq paykunapaq atiysapa ruwasqa kanqa; allin ruwanankupaqmi rimayniykuna paykunata inkitan, taytankunamanta paykunata yachachin; Jesusmanta riman, Paypi kreyinankupaq tukukuykamataq takyanankupaq ima paykunata inkitan, kaytaq wiñay kawsay.

5. Cheqaqpi sut'i kasqanman hinataq allin kallpawan hucha

kontra rimarin, chhaynaqa, manan pipas phiñarikunqachu qel-qasqay simikunawanqa, ichaqa saqraq nunanmanta kaq runallan.

6. Kusiqellpukunin sut'in kaqpi, kusiqellpukunin cheqaq kaqpi; kusiqellpukunin Jesusniypi, Paymi nunayta supay wasimanta kutichikapurqan.

7. Khuyapakuyniyuqmi llaqtaypaq kani, hatuntaq Cristopi iñiyuiy, askha mana ima qhelliyoq nunakunawan taripanan tiyananpi tupanaypaq.

8. Khuyapakuyniyuqmi judiopaq kani—Judio nispaqa nini, haqay hamusqay runakunamanta nisqayrayku.

9. Hawarunakunapaqpas khuyapakuyniyuqmi kani; ichaqa, manan mayqenkaqninkupaqpas suyakuyniy kayta atinmanchu, ichaqa Cristowan allichanakuqtillanku, k'ikllu punkunta haykuqtinku, wiñay kawsayman pusaq siwkneq ñanninta pureqtillanku; probakuna p'unchaw tukukunankama kay ñanta qateqtillanku ima.

10. Kunantaq ancha munasqay wawqeykuna, judiopas, pachaq tukukuyninkunapas, kay simikunata uyariychis, Cristopitaq kreyiychis; kay simikunapi mana kreyinkichischu chayqa, Cristopi kreyiychis. Cristopi kreyinkichis chayqa, kreyinkichismi kay simikunapi. Cristoq rimayninkunan, Paytaq kaykunata qowarqan, llapan runakunamantaq yachachin allin ruwanankupaq.

11. Mana Cristoq rimayninkunachu chayqa, qankuna taripaychis, Criston qhepa p'unchawpi atiywan ancha hatun kusiqellpuwan ima qhawachisunkichis, kaykuna rimayninkuna kasqanta. Qankuna noqapiwantaq uyapura sayarisunchis taripananpa ñawpaqenpi; hinataq usphuña karqani chaypas kaykuna qelqanaypaq Paypa kamachisqan kasqayta yachanaykichis.

12. Taytamantaq rimarikuni Cristoq sutinpi, noqanchismanta ashkha, manaña llapanchischu chaypas, chay ancha hatun qhepa p'unchawpi qhapaq-suyunpi qespichisqa kananchispaq.

13. Kunantaq ancha munasqay wawqeykuna, Israelpa wasinmanta llapan kaqkuna, pachaq llapan k'uchunkuna, qankunamanmi rimariykichis, ñut'u hallp'amanta qapariqpa arun hina: Qankunawanña allillan, chay hatun p'unchaw hamunankama.

14. Yayaq sumaq kayninmanta mana malliqkuna, judioq rimayninkuna mana yupaychaqkuna, ni rimayniykunatapas, nitaq Yayaq Chitanpa siminmanta lloqsimunan rimayninkunatapas yupaychaqkuna, wiñaypaqmi qankunamanta kacharparikuni; qhepa p'unchawpin kay rimaykuna kondenasunkichis.

15. Kay pachapi inturisqaytaq taripana tiyanaq ñawpaqenpi qankuna kontra apamusqa kanqa; khaynatan Wiraqocha kama-

chiwarqan, kasunaytaqmi. Hinataq kachun.

ENOSPA QELQAN

Nefitakunamata lamanitakunaman huk qelqa lloqsimunanmanta Wiraqochaq promesan. Kay ishkay llaqtakunaq imayna kayninku, awqanakuyininkunapiwan.

1. Hinataq noqa Enos, taytay chanin runa kasqanta yachani—siminpitaq yachachiwarqan, Wiraqochaq yachayninpi anyayninpiwan—kayraykutaq saminchasqa Yayaypa sutin kachun.

2. Willasaykichistaqmi huchaykuna panpachayta manaraq chaskispay Yayaq ñawpaqenpi kallpachakusqayta.

3. Sach'a-sach'akunapi uywakuna chakuq rirqani, hinataq wiñay kawsaymanta, qollanankunaq kusikuyninkumantawan taytapa rimasqan pasaqlla uyarisqay rimaykuna sonqoyman ukhutapuni haykurqan.

4. Nunaytaq yarqasqa karqan, hinaspataq Kamaqniypa ñawpaqenpi qhonqorikurqani, ancha hatun yayaman-rimarikuypa mañakuypiwantaq kikiy nunaypaq qaparirqani; p'unchawnintintaq Payman waqyakurqani; ari, tuta hamuqtintaq seqachirqaniraraq aruyta hanaqman, hanaqpachamantaq chayarqan.

5. Huk arutaq noqaman hamurqan: Enos, panpachasqan huchaykikuna, saminchasqataqmi kanki, nispa.

6. Noqa Enostaq yacharqani, Yaya mana llullakuy atinanta; chhaynataq, huchaykuna pichasqa karqan.

7. Noqataq nirqani: Wiraqochaq, imaynatan kay ruwakun, nispa.

8. Paytaq niwarqan: Mana hayk'aqpas rikusqayki ni uyarisqayki Cristopi iñiykiykiraykun. Askha watakunataq pasanqa ay-chapi Pay kikin manaraq qhawachikushaqtin; chhaynaqa, riy, iñiykiykin alliyachisunki, nispa.

9. Kunantaq kay rimaykunata uyareqtiy, wawqeykuna nefitakunaq allin kayninkuta munayta qallarirqani; chhaynataq paykunarayku tukuy nunayta Yayaman seqariyachirqani.

10. Hinataq, khaynataq nunapi kallpachakushanaykama, Wiraqochaq arun yuyayniyman yapamanta hamurqan: Kamachiyniykuna waqaychaypi k'uchiy-k'uchi kasqankuman hinan wawqeykikunamanta watukusaq. Paykunamanmi kay hallp'ata qorqani, qollanantaqmi kay hallp'a; manataqmi kay hallp'ata ñakasaqchu, ichaqa millay ruwayninkuraykulla; chhaynaqa, imayna nisqayman hinan wawqeykikunaman hamusaq; huchallikuyninkunataq

umanku pataman llakikuywan apamusaq, nispa.

11. Kay rimaykunata noqa Enos uyarisqay patamantaq, Wiraqochapi iñiyiniy mana kuyoq kayta qallarirqan. Wawqey lamanitakunaraykutaq askha kallpachakuywan Payman rimarikurqani.

12. Hinataq, Yayaman k'uchillaña rimarikusqay pataman, llank'asqay patamanwan, Wiraqocha niwarqan: Iñiyiniykiraykun munasqaykiman hina qosqayki, nispa.

13. Kaytataqmi Paymanta munarqani: Sichus llaqtay nefitakuna huchapi urmankuman, hinaspataq qollunkuman, manataq lamanitakuna qolluchisqachu kankuman chayqa, llaqtay nefitakunaq qelqanta Wiraqocha Yaya waqaychananpaq, qollanan mankinpa atiyninwanña kanman chaypas; hayk'aqllapas hamuq p'unchawkunapi lamanitakunaman apamusqa kananpaq, ichapas qespichisqa kayman apamusqa kanankupaq—

14. Kunan p'unchawkanaqa, yanqapaqmi yapamanta cheqay iñiyman paykunata apamunaykupaq kallpaychakusqayku karqan. Phiñakuyninkupitaq sullullchakurqanku atinkuman chayqa, noqaykuta, qelqaykuta, taytaykuq llapan kustumbrenkutawan chinkachinankupaq.

15. Chhaynataq, Wiraqocha Yaya qelqaykuta waqaychay atisqanta yachaspay, pasaqla Payta waqyakurqani: Imataña iñiywan Cristoq sutinpi mañakunki chayta chaskinaykipaq kreyispayki chayqa, chaytan chaskinki, nispan Pay niwarqan.

16. Iñirqanitaqmi, Yayatataq waqyakurqani qelqakunata waqaychananpaq. Noqawantaq rimanakurqan, Pay kikin chanin pachapi lamanitakunaman chaykunata apamunanpaq.

17. Noqa Enostaq yacharqani, ruwasqan rimanakuyman hina kananta; chhaynataq nunay samarqan.

18. Wiraqochataq niwarqan: Taytaykikunapas kaytan mañakuwarqanku, iñiyinkuman hinataq paykunapaq ruwasqa kanqa; qanpa hinan iñiyinku karqan, nispa.

19. Hinataq kunan noqa Enos, Nephiq llaqtan chawpinta rirqani, hamunan imaymanakunamanta unanchaspa, uyarisqaymantarikusqaymatawan sut'inchaspa.

20. Sut'inchanitaqmi, Nephiq llaqtan mana sayk'uypuni, Yayapi cheqay iñiyman lamanitakunata apamunankupaq llank'asqankuta. Ichaqa, yanqapaqmi llank'ayniyku karqan; mana kuyoqmi cheqnikuyninku karqan; mana allin kayninkuwan pusasqan karqanku, salqa, phiñallaña, yawar munaq runakuna; rikch'aykunayoq, qhelli kayniyoqpiwan hunt'a; aycha mikhuq uywakunata mikhuspanku, karpakunapi tiyaspanku; qaramanta llañu chunpita weqawninkuman watakuspankutaq q'ara umantin purunpi muyu-

MOSIAH 2

pakurqanku. Peqtapi, chanpikunapi, hachakunapiwantaq allin makipuni karqanku. Ashkhataq paykunamanta hanku aychallata mikhuqku; pasaqllataq noqayku sipiyta mashkarqanku.

21. Hinataq Nephiq llaqtan hallp'ata chakrarqan, imaymana granokunata rurukunatawan wiñachirqanku; huñu-huñuta uywakunata, huñu-huñutataq imaymana uywakunata, kabrakunata, salqa kabrakunata, askha kawallokunata ima uywarqanku.

22. Ashkhapunitaq unanchaqkuna noqayku purapi karqan. K'ullu umayoqtaq runakuna karqanku, sasa hamut'ana.

23. Manataq imapas karqanchu, ichaqa ancha k'aracheq kaylla, awqanakuykunamanta, maqanakuykunamanta, qolluymantawan yachachiy unanchallaypiwan; pasaqla wañuyanta, wiñay-wiñay hayk'a unay kananmanta, Yayaq atiyinmanta taripayninmantawan, kay llapa imaymanakunamantawan yuyarichiy, Wiraqochaq manchakuyninpi kachinapaq pasaqla paykunata yuyarichiy. Manan pishichu kaykunamanta karqan, ancha sut'in rimaykunallan wañuyman usqhaylla rinankumanta paykunata hark'arman. Khaynatataq paykunamanta qelqani.

24. Awqanakuykunatataq p'unchawniykunapi rikurqani, nefitakuna lamanitakunawan.

25. Hinataq machuyayta qallarirqani, pachak qanchis chunka isqonniyoq watakunataq pasarqan, Jerusalemanta taytayku lloqsimusqanmanta pacha.

26. Rikurqanitaqmi asllaman ayapanpayman urayunayta, Yayaq atiyinpa llank'asqantaq karqani, kay llaqtaman unanchanaypaq, yachachinaypaq, Cristopi kaq cheqaqman hina Wiraqochaq rimayninta willanaypaq. Llapan p'unchawniykunapitaq chaykunata willarqani, chaypitaq kusikurqani pachaq imaymanankunamanta astawanraq.

27. Asllamantaqmi maypi samanay kasqanman risaq, chaytaq Kutichikapuqniywan; yachanin Paypi samanayta. Anchatapunitaqmi kusikuni, wañuq kaqniy mana wañuqwan churakunan p'unchawpi, Paypa ñawpaqenpitaq sayasaq; hinaspataq ancha hatun kusikuywan uyanta rikusaq, Paytaq niwanqa: Noqaman hamuy saminchasqa, kanmi maypi kanaykipaq allichasqa Taytappa wasinkunapi, nispa. Hinataq kachun.

MOSIAHQ QELQAN

2 T'AQA

Llaqtanman rimarinanpaq inka Benjamin huk torreta ruwachin. Yaya manchakuq inkaq chanin kamachiynin.

MOSIAH 2

1. Hinataq taytanpa kamachisqanman hina Mosiah ruwaqtin, llapan hallp'antinpi rimarimusqan patamanwantaq, tukuy hallp'antinmanta runakuna hamurqanku, Wiraqochaq Wasinman rinankupaq, paykunaman inka Benjamin rimarinan simikunata uyarinankupaq.

2. Ancha askha kaqtinkutaq mana paykunata yuparqankuchu; anchatapunitaq kay hallp'api mirasqaku kallpachakusqaku ima chayqa.

3. Uywankuq phiwi uñankutataq apamurqanku, Moisespa kamachisqa-siminman hina arpayta ruphasqa munachiytawan munachinankupaq,

4. Jerusalem hallp'amanta paykunata horqomusqanrayku, awqankunaq makinkunamanta paykunata horqosqanmanta, chanin runakunata yachacheqninkupaq churasqanmanta; Zarahemla hallp'api sumaq kawsay hatarichiq, Yayaq kamachiyninkuna waqaychanankupaq yachacheq, kusikuspanku Yayaman runakunamanwan munakuyniyuq hunt'asqa kanankupaqwan, chanin runata inkanku kananpaq churasqanmantawan Wiraqocha Yayankuta añaychanankupaq.

5. Hinataq Wiraqochaq Wasinman paykuna hamuqtinku, muyureqnintinpi karpankuta hatarichirqanku, sapanka runa ayllunman hina; paykunataq karqanku: Warminku, churinku, ususinku, paykunaq churinku ususinkupiwan, kurakmanta sullk'a kaqman; sapanka ayllukunataq hoqkunamanta t'aqasqa karqanku.

6. Karpankutataq Wiraqochaq Wasinpa muyureqninpi hatari-chirqanku, sapanka runaq karpanpa punkuntaq Wiraqochaq Wasinman qhawaq karqan; chhayna kaqtin, karpallankupi kspanku, paykunaman inka Benjamin rimarinan simikunata uyarinankupaq;

7. Runakuna askhapuni kaqtintaq inka Benjaminqa, mana llapankutachu yachachiyta atinman karqan Wiraqochaq Wasinpa perqankuna ukhupi, chayraykutaq huk torreta ruwachirqan, paypa rimarinan simikunata runankuna uyariyta atinankupaq.

8. Hinataq payqa, llaqtanta torremanta rimariyta qallarirqan; runakuna askhapuni kaqtinkutaq, mana llapankuchu rimayninkunata uyariyta atirqanku, chayraykutaq rimasqan simikunata qelqachirqan, arun mana uyariy atiqkunaman apachinanpaq, paykunapas rimayninkunata chaskinankupaq.

9. Kaykunataqmi rimasqan qelqachisqan ima simikuna kanku: Wawqeykuna, llapan huñunakuqkuna, kunan p'unchaw qankunaman rimarinay simikunata uyariy atiqkuna. Manan qankunaman rimarinay simikunawan pukllanaykichispaqchu kayman hamunaykichispaq kamachirqani, ichaqa, uyariwanaykichispaq, rinriyki-

MOSIAH 2

chista kicharipa uyarinaykichispaq, songoykichista hamut'anaykichispaq, umaykichistataq Yayaq pakasqa imaymanankuna qankunaman pashkarisqa kananpaq.

10. Manan manchakuwanaykichispaqchu kayman hamunaykichispaq kamachirqaykichis, nitaq noqa kikiymanta wañuq runamanta aswan kanayta yuyanaykichispaqtaqchu.

11. Ichaqa, qankuna hinan kani, runa-kurkuypi yuyaypi ima imaymana kallpawañuykunaman watasqa. Chaypiwanpas kay llaqtaq akllasqanmi karqani, taytaypa sapaqchasqan, Wiraqochaq makinpa saqesqantaq karqani, kay runakunaq kamachiqninku, inkanku ima kanaypaq; mana imawanpas tupachina atiyinwan-taq waqaychasqa karqani, Wiraqochaq qowasqan tukuy kallpaywan, umaywan, atiyiniywan qankunata sirvinaypaq.

12. Qankunataq niykichis—kunan p'unchawkaman p'un-chawniykunata qankunata sirvinaypaq kacharisqa karqani, manataqmi qorita, qolqeta ni ima qhapaqyaykunatapas qankunamanta mañakurqanichu;

13. Manataqmi kacharirqanichu ch'achana wasikunapi wish-q'asqa kanaykichista, nitaq qankuna pura hark'anakunaykichistapas, nitaq runa wañuchinaykichistapas, suwanaykichistapas, nitaq map'akuykuna ruwanaykichistapas. Manataqmi kacharirqanichu, ni ima millay ruwaykunata ruwanaykichistapas; yachachirqaykichistaqmi Wiraqochaq kamachiyninkunata, lliw imaymanakunapi Paypa kamachisqasuykichista waqaychanaykichispaq—

14. Noqa kikiypas makiywanmi llank'arqani qankuna sirvinaypaq, impuestokunawan mana q'epipasqa kanaykichispaq, mana ima sasa apanakuna qankunaman hamunanpaq—kay llapan imaymanakuna rimasqaymantataq, qankuna kikiykichis kunan p'un-chaw sut'inchaq kankichis.

15. Chaypiwanpas wawqeykuna, manan yupaychakunaypaqchu kaykunata ruwarqani, manataqmi qankunata tunpanaypaqchu kaykunata nini chaywan, ichaqa, kunan p'unchaw ch'uya luriwan Yayaq ñawpaqenpi kutichiy atinayta yachanaykichispaqmi kay imaymanakunata niykichis.

16. Qankunata niykichis: Manan, qankunaq sirvisioykichispi p'unchawniykunata pasarqani nisqayraykuchu yupaychakuyta munani; Yayaq sirvisionpin karqani.

17. Kaykunataq niykichis, yachaysapa kayta yachanaykichispaq; runamasiykichis sirvisionpi kaspaykichisqa, Yayaykichispa sirvisionpi kasqaykichista yachanaykichispaq.

18. Inkanchis nispan waqyawarqankichis; noqataq, inkanchis nispa waqyasqaykichis, qankuna sirvinaypaq llank'ani; chhaynari,

MOSIAH 2

manachu qankuna llank'anaykichis sirvinakunaykichispaq?

19. Noqataq, inkanchis nispa waqyasqaykichis, sirvisioykichispi p'unchawninkunata pasachirqan, chaypiwanpas, Yayaq sirvisiolanpi kaspá qankunamanta añaychayta chaskini chayri, hayk'atan hanaqpachapi Inkaykichista añaychanaykichis!

20. Qankunata nisaykichis wawqeykuna, tukuy nunaykichispa kallpanwan kamasoqniykichis, waqaychasoqniykichis, allillan kachisoqniykichis, kusichisoqniykichis, qankuna pura sumaq kawsayniyoq tiyanaykichispaq qosoqniykichis Yayaman llapa añaychayta yupaychaytawan qowaqchis chayqa—

21. Qankunataq niykichis—qallariymantapacha kamasoqniykichista, munayniykichisman hina ruwanaykichispaq kuyurinaykichispaqwan samariyta qospasuykichis, p'unchawmanta p'unchawman waqaychasoqniykichista, huk raturamanta hukkaqman yanapasosqniykichistawan sirviwaqchis chayqa—niykichis, Payta tukuy nunaykichiswan sirviwaqchis chaypas, mana sirveq warmaraqmi kawaqchis.

22. Kamachiyninkunata waqaychanallaykichistataqmi qankunamanta Pay mañakun. Paytaq prometirqasunkichis, kamachiyninkunata waqaychawaqchis chayqa, kay hallp'api t'ikarinaykichista; manataqmi Payqa kuyurinchu chay nisqanmanta; chhaynaqa, kamachiyninkunata waqaychankichis chayqa, saminchasunkichismi, t'ikarichisunkichistaqmi.

23. Nawpaqtaqa, Paymi kamarqasunkichis, kawsayniykichistaq qorqasunkichis, chaymantataq Payman manu kankichis.

24. Ishkay kaqpitaq, kamachisqasuykichisman hina ruwanaykichistan qankunamanta suyan, chay ruwasqaykichismantataq chay kikinpacha saminchasunkichis; chhaynatataq Pay chanincharqasunkichis. Manuraqtaqmi Payman kankichis, kunanpas kankichis, kallankichistaqmi wiñay-wiñaypaqpas; chhaynari iman kapusunkichis kikiykichis yupaychakunaykichispaq?

25. Kunantaq tapuykichis, atiwaqchischu qankuna kikiykichismanta imallatapas niyta? Manan nispan kutichisakichis. Manan niyta atiwaqchischu pachaq ñut'u hallp'an hinallapas kasqaykichista, chaypiwanpas ñut'u hallp'amantan kamasqa karqankichis, ichaqa, kamasoqniykichispan chaykuna.

26. Noqa kikiypas, inkanchis nispa waqyasqaykichis, manan qankuna kikiykichismanta aswan allinchu kani, noqapas hallp'amantan kani. Rikushankichistaqmi machu kasqayta, pachamanman kay wañuq runa-kurkuyta haywanaypaq hinaña kasqayta.

27. Chhaynaqa—qankunata sirvirqaykichis, Yayaq ñawpaqenpi

MOSIAH 2

ch'uya luriwan purispa nispa qankunaman nisqayta hina, chhay-nallatataqmi kunan p'unchaw huñunachimurqaykichis, mana ima huchayoq tarisqa kanaypaq, qankunamanta kamachiwasqan imaymanakunamanta Yayaq taripasqan kanaypaq sayareqtiy yawarniykichis noqa pataman mana hamunanpaq.

28. Qankunata niykichis: Yawarniykichismanta p'achaykunata maqchiy atinaypaqmi huñunachimurqaykichis, ayapanpayman urayunaypaqña kashaqtiy pachapi sumaqla urayunaypaq. Mana wañuq nunaytaq hanaqpachapi takiqkunawan chanin Yayaq yu-paychayninkunata takiypi huñunakunanpaq.

29. Astawanraqtaqmi qankunata nisaykichis, manaña astawan yachacheqniykichis nitaq inkaykichispas kayta atinayta qankunaman ninaypaq iman huñunachimurqaykichis.

30. Kunan pachapas anchatapunin llapan runa-kurkuy khata-tatan, qankunaman rimarinaypaq kallpachakushaqtiy; ichaqa, Wiraqocha Yayan yanapawan, qankunaman rimarinaypaq ima kachariwan; Paytaq kamachiwarqan, churiy Mosiah qankunaq inkaykichis, kamachisoqniykichis ima kasqanta kunan p'unchaw qankunaman ninaypaq.

31. Kunantaq wawqeykuna, kunan pachakama ruwasqaykichista hina ruwanaykichistan munani. Kamachiyniykunata, taytaya kamachiyninkunatawan waqaychasqaykichisman hina, chaytaq t'ikarirqankichis, awqaykichiskunaq makinkunaman urmanaykichismantataq hark'asqa karqankichis, chhaynallatataq churiypa kamachiyninkunata utaq paywan qankunaman qosqa kanan Yayaq kamachiyninkunata waqaychankichis chayqa, t'ikarinkichismi kay hallp'api, awqaykichiskunataq qankunapi mana ima atiyiniyoq kanqa.

32. Ichaqa llaqtay, qhawakuychis, qankuna purapiñataq maqanakuykuna hatarinman, taytay Mosiahq rimasqan millay nuna kasuymanñataq k'irarikuwaqchis.

33. Chay millay nuna kasuy munaq runapaqqa huk llakin kamachisqa kan; payta uyariyta munan, huchanpi qhepaspataq wañun chayqa, kikin nunanpaq kundenasiontan ukyan. Wiñay-wiñaypaq muchuytan chaninchayninta hina chaskin, pay kikinpa yachayninman kontrata Yayaq kamachisqa siminta mana kasuspa.

34. Qankunata nisaykichis, manan pipas qankuna purapi kanchu, ichaqa huch'uy erqechaykichiskunalla, kaykunamanta mana yachachisqa kaqkuna; hanaqpachapi Tataykichisman wiñaypaq-puni manu kasqaykichista mana yachaq, llapa kapusoqniyichista kasqaykichitawan Payman qonaykichispaq; Jerusalemanta tay-

tanchis Lehi lloqsimusqan pachakama qollanan unanchaqkunaq rimasqan unanchaykunayoq kaq qelqakunamanta yachachisqa kasqaykichis mana yachaqpiwan;

35. Kunankama taytanchiskunaq llapan rimasqankunamantapas. Wiraqochaq kamachisqantataqmi paykuna rimarqanku, chhaynaqa, chaninmi cheqaqtaqmi kaykuna.

36. Kunantaq qankunata nisaykichis wawqeykuna, kay llapan imaymanakunamanta yachasqaykichis yachachisqapiwan kasqaykichis pataman huchallikunkichis, rimasqa kasqan kontrataq rikichis, Wiraqochaq Nunanmantataq ayqerinkichis qankunapi mana kananpaq, yachaysapaq ñanninpi pusanasuykichispaq, saminchasqa, t'ikarichisqa, qhawasqa ima kanaykichispaq chayqa—

37. Qankunata nisaykichis, kaykuna ruwaq runaqa, sut'in ankallikuypin Yaya kontra hatarin; chhaynaqa, millay nuna kasunanpaqmi k'irarikun, llapa chaninchaypa awqantaq tukupun; chhayna kaqtintaq mana paypichu Wiraqocha tiyan. Manan Payqa tiyanchu qhelli wasikunapiqa.

38. Chhaynaqa, chay runa mana yuyayninman kutirimunmanchu chayqa, Yayaq awqan qhepaspataq wañun chayqa, hanaqpachaq chaninchayninpa mañakuyninmi mana-wañuq nunanta rikch'arichin pay kikinpa huchankuna yuyayman; chaytaq payta huch'uyyachin Wiraqochaq ñawpaqenpi, qhasqontataq huchawan, nanaywan, muchuywan ima hunt'achin, kaytaq mana wañuchiy atina nina, rawrayninkunataq wiñay-wiñaypaq seqarimun.

39. Kunantaq qankunata niykichis, khuyapakuyqa manan chay runapi derechuyoqchu; chhaynaqa, qhepa kaq imayna kayninqa, mana tukukuyniyochu muchuy awantaymi.

40. Qankuna machu runakuna, qankunapas wayna runakuna, rimayniykunata hamut'ay atiq huch'uy erqekunapas, sut'intan rimarirqaykichis hamut'ay atinaykichispaq. Huchallikuypi urmaqkunaq ancha millay kaypi kanankumanta yuyarinaykichispaq rikch'arinaykichistan Yayamanta mañakuni.

41. Astawanraqtaq—Yayaq kamachiyninkuna waqaychaqkunaq kusiy-kusi, saminchasqapiwan kayninkumanta yuyaykunaykichistan munani. Imaymanakunapin paykuna saminchasqa kanaku, kay kawsaypi kaqpipas, nunapi kaqpipas; tukukuykamataq takyanqaku chaytaq, hanaqpachapi chaskisqa kanqaku, chhaynataq, mana hayk'aq tukukuq kusikuypi Yayawan tiyanankupaq. Yuyariychis, yuyariychis kaykuna cheqaq kasqanta. Wiraqocha Yayan kaykunata rimarirqan.

MOSIAH 3

3 T'AQA

Inka Benjaminpa rimaynin qatillan. Cristomanta hoq unanchay. Ñak'ariymanta astawan rimarikun.

1. Yapamantataq wawqeykuna, uyariwanaykichispaq waqyari-ni, astawanraqmi qankunaman rimarinay kashan. Hamunan imaymanakunamantan qankunaman rimarinay kashan.

2. Qankunaman ninaykunaqa, Yayaq angelninpa yachachiwasqanmi. Paytaq niwarqan: Rikch'ariy, nispa; rikch'ariqtiytaq ñawpaqeypi pay sayashasqa.

3. Paytaq niwarqan: Rikch'ariy, qanman ninay rimaykunatataq uyariy. Ancha hatun kusikuypa sumaq willayninkunata qanman willanaypaqmi hamuni.

4. Uyarirqanmi Wiraqocha yayaman-rimarikuyniykikunata, chanin kasqaykitataq tariparqan, Paytaq qanman kachamuwarqan kusikunaykipaq; Ilaqtaykiman willanaykipaq, paykunapas kusikuywan hunt'asqa kanankupaq.

5. Hamushanmi pacha, manataqmi sinchi kharupichu kashan, atiywan kamacheq Llapa-atiyniyoq Wiraqocha—Paytaq karqan, kantaq wiñaymanta wiñaykama— hanaqpachamanta urayamunqa runakunaq wawankunaq chawpinman, hallp'amanta runa-kurkupitaq tiyanqa; runakuna purapitaq purinqa hatun utina ruwaykunata ruwaspa, onqoqkunata alliyachispa, wañusqakunata hatari-chispa, wist'ukunata purichispa, ñawsakunata qhawachispa, upakunata uyarichispa, imaymana onqoykunata alliyachispa.

6. Saqrakunataq qarqonqa, utaq runakunaq wawankunaq songonkupi tiyaq mana allin nunakunata.

7. Hinataq wateqaykunata, runa-kurkupi nanaykunata, yarqayta, ch'akiyta, sayk'uyta, runaq ñak'arinanmanta astawanraq mana wañuspa ñak'arinqa. Hunp'inanmantan yawar lloqsimunqa; chhayna hatunmi ñak'ariynin kanqa, Ilaqtanpa millay ruwayninkuna millay-millanankunarayku ima.

8. Jesucristo, Yayaq Churin, hanaqpachaq kay pachaq ima Taytan, qallariymantapacha imaymanakuna Kamaq nispa waqyasqataq kanqa. Mamanpa sutintaq Maria kanqa.

9. Paypa kaqmanmi hamunqa, Paypi iñeqtinku runakunaq wawankunaman qespiy hamunanpaq; kay tukuy imaymanakuna patamantaq, runata hinalla Payta kachinqaku, saqrayoqmi nispa-taq Payta maqanqaku, chakatanqaku ima.

10. Wañusqakunamantataq kinsaÑeqen p'unchawpi hatari-munqa, runakuna taripananpaqtaq sayashan. Kaykunaqa ruwasqa

kan, runakunaq wawankunaman chanin taripana hamunanpaq.

11. Adanpa kamachi-p'akisqanrayku urmaqkunaq huchankunarayku, paykunamanta Yayaq munayninta mana yachaspa wañuqkunarayku, utaq mana yachaspanku huchallikuqkunarayku ima yawarnin ñak'arinqa.

12. Ichaqa ay, ay haqay runamanta, Yaya kontra ankallikusqanta yachaq runamanta! Qespiyqa manan hamunqachu chhayna runamanqa, ichaqa, yuyayman kutirimuywan Wiraqocha Jesucristopi iñiywan imalla.

13. Runakunaq llapan wawankunaq chawpinmantaq Wiraqocha Yaya qollanan unanchaqkunata kachamurqan, llapa ayllukunaman, llaqtakunaman, simikunaman ima kay imaymanakunata willanankupaq; chaywan Cristoq hamunanpi kreyiqkuna, huchankuna panpachayta tarinankupaq; ancha hatun kusikuywantaq kusikunankupaq, paykuna puramanpas Pay hamunmanña karqan hina.

14. Chaypiwanpas k'ullu umayoq llaqtan kasqantan Wiraqocha Yaya rikurqan, paykunamantaq huk kamachisqa-simita qorqan, Moisespa kamachisqa-simintapuni.

15. Askha unanchakunata, utirayaykunata, rikch'aykunata, llanthukunatawanmi hamuyninmanta paykunaman qhawachirqan. Qollanan unanchaqkunapas rimarqankun paykunaman Wiraqocha hamunanmanta, chaypiwanpas, rumiyachirqankun sonqonkuta; manataqmi hamut'arqankuchu Moisespa kamachisqa-simin mana imapaqpas allin kasqanta, ichaqa yawarninpa ñak'ariyninllawan.

16. Huch'uy wawakunaña huchallikuyta atinkuman chaypas, manan qespichisqachu kankuman. Ichaqa, qanta niyki, saminchasqan paykuna kanku, nispa. Adanpichu utaq imayna kayninkuraykuchu paykuna urmanku, chhaynallatataqmi Cristoq yawarnin huchankunata ñak'arin.

17. Astawanraqtaq niyki, manan hukniraq sutiqa qosqachu kanqa, nitaq hukniraq ruwanakunapas, ni hukniraq ñanpas runakunaq wawankunaman qespiy hamunanpaq, ichaqa, Llapa-atiyniyoq Wiraqochaq Cristoq sutillanpi, sutillanwan.

18. Taripanmi Pay, chanintaqmi taripayninkuna; erqe kaspa llaraq wañuq erqetaq mana chinkancho. Ichaqa, kundenasiantan kikin nunankupaq runakunaqa ukyanku, k'umurikuspa huch'uy erqechakuna hina mana wakeqtinkuqa; Llapa-atiyniyoq Wiraqocha Cristoq yawarninpi yawarninwan ima qespiy kasqanta, kunan kasqanta, hamunantawan mana kreyinqakuchu chayqa.

MOSIAH 3

19. Kumun runaqa Yayaq awqanmi, hinataqmi karqan Adanpa urmayninmantapacha, hinallataqmi wiñay-wiñaypaqpas kanqa, Qollanan Nunaq munachiyninta mana uyakunqachu chayqa, kumun runa kasqanta wishch'uspa Wiraqocha Cristoq ñak'ariyninwan qollanan mana wakinqachu chayqa, erqe hina kasukuq, llanp'u songoyoq, ullpuykukuq, songo ñit'iykukuyniyoyq, muna-kuyniyoyq hunt'a, payman qonanpaq Wiraqochaq allin rikusqan imaymanakunaman kasukuy munaq, erqechu taytanta kasukun chhayna mana wakinqachu chayqa.

20. Astawanraqtaq: Hamunqan pacha, llapa llaqtakunaman, ayllukunaman, simikunaman, runakunamanwan Qespicheqpa yachaynin ch'eqerinanpaq.

21. Chay pacha hamuqtintaq, mana pipas Yayaq ñawpaqenpi mana ima huchayoqchu tarisqa kanqa—huch'uy erqechakunalla—ichaqqa, yuyayman kutirimuyllawan, Llapa atiyniyoq Wiraqocha Yayaq sutinpi iñiyllapiwan.

22. Kunan pachapas Wiraqocha Yayayki kamachisqasuyki imaymanakunata llaqtaykiman yachacheqtiykipas, manan mana-huchayoqchu paykuna tarisqa kanku Yayaq ñawpaqenpi, ichaqqa, qanman rimarisqay simikunaman hinallan.

23. Kunanqa, Wiraqocha Yaya kamachimuwasqan simikunatan rimarqani.

24. Khaynatan Wiraqocha nin: K'anchaq sut'inchaq hinan kaykuna sayanqa kay runakuna kontra, taripana p'unchawpi; chaywantaq taripasqa kanqaku, sapanka runa ruwasqanman hina, allinña utaq mana-allinña chay ruwaykuna kaqtinpas.

25. Ruwayninku millay kanqa chayqa, paykuna kikinkuq huchankuta, millay-millanankutawan rikunankupaqmi churasqa kanku, chaytaq Wiraqochaq ñawpaqenmanta ñak'ariyman mana tukukuyniyoyq muchuymanwan hitirichisqa, manañataq astawan chaymanta kutirimuyta atinkumanchu; chhaynaqa, kondensation ukyarqanku paykuna kikinkuq nunankupaq.

26. Chhaynaqa, Yayaq phiñakuyninpa qerunmanta ukyarqanku, manataq chay chaninchay paykunata mananchayta atirqanchu, hark'asqa rulumanta mikhusqanrayku Adanta urmananmanta mana mananchay atisqanta hina. Chhaynaqa, manañan hayk'aspas khuyapakuyqa paykunata kutichiyta atinmanchu.

27. Ñak'ariyninkutaq, ninayoq sallu rumiyoppiwan qocha hina; chaypa rawraynintaq mana qolluchiy atina, q'osñiynintaq wiñay-wiñaypaq seqarin. Chhaynatan Wiraqocha kamachimuwarkan. Hinataq kachun.

MOSIAH 4

4 T'AQA

Inka Benjaminpa rimaynin tukukun. Qespiypaq ima ruwanakuna. Yayamanta runakunaq imatapas suyasqanku. Qespi kaymanta, yachaysapa kaymanta, k'uchi kaymantawan rimarikun.

1. Hinataq, Wiraqochaq angelninpa payman qosqan rimaykunata inka Benjamin rimayta tukusqan pataman, muyureqnintinpi runakunata qhawarirqan, Wiraqochaq manchakuynin paykunaman urmasqanrayku panpaman urmasqankutataq rikurqan.

2. Aychakaq kayninkupitaq, ñut'u hallp'amanta aswan pishitaraq rikukusqaku karqan. Llapankutaraq huk arullapi khaynata kallpawan qaparirqanku: Khuyapakuyniyoy kay, Cristoq ñak'ariyninpa yawarnintaraq churaykuy, huchaykuq panpachayninta chaskinaykupaq, songoyku ch'uyanchasqa kananpaq. Hanaqpachata, kay pachata, llapa imaymanakunatawan kamaq, runakunaq wawankunaq chawpinman hamunan Yayaq Churin Jesucristopin iñiyku, nispa.

3. Hinaspataq, kay simikunata rimasqanku pataman, Wiraqochaq Nunan paykuna pataman urayamurqan, kusikuywan hunt'asqaraq karqanku, huchankuq panpachayninta chaskispanku, ch'uya songoyoy kaspanku, paykunaman inka Benjamin rimasqan simikunaman hina hamoq Jesucristopi ancha hatunpuni iñiy-ninku kasqanrayku.

4. Inka Benjamintaq yapamanta siminta kicharispas khaynata paykunaman rimariyta qallarirqan: Qochuykuna, wawqeykuna, aylluykuna, llaqtay ima, yapamantan uyariwanaykichista munani, qankunaman rimarinay puchuq simikunata uyarinaykichispaq, hamut'anaykichispaqwan.

5. Yayaq sumaq kayninmanta yachay, kunan p'unchaw mana imapas kasqaykichis yachayman rikch'arichisunkichis, mana ima chaninniyoy urmasqa kaymanwan chayqa—

6. Qankunata niykichis, Yayaq sumaq kaynin, mana imawapas tupachina atiyin, yachaysapa kaynin, songo ñit'iykukuynin, runakunaq wawankunapaq hatun ñak'ariynin yachaymanwan chayamurqankichis chayqa; hallp'a kamasqa kasqanmantapacha allichasqa ñak'ariytapas, Wiraqochapi kunfiyansan churaq runapaq qespiy hamunanpaq, k'uchiy-k'uchitaraq kamachiyninkuna waqaychaypi kanqa, kawsaynin tukukunankamataq (kay wañuq runa-kurkuq kawsaynintan nini) iñiyipi qatillanqa chayqa—

7. Noqaqa nini, kay runan qespiy chaskiq runa, pacha kamasqa kasqanmantapacha llapan runakunapaq; Adanpa urmasqanmantapacha kasqan runakunapaq, kunan kaq runakunapaq,

pachaq tukukunankama llapan kaq runakunapaqwan allichasqa kasqan ñak'ariywan.

8. Khaynatan qespiy hamun. Manataqmi hukniraq qespiyqa kanchu, ichaqa kay rimasqa kaqlla. Manataqmi hukniraq ima ruwanakunapas kanchu runakuna qespichisqa kanankupaq, ichaqa, qankunaman rimarisqay ruwanakunalla.

9. Yayapi kreyiychis. Pay kasqanta, hanaqpachapi, kay pachapiwan llapan imaymanakunata Pay kamasqanta kreyiychis. Hanaqpachapi kay pachapiwan tukuy yachaysapa, tukuy atiyniyoqpiwan kasqanta kreyiychis. Wiraqochaq llapan hamut'ay atisqanta runakuna mana hamut'ay atinankuta kreyiychis.

10. Yapamanta, huchaykichiskunamanta kutirimunaykichista, chaykunata wikch'unaykichista, Yayaq ñawpaqenpitaq k'umurikunaykichista ima kreyiychis; cheqaq sonqowan Paymanta mañakuychis panpachanasuykichispaq. Kunantaq, kaykunapi kreyinkichis chayqa, chaykunata ruwanaykichispaq kallpachakuychis.

11. Yapamantataq niykichis ñawpaq nisqayta hina, Yayaq kusiqellpun yachayman chayamusqaykichisman hina, utaq sumaq kayninta reqsirqankichis, munakuyninmantataq mallirqankichis, nunaykichispi ancha hatun kusikuy ruwaq huchaykichiskuna panpachayta chaskisqaykichisman hina, chhaynallatataqmi yuyarinaykichista munayman, wiñaypaqtaq yuyayniykichispi hap'iychis Yayaq hatunpuni kayninta, mana imapas kasqaykichista, sumaq kayninta, qankunarayku hatun-muchuyninta mana llunp'aq wawakuna; ullpuykukuychis ullpuykukuypa ukhunkunapi, sapa p'unchw Wiraqochaq sutinta waqyaspa, angelpa siminpa rimasqan hamuq imaymanakunapi iñiypi mana sayk'uy sayaspa.

12. Qankunata nisaykichis, kaykunata ruwankichis chayqa, wiñaypunin kusikunkichis, Yayaq munakuyninwan hunt'ataq kankichis, wiñaypunitaq huchaykichispa panpachayninta qhepachinkichis. Qankuna kamaqniykichispa kusiqellpun yachaypi, utaq chanin kaqta, cheqaq kaqta ima yachaypin wiñankichis.

13. Manataqmi qankuna pura k'irinakuyta munankichischu, ichaqa, sumaq kawsaypi tiyayllata, sapankaman paypa kasqanman hina qospa.

14. Manataqmi kacharinkichischu, yarqasqa, utaq q'alallapas wawaykichiskuna purinankuta. Manataqmi saqenkichischu Yayaq kamachisqa siminkunata p'akinankuta, ni paykuna pura maqanakunankutapas, churanakunankutapas; manataqmi taytanchiskunaq rimasqanku millay nuna, llapa chaninchaypa awqan, huchaq taytan saqrata servinankutapas.

15. Ichaqa, cheqaqpi, yuyaysapa kaypiwan ñanpi puriytan

paykunata yachachinkichis. Paykuna pura munanakunankuta sirvinakunankutawanmi paykunaman yachachinkichis.

16. Qankuna kikiykichispas, yanapayniykichis nesitaqkunata yanapankichis. Kapusoqniykichismantataq nesitaqkunaman qonkichis, manataqmi saqenkichischu mañakuq runa yanqapaq mañakunasuykichista, hawaman wañunanpaq qarqospa.

17. Ichapaschá ninkichis: Pay kikinmi ñak'ariyninta kay runa apakamurqan; chhaynaqa, sayachisaqmi makiyta, manataq mikhunaymanta payman qosaqchu, manataqmi ima kapuwasqanmantapas payman qosaqchu mana ñak'arinanpaq, chaninmi ñak'ariynin, nispa.

18. Ichaqa, qanmanmi niyki runa, pipas kayta ruwan chayqa, chay kikin runan yuyayninman kutirimunanpaq hatun llank'ayniyoq. Chay ruwasqanmanta mana yuyayman kutirimunqachu chayqa, wiñaypaqmi chinkanqa, manataqmi Yayaq qhapaqsuyunpi kayniyoqchu kanqa.

19. Manachu llapanchis mañapakuqkuna kanchis. Manachu llapanchis kikin Kaqmanta, Yayamanta imatapas suyanchis; llapa kapuwasqanchismanta, mikhuymanta p'achamanta, qorimanta, qolqemanta, imaymana qhapaqyaykunamantawan?.

20. Kunanpachapas sutintan waqyasharqankichis, huchaykichiskuna panpachananta mañakuspaykichis. Yanqapaq mañakunaykichistachu Pay kacharirqan? Manan. Nunantan qankuna pataman hich'arimurqan, sonqoykichis kusikuywan hunt'akunantataq kacharirqan, simiykichistataq upallachirqan mana rimariy atinaykichispaq; chhayna ancha hatunmi kusikuyniykichis karqan.

21. Kunantaq, kawsayniykichisrayku, lliw kapusoqniykichisrayku, kasqaykichisrayku ima dependisqaykichis Yaya, kamasoqniykichis Yaya, imataña—chaskinaykichispaq kreyispa—iñiypi mañakusqaykichista, allin kaqta qosunkichis chayri, hayk'atawanraqtaq kapusoqniykichismanta qonakunaykichis.

22. Mana wañunanpaq qankunamanta kapusoqniykichismanta mañakuq runata taripankichis kundenankichispiwan chayqa, hayk'a chaninmi kundenasionniykichis kanqa, mana qankunaq kaq, ichaqa Yayaq kaqninkunata mana qosqaykichisrayku; Yayallaqtaqmi kawsayniykichispas; chaypiwanpas manan mañakunkichischu, nitaq wanankichischu ruwasqaykichiskunamanta.

23. Qankunata niykichis, ay haqay runamanta! Kapusqanqa paywanmi wañunqa. Kay hallp'api kasqan imaymanakunawan qhapaq kaq runakunamanmi kaykunata nini.

24. Yapamantataq wakchakunaman nini, mana kapuqniyoqkunaman, ichaqa asllayoq kaspaykichis huk p'unchawmanta huk-

MOSIAH 5

kaqman kawsaqkunaman; mana kapusqasuykichisrayku mañakuqkunata mananchaqkunamanmi nini. Sonqoykichispi kayta niyaykichistan munayman: Mana kapuwasqanraykun mana qonichu, kapuwanman chayqa qoymanmi, nispa.

25. Kayta sonqoykichispi ninkichis chayqa, mana huchayoqmi qhepankichis, mana chayqa kundenasqan kankichis; chanintaqmi kundenasioniykichis, mana chaskisqaykichista munapakusqaykichisrayku.

26. Kunantaq qankunaman rimasqaykunarayku—mana huchayoq Yayaq ñawpaqenpi purinaykichispaq, huk p'unchawmanta hukkaqman huchaykichis panpachayta qhepachinaykichisrayku—wakchakunaman kapusqasuykichismanta qonaykichista munayman, sapanka runa kapusqanman hina: yaraqayniyoqta mikhuchispa, q'alalla kaqta p'achaspa, onqoqkunamanta watukuspa, alliyankuta mashkaspa, mashkaspa, nunapipas kay kawsaypi kaqipipas nesitasqankuman hina.

27. Rikuychistaq kay tukuy imaymanakuna yachaysapa kaypi, qayllallapiwan ruwakunanta; manan runamanta mañakunchu kallpan atisqanmanta aswantaraq p'itanantaqa. Ichaqa, k'uchin pay kanan, chaywan chanin kaqta aypananpaq; chhaynaqa, qayllallan llapa imaymanakuna ruwasqa kanan.

28. Pipas qankuna puramanta runamasinmanta mañakun chayqa, chay mañakusqanta rimanakusqanman hina kutichipunanta yuyarinaykichista munayman; mana chayqa huchallikunkichismi, ichapastaqchá runamasiykichistapas huchallichinkichis.

29. Tukunaypaqtaq—manan qankunata niykichismanchu, llapan huchallikuy atinaykichiskunataqa; imaymana ruwaykuna, ñankunapiwanmi kan, sinchi askha kaqtintaq mana yupayta atinichu.

30. Ichaqa, atinin qankunaman kay niyta: Qankuna kikiykichista, yuyasqaykichista, ruwayniykichistawan mana qhawakunkichischu chayqa, manataq Yayaq kamachiyninkunata waqaychanchischu, nitaq kawsayniykichispa tukukuyninkamachu Wiraqochanchis hamunanmanta uyarisqaykichispi ñiyniyoqchu kankichis chayqa, wañunaykichismi. Kunanqa runa, yuyariy, amataq qolluychu.

5 T'AQA

Inka Benjaminpa rimayninkunaq imayna chaskisqa kasqan. Runakuna yuyayninkuman kutirimunku, hinaspa Cristowan rimanakunku, Paypa sutinwan waqyasqataq kanku.

1. Hinataq kunan, khaynata llaqtanman inka Benjamin rima-

reqtin, paykunapuraman kacharqan, kreyirqankuchus paykunaman rimasqan simikunata, chayta llaqtanmanta yachayta munaspa.

2. Llapankutaq huk arullapi kutichirqanku: Ari, kreyiykun noqaykuman llapa rimariwasqaykiku simikunapi; yachaykutaqmi hinapuni. cheqaq ima kasqanta, Llapa-atyinyoq Wiraqochaq Nunan ancha hatun t'ikrakuyta noqaykupi utaq sonqoykupi apamusqanrayku, manañataq astawan millay kaq ruwanaykupaq munayniyku noqaykupi kanchu, ichaqa pasaqlla allin kaqta ruwanallaykupaq.

3. Noqayku kikiykupas, Yayaq mana tukukuq sumaq kayninan, Nunanpa rimariwasqankuwan ima chay hamunan imaymanakunamanta ancha hatun rikuyinyoq kayku; nesitakunman chaytaq llapan imaymanakunamanta unanchaykuman.

4. Inkanchis rimariwasqanchis imaymanakunapi iñiyiykutaqmi, kay ancha hatun yachayta noqaykuman apamurqan, chaywantaq ancha hatun kusikuywan kusikuyku.

5. Munashaykutaqmi Yayanchiswan rimanakuypi haykuyta, munayninta ruwanaykupaq, llapa kamachiwananchis kamachiyininkunapi p'unchawninchiskunaq puchunkuna kasukuq kanaykupaq; angelpa rimasqan hina mana tukukuq muchuyta noqaykuman mana urayachimunaykupaq, Yayaq phiñakuyninpa qerunmanta mana ukyanaykupaq, nispa.

6. Kaymi paykunamanta inka Benjamin munasqan rimaykuna; chhaynataq paykunata nirqan: Munasqay rimaykunatan rimarqankichis, rimanakuy ruwasqaykichistaq chanin rimanakuy.

7. Kunantaq, rimanakuyman haykusqaykichisrayku, Cristoq wawankuna, churinkuna ususinkunapiwan waqyasqa kankichis. Nunapin kunan p'unchaw Pav churiyarqasunkichis; sutinpi iñiywanmi sonqoyku t'ikrakun nispan nirqankichis, chhaynaqa, Paymantan paqarirqankichis, Paypa churi-ususinkunataq wakirqankichis.

8. Kay umawantaq qespi ruwasqa kankichis, manataq hoq uma kanchu chaywan qespi ruwasqa kayta atinaykichispaq. Manan hukniraq suti qosqa kanchu, chaywan qespiy hamunanpaq; chhaynaqa, Cristoq sutinta qankunapi churakunaykichistan munayman, kawsayniykichispa tukukuyninkama kasukuq kanaykichispaq, Yayawan rimanakuypi llapa haykuqkuna.

9. Hinaqa, pipas kayta ruwanqa chayqa, Yayaq paña makinpi tarisqan kanqa, ima sutiwan waqyasqa kananta yachasqankurayku. Cristoq sutinwan waqyasqan pay kanqa.

10. Hinaqa, Cristoq sutinta mana churakuqqa hukniraq suti-

MOSIAH 17

wan waqyasqa kanan; chhayaqa, Yayaq lloq'ë makinpin chay runa tarikunqa.

11. Huk sutitan qosqaykichis, manataq hayk'aqpas pichasqachu kanqa, ichaqa huchallikuyllawan nispa nisqayta yuyarinaykichistan munayman, kaymi chay suti; hinaqa, qhawakuychis mana huchallikunaykichispaq, songoykichismanta kay suti mana pichasqa kananpaq.

12. Niykichistaq: Pasaqllapuni kay suti songoykichispi qelqasqa kanantan munayman, Yayaq lloq'ë makinpi mana tarisqa kanaykichispaq, ichaqa, waqyasqa kanaykichis aruta, Pay waqyana-suykichis sutitawan uyarinaykichispaq, reqsinaykichispaq ima.

13. Imaynatataq huk runa reqsinman mana servisqa patron-tari, paypaq mana reqsisqa kasqa patrona, songonpa munayninkunamanta yuyayninkunamantawan kharupi kaqtari?

14. Yapamantataq: Runamasinpa kaq asnutachu huk runa apayukuspa hap'ikapun? Manan nispan nisaykichis; manan saqellanqapaschu uywankuna purapi mikhunanta, ichaqa, qatinqa asnuta, qarqonqataq. Chhaynallataqmi qankuna purapi kanqa, waqyasqa kanaykichis sutita mana yachankichischu chayqa.

15. Chhaynaqa, allin takyasqa mana kuyuchiy atina, allin ruwaykunawan hunt'a kanaykichistawanmi munayman; Cristo, Llapa-atinyiyoq Wiraqocha Yaya Paypata hina markanasuykichispaq, hanaqpachaman apasqa kanaykichispaq; kay pachapi hanaqpachapiwan llapa imaymanakuna ruwaq, llapa patapi kaq Yayaq yachaysapa kayninwan, atiyinwan, chaninchayninwan, khuyapakuyinpiwan ukhunta mana tukukuq qespiyniyoq, wiñay-wiñaypaq kawsayniyoqpiwan kanaykichispaq. Hinataq kachun.

17 T'AQA

Abinadiq ñak'ariynin. Ninawan wañuyta ñak'arishaqtin wañucheqninkuna ñak'arichisqa kanankumanta rimarin. Almaq t'ikrakuyin.

1. Hinataq, kay rimaykunata Abinadi tukuqtin, kurakninkunata inka Noe kamachirqa payta apaspa wañuchimunankupaq.

2. Ichaqa, paykuna purapi huk runa karqa Alma sutiyoq, Nefiq ch'awchun. Waynallan pay karqa, Abinadiq sut'inchasqa simikunataq kreyirqa, yacharqantaqmi paykuna kontra Abinadiq rimasqa huchakunamanta; chhaynataq, inkamanta mañakuyta qallarirqa Abinadiwan mana phiñarikunanpaq, ichaqa sumaqllata ripunanta saqenanpaq.

3. Ichaqa, astawanmi inka phiñarikurqa, paykuna chawpimanta Alma qarqosqa kananpaqtaq kamachirqa; warmankuna-

tataq kacharqan Almaq qhepanta, payta sipimunankupaq.

4. Ichaqa paykunamanta ayqekurqan, pakakuqtintaq mana pay tariyta atirqankuchu. Ashkha p'unchawkuna pakasqa kaspataq, Abinadiq llapan rimasqan simikunata qelqarqan.

5. Hinataq, llaqtakamayochkunata Noe kamachirqan Abinadita muyurispá hap'inankupaq; watayuspataq ch'achana wasiman payta churarqanku.

6. Kinsa p'unchaw patamantaq, kurakkunawan rimanakuspan Abinadi yapamanta ñawpaqenman apamusqa kananpaq kamachirqan.

7. Paytaq Abinadita nirqan: Abinadi, tariykun imawan qanta tunpanaykupaq, wañuytataq merisinki.

8. Runakunaq chawpinmanmi kikin Yaya urayamunqa nispan nirqanki; kunantaq kayrayku wañuchisqa kanki, noqamanta llaqtaymantawan millay rimasqaykikunata mana kutichikapunkichu chayqa, nispa.

9. Abinaditaq payta nirqan: Qanta nisayki—manan kutichikapusaqchu kay llaqtamanta qanman rimasqay simikunataqa, cheqaqmi chay rimaykuna. Cheqaq kasqanmanta yachanaykipaqtaq makiykipi urmanaypaq kacharirqani.

10. Ari, wañuykaman ñak'arisaq, manataqmi rimasqaykunata kutichikapusaqchu, qankuna kontrataq sut'inchaq hina sayanqa. Sipiwanichis chayqa, mana huchayoq yawartan sut'uchinkichis, qankuna kontrataq kaypas sut'inchaq hina qhepa p'unchawpi sayanqa, nispa.

11. Kunantaq inka Noeqa, kachariytaña munasharqan, rimayninkunata manchakusqanrayku, Yacaq taripayninkuna payman hamunantawan manchakuspa.

12. Ichaqa, kurakkuna Abinadi kontra qaparirqanku, payta tunpayta imataq qallarirqanku: Inkatan k'amin, nispa. Hinataq inkaqa Abinadi kontra phiñarichisqa kaspá, sipisqa kananpaq payta kacharirqan.

13. Hinataq, Abinadita hap'ispanku chaqnayurqanku, ninawantaq runa-kurkunta wañunankama ñak'arichirqanku.

14. Payta nina ruphayta qallareqtintaq, khaynata paykunaman qaparirqan:

15. Noqawan ruwasqaykichista hinan ch'awchuykichis askha runakunata ninawan ñak'arichinqaku wañuyta nanayninkunata; kaytataq Wiraqocha Yayankuq qespiyninpi kreyisqankurayku.

16. Qankunataq imaymana onqoykunawan muchuchisqa kankichis, huchaykichiskunarayku.

17. Tuky qayllamanta maqasqataqmi kankichis, qarqosqa,

MOSIAH 18

kaymanta haqayman ch'eqechisqa imataq kankichis, k'ita uywakuna salqa millay animalkunaq qatikachasqa kasqankuta hina.

18. Haqay p'unchawpitaq chakusqa kankichis, awqaykichispa makinmantaq urmankichis; chaymi ñak'arinkichis, wañuyta nayninkunata ninawan noqa ñak'arisqayta hina.

19. Khaynatan Yaya aynikun llaqtaq wañuchiqkunawan. O Yaya, nunayta chaskikapuy.

20. Kay simikunata Abinadi neqtintaq, ninawan wañuyta ñak'arisqanrayku urmarqan; ari, Yayaq kamachiyninkunata mana mananchay munasqanraykun wañuchisqa karqan; wañuyninwantaq rimayninkunaq cheqaq kayninta intuykurqan.

18 T'AQA

Mormonpa ununkuna. Helamta hukkunatawan Alma unuchan. Cristoq lñeqkuna-huñun. Inka Noe awqasuyunkunata kachan, Almata qatikuqninkunatawan wañuchimunankupaq.

1. Kunantaq, Noeq warmankunamanta ayqekuq Alma, huchankunamanta millay ruwasqanmantawan wanarqan, runakuna purapitaq pakallapi purirqan, Abinadiq rimayninkunata yachachispa.

2. Ari, imaymana hamunamanta, wañusqakunaq kawsariyninkumanta, Cristoq atiyinwan, ñak'ariyninwan, wañuyninpiwan wakichisqa kanan runakunaq qespiyninkumantawan; kawsariyninmanta, hanaqpachaman seqaripuyinmantawan.

3. Rimayninkunata tukuy uyariy munaqkunamanmi pay yachachirqan. Pakallapitaq paykunata yachachirqan inka Noe mana yachananpaq. Askha runakunataq rimayninkunapi kreyirqanku.

4. Hinataq, paypi llapan kreyiqkuna, Mormon sutiyuq hallp'aman rirqanku— inkamantataq kay sutita kay hallp'a chaskirqan— hallp'ankuq lindanpi kaspataq, maynillanpiqa utaq maynin uhukunallaqa k'ita uywakuna kaypi hunyarqan.

5. Chay Mormonpitaq ch'uya unuyuq qocha karqan, chaymantaq Alma rirqan. Chay qochaq sispayninpi huch'uy sach'akunayoq sach'a-sach'a kaqtintaq, chaypi Alma p'unchawpi pakakurqan inkaq mashkaykachaqninkunamanta.

6. Hinataq, payta llapan kreyiqkuna chayman rirqanku rimayninkuna uyariq.

7. Askha p'unchawkuna patamantaq, askha runakuna huñunakurqanku Mormon hallp'api, Almaq rimayninkuna uyarinankupaq. Ari, rimayninkunapi llapa kreyiqkunanan huñunakurqanku payta uyarinankupaq. Paykunataq pay yachachirqan yuyayman

kutirimuyta, qespiyta, Wiraqochapi iñiytawan.

8. Hinataq paykunata nirqan: Qhawariychis, kaypin Mormonpa ununkuna kashan, (khaynan waqyasqa karqan) kunanqa Yayaq t'aqanman hamuytataq munankichis, Paypa llaqtantaq waqyasqa kayta munankichis chayqa; ch'usaq kananpaqtaq q'epinaykichispi yanapanakuyta munankichis;

9. Ari, waqaqkunawantaq waqayta munankichis, sonqochay nesitaqkunata sonqochaspa; llapa pacha lliw imaymanakunapi, llapa kanaykichis hallp'apiwantaq Yayaq sut'inchaqninkuna hina sayanaykichispaq, wañunakamapuni; Yayaq qespichisqan kanaykichispaq, qallariy kaq kawsariypa runankunawan yupasqa kanaykichispaq, wiñay kawsayniyoq kanaykichispaqwan—

10. Kunan nisaykichis, kaytaq sonqoykichispa munaynin chayqa, iman hark'asunkichis Wiraqochaq sutinpi unuchasqa kanaykichismanta, Paywan rimanakuypi haykusqaykichismanta sut'inchaq hina, Payta servinaykichispaq, kamachiyninkunatawan waqaychanaykichispaq, aswan askhatapuni qankuna pataman Nunanta hich'arimunanpaq? nispa.

11. Kay simikunata runakuna uyareqtinkutaq, kusikuypi makinkuta t'aqllakurqanku, hinaspataq qaparirqanku: kaymi sonqoykuq munaynin, nispa.

12. Hinataq, Helamta hap'ispa—pay ñawpaq kaq kaspera—unuman Alma rirqan sayarispataq khaynata qaparirqan: O Wiraqocha, warmayki pataman Nunaykita hich'arimuy kay ruwayta chandin sonqowan ruwananpaq, nispa.

13. Kay simikunata neqtintaq, Wiraqochaq Nunan pay patapi karqan, hinaspataq nirqan: Helam, noqa unuchayki Llapa-atiyniyoq Yayamanta atiyniyoq kaspera, kay wañuq runa-kurkupi wañunaykikama Pay servinaykipaq rimanakuypi haykusqaykimanta sut'inchayta hina; Wiraqochaq Nunanyá qan pataman hich'arisqa kachun; Paytaqyá wiñay kawsayta qanman qochun, hallp'aq qallariyninmantapacha allichasqan Cristoq kutichikapuyninwan, nispa.

14. Kay simikunata Alma neqtintaq, Alma Helampiwani unupi p'anpasqa karqanku; hinamantaq paykuna sayarimurqanku, Nunawan hunt'asqa kaspataq kusikuspa unumanta lloqsimurqanku.

15. Yapamantataq huk runata Alma aparqan, ishkay kutitataq unuman haykurqan, qallariypi hinataq payta unucharqan; ichaqa, manan kikin Almaqa unupi yapamanta p'anpakurqanku.

16. Khaynatataq Mormon k'itiman sapanka riqkunata pay unucharqan, paykunataq karqanku yaqa ishkay pachak tawayoq nunakuna; ari, paykunataq Mormonpa ununpi unuchasqa kar-

MOSIAH 18

qanku, Yayaq munayninwan hunt'ataq karqanku.

17. Chay pachamantapachataq Yayaq iñeqkuna-huñun, utaq Cristoq iñeqkuna-huñun nispa waqyasqa karqanku. Hinataq pipas Yayaq atiyininwan kallpanpiwan unuchasqa kaq, iñiqkuna-huñunman yapasqa karqan.

18. Hinataq Almaqa, Yayamanta atiyiniyoq kaska kurakkunata sapaqcharqan; huk kurakta paykunamanta sapanka pishqa chun-kapaq sapaqcharqan, paykunata yachachinankupaq, Yayaq qhapaq suyunpa imaymanakunamanta paykunata yachachinankupaq.

19. Paykunatataq kamachirqan mana imatapas yachachinankupaq, ichaqa, paypa yachachisqanta, qollanan unanchaqqunaq rimasqankuta ima.

20. Ari, kamachillarqantaqmi mana imatapas yachachinankupaq, ichaqa, yuyayman kutirimuyta, llaqtan kutichikapuq Wiraqochapi iñiytawan.

21. Kamachillarqantaqmi, paykuna purapi mana cheqninakuykuna kananpaq, ichaqa, ch'ullalla ñawiwana ñawpaqman qhawankupaq, ch'ullalla iñiyiniyoq, ch'ullalla unuchayniyoq kaska; huklla kaypi, paykuna pura munanakuypi sonqonku awasqa kaspama ima.

22. Khayna yachachinankupaqmi paykunata kamachirqan. Khaynatataq Yayaq wawankunaman tukurqanku.

23. Paykunatataq pay kamachirqan, samana p'unchawta waqaychanankupaq, qollananta kachinankupaq, sapa p'unchaw Wiraqocha Yayankuta añaychanankupaqwan.

24. Kamachillarqantaqmi paypa sapaqchasqan kurakkunata, paykuna kikinku kawsayninkupaq makinkuwan llank'anankupaq.

25. Sapanka semanataq huk p'unchawta sapaqcharqanku, huñunakuspa runakunaman yachachinankupaq, Wiraqocha Yayankuta yupaychanankupaq, llapa atisqankuman hina huñunakunankupaqwan.

26. Kurakkunataq mana runakunamantachu kawsayninkupaq suyananku karqan; ichaqa, Yayaq munakuynintan llank'ayninku-rayku chaskinanku karqan, Nunapi kallpasapa wiñanankupaq, Yayaq yachayninwan ima kanankupaq; Yayamanta atiywan kallpapiwan yachachinankupaq.

27. Yapamantataq Alma kamachirqan, iñeqkuna-huñumanta runankuna kapuqninkumanta qonankupaq, sapankankuq kapusqanman hina; askha kapunman chayqa aswan askhatan qonapaq, chikallan huk runaq kaqtintaq huk chikallanta paymanta mañakunnanta, mana imayoq runaman qosqa kananpaq.

28. Khaynatataq kapuqninkumanta qonkuman, paykuna ki-

kinkuq qespi kayninkumanta munayninkumantawan hina, Yayaman, nesitaq kurakkunaman, ari, sapanka nesitaq runaman, q'alla-lla kaq runaman ima sumaq munakuyninkuman hina.

29. Kaytataq paykunata nirqan, Yayamanta kamachisqa kaspas. Sumaqтатаq Yayaq ñawpaqenpi purirqanku paykuna pura rakinakuspanku, kay kawsaypi kaqmantapas, nunapi kaqmantapas, nesitasqankuman munasqankumanwan hina.

30. Hinataq, kay imaymanakuna Mormonpi ruwasqa karqan; ari, Mormonpa ununkunaq kasqanpi, Mormonpa ununkunaq sispanpi kaq sach'a-sach'akunapi. Ari, Mormonpa k'itin, Mormonpa ununkuna, Mormonpa sach'a-sach'aniwanqa, ancha sumaqmi chaykuna karqan chay k'itipi Kutichikapuqninku reqsiyman chayamuqkunaq ñawinkupaq; ari, ancha saminchasqataqmi paykuna kanku, wiñaypaqtaq Payta yupaychaspas takingaku.

31. Kaykunataq chay hallp'aq lindanpi ruwasqa karqan, inkaq yachayninman mana chayamunanpaq.

32. Hinaspataq inkaqa runakunaq hasasayninkuta rikuspa, paykunata qhawanankupaq warmankunata kacharqan. Chhaynataq, Wiraqochaq rimayninkunata uyarinankupaq huñunakushasqanku p'unchawpi, inkaman willarqanku.

33. Inkataq nirqan: Noqa kontra ankallikunankupaqmi runakunata Alma hatarichishan, nispas; hinataq awqasuyunkunata paykunata qolluchimunankupaq kacharqan.

34. Hinataq, Alma, Wiraqochaq Ilaqtanpiwan, inkaq awqasuyunkuna hamunankumanta yacharqanku; chhaynataq karpankuta, ayllunkutawan apayukuspanku purunman lloqsirqanku.

35. Paykunataq karqanku yaqa tawa pachak pishqa chunka nunakuna.

ALMAQ CHURIN

ALMAQ QELQAN

5 T'AQA

Yavaq qollanan ordenninman hina Hatun Kurak kaq Almaq rimayninkuna, tukuy hallp'antinpi kaq hatun Ilaqtakunapi, huch'uy Ilaqtakunapiwan rimasqan.

Iñeqkuna-huñuq imavna kasqanta vapamanta willan. Millay ruwawkuna kontra rimarin. Yuvayninkuman kutirimunankupaq runakunata anyan.

1. Hinataq, Yayaq rimayninkunata runakunaman rimariyta Al-

ma qallarirqan; qallariypi Zarahemla hallp'api, hinamantaq tukuy hallp'antinpi.

2. Kaytaqmi Zarahemla Ilaqtapi kaq iñeqkuna-huñumanta runakunaman rimarisqan simikuna, pay kikinpa qelqankunaman hina:

3. Noqa Alma, Yayaq iñeqkuna-huñunpi Hatun Kurak kanaypaq taytay Almaq sapaqchasqan kaspakay ruwananpaqtaq Yayamanta atiyiniyoq kallpayoqpiwan karqan—qankunata niykichis, iñeqkuna-huñutan hatarichirqan Nephiq hallp'anpa lindanpi kaq hallp'api, Mormonpa hallp'an nispa sutichasqa hallp'api; ari, wawqenkunataq Mormonpa ununkunapi unucharqan.

4. Qankunataq niykichis, Yayaq khuyapakuyninwan atiyinpiwanmi horqosqa karqanku inka Noeq runankunaq makinkunamanta.

5. Chay patamantaq, purunpi lamanitakunaq hark'asqan karqanku, ari, hark'asqan karqanku niykichismi, yapamantataq hark'asqa kasqankumanta paykunata Wiraqocha qespichirqan rimayninpa atiyinwan; kay hallp'amantaq apamusqa karqanchis, kay tukuy hallp'antinpi imataq Yayaq iñeqkuna-huñunta hatarichiyta qallarirqanchis.

6. Kunantaq qankunata nisaykichis, kay iñeqkuna-huñumanta kaq wawqeykuna, allintachu yuyarinkichis taytaykichiskuna hark'asqa kasqankumanta? Allintachu yuyarinkichis paykunapaq Wiraqochaq khuyapakuyninta unay-ñak'ariynintawan? Astawanraqtaq, allintachu yuyarinkichis supay wasimanta nunankuta qespichimusqanta?

7. Paymi sonqonkuta t'ikrarqan, ari, qaqa puñuymantan paykunata rikch'arichimurqan, Yayamantaq paykuna rikch'arirqanku. Tutayaq chawpipin paykuna karqanku, chaypiwanpas wiñay-wiñaypaq rimaypa k'anchayninwanmi nunanku k'ancharisqa karqan; ari, wañuypa chaqnankunawan, supay wasiq watanankunapiwan muyurisqan karqanku, wiñay-wiñaypaq qolluytaq paykunata suyarqan.

8. Kunantaq qankunata tapuykichis wawqeykuna—qollochisqachu karqanku? Manan, manan qollochisqachu karqanku, nispan nisaykichis.

9. Yapamantataq tapuykichis—t'ipisqachu karqan wañuypa chaqnankuna, kacharisqachu karqan paykuna muyuriq supay wasiq chaqnankuna? Ari nispan nisaykichis, pashkasqan karqan, nunankutaq hatunyarqan, kutichikapuq munakuytataq takirqanku. Qespichisqa kasqankumantataq qankunata niykichis.

10. Kunantaq qankunata tapuykichis—Imaraykun qespichisqa

kanku? Ari, imapin teqsichakurqanku qespiyta suyanankupaq? Imaraykun wañuyta chaqnankunamanta, supay wasiq washkar-ninkunamantapas kacharisqa karqanku?

11. Atinin qankunaman kay niyta—manachu taytay Alma kre-yirqan Abinadiq rimasqan simikunapi? Manachu qollanan unan-chaq pay karqan? Manachu pay rimarqan Yayaq rimayninkunata, taytay Almataq chay rimaykunapi kreyirqan?

12. Iñiyinman hinataq sonqonpi ancha hatun t'ikrakuy ru-wasqa karqan. Qankunataq niykichis—cheqaqmi kay llapan imaymanakuna, nispa.

13. Paytaqmi rimayninkunata taytaykichiskunaman yachachir-qan, paykunaq sonqonkupipas ancha hatun t'ikrakuymi ruwasqa karqan, ullpuykukuspankutaq cheqaq kawsaq Yayapi kunfiyan-sankuta churarqanku. Tukukuykamataq iñiysapa karqanku, chhaynataq qespichisqa karqanku.

14. Kunataq tapuykichis iñeqkuna-huñumanta kaq wawqey-kuna, Yayamantachu nunaykichispi paqarisqa karqankichis? Chaskirqankichischu rikch'ayninta uyaykichispi? Sentirqankichis-chu sonqoykichispi kay hatun t'ikrayta?

15. Iñinkichischu kamasuqniykichispa kutichikapuyninpi? Iñeq ñawiwanchu ñawpaqman hina qhawarinkichis, kay wañuq runa-kurkuta mana wañunanpaq hatarichisqa kasqanta rikuspa, kay waqlliqaq mana waqlliqaq hatarichisqa kasqanta rikuspa, kay wañuq runa-kurkupi ruwasqa kasqanman hina Yayaq ñawpaqen-pi sayaripa taripasqa kanapaq?

16. Qankunata nisaykichis—yuyayukuwaqchischu, khaynata haqay p'unchawpi Wiraqochaq arun niqta: Noqaman hamuychis saminchasqakuna, chaninchaypa ruwayninmi ruwayniykichis hall-p'api karqan, niqta?

17. Ichari yuyakuwaqchischu haqay p'unchawpi Wiraqocha-man llullakuy atinaykichista—Wiraqocha, ruwayniyuqa chanin ruwaykunan karqan hallp'a patapi, nispa—Paytaqchu qespichisun-kichis?

18. Hukniraq rimaypiqa—yuyayukuwaqchischu Yayaq taripana tiyananman huchawan, pisachikuywan ima hunt'a nunayoq apa-muspa kayta, tukuy huchaykichista yuyaripa, ari, llapan millay ruwasqaykichista k'apak yuyariypi, ari Yayaq kamachiyninkuna kontra ankallikusqaykichista yuyaripa?

19. Nicaykichis, qhawariwaqchischu Yayata haqay p'unchaw-pi, ch'uya sonqowan llunp'aq makipawan? Nisaykichistaq—qha-warikuwaqchischu uyaykichispi Yayaq rikch'aynin churasqa kaq-tin?

20. Nisaykichistaqmi—yuyayukunkichischu qespichisqa kanaykichista, saqraq watasqan kanaykichispaq kacharikushaqtiykichis?

21. Nisaykichis, haqay p'unchawpin yachankichis qespichisqa kayta mana atinaykichista. Manan pipas qespichisqa kaytaqa atinmanchu, p'achankuna yuraqtapuni mana t'aqsasqa kaqtinqa; ari, llapa qhellimantan p'achankuna ch'uyanchasqa kanan, taytanchiskunaq rimasqanpa yawarninwan; Paytaqmi hamunqa huchankunamanta runakunata qespichinanpaq.

22. Kunantaq tapusaykichis wawqeykuna, imaynatan mayqin kaqniykichispas sentikuwaqchis Yayaq taripananza ñawpaqenpi sayarispaykichis, yawarwan, imaymana qhellikunawan ima p'achaykichis qhellichasqa kashaqtin? Imatan kay imaymanakuna qankuna kontra sut'inchanqa?

23. Manachu kaykuna rimarinqa runa wañucheqkuna kasqaykichismanta, ari, imaymana millay ruwaykunamanta huchasapa kasqaykichismantawan?

24. Wawqeykuna, yuyankichischu chhayna kaq runa, Yayaq qhapaq suyunpi Abrahamwan, Isaakwan, Jakobwan, ch'uya yuraq mana ima qhelliyoq, maqchisqa p'achayoq llapa qollanan unanchaqkunawan ima tiyananpaq tiyanayoq kananpaq?

25. Manan nisaykichismi; chhayna kaqtinqa, Kamaqninchistan qallariymantapacha llullakuqta ruwankichis, utaq qallariymantapacha llullakuq kasqanta yuyankichis; manan yuyawaqchischu chhayna runa hanaqpacha qhapaq-suyupi tiyanayoq kananta; ichaqa, qarqosqan kanqaku, saqraq suyunpa wawankuna kasqankurayku.

26. Kunantaq qankunata niykichis wawqeykuna, songo t'ikrayta rikurqankichis chayqa, kutichikapuq munakuypa takinta takiyta munarqankichis chayqa, tapusaykichis, khaynatachu kunan yuyakunkichis?

27. Yayaq ñawpaqenpi mana qhelliyoq kachikuspaykichischu purirqankichis? Kunanpacha wañunaykichispaq waqyasqa kaqtiykichis, ullpuykukuqmi karqani, nispachu songoykichis ukhupi niyta atiwaqchis? Llaqtanta huchankunamanta kutichikapuq hamuq Cristoq yawarninwan maqchisqa yuraqyachisqanpiwan p'achaykichis kasqanta?

28. Anchayaymanta pichasqachu kankichis? Mana chhayna kankichis chayqa, manan listuchu kankichis Yayawan tupanaykichispaq. Usqhayllan alistakunaykichis, sispallapiñan hanaqpacha qhapaq-suyu kashan; chhayna kaq runataq, mana wiñay kawsayniyoqchu.

29. Nillanitaq—kanchu pipas qankuna purapi, chikikuymanta

mana llat'asqa? Chhayna runaqa manan alistasqachu, usqhaylla alistakunantataq munayman, sispallapiñan pacha kashan, manataqmi pay yachanchu hayk'aq chay pacha hamunanta; hina kaq runaqa, manan mana-huchayoqchu tarisqa kanqa.

30. Yapamantataq nisaykichis—kanchu pipas qankuna purapi wawqenmanta asikuq, utaq qatikachaykunawanpas pay rawkhaq.

31. Ay chhayna kaq runamanta, manan alistasqachu chay runa; sispallapiñataqmi pacha kashan yuyayninman kutirimunapaq; mana chayqa, manan qespichisqa kayta atinqachu!

32. Ari, ay millaykuna ruwaqkunamanta; yuyayman yuyayman kutirimuychis, Wiraqocha Yayan chayta rimarirqan.

33. Llapan runakunatan waqyan, khuyapakuyuniyoq makikunataq paykunaneqman chutarisqa kashan: Yuyayman kutirimuychis, noqataq chaskisaykichis, nispa.

34. Ari, khaynatan Pay nin: Noqaman hamuychis, kawsaq sach'aq rurunmantataq mikhunkichis; ari, qespillataq mikhunkichis ukyankichis ima kawsaq t'antamanta kawsaq unumantawan;

35. Ari, noqaman hamuychis, chaninchaypa ruwayninkunataq apamuychis, manataqmi wit'usqachu nitaq ninaman wik-ch'usqachu kankichis—

36. Sispallapiñan pacha kashan, allin rurukunata mana apamuykuna, utaq chaninchaypa ruwayninkunata mana ruwaqkuna, muchunankupaq qaparqachanankupaq ima rasonniyoq kankupaq.

37. Millay ruwaqkuna, pachaq yanqapaq kaq imankunapi punkipakuqkuna, chaninchaypa ñanninkunata reqsinankupa yuyayukuspanku mana micheqniyoq owejakuna hina chinkaqkuna, michiqña waqyarqasunkichis waqyashasunkichisña chaypas, manan arunta uyariyta munankichischu!

38. Qankunata nisaykichis—allin kaq micheqqa waqyashasunkichismi, ari, kikin sutinwanmi waqyashasunkichis, chaytaq Cristoq sutin. Waqyasqa kanaykichis sutita, allinkaqa micheqqa arunta mana uyarinkichis chayqa, manan allinkaqa micheqqa ovejankunachu kankichis.

39. Kunanri, mana allinkaqa micheqqa ovejankunachu kankichis chayri, ima t'aqamantan kankichis? Noqataq nisaykichis, saqran micheqniykichis, paypa t'aqanmantataqmi kankichis; kunanri, pin kayta mananchanqa? Nisaykichistaqmi, pipas kayta mananchaqaq llulla runan, supaypa wawantaqmi.

40. Qankunataq nisaykichis—ima allin kaqpas Yayamantan hamun, imapas mana—allin kaqtaq saqramanta hamun.

41. Chhaynaqa, allin ruwaykunata huk runa apamun chayqa,

allin micheqpa aruntan uyarin, Paytataq pay qatikun. Ichaqa, pipas mana-allin ruwaykunata apamuqqa saqraq wawanmi waki-pun, paypa aruntataq uyarin, paytataq qatikun.

42. Pipas kayta ruwaqtaq, paymanta chaskikuyninta chaskinan; chhaynaqa, chaninchaymanta kaq imaymanakunaman hina wañuytan chaskikuyninta hina chaskin, llapan allin ruwaykunaman wañusqa kaspas.

43. Kunantaq wawqeykuna, uyariwanaykichistan munayman, nunaypa tukuy atiyinwanmi rimarishani. Sut'intan qankunaman rimarirqani mana pantay atinaykichispaq, utaq, Yayaq kamachiy-ninkunaman hinan rimarirqani.

44. Khaynata rimarinaypaqmi waqyasqa kani, Cristo Jesuspi kaq Yayaq qollanan ordenninman hina; ari, sayaripa kay runakunaman sut'inchanaypaqmi kamachisqa kani, hamunan imaymanakunamanta taytanchiskunaq rimasqankumanta.

45. Manataqmi llapanchu kay. Manachu yuyankichis noqa kikiymanta kay imaymanakunamanta yachasqayta? Qankunamantaq sut'inchani, kay rimasqay imaymanakuna cheqaq kasqanta. Imaynatataq yuyankichis, kaykuna cheqaq kasqanmanta yachasqaytari?

46. Qankunata nisaykichis, Yayaq Qollanan Nunanpa yachachiwasqanmi kaykuna. Askha p'unchawmi sasirqani, yayaman-rimarirqani ima, noqa kikiymanta kay imaymanakunata yachanaypaq. Kunantaq noqa kikiymanta yachani kay imaymanakuna cheqaq kasqanta, Wiraqocha Yaya Qollanan Nunanwan kaykunata yachachiwasqanrayku; kaytaqmi noqapi kaq willaq nuna.

47. Astawanraqtaq niykichis, khaynan noqaman willawasqa kargan, taytanchiskunaq rimasqanku simikuna cheqaq kasqanta, noqapi kaq unanchaq nunaman hina; kaypas Yayaq Nunanpa willasqallantaq.

48. Nisaykichistaqmi, hamunan imaymanakunamanta imataña qankunaman ninay cheqaq kasqanta noqa kikiymanta yachasqayta. Nillaykichistaqmi, Churi, Taytaq Sapan Churin, munakuy-niyuq, khuyapakuyniyuq, cheqaqwan ima hunt'a Jesucristoq hamunanmanta yachasqayta. Paymi, runakunaq huchankuna horuq hamunqa; ari, mana kuyuripa sutinpi iñeq sapanka runaq huchankunata.

49. Kunantaq nisaykichis, kay ordenman hinan waqyasqa kargani, ancha munasqay wawqeykunata yachachinaypaq, kay hallp'api tiyaq sapanka runamanwan; ari, llapaman yachachinaypaq, machumanpas waynamanpas, hark'asqamanpas qespi kaqmanpas, ari, machumanpas mana ancha machu kaqmanpas, wiñaq

miraymanpas niykichismi; ari, yuyayninkuman kutirimunankupaq, yapamanta paqarinankupaqwan paykunaman qaparinaypaq.

50. Ari, khaynatan Nuna nin: Yuyayniykichisman kutirimuychis pachaqa llapan k'uchunkuna, sispallapiñan hanaqpachaqa qhapaq-suyun kashan; ari, kusiqellpunpi, atiyinpi, hatun-kayninpi, kallpanpi, kamachikuyninpiwanmi Yayaqa Churin hamunqa, nispa. Ari, qankunatan nisaykichis ancha munasqay wawqeykuna: Qhawariychis hallp'antinpa Inkanpa kusiqellpunta; hanaqpachaqa Inkanpas asllamanmi k'ancharimunqa, llapa runakunaqa wawankuna purapi, nispa Nunaqa nisqanta.

51. Niwallantaqmi Nuna, ari, ancha kallpayoq kunkawan niwan: Riy, kay runakunamantaqa nimuy—Yuyayniykichisman kutirimuychis, yuyayniykichisman mana kutirimunkichischu chayqa, manan imaynatapas chaskinkichischu hanaqpachaqa qhapaqsuyunta, nispa.

52. Yapamantataqa nisaykichis Nunaqa nisqanta: sach'aq saphinmanmi hacha churasqa kashan, chhaynataqa, allin ruru mana qoq sapanka sach'a wit'usqa kanqa, ninamantaqa wikch'usqa kanqa; ari, mana tukukuq, mama qollochiy atina ninaman. Yuyariychis, Qollanan Kaqmi rimarirqan, nispa.

53. Kunantaqa niykichis ancha munasqay wawqeykuna, awantawaqchischu kay rimariykunata; ari, huk qayllamanchu kay imaymanakunata churawaqchis, sarukachawaqchischu Qollanan Kaqta, ari, punkipakuwaqchischu sonqoykichispa anchayayninpi; atipakunkichisraqchu sinchi chaninniyuq p'achakunawan p'achakuyta, kay pachaqa yanqapaqa imankunapi qhapaqyayniykichiskunapiwan sonqoykichista churaspa?

54. Ari, atipakunkichispunitaqa, hukniykichis hukkaqmanta aswan allin kanaykichispaqa yuyayta; ari, atipakunkichistaqa wawqeykichis qatikachayta— k'umurikuspa Yayaqa qollanan ordenninman hina puriqkunata, chaywantaqa iñeqkuna-huñuman apamusqa karqanku, Qollanan Nunaqa qollanachisqantaqa karqanku, yuyayman kutirimuyta chanin ruwaykunata apamuspa—

55. Ari, atipakunkichischu wakchakunaman nesitaqkunamanwan wasaykichista t'ikrayta, paykunamanta kapusuqniykichista hark'aspa?

56. Qhepatataqa, millay ruwayniykichispi atipakuqkuna qankunata niykichis, kaykunan wit'usqa kaspera ninaman wikch'usqa kanqaku, mana usqhayllachu yuyayninkuman kutirimunqaku chayqa.

57. Llapaykichismantaqa kunan niykichis, allin micheqpa arun uyariy munaqkunaman, lloqsimuychis millay ruwaqkuna pura-

manta, sapaq kaychis, amataq qhelli imaymanankunata llamiychischu. Pichasqan sutinku kanqa, huchasapakunaq sutinkutaq mana chaninkunaq sutinkuwanchu yupasqa kanqa, Yayaq khayna nisqan simi hunt'akunanpaq: Huchasapakunaq sutinkunaqa, manan llaqtaypa sutinwanqa chharqosqachu kanqa;

58. Chaninkunaq sutinkunaqa kawsaypa qelqanpi qelqasqan kanqa, paykunamantaq paña makiypi huk chaskikuyta qosaq, nispa. Kunanri wawqeykuna, iman kapusunkichis kay kontra ninaykichispaq? Nisaykichismi, kay kontra rimarinkichis chayqa, manan imapas qokunchu, Yayaq rimayninga hunt'akunanmi.

59. Ima micheqmi qankuna purapi kan, askha ovejayoq kaspa atoqkuna hamoqtin ovejankunata mana mikhunanpaq ovejankuna mana qhawaq? Ovejankunaman atoq haykunman chayri, manachu atoqta pay qarqonqa? Atinqa chaytaq atoqta sipinqa.

60. Kunantaq niykichis, waqyashasunkichismi allin micheq; arunta uyarinkichis chayqa, t'aqanmanmi apamusunkichis, ovejankunataq kankichis; Paytaq kamachisunkichis qankuna puraman ima millay atoqpas haykunanta mana kacharinaykichispaq, mana qollochisqa kanaykichispaq.

61. Kunantaq noqa Alma, kamachiykichis kamachiwaqpa siminpi, qankunaman rimarisqay simikunata ruwanaykichispaq.

62. Kamachita hinan rimariykichis iñeqkuna-huñumanta kaqkunaman; iñeqkuna-huñumanta mana kaqkunamantaq rimarini waqyakuyta hina: Hamuychis, yuyayman kutirimuypi unuchakuychis, kawsaq sach'aq rurunmanta qankunapas mallinaykichispaq, nispa.

11 T'AQA

Taripaqquna ima chaskinankupiwan. Nephitakunaq qolqenku, tupunakunapiwan. Zeezrom Amulekpa tutayachisqan.

1. Mosiahq kamachisqa-siminpin karqan, sapanka runa kamachisqa-simi q taripaqnin kaspa, utaq taripa q kanankupa q churasqa kaspanku qolqeta chaskinankupa q, ñawpaqenkuman taripasqa kanankupa q apamusqa runakunata taripanankupa q llank'asqankuman hina.

2. Huk runa huk runaman manu kaspan, mana chay manu kasqanta kutichipuyta munarqanchu chayqa, taripa qman willasqan karqan; taripa qtaq atiy ninta llank'achir qan, llaqtakamay oqkunata q kachar qan, taripa qpa ñawpaqenman apamusqa chay runa kananpa q; taripa qtaq chay runata taripar qan, kamachisqa si-

miman hina, chay runa kontra cheqaqchay apamusqankuman hinapiwan. Chhaynataq chay runaqa kamachisqa karqan, manuskusqanta kutichinanpaq, utaq, qechusqapas karqan, utaq, runakuna chawpimantapas suwa hina qarqosqa kananpaq.

3. Taripaqtay qolqeta chaskiq, tiempunman hina—qorimanta senineta huk p'unchawmanta, utaq, qolqemanta senumtapas (kaytaq qorimanta senineman kushka puralla karqan); kaytaq karqan qosqa kasqan kamachi-simiman hina.

4. Kaytaq qorimanta qolqemantawan qolqenkuq sutinkuna, hayk'a chanin kasqanman hina. Sutinkunataq nefitakunaq qosqan karqan; manan Jerusalenpi judiokuna hinachu yuparqanku, nitaq judiokuna hinachu tupurqanku. Ichaqa kambiyarqankun yupayninkuta tupunankutapas, sapanka miraypi runakunaq munayninkuman, susidisqanmanwan hina, inka Mosiahq churasqan tari-paqkunaq kamachiyninkukama.

5. Khaynan chay yupay karqan—qorimanta senine, qorimanta seon, qorimanta shum, qorimanta limnahpiwan.

6. Qolqemanta senum, qolqemanta amnor, qolqemanta ezrom, qolqemanta ontipiwan.

7. Qolqemanta senumqa qorimanta senineman kaqllan karqan, sebada tupunapaqpas, imaymana rurukuna tupunapaqpas.

8. Qorimanta seonpa chaninninqa karqan seninemanta ishkay kutin.

9. Qorimanta shumtaq, seonpa chaninninpa ishkay kutin karqan.

10. Qorimanta limnahq chaninnintaq, llapankuq chaninnin hina.

11. Qolqemanta amnorqa, ishkay senumkuna hinan karqan.

12. Qolqemanta ezromtaq, tawa senumkuna hina.

13. Ontitaq, llapankuq chaninnin hina karqan.

14. Kunanqa kaytaqmi karqan, huch'uy yupayninkuq chaninnin—

15. Huk shiblon, senumpa chawpin karqan; chhaynaqa, huh shiblon karqan sebadaq tupunanpa chawpin.

16. Shiblumtaq shiblonpa chawpin.

17. Leahtaq karqan shiblumpa chawpin.

18. Kunanqa kaymi sutinku karqan yupayninkuman hina.

19. Qorimanta antionqa kinsa shiblonkuna hinan karqan.

20. Kayqa karqan qhapaqyanankupaqmi, ruwasqankuman hinataq qolqenkuta chaskirqanku chayqa; chhaynaqa, runakunatan churanakuykunaman, imaymana takurikuykunaman, millay ruwaykunamanwan haykuchirqanku, astawan llank'achisqa kanan-kupaq; ñawpaqenkuman apamusqa tari-paykunaman hina qolqeta

chaskinankupaq; hinataq runakunata phiñarichirqanku Alma kontra, Amulek kontrapiwan.

21. Kay Zeezromtaq khaynata Amulekta tapuyta qallarirqan: Kutichiwankichu qanman huk chikan tapuykuna tapunayta, nispa. Zeezromqa makin karqan saqraq ruwayninkunapi, allin kaqta qolluchinanpaq; hinaspataq Amulekta nirqan: Kutichiwankichu qanman tapunay tapuykunata, nispa.

22. Amulektaq payta nirqan: Ari, noqapi kaq Wiraqochaq Nunanman hina kanqa chayqa; manan imatapas nisaqchu Wiraqochaq Nunanman kontraqa, nispa. Zeezromtaq payta nirqan: Qhawariy kay qolqemanta soqta ontikunata, kay llapantan qosayki llapamanta Aswan Kaqta mananchanki chayqa, nispa.

23. Kunantaq Amulek nirqan: Supay wasiq churin, imanaqtinmi wateqawanki? Yachankichu chaninkuna chhayna wateqaywan mana urmasqankuta?

24. Kreyinkichu Yaya mana kasqanta? Manan nisaykin; yachankin Yaya kasqanta, ichaqa qhapaqyaytan Paymanta astawan munakunki.

25. Kunantaq Yayaq ñawpaqenpi llullakuwarqanki. Qhawariy kay ancha chaninniyuq soqta ontikunata, qanman qosqayki nispan niwarqanki; ichaqa, mana qowanaykipaqmi sonqoykipi yuyayukurqanki. Munayniykiqa karqan, cheqaqpuni kawsaq Yayata mananchanaypaqmi, qolluchiwanaykipaq ima kananpaq. Kunantaq kay ancha hatun millayrayku chaninchayniyuq kanki, nispa.

26. Zeezromtaq payta nirqan: Kanmi cheqaq, kawsaqpiwan Yaya ninkichu?, nispa.

27. Amulektaq nirqan: Ari, kanmi cheqaq, kawsaqpiwan Yaya, nispa.

28. Kunantaq Zeezrom nirqan: Kanchu huk Yayamanta aswan?, nispa.

29. Paytaq kutichirqan: Manan, nispa.

30. Yapamantataq payta Zeezrom nirqan: Imaynatataq kaykunamantari yachanki, nispa.

31. Amulektaq nirqan: Huk angelmi kaykunata yachachiwarqan, nispa.

32. Yapamantataq Zeezrom nirqan: Pin hamuq kanqa? Yayaq Churinchu, nispa.

33. Paytaq payta nirqan: Ari, nispa.

34. Zeezromtaq yapamanta nirqan: Huchankupichu runakunata qespichinqa, nispa. Amulektaq kutichispa nirqan: Manan nisaykin. Mananpunin Pay atinmanchu, rimayninkuna mananchayta, nispa.

35. Kunantaq runakunata Zeezrom nirqan: Kaykunata yuyariychis, huk Yayallan kan nispa nisqanta; ichaqa nirqanmi, Yayaq Churinmi hamunqa, manataqmi llaqtanta qespichinqachu, nispa; Yaya kamachinanpaq atiyniyoqpas kanman hina, nispa.

36. Yapamantataq payta Amulek nirqan: llullakurqankin, Yaya kamachinanpaq atiyniyoqpas kanman hinan rimarqan, nispan nirqanki—manan runakunata huchankunapiqa Yaya qespichinqachu, nispa nisqayrayku.

37. Yapamantataq qanta nisqayki: Manan huchankunapi runakunata qespichiyta atinmanchu, manan rimayninkunata mananchayta atiymanchu. Nirqantaqmi Pay, mana ima qhellipas hanaqpacha qhapaq-suyuta chaskiy atinanta. Chhaynari, imaynatan qespichisqa kawaq, hanaqpacha qhapaq-suyuta mana chaskispayki? Chhaynaqa, manan huchaykikunapi qespichisqa kayta atiqachu, nispa.

38. Kunantaq yapamanta payta Zeezrom nirqan: Kikin Wiñay Taytachu Yayaq Churin, nispa.

39. Amulektaq payta nirqan: Ari, Paymi hanaqpachaq, kay pachaq, kaykunapi kaq imaymanakunaq ima kikin Wiñay Taytan. Paymi qallariy tukukuypiwan ñawpaq kaq qhepa kaqpiwan.

40. Paytaq kay hallp'aman hamunqa, llaqtan kutichikapuq; sutinpi iñeqkunaq huchankunataq Paypi apanqa; kaykunataqmi wiñay kawsayniyoq kanqaku, manataqmi pimanpas qespiyqa hamunqachu.

41. Chhaynataq huchasapakunaqa qhepanku manapas qespichiy kanmachu karqan hina; ichaqa, wañuyta watayninkuna kacharisqalla. Hamunshanmi pacha llapan runakuna wañusqakunamanta hatarispa Yayaq ñawpaqenpi sayanankupaq, ruwasqankuman hina taripasqa kanankupaq.

42. Kunanqa, kanmi huk wañuy, mana-wiñaypaq wañuy sutiyoq, Jesucristoq wañuynintaq kay mana-wiñaypaq wañuyta chaqnankunata pashkanqa, kay mana-wiñaypaq wañuymanta llapan runakuna hatarichisqa kanankupaq.

43. Nunataq runa-kurkunpiwan yapamanta huñunakunqaku hunt'asqa kikinpi; sapanka chaki-makikuna moqonkunapiwan imayna kanankuman hina yapamanta sayarichisqa kanqaku, kunan kasqanchista hinapuni; Yayaq ñawpaqenpi sayananchispaq apamusqataq kasun, kunanchu yachanchis chhaynata yachaspa, llapa huchanchiskunamanta ch'uyapuni yuyariyiniyoq kaspas.

44. Kay yapamanta sayarichiyqa llapamanmi hamunqa, machumanpas waynamanpas, qespiamanpas hark'asqamanpas, qhari-manpas warmimanpas, millay ruwaqkunamanpas chaninkuna-

manpas. Manataqmi huk chukchallapas umankumanta chinkanqachu, ichaqa llapanmi kunan kasqanman hina kikillanman utaq runa-kurkuman hunt'asqapuni yapamanta churasqa kanqa. Churi Cristoq, Tayta Yayaq, Qollanan Nunaqpiwan— paykunataq huk wiñay Yayalla kanku—ñawpaqenkumantaq apamusqa kanqaku, ruwasqankuman hina taripasqa kanankupaq, allinña utaq mana allinña ruwayninku karqan chaypas.

45. Wañuq runa-kurkuq wañuyninmanta, wañuq runa-kurkuq kawsariyninmanta iman rimarirqayki. Nisaykitaq—kay wañuq runa-kurkuqa, mana wañuq runa-kurkumanmi hatarichisqa kanqa, wañuqmanta, ñawpaq kaq wañuymantapuni kawsariyman, manaña wañuy atinankupaq; nunankuna runa-kurkunkuman huñuna-kuspanku manaña hayk'aqpas t'aqasqa kanankupaq. Khaynataq kay llapan nunapi-kay, mana wañuqpiwan wakipun, mana astawan waqlliya rikuy atinankupaq.

46. Kay rimaykunata Amulek tukuqtintaq, yapamanta runakuna utirayayta qallarirqanku, Zeezrompas khatatataytan qallarirqan. Khaynatataq Amulekpa rimayninkuna tukukurqan, utaq kayllatan qelqarqani.

12 T'AQA

Amulekpa sut'inchaynin Almaq kallpachasqan. Kawsaq sach'amanta yachachiy. Qespiy imayna kanan ch'uyanchasqa.

1. Kunantaq, Amulekpa rimayninkuna Zeezromta upallachisqanta rikuspa Almaqa—Amulekta qollochinanpaq llullakuyninpi atoqrayayninkunapiwan payta Amulek hap'isqantan Almaqa rikurqan—huchankunata yachaspa khatatataytawan qallarisqanta rikuspa imataq Almaqa, siminta kicharispayman rimariyta qallarirqan, Amulekpa rimayninkunata takyachispa; Amulekpa ruwasqanmanta aswantaraqtaq qelqakunata kicharirqan, ch'uyancharqan ima.

2. Zeezromman Almaq rimarisqan simikunataq muyureqnintinpi kaq runakunaq uyarisqan karqan. Askhapunin runakuna karqanku, khaynatataq Alma rimarirqan:

3. Kunanqa, Zeezrom, rikushankin llullakuyniykipi atoqrayayniykiwan hap'isqa kasqaykita; manan runakunallamanchu llullakurqanki, ichaqa, Yayamanmi llullakurqanki. Llapay yuyasqaykitan Pay yachan, yachashankitaqmi yuyasqaykikunata Nuna yachachiwasqankuta.

4. Rikushankitaqmi saqraq atoqrayaq kayninman hina atoqrayay ruwayniykikuna yachasqaykuta. Chay ruwayniykitaq karqan kay runakunaman llullakunaykipaq, q'otonaykipaqwan; paykuna-

ta noqayku kontra hatarichinaykipaq, k'amiwanankupaq, qarqowanankupaqwan—

5. Kaytaq awqaykiq ruwaynin karqan, qanpitaq atiyinta llank'achirqan. Kay yuyarinaykichistan munayman—qanman rimarisqaytaqa llapan runakunamanmi rimarini.

6. Llapaykichismantaq niykichis, awqaq toqllan kay kasqanta; kay runakuna hap'inanpaqmi churarqan, hark'asqata hina qankunata payman apananpaq, chaqnankunawan muyuchinasuykichispaq, hark'ayninpa atiyinman hina wiñay-wiñaypaq chinkachiywan qankunata watanasuykichispaq.

7. Kay simikunata Alma rimareqtintaq, astawanraq khatatatayta Zeezrom qallarirqan, astawan-astawanraqtaq Yayaq atiyinmanta kunbinsikurqan. Kumbinsisqataqmi karqan, Alma Amulekpiwan paymanta yachasqankuta; sut'intapunin yacharqan sonqonpa munayninkunata yuyasqantawan paykuna yachasqankuta. Atiyimi paykunaman qosqa karqan, unanchana nunaman hina kay imaymanakunamanta yachanankupaq.

8. Zeezromtaq paykunata k'uchillaña tapuyta qallarirqan, Yayaq qhapaq-suyunmanta astawan yachananpaq. Paytaq Almata nirqan: Ima ninantan nin, wañusqakunaq kawsariyinmanta Amulekpa rimarisqan, chaninkunapas mana chaninkunapas llapankun wañusqakunamanta hatirimunqaku, Yayaq ñawpaqenmantaq apamusqa kanqaku, ruwayninkuman hina taripasqa kanankupaq, nispa nisqa?, nispa.

9. Kunantaq Almaqa khaynata payman kaykunata ch'uyan-chayta qallarirqan: Askhamanmi qosqa Yayaq pakasqa imaymanankunamanta yachanankupaq, chaypiwanpas, sut'in kamachiywan churasqan kanku mana qonankupaq, ichaqa, runakunaq wawankunaman Paypa qosqan rimayninpa partenman hinalla; Payta uyakusqankuman, k'uchi kasqankumanwan hinallapiwan.

10. Chhaynaqa, sonqon rumiyacheqqa rimaypa aswan pisi-llantan chaskin; sonqon mana rumiyacheqmantaq, rimaypa aswan askha t'aqan qosqa kan; Yayaq pakasqa imaymanankunamanta yachananpaq, hunt'atapuni chaykunata yachanankama.

11. Sonqonku rumiyachiqkunamantaq rimaypa aswan pisi t'aqallan qosqa kan, pakasqa imaymanankunamanta mana imatapas yachanankukama; hinamantaq saqraq hark'asqan apasqa kanku, munayninwantaq chinkachiyman apasqa kanku. Kaymi supay wasiq chaqnanpa ima ninan.

12. Sut'intataqmi wañuymanta Amulek rimarirqan, kay wañuqmanta mana wañuqman hatirichisqa kanamanta, ruwayninchiskunaman hina taripasqa kanapaq Yayaq taripanpa ñawpa-

qenman apamusqa kananchismanta.

13. Hinaqa, sonqonchis rumiyachisqa karqan chayqa, ari, Yayaq rimaynin kontra sonqonchista rumiyachirqanchis, noqanchispi chay rimaykuna mana tarisqa kanankama chayqa, millaypunin imayna kananchis kanqa, chaymantaqmi kundinasqa kasunchis.

14. Rimayninchiskunan kundinawasunchis, ari, llapan ruwayninchiskunan kundinawasunchis. Manan ch'uyachu tarisqa kasun, yuyayninchispas kundinawasunchismi; chhayna millay kaypitaq mana Yayanchista qhawariyta qhariykachasunchu; kusiqaqmi kasway, orqokunata rumikunatawan noqanchis pataman urmaspa Paypa ñawpaqenmanta pakawananchispaq kamachiyta atiswan chayqa.

15. Ichaqa, manan kay kanmanchu; hamunanchismi, ñawpaqenpi, kusiqellpunpi, atiyinpi, kallpanpi, hatun-kayninpi, kamachikuyninpiwan sayananchis. Reqsinchistaqmi wiñay-wiñaypaq p'enqakuyninchispi, llapan taripayninkuna chanin kasqanta; llapan rimayninkunapi chanin kasqanta, runakunaq wawankunawan khuyapakuq kasqanta, sutinpi kreyiqkunata yuyayman kutirimumapaq chanin ruruta apamoq runakunata qespichinanpaq llapa atiyiniyoq kasqantawan.

16. Kunantaq nisaykichis—chaymanmi ishkay kaq wañuy hamunqa, nunapi wañuy; chaymantaq pacha kan, mana-wiñaypaq wañuyman hina huchankupi wañuqkuna nunapipas wañunankupaq; ari, chaninchaymanta kaq imaymanakunaman hinan pay wañunqa.

17. Hinamantaq pacha kanqa, sallu rumiyoy ninayoqpiwan wiñay-wiñaypaq rawraynin wicharimuq qocha hina ñak'ariyninku kananpaq; hinamantaq pacha kanqa, wiñay-wiñay qolluypaq watasqa kanankupaq, saqraq atiyinman hark'ayninmanwan hina, paytaq paykunata munayninman hina watarispan.

18. Hinamantaq qankunata nisaykichis, manapas kutichikapuy kanmanchu karqan hinan paykuna kanqaku. Manan qespichisqa kayta atinkumanchu Yayaq chaninchaninman hinaqa, manataqmi wañuyta atinkumanchu manaña astawan waqlliy kasqanta rikuspanku, nispa.

19. Hinataq, kay simikunata Alma rimariyta tukuqtin, astawanraq runakuna utirayayta qallarirqanku.

20. Paykuna purapi huk kamachikuqtaq karqan Antionah sutiyoq; achhuyamuspataq payta nirqan: Iman kay nisqayki, wañusqakunamantan runa hatarimunqa, kay wañuqtaq mana wañuqman kambiyasqa kanqa, manataq hayk'aqpas nuna wañunqachu nisqayki?

21. Ima ninantan qelqakuna nin—Eden pawqarpa intiq lloqsimunan qayllanpi kerubinta huk rawraq q'anchinatawan Yaya churarqan, ñawpaq tayta-mamanchiskunañataq haykuspanku kawsay sach'aq rurunmanta mikhuspa wiñaypaq kawsankuman? Chhaynataq rikunchis, wiñaypaq kawsanankupaq mana atikusqanta, nispa neq?

22. Kunantaq payta Alma nirqan: Kayta sut'inchanaypaq hinañan kasharqani. Rikunchismi, hark'asqa rurumanta mikhuspa Yayaq rimayninman hina Adan urmasqanta; khaynatataq rikunchis urmayninwan llapa runakuna chinkasqa, urmasqapiwan wakisqankuta.

23. Kunantaq niykichis—chaypacha kawsay sach'aq rurunmanta Adan mikhuyta atinman karqan chayqa, manan wañuy kanmanchu karqan, ch'usaqtaq rimay kanman karqan, Yayata llullakuqta ruwaspa. Khaynatan Pay nirqan: Mikhunki chayqa, cheqaqtapunin wañunki, nispa.

24. Kunanqa rikunchismi, runakunaman wañuy hamusqanta; ari, Amulekpa rimarisqan mana wiñaypaq kaq wañuy. Chaypiwanpas qosqan runaman pacha karqan yuyayninman kutirimumanpaq; chhaynataq kay kawsay pruebakuna pacha wakirqan, Yayawan tupanapaq alistakunapaq; noqayku rimarisqayku chay mana tukukuyniyuq imayna kanapaq alistakunapaq; chaytaq kanqa, wañusqakunamanta kawsarimuna patamanña.

25. Pachaq qallariyninmantapacha churasqa qespiy imayna kanan mana kanmanchu karqan chayqa, manan wañusqakunamanta kawsarimuna kanmanchu karqan. Ichaqa, karqanmi qespiy imayna kanan, chaytaq wañusqakunamanta ña rimarisqaña kawsariyta apamunqa.

26. Kunantaq, rispanku kawsay sach'amanta ñawpaq kaq tayta-mamanchis mikhuyta atikunman karqan chayqa, wiñaypaqmi usuri kankuman karqan, alistakunankupaq mana tiempuyuq kaspanku; chhaynataq kutichikapuna imayna kanan qollunman karqan, Yayaq rimaynintaq ch'usaq kanman karqan, mana imapaq allin kaspá.

27. Ichaqa, manan chhaynachu karqan, wañunankupaqmi runakunaman kamachisqa karqan; wañuy patamantaq taripayman hamunanku, rimarisqayku kikin taripayman, chaytaqmi tukukuy.

28. Kay imaymanakuna runakunaman hamunanpaq churaspaqtaq Yaya rikurqan, paykunaman kamachisqan imaymanakunamanta runakuna yachanankupaq chanin kasqanta;

29. Chhaynataq paykunawan rimanankupaq angelkunata ka-

chamurqan, paykunataq Yayaq kusiqellpunta runakunaman qhawachirqanku.

30. Chay pachamantapachataq sutinta waqyayta runakuna qallarirqanku. Chhaynataq runakunawan Yaya rimarirqan, kay pachaq qallariyninmantapacha akllasqa kutichikapuy imayna kanantataq paykunaman yachachirqan. Kaytataq runakunaman yachachirqan, iñiyninkuman, yuyayman kutirimuyninkuman, qollanan ruwayninkumanwan hina.

31. Hinataq runakunaman kamachiykunata qorqan—kay pachapi kaqman hina qallariypiraq ñawpaq kaq kamachiykunata paykuna p'akispanku, Yayakuna hinataq paykuna wakipurqanku, allinta mana allintawan yachaspanku; paykuna kikinkutataq churakurqanku imatapas ruway atinankupaq utaq munayninkuman munapakusqankumanwan hina ruwanankupaq kaypi churasqa kaspanku; allin ruwanankupaqpas utaq mana allin ruwanankupaqpas—

32. Chhaynataq, kutichikapuy imayna kananta paykunaman yachachisqan pataman paykunaman kamachiykunata Yaya qorqan, millay kaqta mana ruwanankupaq; kaypa chaninnintaq ish-kay kaq wañuy, kaytaq chaninchaymanta kaq imaymanakunaman hina wiñay-wiñaypaq wañuy. Khayna runakunapiqa kutichikapuy imayna kananga mana ima atiyniyoqmi, manataqmi Yayaq hatun sumaq songo kayninman hina chaninchaypa ruwayninkunaqa chinkachisqachu kanman.

33. Ichaqa, Churinpa sutinpin runakunata Yaya waqvarqan (kaytaq churasqa kaq kutichikapuy imayna kanan karqan) khaynata nispa: Yuyayniykichisman kutirimunkichis manataq songoykichista rumiyachinkichischu chayqa, khuyapakuyniyoqmi qankunawan kasaq, Sapan Churiywan.

34. Chhaynaqa, pipas yuyayninman kutirimunqa songonta mana rumiyachispa chayqa, Sapan Churiywanmi khuyapakuymán derechuyoc kanqa, huchankuna panpachaypaq; kaykunataq samariyniymán haykunqaku.

35. Pipas songonta rumiyachinqa millaytataq ruwanqa chayqa, phiñarikuyniypin sullullchakusaq, samariyniymán mana haykunanpaq, nispa.

36. Kunantaq wawqeykuna qankunaman nisaykichis, songoykichista rumiyachinkichis chayqa, manan Wiraqochaq samariyninman haykunkichischu; chhaynataq millay ruwayniykichis Payta phiñarichin, chaytaq ñawpaq kaq phiñarichiypi hina qankunaman phiñarichiyninta kachamun; ari, rimayninman hina qhepa kaq utaq ñawpaq kaqpipas, wiñay-wiñaypaq nunaykichis qollunan-

paq; chhaynataq rimayninman hina, qhepa kaq wañuymanpas ñawpaq kaqmanpas.

37. Kunantaq wawqeykuna, kaykunata yachasqanchista rikuspa—cheqaqpunitaqmi chaykuna kanku—hakuyá yuyayninchisman kutirisun, amataq songonchista rumiyachisunchu, qowasqanchis ishkaq kaq kamachiypi phiñakuyninta hamuchinanpaq Wiraqocha Yayanchista mana phiñarichinanchispaq; ichaqa, haku rimayninman hina allichasqa Yayaq samariyininman haykusun.

32 T'AQA

Wakchakuna qespinamanta uyarinku. Almaq yupaychayninkuna, rimaynin-kunapiwan. kreyiy munaywanmi iñiy wiñan.

1. Hinataq, rispanku Yayaq siminta runakunaman yachachiyta qallarirqanku, sinagogakunaman wasinkunamanwan haykuspanku; ari, k'ikllukunapipas yachachirqankun simita.

2. Hinataq, paykunapurapi ancha askha llank'ay pataman, wakcha runakuna purapi usachikuyniyuq kayta qallarirqanku. Kay wakcha runakunaqa, sinagogakunamanta qarqosqan karqanku wakcha p'achankurayku.

3. Chhaynataq, Yaya yupaychanankupaq sinagogakunaman haykunankumanta hark'asqa karqanku, qhelli runakuna hina qhawasqa kaspanku. Chhaynataq wakcha karqanku; ari, q'opa hinan wawqenkunaq rikusqan karqanku, kay pachaq imaymanankunaman hinataq wakcha karqanku; songonkupipas wakchan karqanku.

4. Kunantaq, Onidah orqopi runakunaman Alma yachachishaqtin, kay pachaq imaymanankunaman hina wakcha kasqankurayku songonkupi wakcha rimasqanchis runakunamanta, ancha askha runakuna payman hamurqanku.

5. Paykunataq Almaman hamurqanku; paykuna umachaqtaq Almata nirqan: Imatan kay wawqeykuna ruwanqaku, wakcha kasqankuraykun llapan runakunaq cheqnisqan kanku; ari, kurakniyuq cheqnisqan astawanqa. Sinagoga ruwanaykupaq kikin makiykuwan anchatapuni llank'asqayku sinagogaykunamantan paykuna qarqowarqanku, ancha wakcha kasqaykuraykutaqmi qarqowarqanku; manan maypi Yayayku yupaychanaykupaq kanchu; imatan ruwasaqku, nispa.

6. Kayta uyarispataq payman hina Alma kutirirqan, ancha kusikuywantaq payta qhawarqan; ñak'ariyninku paykunata cheqaqtapuni llanp'u songota wakichisqanta, Yayaq rimayninta uyarinankupaq hina kasqankutawantaq rikurqan.

7. Chhaynataq, manaña imatapas hukkaq runakunaman nir-

qanchu, ichaqa, makinta chutarispa cheqaqtapuni yuyayninku-
man kutirimuq qhawasqan runakunata khaynata nirqan:

8. Rikunin llanp'u sonqo kasqaykichista, chhayna kaqtinqa,
saminchasqan kankichis.

9. Imatan ruwasaku—sinagogaykunamanta qarqosqan kayku,
manataqmi Yayayku yupaychayta atiykuchu—nispan wawqeyki-
chis nirqan.

10. Kaytan nisaykichis: Sinagogallaykichispi Yayata yupay-
chaytachu yuyankichis?

11. Astawanraqtaq tapuykichisman: Semanapi huk kutillata
Yayata yupaychanaykichistachu yuyankichis?

12. Nisaykichistaq—allinmi sinagogaykichismanta qarqosqa
kasqaykichis llanp'u sonqo kanaykichispaq, yachaysapa kayta ya-
chanaykichispaqwan. Nesitakunmi yachaysapa kayta yachanayki-
chis; qarqosqa kasqaykichisraykun wawqeykichiskunaq cheqnis-
qan kankichis, ancha wakcha kasqaykichisrayku; chayraykutaqmi
llanp'u sonqo kayman apamusqa karqankichis; chhayna nesito-
pin llanp'u sonqo kayman apamusqa kankichis.

13. Kunantaq saminchasqa kankichis llanp'u sonqo kayman
tanqasqa kasqaykichisrayku. Mayninqa, llanp'u sonqo kayman
tanqasqa kaspán runaqa yuyayman kutiriyta mashkan. Kunanqa,
cheqaqtapuni yuyayman kutirimuqqa, khuyapakuytan tarinqa;
khuyapakuyta tarispa tukukuykama takyaq runataq qespichisqa
kanqa.

14. Kunantaq qankumanan, llanp'u sonqo kayman tanqasqa
kasqaykichisraykun saminchasqa kankichis nispa nisqayrayku,
manachu yuyankichis, Yayaq rimayninrayku cheqaqtapuni llanp'u
sonqo wakiqkuna aswan saminchasqa kasqankuta?

15. Ari, cheqaqtapuni llanp'u sonqo wakispa huchankuna-
manta runa kutirimun, hinaspataq tukukuykama takyan chayqa,
chay runan saminchasqa kanqa; ari, ancha wakcha kasqankuray-
ku, llanp'u sonqo kayman tanqasqa kaqkumanta aswan samin-
chasqa.

16. Chhaynaqa, saminchasqan kanku, llanp'u sonqo kayman
mana tanqasqa kaspá sonqonkupi llanp'uyaqqkuna. Hukniraq ri-
maypiqa, saminchasqan Yayaq rimariyninpi kreyispa sonqonta
mana k'ulluyachispa unuchasqa kaqqa; ari, rimay yachananpaq
mana apamusqa kaspá, manaraq kreyishaspanku chay yachay-
man mana tanqasqakuna.

17. Ari, askhan kan kay niqkuna: Hanaqpachamanta huk se-
ñalta qhawachiwankiku chayqa, chaymi cheqaqtapuni yachasaq-
ku; chaymi kreyisaqku, nispa.

18. Kunantaq tapuni: Iñiychu kay? Manan nisaykichismi. Hukta runa yachanqa chayqa, manan kreyinanpaq rason kanchu, yachañataq chayta chayqa.

19. Kunanri, hayk'a aswan ñakasqaraqmi Yayaq munayninta yachaspa chayta mana ruwaq runa iñeqlla runamanta, utaq iñinanpaq rasonniyoq kaspalla huchallikuypi urmaq runamanta?

20. Kaytaqa qankunan taripanaykichis. Nisaykichistaq—huk makipin kan hukkaq makipi kasqan hina; sapanka runamantaq kanqa ruwayninkunaman hina.

21. Kunantaq iñiymananta rimarisqayman hina—iñiyqa, manan imaymanakunamanta hunt'asqa yachayniyoq kaychu; chhaynaqa, iñiyniyoq kankichis chayqa, cheqaq kaq mana rikusqa imaymanakunatan suyankichis.

22. Kunantaq nisaykichis, yuyarinaykichistataqmi munayman, sutinpi llapan kreyiqkunawan khuyapakuyniyoq Yaya kasqanta; chhaynaqa, ñawpaqtaqa Pay munan kreyinaykichistan; ari, rimayninkunapi.

23. Angelkunawanmi rimayninta runakunaman qon; ari, manan qharikunallamanchu, ichaqa, warmikunaman iman. Manan llapanchu kay, huch'uy erqechakunamanpas qosqan askha kuti rimaykuna kan, kaytaq hamawt'ata, yachayniyoqtawan tutayachin.

24. Kunantaq ancha munasqay wawqeykuna, qarqosa, ñak'arisqapiwan kasqaykichisrayku, ima ruwanaykichista noqamanta yachayta munasqaykichisman hina—manan qankuna taripanaypaq munasqaytachu yuyanaykichista munani, ichaqa, cheqaq kasqanman hinallan—

25. Manan, llapaykichismi k'umurikunaykichispaq tanqasqa karqankichis nispa ninaytachu nini; cheqaqtapunin kreyini imapiña kaspankupas llanp'u sonqo wakiy atiqkuna qankuna purapi huk runakuna kasqanta.

26. Kunanqa iñiymananta rimasqayta hina—Iñiy mana hunt'asqa yachay kasqanta—hinallataqmi rimayniykunawan. Qallariypiqa manan yachawaqchischu hunt'asqapuni cheqaq kasqanmantaqa, iñiychu mana hunt'asqa yachay chhaynata.

27. Ichaqa, rikch'aripa yuyayniykichista hatarichinkichis chayqa, rimayniykunata prubanaykichiskamapuni, huk chikan iñiytaq llank'achiwaqchis chayqa, ari, kreyiyllataña munawaqchis chaypas, kay munayta qankunapi llank'ananta saqeychis, huk chikanta rimayniykunamanta qankunapi maypi kananpaq qonaykichispaq kreyinaykichiskama.

28. Kunanqa, muhuman Yayaq rimayninta tupachisun. Son-

qoykichispi muhu tarpukunanta kacharinkichis chayqa, cheqaq muhu utaq allin muhu kanqa chayqa, manataq mana kreyinyiki-chiswan qarqonkichischu Wiraqochaq Nunanwan tupapakunay-kichispaq chayqa, sonqoykichis ukhupin wiñayta qallarinqa. Kay wiñayta rikuyta qallarispaq qankuna ukhupi kay niyta qallarinkichis—kay muhuqa cheqaqtapunin allin muhu utaq kay simiqa allin simin, nunaytan hatunyachiyta qallarín; ari, yuyayniytan k'anchariyta qallarín, ari, noqapaq ancha sumaq kaytan qallarín, nispa.

29. Kunanri, manachu kay iñinyikichista hatunyachinman? Ari nisaykichismi; chaypiwanpas manan hunt'asqa yachaymanchu wiñarqan.

30. Ichaqa, muhu punkirisqanman hina, ch'ichirisqanman hina, wiñaytawan qallariqtintaq, allin muhun kay nispan ninaykichis; punkirintaq, ch'ichirintaq, wiñaytawantaq qallarín.

31. Kunanri, sut'inpunichu kashankichis allin muhu kay kasqanmanta? Ari nisaykichismi, rikch'ayninman hinan sapanka muhu qon.

32. Chhaynaqa, muhu wiñan chayqa, allin muhun; mana wiñanachu chaytaq, mana allin muhuchu, chhayna kaqtintaq wik-ch'usqa kapun.

33. Kunanqa, khaynatataq ruwarqankichis, tarpurqankichistaq muhuta, ch'ichirispaq wiñayta qallarirqan chayqa, yachankichismi chay muhu allin kasqanta.

34. Kunanri, hunt'asqachu yachayniykichis? Ari, hunt'asqan chaypi yachayniykichis, iñinyikichistaq puñun; yachasqaykichis-raykutaqmi kay, yachankichistaqmi nunaykichista Yayaq rimaynin punkirichisqanta, yachallankichistaqmi ch'ichirisqanta, hamut'ayniykichistaq k'ancharisqa kayta qallarisqanta, yuyayniykichistaq wiñayta qallarín.

35. Chhaynari, manachu cheqaq kay? Ari nisaykichismi, k'anchay kasqanrayku; imaña k'anchay kan chayqa, allinmi, atikuntaq reqsiyta chayqa; chhaynaqa, yachanaykichismi allin kasqanta. Kunanri, kay k'anchayta mallisqaykichis pataman, hunt'asqachu yachayniykichis?

36. Manan nisaykichismi, manataqmi iñinyikichista huk qayllamanchu churanaykichis. Iñinyikichisllatan llank'achirqankichis, muhuta tarpuspa allinchus muhu chayta yachanaykichispaq.

37. Sach'a wiñayta qallarisqanman hinataq ninkichis: Haku, ancha hatun llank'aywan hallmasun saphichakuspa wiñananpaq, ruruta qowananchispaq, nispa. Ancha hatun añanwan hallmankichis chayqa, saphichakunqan wiñanqataq rurutataq qonqa.

38. Ichaqa, sach'ata qonqankichis, manataq chay kallpachayta yuyankichischu chayqa, manan saphichakunqachu; intiq q'oñiy-nin hamuspa ruphaqtintaq, mana saphiyoc kaqtin naq'enqa, t'iraspataq wikch'upunkichis.

39. Kayqa, manan muhu mana allin kaqtichu, nitaq chaypa rurun mana munana kaqtinchu; ichaqa, hallp'aykichis wakcha kaqtinmi, sach'ata kallpachayta mana munasqaykichisraykupiwanmi; chhaynaqa, manan chay sach'aq rurun qankunapaq kanmachu.

40. Chhaynan, Yayaq rimayninta mana kallpachankichischu, iñiy ñawivan rurunta suyaspa chayqa, manan hayk'aqpas kawsay sach'aq rurunta horqowaqchischu.

41. Yayaq rimayninta kallpachankichis chayqa, ari, wiñayta qallariqtin, sach'atataq kallpachankichis wiñayta qallariqtin, iñiy-niykichiswan ancha hatun k'uchi kaywan, sonqo ñit'iykukuywan chaypa rurunta suyaspa chayqa, saphichakunqan; wiñay-wiñay kawsayman wiñariq sach'ataq kanqa.

42. Yayaq rimayninta qankunapi saphichakunanpaq kallpachakusqaykichisrayku, k'uchi kayniykichisrayku, iñiykiykichisrayku, sonqo ñit'iykukuyniykiykichisrayku iman chaypa rurunta horqonkichis; chay rurutaq aswan sumaq, llapan mishk'i kasqanmanta aswan mishk'i, llapan yuraq kaqmanta aswan yuraq, llapan ch'uya kaqmanta aswan ch'uya. Kay rurumantataq mikhunkichis hunt'akunaykikchiskama, mana yarqayniyoq ni ch'akiyniyoq kanaykichispaq.

43. Chaymi wawqeykuna, qankunaman ruruta apamunanpaq sach'ata suyaspaykichis, iñiykiykichispa, k'uchi kasqaykichispa, sonqo ñit'iykukuyniykiykichispa ima rurunta pallankichis.

34 T'AQA

Amulekpa sut'inchaynin. Ancha hatun qhepa-kaq munachiy. Imaynata khuyapakuy chaninchavta hunt'asqanmanta. Yuyayman kutirimuyta ama suyachinachu.

1. Hinataq, paykunaman kay simikunata Alma rimariqtin, panpapi tiyarikurqan; Amulektaq sayaripa khaynata paykunaman yachachiyta qallarirqan:

2. Wawqeykuna, Yayaq Churin nispa yachachisqayku Cristoq hamunanmanta rimasqa kasqan imaymanakunamanta sanp'a runa kanaykichista mana atikunantan yuyani; ari, yachanin noqaykumanta manaraq t'aqakushaqtikyichis kaykuna allintapuni qankunaman yachachisqa kasqanta.

3. Ñak'arisqaykichisrayku, ima ruwanaykichista qankunaman yachachinasuykichispaq ancha munasqay wawqeymanta munasqaykichista hinan, huk chikanta rimarirqasunkichis umaykichista alistananpaq; ari, iñiyman, sonqo ñit'iykukuyman iman anyarqasunkichis.

4. Ari, askha iñiyniyoq kanaykichiskama, Yayaq rimayninta songoykichispi tarpunaykichiskama, sumaq kayninmanta mallinaykichispaq.

5. Rikurqaykutaqmi—Yayaq Churinpichu rimay kan, ichari manachu Cristo kan, nispa umaykichispa tapakuynin kasqanta.

6. Rikurqankichistaqmi askha kutita qankunaman wawqey sut'inchasqanta; qespinapaq rimay Cristopi kasqanta.

7. Rimarqanmi wawqey, Zenospa rimayninkunamanta, Yayaq Churinwan qespiy hamun nispa; rimallarqantaqmi Zenockpa rimayninkunamanta, Moisespa rimayninkunamantapas rimallarqantaqmi, kay imaymanakuna cheqaq kasqanta sut'inchanapaq.

8. Kunantaq noqa kikiymanta qankunaman sut'inchasqa kaykuna cheqaq kasqanmanta. Nisaykichisitaq—yachanin runakunaq wawankuna puraman Cristo hamunanta, Ilaqtanpa huchakunata Paypi hap'inanpaq, runakunaq huchankunarayku ñak'arinanta. Wiraqocha Yayan kayta rimarqan.

9. Nesitakunmi ñak'ariy ruwasqa kanan. Wiñay Yayaq ancha hatun ruwanankuman hinataq ñak'ariy ruwasqa kanan; mana chayqa, llapan runakunan mana pantaypuni qollunanku. Llapankun rumiyachisqa kanku, llapankun urmasqa chinkasqapiwan kanku; wañunankutaqmi nesitakusqan ñak'ariy mana ruwasqachu kanman chayqa.

10. Nesitakunmi ancha hatun qhepa kaq arpay kanan; ari, manan runaq arpayninchu nitaq uywakunaqchu, nitaq ima urpiqpas; manan runa arpaychu kanqa, ichaqa, mana tukukuyniyoq wiñay-wiñaypaq arpaymi kanan.

11. Manan ima runapas kanchu kikin yawarninta sut'uchinanpaq, huk runakunaq huchankunarayku ñak'arinanpaq. Kunanqa, runata huk runa wañuchinman chayri, chanin kamachisqa-siminchisri wawqenpa kawsaynintachu qechunqa? Manan niykichismi.

12. Ichaqa kamachisqa-simiqa mañakun wañucheqpa kawsaynintan; chhaynaqa, manan imapas kanmanchu runakunaq huchankunamanta kuticheq mana tukukuyniyoq ñak'ariymanta aswan pisiqa.

13. Chhaynaqa, nesitakunmi ancha hatun qhepa kaq arpay kanan, chay patamantaq kanqa utaq nesitakunqa yawar sut'uchiy tukuchina; chaymantaq Moisespa kamachisqa-simin hunt'akunqa;

ari, llapanmi hunt'asqa kanqa, sapanka ch'iñi sapanka seq'e ima; manataq imapas pasanqachu.

14. Kaymi kamachisqa-simiq hunt'a ima ninan, sapanka qayllankuna chay ancha hatun qhepa arpayman qhawachispa. Chay ancha hatun qhepa arpaytaq kanqa Yayaq Churin, ari, mana tukuyuyniyog wiñaypaqwan.

15. Khaynatataq qespiyta Pay apamunqa, sutinpi llapan kre-yiqkunaman; kaytaqmi chay qhepa arpaypa imayna kanan, khuyapakuyta llank'ayninta apamunanpaq, kaytaq chaninchayta atipan; yuyayninkuman kutirimunankupaq iñiyuniyog kanankupaq imayna ruwanata runakunaman apamuspa.

16. Khaynatataqmi khuyapakuyqa, chaninchaypa munayninta hunt'ayta atinman, qespi kay makipitaq paykunata muyurin; yuyayman kutirinapaq iñiyta mana llank'achiqtaq chaninchaypa mañakuyninpa hunt'asqa kamachisqa-simiman churasqa kan. Chhaynaqa, yuyayman kutirinapaq iñiyuniyog kaqllapaqmi chay ancha hatun wiñay-wiñaypaq kutichikapuy apamusqa kanqa.

17. Chhaynaqa, Yayañayá qankunaman qochun wawqeykuna, yuyayman kutirimunapaq iñiyuniyogichista llank'achiyta qallarinchayki-chispaq, qollanan sutinta waqyayta qallarinchayki-chispaq, qankunawan khuyapakuyuniyog Pay kananpaq.

18. Ari, Paymanta khuyapakuyrayku mañakuychis. Qespichinanpaq ancha atiyuniyogmi Pay.

19. Llanp'u sonqo kaychis, Payman waqyakuytataq qatillaychis.

20. Payta waqyakuychis chakraykichispi kaqtiykichis, ari, llapa uywaykichiskunarayku.

21. Wasiykichispi Payta waqyakuychis, ari, wasiykichispi llapa kaqkunarayku; tutamantanpi, chawpi p'unhawpi, tutayaqinpas.

22. Ari, awqaykichispa atiyin kontra Paymanta mañakuychis.

23. Ari, Payta waqyakuychis llapa chaninchaypa awqan saqra kontra.

24. Payta waqyakuychis chakraykichispa rurunkunarayku, chaypi t'ikarinaykichispaq.

25. Mañakuychis chakraykichispa uywankunarayku, uywaykichiskuna mirananpaq.

26. Ichaqa, manan llapanchu kay; wasiykichis ukhupi nunaykichista seqariyachiychis pakasqa k'uchuykichiskunapi, purunniykichiskunapiwan.

27. Wiraqochata mana waqyakuqtiykichistaq sonqoykichis hunt'a kananta kachariychis, allin kayniykichisrayku, qankuna muyureqniykichispi kaq runakunaq allin kayninkuraykupiwana pa-

saqlla yayaman-rimarikuypi kaspaykichis.

28. Kunantaq niykichis ancha munasqay wawqeykuna—ama yuyaychischu llapan kay kasqanta. Kay llapan imaymanakunata ruwasqaykichis pataman, nesitaqkunamanta q'alalla kaqkunamantawan ayqenkichis, manataq onqoqkunata ni ñak'ariqkunamantapas watukunkichischu, nesitaqkunamantaq kapusoqmiykichismanta—kapusunkichis chayqa—mana qonkichischu chayqa, qankunata nisaykichis, mana kay mayqen kaqkunatapas ruwankichischu chayqa, yanqapaqmi yayaman-rimarikuyniykichis, manataqmi imapaqpas sirvisunkichischu, iñiy mananchaq ish kay uya-kuna hinataqmi kankichis.

29. Chhaynaqa, khuyapakuy niyoq kayta qonqankichis chayqa, mana ima chaninniy qaqtin runakunaq sarukachasqan, ch'uyanchaqkunaraq choqasqan q'opa hinan kapunkichis.

30. Kunanqa wawqekuna kay tukuy sut'inchaykunata chaskisqaykichis pataman, kay imaymanakunamanta qollanan qelqakuna cheqaqchasqantawan rikuspa, yuyayman kutirimuy rurukunata apamuspa hamunaykichistan munayman.

31. Ari, hamunaykichista, amaña astawan songoykichista rumiyachinaykichista imataq munayman. Kunanmi qespiyniykichispa pachan, p'unchawnin ima; chhaynaqa, yuyayniykichisman kutirimunkichis, manataq songoykichista rumiyachinkichischu chayqa, kunanpachan ancha hatun qespiy imayna kanan qankunaman apamusqa kanqa.

32. Kay kawsaymi Yayawan tupanankupaq runakunaq alistananku pacha; ari, kay kawsaypa p'unchawninmi ruwayninkuta runakuna ruwanankupaq p'unchaw.

33. Kunantaq, ñawpaqta qankunaman nisqayta hina, askha sut'inchaykuna imataq kapurqasunkichis chayqa, qankunamanta mañakusaykichis, ama tukukuykamachu suyachiychis yuyayniykichisman kutirimunaykichis p'unchawta. Wiñay-wiñaypaq alistakunanchispaq noqanchisman qosqa kay kawsaypa p'unchaw patamanqa, kay kawsaypi kananchiskama tiempunchista mana allinyachisunchischu chayqa, laqha tutan hamunqa, manataqmi chaypi ima ruwanapas ruwakuyta atikunmanchu.

34. Chay millay ñak'ariyman apamusqa kaspaqa, manan kay niyta atiwaqchischu: Kutirimusaqmi yuyavniyman, Yayaymanmi kutirisaq, nispa. Manan, manan kayta niyta atiwaqchischu; kay kawsaymanta lloqseqtiykichis runa-kurkuykichispi kaq nunallataqmi chay wiñay-wiñay pachapi atiy niyoq kanqa runa-kurkuykichis hap'ikunanpaq.

35. Wañuvkama vuvayman kutirimuy niykichispa p'unchaw-

ninta suyachirqankichis chayqa, saqraq nunanman watasqan wakirqankichis, paypata hinataqmi qankunata pay markasunkichis; chhaynaqa, Wiraqochaq Nunanmi qankunamanta hitirirqan, manataqmi qankunapi maypi kananpaq kanchu, saqrataq qankunapi tukuy atiyniyoq. Kaytaqmi millay ruwaqkunaq tukukuypi imayna kayninku.

36. Kaytaqa yachani—manan qhelli wasikunapiqa tiyanichu, ichaqa, chaninkunaq songonkupin, nispa Wiraqocha nisqanrayku. Nillarqantaqmi Pay: Qhapaq-suyuy-pin chaninkuna tiyanqaku manaña astawan lloqsinkunapaq; ichaqa, yuraqyachisqan p'achanku kanan Chitaq yawarninwan, nispa.

37. Kunanqa ancha munasqay wawqeykuna, kay imaymanakunata yuyarinaykichistan munayman, Yayaq ñawpaqenpi manchakuywan qespiyniykichista llank'aynaykichista; amaña astawan Cristoq hamunanta mananchanaykichista;

38. Amaña astawan Qollanan Nuna kontra ankallikuspa, ichaqa Payta chaskiyichis, Cristoq sutintataq churakuyichis. Ñut'u hallpakama k'umurikuyichis, Yayatataq yupaychaychis, nunapipas cheqaqpipas, maypiña kaqtiykichispas. Sapa p'unchaw añaychakuyipi kawsaychis, imaymana saminchaykunata, khuyapakuykuna-tawan qosqasuykichisrayku.

39. Ari, anyallasaykichitaqmi wawqeykuna, pasaqlla yayaman-rimarikunaykichispaq; saqraq wateqayninkunawan mana pantachisqa kanaykichispaq, pay mana atipanasuykichispaq, qhepa p'unchawpi paypa mana kanaykichispaq. Manan allintachu payqa qosunkichis.

40. Kunantaq ancha munasqay wawqeykuna sonqo ñit'iykukuyniyoy kanaykichispaq, imaymana ñak'ariykunata awantanaykichistapaq ima anyaykichisman; ancha wakcha kasqaykichisrayku qarqoqniykichiskuna kontra mana millay rimanaykichispaq; paykuna hina huchallikuqkuna mana wakiwaqchispaq;

41. Ichaqa, sonqo ñit'iykukuyniyoy kaychis, awantaychis chay muchuykunata, llapan ñak'ariyniykichiskunamanta huk p'unchaw samarinaykichista suyaspaykichis.

CHURIN KORANTONMAN ALMAQ KAMACHIYNINKUNA

39 t'aqamanta 42 t'aqakama

39 T'AQA

Map'akusqanrayku Korianon anyasqa. Huchallikuvnin zoramitakunaq iñiy-ninkuta pisiyachin. Qhepamanmi Cristoq kutichikakapuynin ayan.

1. Kunanqa churiy, aswan askhan qanman ninay kapuwan

wawqeykiman nisqaymantaqa. Manachu qhawarqanki wawqeykiq mana kuyuq kasqanta, iñiysapa kasqanta, Yayaq kamachiy-ninkuna waqaychaypi k'uchi kasqantawan? Manachu allinta pay qhawachirqasunki?

2. Manan wawqeykiq kasusqanta hinachu rimayniykunata kasurqanki zoramitakuna chawpipi. Kaymi qan kontra kapuwan: Kallpaykipi yachaysapa kayniykiwanmi yupaychakuyta qallarirqanki.

3. Manataqmi llapanchu kay churiy. Ancha llakichiwaqтан ruwarqanki, ruwanaykipaq waqyasqa kasqaykita saqespan Siron hallp'aman rirqanki lamanitakunaq sispayninman, chay ch'aranqara Isabelpa qhepanta.

4. Ashkha runakunaq sonqontan pay suwarqan, ichaqa manan chayraykuchu qanpaq allin chay karqan, churiy. Qanman konfiasqa kasqan serviytan atindiwaq karqan.

5. Manachu yachanki, churiy, Wiraqochaq ñawpaqenpi kaykuna millay-millana kasqanta; ari, llapan huchakunamanta aswan millay-millana, ichaqa, mana-huchayoq yawar sut'uchiylamanta, Qollanan Nuna mananchayllamantawan mana.

6. Qanpi huk kutin kasqan Qollanan Nunata mananchanki chayqa, yachankitaq chay mananchasqaykita chayqa, mana panpachayniyoq huchan kay. Ari, pipas Yayaq k'anchaynin kontra, yachaynin kontrapiwan sipin chayqa, manan ruwanallachu paypaq panpachay aypay; ari, nisaykin churiy, manan ruwanallachu paypaq panpachay aypay.

7. Kunantaq churiy Yayamanta munayman, chhayna hatun millay huchamanta mana huchayoq kanaykita. Manan huchaykikunamanta rimaymanchu nunaykita llakichinaypaq, allin kayniyki-paq mana kanmanchu chayqa.

8. Ichaqa, manan huchaykikunata Yayamanta pakayta atiwaqchu; yuyayman mana kutirimunkichu chayqa, huchaykikunan qan kontra sut'inchaqkuna hina qhepa p'uchawpi sayarinqa.

9. Kunanqa churiy, yuyayman kutirimuspa huchaykikuna wik-ch'unaykitan munayman, amañataq riychu ñawiykiq munapakusqanpa qhepanta; ichaqa, kay llapan imaymanakuna ruwayta wanay; kayta mana ruwankichu chayqa, manan imaynatapas Yayaq qhapaq-suyunta chaskiwaqchu. Yuyariy, qanpitaq kayta apay, kaykuna ruwaytataq wanay.

10. Noqataq kamachiyki qanpi apanaykipaq, ruwayniykikunapi kurak wawqeykikunawan rimanakunaykipaq. Wayna kaynillaykipiraqmi kashanki, wawqeykikunaq yanapasqan kaytaraqmi nesitanki. Uyariy kunsijonkuta.

11. Ama yanqa waq'a imaymanakunawan apachikuychu; ama saqrata kachariychu yapamanta chay millay-millana ch'aranqarakunaq qhepanta sonqoykita apananpaq. Qhawariy churiy, ancha hatun millaytan zoramitakunaman apamurqanki; ruwasqaykita rikuspankutaqmi rimayniykunapi mana kreyirqankuchu.

12. Kunantaq Wiraqochaq Nunan noqata niwan: Wawaykikunata kamachiy allin kaqta ruwanankupaq; askha runakunaq sonqokuta imañataq qolluyman apankuman, nispa. Chhaynaqa, qanta kamachiyki churiy, Yayaq manchakuyninpi, millay ruwanaykikunata amaña ruwanaykipaq;

13. Tukuy yuyayniykiwan, atiykiykiwan, kallpaykipiwan Wiraqochaman kutirinaykipaq; amaña astawan runakunaq sonqokuta millay ruwayman pusanaykipaq. Aswanmá paykunaman kutiriy, hinaspataq huchaykikunata chay pantasqa ruwasqaykikunatawan allichamuy.

14. Ama qhapaqyaykunata, nitaq kay pachaq yanqa imaymanakunatapapas mashkaychu; manan qanwan kaykunata apayta atiwaqchu.

15. Kunantaq churiy, huk chikanta nisayki Cristoq hamunanmanta. Qantataq nisayki: Paymi cheqaqtapuni runakunaq huchankuna horqoq hamunqa; ari, qespiymanta sumaq willaykunata llaqtanman willaqmi hamunqa.

16. Kunantaq churiy, kay serviymanmi waqyasqa karqanki, yuyayniykita alistanaykipaq kay runakunaman kay sumaq willaykunata willanaykipaq; hukniraq rimaypiqa, qespiy paykunaman hamunanpaq, wawankunaq yuyaynikuta alistanankupaq, Paypa hamunan pachapi Yayaq rimayninta uyarinankupaq.

17. Kunanqa, huk chikanta kay imaymanakunamanta umaykita samarichisaq. Qanqa tapukushanki, imanaqtin kaykuna chhay tukuy ñawpaqtaraq yachakunanmanta. Noqataq nisayki: Manachu huk nuna Yayapaq chaninniyuq kunan pacha hamuq pachapi nuna hina?

18. Manachu nesitakun qespina imayna kanan kay runakunaman yachachina, wawankunaman hina.

19. Manachu atinalla kunan pachapi angelninta Wiraqocha kachamunanpaq, noqanchisman kay sumaq willaykunata willawananchispaq, wawanchiskunaman hina, utaq hamuyninpa pacha patamanpas hina?

40 T'AQA

Koriantonman Alma rimariyta qatillan. Tukuy runakunapaq kawsarimuy. Wañuymanta kawsarimuykama sapaqpi chaninkuna millay ruwaqkunamanta kanku. Cheqaqpuni savarichipuy.

1. Kunanqa churiy, kaymi qanman astawan rimarinay; rikushanin wañusqakunamanta umayki huk chikanta utirayasqanta.

2. Kayta qanman nisayki, manan kawsarimuy kanchu—huk rimaypiqa niyman, kay wañuqqa manan mana-wañuqta churakunchu, kay waqlliqa manan mana-waqlliqa churakunchu,—ichaqa, Cristoq hamusqan patamanña.

3. Paymi wañusqakunaq kawsarimuyninkuta wakichin. Ichaqa churiy, manaraqmi kawsarimuyqa kanraqchu. Kunanqa huk pakasqata qanman reqsichisayki; chaypiwanpas, askhan pakasqa imaymanakuna kan, chaykunataq waqaychasqa kanku, manataq pipas chaykunata yachanchu, ichaqa kikin Yayalla. Ichaqa hukta qanman qhawachisayki, chayta yachanaypaqtaq k'uchillaña Yaya-ta tapurqani, chaytaq kawsariymanta.

4. Kanmi señalasqa pacha, wañusqakunamanta llapan runakuna hatarimunankupaq. Kunanqa, hayk'aq kay pacha hamunqa chaytaqa manan pipas yachanchu; ichaqa, Yayaqa yachanmi señalasqa pachata.

5. Kunanqa, ichachus huk kutilla utaq ishkay kuti, utaq kisa kuti kanqa wañusqakunamanta runakuna hatarimunankupaq chayqa, manan imapas qokunchu; Yayan yachan kay tukuy imaymanakunata; allinñataqmi khayna kananmanta yachay—kanmi wañusqakunamanta llapan runakuna hatarimunankupaq señalasqa pacha.

6. Kunanqa, kananmi ch'usaq pacha, wañuna pachaq kawsarimuna pachaq ima chawpinkupi.

7. Kunanqa tapuymán, wañuna pachamanta kawsarimuna pachakama, runakunaq nunankuwan ima kasqanta.

8. Ichachus huk pachamanta aswan kan runakuna sayarinankupaq chayqa, manan imapas qokunchu; manataq llapanchu huk kutillapi wañunku chayqa, manataqmi imapas kay qokunchu. Llapapas huk p'unchawllan Yayawanqa, runakunallapaqtaqmi pachaqa tupusqa.

9. Chhaynaqa, señalasqan runapaq pacha, wañusqakunamanta sayarinankupaq; kantaqmi pacha, wañuna pachaq kawsarimuna pachaqpiwan chawpinkupi. Kunanqa kay pachamanta, iman kapun runakunaq nunankuwan, chayta yachanaypaqmi k'uchillaña Wiraqochata tapukurqani; kaytaqmi yachasqay.

10. Llapan runakuna sayarinankupaq pacha chayamuqtintaq, paykuna yachanqaku, runakunaman señalasqa pachakunata Yaya yachasqanta.

11. Kunanqa, wañuna pachaq kawsarimuna pachaqpiwan chawpipi nunaq imayna kananmanta—Huk angelpa yachachiwas-

qanmi kay kawarqan, llapa runakunaq nunanku, kay wañuq runa-kurkumanta ripusqankuman hina, ari, llapa runakunaq nunanku, allinña mana allinña kaqtinpas wasiman apasqa kasqankuta, paykunaman kawsay qoq Yayaman.

12. Hinamantaq, chanin kaqkunaq nunanku, kusiy-kusi kaypi chaskisqa kanqaku, chaytaq kusipawqar sutichasqa, samarina pacha, sumaq kawsay pacha; chaypitaq llapan llakinkunamanta, llapan qhawakuymanta, tukuy muchuymantawan samanqaku.

13. Hinataq, huchasapakunaq nunanku, ari, ancha millay kaqkuna— kaykunaqa, Wiraqochaq Nunanmanta mana imayoq mana huk chikanpiwanmi kanku; millay ruwaykunatan akllarqanku allin kaqmantaqa, chayraykutaq saqraq nunan paykunaman haykurqan, wasinkuta hap'ikuspa—kaykunan tutayaq hawaman qarqosqa kanqaku. Chaypin waqay, qaparqachay, kiru saqtaypiwan kanqa; kaytaq paykuna kikinkuq millay ruwayninkurayku, saqraq munayninman hina hark'asqa apasqa kaspanku.

14. Kaymi huchasapakunaq nunankuq imayna kayninku; paykuna pataman Yayaq wapu phiñarikuyninta, tutayaqpi ancha millay manchakuypi suyay. Chhaynan kay hina kaypi qhepanku, chaninkunachu kusipawqarpi hina, kawsarimunanku pachakama.

15. Kanmi runakuna, kawsarimuy manaraq kashaqtin, nunaq kusikuypi kayninta, ñak'ariypi kaynintawan ñawpaq kaq kawsariy kasqanta hina hamut'aqkuna. Ari, kawsarimuy nikonmanmi nunaq utaq almaq hatariyninta, kusiy-kusi kaymanpas, utaq, ñak'ariymanpas churasqa kayninta, rimasqa siminkunaman hina.

16. Yapamantataq, rimasqan qarqan, kanmi ñawpaq kaq kawsarimuy, ña kaq runakunaq, kuna kaqkunaq, utaq kananku kaq llapa runakunaq kawsarimuyninku, wañusqankumanta Cristoq kawsarimuyninkama, nispa.

17. Kunanqa manan yuyaswaychu, khayna rimarisqa ñawpaq kawsariy nunaq kawsarimuynin, kusikuymen utaq ñak'ariymanpas churasqa kanankumantawan kanantaqa. Manan yuyayta atiwaqchu kayta chay ninantaqa.

18. Manan nisaykin; ichaqa nuna runa-kurkuwan huñunakuy-nintan nin, Adanpa p'unchawninmanta Cristoq kawsarimuyninkama.

19. Ichachus rimarisqa kaq runakunaq nunanku runa-kurkunkupiwani huk pachallapi huñunakunku, huchasapakunapas chanin kaqkunapas, chaytaqa manan ninichu; kay niylla allin kachun, llapankun hatarimunqaku; huk rimaykunapiqa, kawsarimuyninkuqa hamun, Cristoq kawsarimuynin patamanña wañuqkunaq kawsarimuyninkuq ñawpaqnintan.

20. Kunanqa churiy, manan ninichu, kawsarimuyninku Cristoq kawsarimuynin pachapi hamunqa nispachu; ichaqa, noqa kikiy yuyasqallaytan qosaq: Chaninkunaq nunankuqa runa-kurkunkuwan huñunakunqaku Cristoq kawsarimuynin pachapi, hanaqpa-chaman seqaynin pachapiwan, nispa.

21. Ichari kawsarimuynin pachapichu ichari chay patamanñachu chaytaqa manan ninichu. Ichaqa, kaytan nini: Kanmi pacha, runa-kurkuq wañusqanmanta kawsarimuyninkama; nunaq kaynintaq kusikuypi utaq ñak'ariypi, wañusqakuna hatarimunankupaq Yayaq señalashan pachakama, nunanku runa-kurkunkuwan yapamanta huñunakunankupaq; Yayaq ñawpaqenpi sayanankupaq apamusqa kaspá, ruwayninkuman hina taripasqa kanankupaq.

22. Ari, kaymi wakichin unanchaqkunaq rimasqan imaymanakunaq yapamanta sayarichiyninta.

23. Runa-kurkumanmi nuna yapamanta churasqa kanqa, runa-kurkutaq nunaman; ari, sapanka runa-kurkuq partinkuna, sapanka moqonkunapiwan runa-kurkunman yapamanta churasqa kanqa. Ari, manan umaq ni huk chukchallanpas chinkanqachu, ichaqa, llapan imaymanakunan yapamanta churasqa kanqa maypi kanan hunt'asqa runa-kurkuman.

24. Kunantaq churiy, kaymi unanchaqkunaq rimasqanku yapamanta sayarichipuy.

25. Chhaynamantaq, Yayaq qhapaq-suyunpi chaninkuna k'ancharinqaku.

26. Ichaqa, huk ancha millay wañuymi huchasapakunaman hamun; wañunkun paykuna, chaninchaymanta kaq imaymanakunaman hina; qhellin paykuna kanku, manataq ima qhelli kaqpas Yayaq qhapaq-suyunta chaskiyta atinmanchu; ichaqa, qarqosqan paykuna kanku millay ruwayninkuq utaq llank'ayninkuq rurunmanta mallinankupaq churasqa; p'oshqo qeroq puchunpa chhanqantataq ukyanku.

41 T'AQA

Koriantonman rimayta Alma qatillan. Yapamanta sayarichiy ima ninan. Ruwayninkuman, munayninkumanwan hinan runakuna taripasqa kanqaku. Runa, pay kikin kontra taripakunqa.

1. Kunanqa churiy, rimarisqa kasqa sayarichiyanta huk chikanta rimarinay kashan. Waqllichirqankun qelqakunata huk chikan runakuna, kayraykutaq pantarqanku. Rikushanitaqmi kay-

manta umayki mana qasilla kasqanta. Qanmanmi kayta hamut'a-chisayki.

2. Nisaykin churiy—kay sayarichiyqa kananmi Yayaq chaninchayninwan. Nesitakunmi, llapan imaymanakuna imayna kanan-kuman sayarichisqa kananku. Nesitakunmi chanintaqmi, Cristoq atiyininman kawsariyninmanwan hina runaq nunan runa-kurkuman yapamanta sayarichisqa kanan, runa-kurkuq tukuy imaymanakuna kikinkuman yapamanta sayarichisqa kanan.

3. Nesitakuntaqmi Yayaq chaninchayninwan, ruwayninkunaman hina runakuna taripasqa kanankupaq. Kay kawsaypi ruwayninku, sonqonkuq munayninkupas allin karqan chayqa, allin kaqllamantaqmi qhepa p'unchawpi paykuna sayarichisqa kanqaku.

4. Ruwayninku millay karqan chayqa, millayllataqmi paykunaman sayarichisqa kanqa. Chhaynaqa, tukuy imaymanakunan imayna kanankuman sayarichisqa kanqa, llapanpas maypi kanan runa-kurkuman—wañuq mana wañuqman hatarichisqa, waqlliq mana waqlliqman—mana tukukuyniyuq kusikuymán, Yayaq qhapaq-suyun chaskinankupaq, utaq mana tukukuyniyuq muchuyman, saqraq suyun chaskiq; huknin huk makipi, huk kaqtaq huk kaq makipi;

5. Huknin kusikuymán hatarichisqa kusikuy munasqanman hina, utaq allinpaqpas allin kaq munasqanman hina. Hukkaqtaq millayman, millay munasqanman hina; p'unchawnintinchi millay ruwayta munarqan, chhaynan tuta hamuqtin millay kaqta chaskinqa.

6. Chhaynallataqmi hukkaq makipipas. Huchankunamanta kutirimuspa, p'unchawninkunaq tukukuyninkama chanin kaqta munarqan chayqa, chhaynallatataqmi chaninchaypi qosqa kanqa.

7. Kaykunan Wiraqochaq kutichikapusqan kanku; ari, kaykunan horqosqa, mana tukukuq tutayaqmanta kacharichisqa kaqkuna. Khaynatan paykuna sayanku, utaq urmankupas. Paykuna kikinkun kikin taripakuqninku kanku, allin kaqta utaq mana allin kaqtapas ruwanankupaq.

8. Yayaq kamachiyninkunaqa mana t'ikrakuqmi. Chhaynaqa, allichasqan ñan kashan pipas chaypi puriyta munaspa qespichisqa kananpaq.

9. Kunantaq churiy, amaña huk kutintapas Yayaykita phiñarichiychu chay yachachiyninkunapi, chhaynata kunan huchallikusqaykita hina.

10. Ama yuyaychu, sayarichiyman rimasqa kasqanrayku, huchamanta kusikuymán sayarichisqa kanaykita. Qanta nisayki, millay ruwayqa, manan hayq'aqpas kusikuychu karqan.

11. Kunantaq churiy, kay kawsaypi kaq runakunaqa, utaq aychapi kaq llapan runakunaqa p'ushqo hayaqepi, millay ruwanaq watananpiwanmi kashanku; kay pachapi mana Yayayoqmi kanaku, Yayaq imayna kaynin kontrataq rirqanku; chhaynaqa, kusikuy imayna kanan kontrapin kashanku.

12. Sayarichiy simiq ima ninanri, hukta kay pachapi kasqanmanta mana imayna kananman hina churaychu, ichari imayna kananpa kontraman churaychu?

13. Manan khaynachu churiy, sayarichiypa ima ninanqa—millayta millaypaq, aychakaqta aychakaqpaq, saqrakaqta saqrakaqman, allinta allin kaqpaq, chaninchayta chaninchaypaq, chanin kaqta chanin kaqpaq, khuyapakuqta khuyapakuqpaq kutichimuy-mi.

14. Khaynaqa churiy, wawqeykikunawan khuyapakuq kay. Chaninchaywan ruwayniykikunata ruway, chaninta taripay, pasaqllataq allin kaqta ruway. Kay llapan imaymanakunata ruwanki chayqa, suñaykitan chaskinki; ari, khuyapakuymi qanman yapamanta sayarichisqa kanqa; chaninchaymi yapamanta qanman kutirichisqa kanqa; chanin taripaymi yapamanta qanman sayarichisqa kanqa, allin kaqpiwantaq qanmana yapamanta qosqa kanqa.

15. Qanmanta lloqsiqmi yapamanta qanman kutirimunqa sayarichisqataq kanqa. Chhaynaqa, sayarichiy simiqa, huchasapatan hunt'asqatapuni kundenan, manataq imallatapas payta chaninchanchu.

42 T'AQA

Koriantonman Almaq rimaynin qatillan. Chaninchay khuyapakuypiwan sut'inchasqa. Kawsay sach'a. Kay kawsay prubakuna pacha. Nunapi runa-kurkupiwana wañuy. Yuyayman kutirimuy, qespiv, kamachisqa-simi, muchuchiy, kay llapan imaymanakuna kanan.

1. Kunanqa churiy, mana hamut'ay atisqayki yuyayniykita mana qasita kachisqanta rikuni, chaytataq mana hamut'ayta atinkichu—kaytaq huchallikuqta muchuchiypi Yayaq chaninchayninmanta; manan chaninchu huchallikuq runa millay ñak'ariyman churasqa kanan, nisan yuyashanki.

2. Kunanqa churiy, kaytan qanman sut'inchasayki. Horqosqa kasqanku hallp'ata hallmanankupaq Eden pawqarmanta ñawpaq kaq tayta-mamanchista Wiraqocha Yaya qarqosqan patamanmi, ari, horqorqanmi runata, Eden pawqarpa intiq lloqsimunan qayllapitaq kerubinta, tukuy qayllaman muyuq rawraq q'anchinata-

wan churarqan, kawsay sach'ata hark'ananpaq—

3. Kunanqa rikunchismi, Yaya hina runa wakisqanta, allinta mana allintawan reqsispa. Makinta chutarispa, kawsay sach'amantawan hap'ispa mikhuspa wiñay-wiñaypaq mana kawsananpaqmi kerubinta rawraq q'anchinatawan Wiraqocha Yaya churarqan, rurumanta runa mana mikhunanpaq—

4. Khaynatataq rikunchis, yuyayman runa kutirimunanpaq pacha qosqa kasqanta; ari, probakunanpaq pacha, yuyayman kutirimunanpaq, Yayata sirvinanpaqwan.

5. Hinaqa, chay kikin pacha makinta chutarispa kawsaypa sach'anmanta Adan mikhunman karqan chayqa, wiñaypaqmi kawsanman karqan, Yayaq rimayninman hina, yuyayninman kutirimunanpaq mana tiempuyoc kaspas. Ari, Yayaq rimaynintaq ch'usaq wakipunman karqan, hatunpuni imayna qespina kanantaq waqllichisqa kanman karqan.

6. Ichaqa, wañunanpaqmi runaman señalasqa karqan; chhaynaqa, kawsay sach'amanta kuchusqa kasqankuman hinan pachamanta wit'usqa kananku karqan. Wiñaypaq chinkasqataq runa wakirqan; ari, urmasqa runan wakipurqanku.

7. Kunanqa rikunkin kaywan, qallariypi tayta-mamanchis kay kawsaypipas nunapipas Wiraqochaq ñawpaqenmanta qarqosqa kasqankuta. Hinaqa rikunchismi, runakuna munayninkuman hina ruwanankupaq wakisqankuta.

8. Khaynaqa, manan nesitakurqanchu kay kawsaypi wañuy-manta runakuna kutichikapusqa kananku; khayna kanman chayqa, kusikuypaq hatunpuni imayna kananqa waqllinmanmi karqan.

9. Chhaynaqa, manataq hayk'aqpas nuna wañuyta atinmanchu, urmaytaq llapan runakunaman nunapi wañuyta, kay kawsaypi wañuytawan apamurqan chayqa— hukniraq rimaypiqa, Wiraqochaq ñawpaqenmanta qarqosqa—chhaynaqa, kananmi karqan kay nunapi wañuy-manta runakuna kutichisqa kananku.

10. Hinataq, imayna kayninkupi aycha kaq, aychaq munayninkunawan apachikuq, millay ima wakiqtinku, kay probakuna pacha allichakunankupaq pacha wakirqan; allichakunapaq pacha wakipurqan.

11. Kunanqa yuyariy churiy, kutichikapuna imayna kanan mana kanmanchu chayqa (huk qayllaman churasqa), wañusqankuman hinan nunanku usuri karqan, Wiraqochaq ñawpaqenmanta qarqosqa kaspanku.

12. Manataqmi kay urmasqa kasqanmanta runa kutichinapaq imapas karqanchu, kaytataq pay kikinman runa apakamurqan

mana kasukuq kasqanrayku.

13. Chhaynaqa, chaninchayman hinaqa, kutichikapunaqa manan wakinmanchu karqan, ichaqa kay allichakuna pachapi, ari, kay alistakuna pachapi yuyayman runakuna kutirimuqtillanku; mana khaynachu kanman chayqa, manan khuyapakuy llank'anmanchu, ichaqa, chaninchaypa ruwaynintan chinkachinman. Chaninchaypa ruwayninkunaqa manan qolluchisqachu kanman; hina kanman chayqa, Yaya kaytan Yaya qollunman.

14. Khaynaqa rikunchismi, lliw runakuna urmasqa kasqankuta, chaninchaypa makinpitaq karqanku; ari, Yayaq chaninchayninpi, kaytaq paykunata churarqan ñawpaqenmanta wiñaypaq qarqosqa kanankupaq.

15. Khuyapakuypa ñanninqa manan wakichisqachu kamnan karqan, ñak'ariy mana ruwasqachu kanman chayqa; chayraykun kikin Yayapuni runakunaq huchankunata ñak'arin, khuyapakuypa ñanninta wakichinanpaq; chaninchaypa mañakuyninta thañichinanpaq; Yaya, hunt'asqa Yaya, chanin Yaya, khuyapakuyniyopqiw Yaya kananpaq.

16. Kunanqa, yuyayman kutirimuyqa manan runaman hamuyta atinmanchu karqan, muchuchiy mana kanmanchu chayqa, kaypas wiñaypaqmi karqan, nunaq kawsaynin chhayna kasqan hina, kusikuy kanan kontrapi churasqa; kaypas nunaq kawsayninpa hina wiñaypaqmi karqan.

17. Kunanri, imaynatan runa yuyayninman kutirimunman, mana huchallikunmanchu chayri? Imaynatan huchallikunman kamachisqa-simi mana kanmanchu chayri? Imaynataq kamachisqa-simiri kanman muchuchiy mana kanmanchu chayri?

18. Ichaqa, churasqan muchuchiy karqan, chanin kamachisqa-simitaq qosqa karqan; kaytaq lurin nanananta runaman apamurqan.

19. Mana kamachisqa-simi qosqachu kanman karqan chayri—runa wañuchiqa runaqa wañunanmi nispa—wañuyta runa manchakunmanchu, runata wañuchiqtin.

20. Hucha kontra kamachisqa-simi mana qosqachu kanman chayqa, runaqa manan huchallikuyta manchakunmanchu.

21. Manataq kamachisqa-simi qosqachu kanman, runataq huchallikunman chayri, imatan chaninchay khuyapakuypas ruwanman; manan kaykunaqa runapi derechuyoqchu kankuman.

22. Ichaqa, qosqan kamachisqa-simi, churasqataq muchuchiy-pas, qosqataq yuyayman kutirimuy-pas; kay yuyayman kutirimuy-tataq khuyapayakuy mañakun; mana chayqa, runatan chaninchay waqyan kamachisqa-simitataq llank'achin, kamachisqa-simitaq

muchuchiya qon; mana khayna kaqtinga, qolluchisqa chaninchaypa ruwayninkuna kanman, Yayataq Yaya kayta qollunman.

23. Ichaqa, manan Yaya kayta Yaya qollunchu, yuyayman kutirimuqtataq khuyapayakuy waqyan, khuyapakuytaq hamun ñak'ariyayku; ñak'ariytaq wañusqakunaq kawsarimuyninkuta waki-chin; wañusqakunaq kawsarimuyninkutaq Yayaq ñawpaqenman runakunata kutirichimun. Khaynatan ñawpaqenman yapamanta apamusqa kanku, ruwayninkuman hina, kamachisqa-simiman hina, chaninchaymanwan hina taripasqa kanankupaq.

24. Llapan mañakuynintan chaninchay llank'achin, khuyapakuy pas paypa llapan kasqantan waqyan; khaynataq mana pipas, ichaqa, cheqaqtapuni yuyayman kutirimuqkunalla qespichisqa kanku.

25. Chaninchaymanta khuyapakuy suwakunantachu yuyarqanki? Manan, manan imatapas nisqaykin. Chhayna kaqtinga, Yaya kaytan Yaya qollunman.

26. Khaynatan Yaya wakichin ancha hatun wiñaypaq munayninkunata, pacha kamasqa kasqanmantapacha allichasqa kasqanta. Khaynatataq runaq qespiynin kutichiyninpiwan wakin, chhaynallatataq qolluyninkupas ñak'ariyninkupas.

27. Chhaynaqa churiy, pi hamuqpas qespillan kawsaq unumanta ukyanman; mana hamuqkunataq mana hamunankupaq tanqasqachu kanku; ichaqa, ruwasqanman hinan qhepa p'unchawpi payman sayarichisqa kanqa.

28. Millay kaq ruwayta munarqan, manataq p'unchawninkunapi yuyayman kutirimurqanchu chayqa, millaymi payman qosqa kanqa, Yayaq sayarichiyinman hina.

29. Kunanqa churiy, amaña kaykuna muchuchinasuykita saqenaykitan munani. Huchaykikunalla qanta muchuchichun, chay muchuchiy yuyayniykiman apamunasuykipaq.

30. Churiy, Yayaq chaninchayninta amaña astawan mananchanaykitan munani. Amaña aswan huch'uy kaqpi allinchakuyta atipakuychu huchaykikunarayku, Yayaq chaninchayninta mananchaspa; ichaqa Yayaq chaninchayninta, khuyapakuyninta, sonqo ñit'iykukuynintawan sonqoykita atipananta kachariy; ullpuykuy pa ñut'u hallp'anman apamunasuykita kachariy.

31. Kunantaq churiy, kay runakunaman Yayaq rimayninta yachachinaykipaq Yayaq waqyasqanmi kanki. Kunanqa churiy, riy, Yayaq rimayninta willamuy, cheqaqwan sut'i sonqopiwan, runakunata yuyayman kutirimuyman apamunaykipaq, khuyapakuy pa ancha hatun ñannin paykunapi atiyniyoq kananpaq. Yayañayá qanman qochun rimayniykunaman hinapuni. Hinataq kachun.

HELAMANPA QELQAN

Nephitakunaman Lamanita Samuelpa unanchayninkuna

13 t'aqamanta 15 t'aqakama

13 T'AQA

Llaqtaq perqan patamanta unanchaykunata Samuel qaparin. Tawakaq miraypi chaninchaypa q'anchinan urmanan. Chanin runakunarayku nefitakunaq llaqtankuna mana taqmasqachu. Hallp'a ñakasqa kanqa. Mana hap'iy atina qhapaqyaykuna.

1. Hinataq pusaq chunka soqtayoq watapi, millay ruwaykunapiraq nefitakuna karqanku; ari, ancha hatun millay ruwaypi, lamanitakunataq mana pantay Yayaq kamachiyninkunata waqaycharqanku, Moisespa kamachisqa-siminman hina.

2. Kay watapitaq huk Lamanita Samuel Zarahemla hallp'aman hamurqan, runakunamantaq yachachiyta qallarirqan. Hinataq, askha p'unchawkunan yuyayman kutirimuyta runakunaman yachachirqan, paykunataq payta qarqorqanku, paytaq hallp'anman kutiripunanpaq hinaña kasharqan.

3. Ichaqa, Wiraqochaq arun payman hamurqan, yapamanta kutispa, imaña sonqonman hamusqantapas runakunaman unanchananpaq.

4. Hinataq, llaqtaman haykunanta mana kacharirqankuchu, chayraykutaq llaqtaq perqan pataman seqarqan, makinkunata chutarispataq wapu kallpayoq aruwan qaparirqan; runakunamantaq unancharqan imataña sonqonman Wiraqocha churasqanta.

5. Paytaq paykunata nirqan: Uyariychis, noqa Lamanita Samuel, Wiraqochaq rimayninkunata rimarini, sonqoyman churasqan simikunata; Paytaq sonqoyman churarqan, chaninchaypa q'anchinan kay runakuna patapi warkurayasqanta kay runakunaman ninaypaq; manaraq tawa pachak wata pasashaqtintaq chaninchayninpa q'anchinan kay runakunaman urmayamunqa.

6. Ari, ancha hatun wañuymi kay runakunata suyan, cheqaqtapunitaq kay runakunaman hamunqa; manataq imapas kay runakunata qespichiyta atinmanchu, ichaqa, yuyayman kutirimuy, Wiraqocha Jesucristopi iñiyllapiwan; Paytaq cheqaqtapuni kay pachaman hamunqa, askha imaymanakunataq Pay ñak'arinqa, llaqtanraykutaq wañuchisqa kanqa.

7. Wiraqochaq huk angelninmi chayta willawarqan, ancha sumaq willaykunataq nunayman apamuwarqan. Qankunamanpas kay willanaypaqmi kachamusqa karqani, sumaq willaykunayoq

kanaykichispaq; ichaqa manan chaskiwayta munarqankichischu.

8. Chhaynaqa, khaynatan Wiraqocha nin: Nephitakunaq ru-miyasqa sonqonkurayku, yuyayninkuman mana kutirimunqaku-chu chayqa, rimayniyta paykuna puramanta horqosaq, Nunayta-taq paykunamanta hitirichisqa, manañataq astawan paykunata awantasaqchu, wawqenkunaq sonqonkutataq paykuna kontra kutirichisqa.

9. Manaraq tawa pachak wata pasashaqtintaq paykunata k'iri-saq; ari, q'anchinawan, yarqaywan, phawaq onqoykunapiwan paykunamanta watukusaq.

10. Ari, ancha millay phiñarikuyniypin paykunamanta watuku-saq, awqaykichiskunamanta tawakaq miraymantataq runakuna kawsanqaku lliwtapuni qolluchisqa kanaykichista rikunankupaq. Cheqaqtapunin kay kanqa, yuyayniykichisman mana kutirimunki-chischu chayqa, nispan Wiraqocha nin. Tawakaq miraymantataq wañuchisqa kanaykichismanta watukunqaku.

11. Ichaqa, yuyayniykichisman kutirimuspa Wiraqocha Yayay-kichisman kutirimunkichis chayqa, phiñarikuyniytan kutirichisqa, nispan Wiraqocha nin; ari, khaynatan Wiraqocha nin: Saminchas-qan kanku yuyayninkuman kutirimuspa noqaman kutirimuqkuna; ichaqa, ay yuyayninkuman mana kutirimuqkunamanta.

12. Ari, ay kay ancha hatun Zarahemla llaqtamanta. Chanin kaqkunaraykun qespichisqa kay llaqtaqa; ari, ay kay ancha hatun llaqtamanta, nispan Wiraqocha nin, ari, rikushanin kay hatun llaqtamanta aswan askhan runakuna noqa kontra sonqonkuta rumiyachinankuta, nispan Wiraqocha nin.

13. Ichaqa, saminchasqan kanku yuyaninkuman kutirimuqku-na, paykunatan amachasaq. Ichaqa, kay ancha hatun llaqtapi chaninkuna mana kankumanchu chayqa, hanaqpachamantan ni-nata urayachimuyman kay llaqtata qolluchinaypaq.

14. Ichaqa, chaninkunaraykun hark'asqa. Ichaqa, hamushanmi pacha, chaninkunata qankuna puramanta qarqonaykichispaq, hi-namantaq wañuchisqa kanaykichispaq poqosqaña kankichis; ari, ay kay ancha hatun llaqtamanta, millay ruwaykuna, millay-milla-nakunapiwan chaypi kasqanrayku.

15. Ari, ay Gideon llaqtamanta, chaypi kaq millay ruwaykuna-rayku millay-millanakunarayku ima.

16. Ari, ay muyureqnintin hallp'api kaq nefitakunaq hap'is-qanku llaqtakunamanta, millay ruwaykuna millay-millanakunapi-wan chaykunapi kasqanrayku.

17. Huk ñakaymi hallp'aman hamunqa, ninmi Awqasuyuku-naq Wiraqochan, kay hallp'api kaq runakunarayku, ari, millay

ruwayninkunarayku millay-millanankunapiwanrayku.

18. Hinataqmi kanqa, ninmi Awqasuyukunaq Wiraqochan, ari, ancha hatun cheqaq Yayanchis; panpapi qhapaqyaykuna lla-pa pakaqkunaqa, manañan astawan chayta tarinqakuchu, hallp'a-pi ancha hatun ñakayrayku, chanin runa kaspá Wiraqochapaq mana pakaqtinkuqa.

19. Noqapaq qhapaqyayninkunata pakanankutan ruwasaq, nispan Wiraqocha nin; ñakasqataq kanqaku mana noqapaq qhapaqyayninkuna pakaqkuna; manan pipas noqapaq qhapaqyayninkunata pakankuchu, ichaqa, chaninkunalla. Noqapaq qhapaqyayninkuna mana pakaqtaq ñakasqa kanqa paypas qhapaqyayninpas, manataq pipas chayta tarinqachu hallp'api ñakay kasqanrayku.

20. Chayamunqataqmi p'unchaw, qhapaqyayninkunapi sonqonkuta churasqankurayku, qhapaqyayninkunata pakanankupaq. Qhapaqyayninkunapi sonqonkuta churasqankuraykutaq qhapaqyayninkunata pakasaq, awqankunamanta ayqekuqtinku. Noqapaq mana pakasqankuraykutaq, paykunapas qhapaqyayninkupas ñakasqa kanqaku; haqay p'unchawpitaq maqasqa kanqaku, nispan Wiraqocha nin.

21. Kay ancha hatun llaqtaq runankuna, uyariychis rimayninkunata; ari, uyariychis Wiraqochaq nisqan simikunata; kaytan Pay nin: qhapaqyayniykichiskunaraykun ñakasqa kankichis, qhapaqyayniykichispas ñakasqan, chaykunapi sonqoykichista churasqaykichisrayku, chaykuna qosqniykichispa rimayninkunata mana uyarisqaykichisraykupiwan.

22. Manan Wiraqocha Yayaykichista yuyarinkichischi saminchasqasuykichis imaymanakunapi; ichaqa, pasaqlan qhapaqyayniykichiskunata yuyarinkichis, manataq chaykunarayku Wiraqocha Yayaykichista añaychayta yuyarinkichischi. Ari, manan sonqoykichis Wiraqochaman achhuyunchu, ichaqa ancha hatun anchayypi alabakuypi, ancha hatun puynkiriypi, munapakuypi, churanakuypi, millay yuyaypi, qatikachaypi, runa wañuchiynkuna-pi, imaymana millay ruwaykunapi iman punkirin.

23. Kayraykun huk ñakayta Wiraqocha Yaya kay hallp'amanpas qhapaqyayniykichiskunamanpas kachamurqan, millay ruwayniykichiskunarayku.

24. Ari, ay kay llaqtamanta, kay chayamusqan pacharayku. Unanchaqkunatan qarqonkichis, paykunamanta asikunkichis, rumikunata paykunaman chanqankichis, wañuchinkichis, imaymana millaykunataq paykunaman ruwankichis, ñawpa pachakunapi runakuna ruwasqankuta hinapuni.

25. Kunantaq rimaqtiykichis ninkichis: P'unchawninchiskuna ñawpa taytanchiskunaq p'unchawninkunapi kanman karqan chayqa, manan unanchaqqunata sipiswanchu karqan, manan rumichaswanchu karqan, qarqoswanchu karqan, nispa.

26. Ichaqa, paykunamanta aswan millaymi qankuna kankichis; Wiraqochachu kawsan chhaynan, huk unanchaqqankuna puraman hamuspa Wiraqochaq rimayninkunata willasunkichis, chaytaq huchaykichiskunamanta, millay ruwayniykichismantawan sut'inchan chayqa, paywanmi phiñarikunkichis, qarqonkichis ima, wañuchinaykichispaqtaq imaymanata mashkankichis; ari, manacheqaq unanchaqqmi pay, huchallikuqmi, saqramantan, nispa ninkichis, ruwayniykichis millay kasqanta sut'inchasqanrayku.

27. Ichaqa, huk runa qankunaman hamunman, hinaspataq: Kayta ruwaychis, manan huchachu; haqayta ruwaychis manataqmi ñak'arinkichischu; ari, paymi ninqa: Sonqoykichispa anchayayninpi puriychis; ari, ñawiykichispa anchayayninpi puriychis, sonqoykichispa ima munasqantataq ruwaychis, nispa qankunaman huk runa hamuspa kayta ninman chayqa, paytan chaskinkichis, unanchaqqmi pay nispaqtaq ninkichis.

28. Ari, hatunyachinkichismi, kapusoqniykichismantataq payman qonkichis; qoriykichismanta, qolqeykichismantawanmi payman qonkichis, ancha chaninniyuq p'achawantaq payta p'achankichis. Qankunaman mishk'i simikunata rimariqtin, llapanpas allillanmi nisqanraykupiwantaq mana ima huchatapas paypi tarinkichischu.

29. O huchasapa waqlisqa runakuna; ch'ilayasqa k'ullu uma-yuq runakuna, hayk'a pacha Wiraqocha awantanasuykichistan yuyankichis?. Ari, hayk'a pachan kacharinkichis, mana allin yuyayniyuq pusaqkuna, ñawsa pusaqkunapiwan pusanasuykichista? Ari, hayk'a pachan tutayaqta akllankichis k'anchay akllanaykichismanta?

30. Rawrarichisqañan Wiraqochaq phiñarikuynin qankuna kontra kashan, millay ruwayniykichiskunaraykun hallp'ata Pay ñakarqan.

31. Hamushanñan pacha, qhapaqyayniykichiskunata ñakananpaq, llusk'a kaqtin mana hap'iyta atinkichispaq; wakcha kayniykichis p'unchawkunapitaq mana qhepachiyta atinkichischu.

32. Wakcha kayniykichis p'unchawkunapitaq Wiraqochata waqyankichis, yanqapaqtaq Payta waqyankichis, hamunñataq qankuna pataman qollunaykichis p'unchaw chayqa, qollunaykichistaq sut'ipuniña kapun. Chay p'unchawpitaq waqankichis, qarqachankichis ima, nispan Awqasuyukunaq Wiraqochan nin.

Chaytaq waqankichis khaynatataq ninkichis:

33. Yuyayniyman kutirimuyman karqan, amataq unanchaqqunata wañuchiymanchu, rumichaymanchu, qarqoymanchu karqan, nispa. Ari, chay p'unchawpin ninkichis: Wiraqocha Yayanchismanta yuyariswan karqan, qhapaqyayninchiskuna qowasqanchis p'unchawpi, hinataq, manan llushk'achu qhapaqyayninchiskuna wakinman karqan chinkachinanchispaq; noqanchismantan qhapaqyayninchiskuna ayqen.

34. Kaypin ruwananchiskunata churarqanchis, tutamantanpi-taq mana kapunchu; q'anchinanchispas noqanchismanta qechusqan kapun, awqanakunanchispaq mashkasqanchis p'unchawpi.

35. Ari, qhapaqyayninchiskunata pakarqanchis, noqanchismantataq llushk'arparirqan, hallp'a ñakasqa kasqanrayku.

36. Yuyayninchisman kutirimuswan karqan, noqanchisman Wiraqochaq rimaynin hamuwasqanchis p'unchawpi. Ñakasqan hallp'a, llapan imaymanakunataq llusk'ayan, manataq hap'iyta atinchischu.

37. Saqrakunaq muyurisqanmi kanchis; ari, nunanchis qolluchiy munaqpa angelninkunawan muyurisqan kanchis. Ancha hatunmi millay ruwayniykichiskuna. O Wiraqocha, manachu phiñakuyniykita noqaykumanta kutirichiyta atiwaq? nispa. Kaymi rimayniykichis kanqa haqay p'unchawkunapi.

38. Probakunaykichis p'unchawkunaqa ñan tukukunña; sayachirqankichismi qespinaykichis p'unchawta, wiñay-wiñaypaq sinchi tardi kanankama, qollunaykichistaq cheqaqpuni ruwasqa. Ari, mana aypay atinaykichistan kawsayniykichispa llapan p'unchaw-ninkuna mashkarqankichis; millay kaqta ruwaspan kusikuyta mashkarqankichis; chaytaq, ancha hatun Wiñay Umanchispi kaq chaninchaynin kontra.

39. Kay hallp'aq runankuna, rimayniykuna uyariy munaqkuna! Wiraqochaq phiñarikuynin qankunamanta kutirinantan mañakuni, yuyayniykichisman kutirispas qespichisqa kanaykichispaq.

14 T'AQA

Cristomanta Lamanita Samuel unanchan. Pishqa wata pataman Cristoq paqariy Nina Señal Ninkuna qosqa kanqa. Wañuy Nin Mantapas Señal Ninkuna qosqa kan.

1. Hinataq, Lamanita Samuel aswan askha imaymanakunatawan unancharqan, manataq chaykuna qelqakuyta atikunmanchu.

2. Khaynatataq paykunaman nirqan: Huk señaltan qosqaykichis—pishqa watakunan hamunqa, hinamantaq Yayaq Churin ha-

munqa, sutinpi llapan kreyiqkunata kutichikapunanpaq.

3. Kaytan hamunan pachapi señalta hina qosqaykichis: Ancha hatun k'anchaykunan hanaqpachapi kanqa, hinataq hamunanpa ñawpaqenpa tutanpi mana tutayaq kanqachu, hinataq runaman rikhuringa p'unchawllapas kanman hina.

4. Chhaynataq huk p'unchaw, huk tuta, huk p'unchawpiwan kanqa, huk p'unchawllapas mana tutayoq kanman hina; kaytaq qankunapaq seña kanqa; yachankichismi intiq lloqsimunanmanta haykunanmantapas; chhaynaqa, sut'intapunin yachanqaku ishka p'unchaw huk tutapiwan kananmanta; chaypiwanpas manan tutaqa laqhayanqachu. Kaytaq Pay paqarinan ñawpaqen tutanpi kanqa.

5. Huk mosoq qoyllur rikhurimunqan, mana hayk'aqpas rikusqaykichis hina; kaypas seña mi qankunapaq kanqa.

6. Mantaqmi llapanchu kay, askha seña kuna, utirayanakunapiwanmi hanaqpachapi kanqa.

7. Llapaykichistaq utirayankichis, hinataq panpaman urmankichis.

8. Yayaq Churinpi tukuy iñeqtaq wiñay-wiñaypaq kawsayniyoq kanqa.

9. Khaynatan angelninwan Wiraqocha kamachimuwarqan, hamuspa qankunaman kay imaymanakunata willanaypaq; ari, kay imaymanakunata qankunaman unanchanaypaqmi Pay kamachiwarqan; ari, khaynatan Pay niwarqan: Yuyayniykichisman kutiriyichis, Wiraqochaq ñannintataq allichaychis nispa kay runakunaman qaparimuy, nispa.

10. Kunantaq, lamanita kasqayrayku, Wiraqochaq kamachivasqan simikunata qankunaman rimareqtiy, qankuna kontra k'araq kasqanraykupiwantaq, noqa kontra phiñarikurqankichis, wañuchiwaytataq mashkashankichis, qankuna chawpimantataq qarqowarqankichis.

11. Uyarinkichismi rimayniykunata, chayraykun kay llaqtaq perqankuna pataman seqamurqani, millay ruwayniykichisrayku Yayaq taripayninkuna qankunata suyasqan uyarinaykichispaq, yachanaykichispaqwan; yuyayman kutirimunapaq imayna kananta yachanaykichispaq ima;

12. Yayaq Churin Jesucristo, hanaqpachaq kay pachaqqiwan Taytan, qallariymantapacha llapan imaymanakuna Kamaqpa hamunanamanta yachanaykichispaqwan; hamuyninpa seña nkunamanta yachanaykichispaq ima, sutinpi kreyinaykichispaq.

13. Sutinpi kreyinkichis chayqa, llapan huchaykichiskunamantan kutirimunkichis, chhayna kaqtintaq, Paypa ruwayninkunawan

HELAMAN 14

huchaykichiskuna panpachayniyoq kanaykichispaq.

14. Yapamantataq, huk señalta qosqaykichis; ari, wañuyninmanta señalta.

15. Cheqaqtapunin Pay wañunan, qespiy hamunanpaq; allinmi Paypaq, nesitakuntaqmi Pay wañunan, wañusqakunaq kawsariyninkuta wakichinanpaq, Wiraqochaq ñawpaqenman runakuna apamusqa kanankupaq.

16. Ari, kay wañuymi kawsariyta apamun, ñawpaqkaq wañuymantataq lliw runakunata qespichimun—chay nunapi wañuymanta. Llapan runakunan Adanpa urmayninwan Wiraqochaq ñawpaqenmanta t'aqasqa kaspanku, kay pachapi imaymanakunamantapas, nunapi imaymanakunamantapas wañusqa hina kanku.

17. Ichaqa, Cristoq kawsariyninmi llapan runakunata qespichin, ari, llapan runakunata; Wiraqochaq ñawpaqenmantataq paykunata kutirichimun.

18. Ari, yuyayman kutirimunapaq ñantataq apamun; pipas yuyayman kutirimuqtaq mana wit'usqachu ninaman choqasqa kananpaq; ichaqa, yuyayman mana kutirimuqqa, wit'usqa kaspan ninaman choqasqa kapun; yapamantataq nunapi wañuy paykunaman hamun; ari, ishkaykaq wañuy, yapamantataq chanin kaq imaymanakunamanta paykuna wit'usqa kanku.

19. Chhaynaqa kutiriyichis kutiriyichis yuyayniykichisman, kaykunata yachaspa mana ruwaspaykichistaq kondensasionman haykumuyta ñak'ariwaqchis, kay ishkay kaq wañuymun apamusqa kaspas.

20. Ichaqa, huk señalmanta qankunaman nisqay hina, wañuyninmanta señal—chay wañunan p'unchawpiqa, intin tutayanqa, manataq qankunaman k'ancharimunqachu; hinallataq killapas qoyllurkunapas. Manataq k'anchay kay hallp'a patapi kanqachu, wañusqan pachamanta kinsa p'unchaw, wañusqakunamanta yapamanta sayarimusqan pachakama.

21. Ari, nunanta haywanan pachapiqa, askha horaskunan qhaqyakuna illapakunapiwan kanqa, hallp'ataq chhapchikunqa khatatatanqataq; kay hallp'a patapi kaq qaqakunataq, hallp'a patapi hallp'a ukhupiwan kaq qaqakunataq, kunanpacha mana ch'eqtasqa kasqanta yachasqaykichis, utaq chay qaqaq aswannin mana ch'iqtasqa kaqqa, ch'eqtakunqan;

22. Ari, ishkaypin ch'eqtakunqaku; chaymanta wiñaypaqtaq k'akrasqa, ch'eqtasqa, hallp'antinpi k'ullpikunapi p'akisqapiwanataq tarikunqa; ari, hallp'a patapipas hallp'aq ukhupipas.

23. Sallallallaykunanan kanqa, askha orqokunataq panpayachisqa kanqa qheshwakuna hina; kunanpacha qheshwakuna nispa

waqyasqa askha hallp'akunataq ancha suni orqokunapi hatarin-qaku.

24. Askha hatun ñankunan p'akisqa kanqa; askha llaqtakunataq purunyanqa.

25. Askha ayapanpakunataq kicharisqa kanqaku, askha wañuqninkunataq haywanqaku; askha qollanan runakunataq askhaman rikhurimunqaku.

26. Khaynatan angel rimariwarqan, askha horaskunan qhaqyakuna, illapakuna kanqa, nispan niwarqan.

27. Paytaq niwarqan: Chay qhaqyakuna, illapakuna, sallallaykunapiwan kaqtinmi kay imaymanakunaqa kanqa, tutayaqtaq hallp'antinta kinsa p'unchaw pakanqa, nispa.

28. Angeltaq niwarqan: Askha runakunan kaykunamanta aswan hatun imaymanakunata rikunqaku, kay señalkuna, kay ancha hatun utirayaykunapiwan, kay hallp'antinpi kananta kreyinakupaq; runakunaq wawankuna purapi mana-kreyina mana kananpaq.

29. Kaytaq kanqa, pipas kreyiq qespichisqa kananpaq; pipas mana kreyiqkunamantaq chanin taripay hamunanpaq; kundenasqa kanqaku chaytaq paykuna kikinku kundenasionninkuta apakamunku.

30. Kunantaq wawqeykuna, yuyariychis yuyariychis, pipas wañun chayqa, pay kikinpaqmi wañun; pipas millay kaqta ruwan chayqa, pay kikinmanmi chayta ruwan. Qespin kankichis, qankuna kikiykichismanta imatapas ruwanaykichispaq kacharisqan kankichis; yachaytan Yaya qorqasunkichis, qespitataq Pay ruwarqasunkichis

31. Allin kaqta mana-allin kaqmanta yachanaykichispaqmi qorqasunkichis, qorqallasunkichistaqmi kawsayta utaq wañuytapas akllanaykichispaq. Atinkichismi allin kaqta ruwaytapas, allin kaqman yapamanta sayarichisqa kanaykichispaq, utaq chay allin kaq qankunaman yapamanta qosqa kananpaq; utaq, millay kaqta ruwaytapas atiwaqchismi, chay millay kaq qankunaman yapamanta sayarichisqa kananpaq.

15 T'AQA

Lamanita Samuel anyayninkunawan qatillan. Llaqtanpa puchun waqaychasqa kanqa. Lliwtapuni nefitakuna qollochisqa kanqaku, yuvayninkuman mana kutirimuqtinkuqa.

1. Kunantaq nisaykichis ancha munasqay wawqeykuna—vu-

yayniykichisman mana kutirimunkichischu chayqa, ch'inmi wasiy-kichis saquesqa kapusunkichis.

2. Ari, yuyayniykichisman mana kutirimunkichischu chayqa, warmiykichismi hatun rasunniyoq waqanankupaq kanqaku, er-qenkuta ñuñuchinanku p'unchawpi; ayqeytan munankichis, manataq maypi pakakunapaq kanqachu; ari, ay wiksayoqkunamanta, llasa kaspankun mana ayqeyta atinqakuchu, chayraykutaq sarukachasqa kanqaku, wañunankupaqtaq saquesqa kanqaku.

3. Ari, ay kay runakunamanta, Nephiq llaqtan nispa waqyasqa kaqkunamanta, kay señalkunata, ancha utirayana imaymanakunatawan paykunaman qhawachisqa kaqtin yuyayninkuman mana kutirimuqtinkuqa. Wiraqochaq akllasqa llaqtan karqanku, ari, Nephiq llaqtantan Pay munakurqan, paykunatataq anyakurqan; ari, millay ruwayninkuna p'unchawkunapin paykunata Pay anyarqan paykunata munakusqanrayku.

4. Ichaqa wawqeykuna, lamanitakunatan Pay cheqnikurqan pasaqllapuni ruwayninku millay kaqtin; kaytaq, taytankuq kustumbrenku millay kasqanrayku. Ichaqa, qespiymi paykunaman hamurqan, nefitakunaq yachachiyninkuwan; kayraykutaq p'unchawninkuta Wiraqocha hatunyachirqan.

5. Paykunamanta aswan askhannin ima ruwanankuq ñanninpi kasqankuta rikunaykichistan munayman, qhawarikuspankutaq Yayaq ñawpaqenpi purinku, kamachiyninkunata, yuyaqankunata, taripayninkunatawantaq waqaychanku Moisespa kamachisqa-siminman hina.

6. Ari, paykunamanta aswan askha runakunan kayta ruwashanku niykichismi; mana sayk'uw k'uchi kaywantaq llank'ashanku puchuq wawqenkunata cheqaq yachayman apamunankupaq; chhaynaqa, askhan sapa p'unchaw paykunaman huñunakunku.

7. Qankuna kikiykichismantataq yachankichis, rikurqankichis-taq chayqa, cheqaq kaq yachayman, taytankuq kostumbrenkuq millay ruwayninku millay millananku yachaymanwan apamusqa kaqkunaqa, qollanan qelqakunapi kreyiymán pusasqapiwan kaqkunaqa, ari, qollanan unanchaqkunaq unanchayninkuna kreyiymán, kaytaq paykunata pusan Wiraqochapi iñiymán, yuyayman kutirumuymánwan; chay iñiy, yuyayman kutirumuypiwantaq paykunaman songopi t'irakuyta apamun—

8. Chhaynaqa, yachankichismi qankuna kikiykichismanta, kayman llapa hamuqkuna, iñiypi, imawan qespi ruwasqa kasqankupiwán, qaqa mana kuyyoq kasqankuta.

9. Yachankichistaqmi, awqanakunapaq maqanakunata p'anasqankuta, manchakunkutaqmi chay maqanakuna hap'iyta,

imaynapipas huchallikunankumanta; ari, rikuwaqchismi huchallikuy manchakusqankuta; awqankuq sarukachasqa, wañuchisqa ima kanankutan saqenku, manataq q'anchinankunata paykuna kontra hoqaringakuchu; kaytaq Cristopi iñiyninkurayku.

10. Chay kreyisqankupi kreyiyninku mana-kuyuq kasqankurayku, k'ancharisqa kaqtinku mana-kuyuriq kasqankuraykupuwantaq paykunata Wiraqocha saminchanqa, p'unchawninkunataq hatunyarichinqa, millay ruwayniyoqña kanku chaypas.

11. Ari, mana kreyiypiña urmanqaku chaypas, p'unchawninkunatan Wiraqocha hatunyachinqa, wawqenchis lamanitakuna yapamanta cheqaq yachayman apamusqa kanankumanta taytanchiskunaq, unanchaq Zenospa, huk askha unanchaqkunapiwan rimasqanku p'unchawkuna hamunankama.

12. Ari, nisaykichismi—qhepa p'unchawkunapin Wiraqochaq promesankuna wawqenchis lamanitakunaman haywarisqa karqan, askha ñak'ariyniyoqña kanqachu chaypas, hallp'a patapiña kayman haqayman qatikachasqa, wañuchisqa, k'irisqa, ch'eqechisqapiwanmi kanqaku, maypi pakakunankupaq mana kaspachaypas, khuyakuyniyoqmi paykunawan Wiraqocha kanqa.

13. Kaytaq unanchaykunaman hina, cheqaq yachayman apamusqa kanqaku, kaytaq Kutichikapuqninku ancha hatun cheqaq micheqninkumanta yachay, owejankunawantaq yupasqa kanqaku.

14. Chhaynaqa niykichismi, aswan allinmi paykunapaq kanqa qankunamantaqa, yuyayniykichisman mana kutirimunkichischu chayqa.

15. Qankunaman ancha hatun qhawachisqa ruwaykuna paykunaman qhawachisqa kanman karqan chayqa, ari, taytankuq kostumbrenkurayku mana-kreyiypi urmaqkunaman qhawachisqa kanman karqan chayqa—qankuna kikiykichismantan rikuyta atiwaqchis—manan hayk'aqpas yapamanta mana-kreyiypi urmankumanchu karqan.

16. Chhaynaqa, khaynatan Wiraqocha nin: Manan lliwtapunichu paykunata qolluchisqa, ichaqa yachaysapa kayniy p'unchawniypin paykunata yapamanta noqaman kutirichimusaq, nispan Wiraqocha nin.

17. Kunantaq nefitakunamanta Wiraqocha nin: Yuyayninkuman mana kutirimunqakuchu manataq munayniytachu ruwanqaku chayqa, lliwtapunin paykunata qolluchisqa, ninmi Wiraqocha, mana-kreyiyninkurayku, paykuna chawpipi ancha hatun ruwaykunataña ruwarqani chaypas; cheqaqtapunin Wiraqochaq kawsasqanta hina kay imaymanakuna kanqa, ninmi Wiraqocha.

16 T'AQA

Nephitakunamanta huk chikan runakuna, Cristoq iñeqkuna-huñunman huñunakunku. Runakunamanta aswan askha kaqkuna Samuelpa sut'inchayninta mananchanku. Payta hap'ispa chaqnayta mashkanku. Ayqekuspa hallp'anman kutikapun. Nephiq astawan yachachiynin. Mana-kreyiy hunyarin.

1. Askhan uyarirqanku, llaqtaq perqan patapi Lamanita Samuelpa rimasqan rimaykunata. Siminkunapi llapan kreyiqkunataq Nephi mashkaq rirqanku; payta tarispankutaq payman huchankunata willarqanku mana mananchaspanku, Wiraqochapi unuchakuyta munaspanku.

2. Ichaqa, Samuel mana kreyiqkunaqa paywanmi phiñarirkurqanku; rumikunataq payman perqa patapi ch'aqerqanku; perqapi sayashaqtintaq askha runakuna payta wach'irqanku; ichaqa, Wiraqochaq Nunanmi paywan karqan, chayraykutaq mana payta ruminkunawan nitaq wach'inkunawanpas hap'ichiyta atirqankuchu.

3. Payta mana hap'ichiyta atisqankuta rikuspataq, askha runakuna rimayninkunapi kreyiqkuna karqan, hinataq Nephiman rirqanku unuchasqa kanankupaq.

4. Nephitaq unucharqan, unancharqan, yachachirqanpiwan; runakunaman yuyayninkuman kutirimuyta qaparispa, señalkunata, utirayaykunatawan qhawachispa, runakuna purapi milagrokunata ruwaspa, asllaman Cristo hamunanta yachanankupaq;

5. Asllaman hamunan imaymanakunata paykunaman nispa; chay imaymanakunaq hamusqan pachapi, ñawpaqtaraq paykunaman yachachisqa kasqanta yachanankupaq, yuyarinankupaqwan, chaywan kreyinankupaq. Chhaynataq Samuelpa rimayninkunapi kreyiqkuna Nephiman rirqanku, unuchasqa kanankupaq yuyayninkuman kutirimuspa, huchankunata willaspa ima.

6. Ichaqa paykunamanta aswan askha kaqkunaqa, manan Samuelpa siminkunapi kreyirqankuchu; chhaynataq, ruminkunawan wach'inkunapiwan payta mana hap'ichiyta atisqankuta rikuspa, khaynata apunkunaman qaparirqanku: Kay runata hap'ispa chaqnamuychis, saqrayoqmi; paypi kaq saqraq atiyinraykun mana ruminchiskunawan, wach'inchiskunapiwan hap'ichiyta atinchischu; chhaynaqa, hap'ispa payta chaqnamuychis, wañuchimuychistaq, nispa.

7. Payta hap'imunankupaq reqtinkutaq, perqamanta p'itaykuspa hallp'ankumanta ayqekurqan, ari, hallp'anman; kikin llaqtan purapi unanchaytataq qallarirqan.

8. Manañataq hayk'aqpas nefitakuna purapi paymanta uyari-

kurqanchu. Khaynan runakunaq ruwayninkuna karqan.

9. Khaynatataq tukukurqan Nephiq Ilaqtanpi taripačkunaq kamachiyninkuq pusaq chunka soqtayoq wata.

10. Khaynallatataqmi tukukurqan taripačkunaq kamachiyninkuq pusaq chunka qanchisniyoq watapas; runakunamanta aswan askha kaqkunataq anchayayninkupi, millay ruwayninkupiwan qheparqanku; aswan pisi kaqtaq Yayaq ñawpaqenpi qhawarikuspa purirqanku.

11. Khaynallataqmi karqan, taripačkunaq kamachiyninkuq pusaq chunka pusaqniyoq watapipas.

12. Taripačkunaq kamachiyninkuq pusaq chunka esqonniyoq watapipas huk chikallantan kambiyarqan runakunaq ruwayninkuna; aswanta runakuna millay ruwayninkupi rumiyarqanku, astawan astawanraqtaq ruwarqanku Yayaq kamachiyninkuna kontra kaqta.

13. Hinataq taripačkunaq kamachiyninkuq esqon chunka watapi, ancha hatun seňalkuna, utirayanakuna ima runakunaman qhawachisqa karqan, unanchačkunaq rimayninkunataq hunt'akuyta qallarirqan.

14. Angeltaq runakunaman rikhurimurqan, yachaysapa runakunaman, ancha hatun kusikuy sumaq willaykunataq paykunaman willarqanku. Khaynatan kay watapi qelqakuna hut'asqa kayta qallarirqan.

15. Chaypiwanpas, sonqonku rumiyachiytan runakuna qallarirqanku, llapankupuni nefitakunamanta lamanitakunamantawan, aswan iñeqkunallataq mana—paykuna kikinkuq kallpankupi, yachayninkupi ima samariyta qallarispanku, khaynata nispanku:

16. Chhayna askha imaymanakunamantaqa wakinninta watakunammi karqan; ichaqa, yachanchismi rimarisqa kaq kay ancha hatun sumaq ruwaykuna mana kananta, nispa.

17. Paykuna purataq khaynata nispanku rimanakuyta churanakuytawan qallarirqanku:

18. Manan rasunchu Cristo hina runa hamunan; chhayna kaqtinga, Yayaq Churintaq kanman, rimakusqanman hinataq hanaqpachaq kay pachaqpiwan Taytan kan chayri, imanaqtintaq mana noqanchiswan qhawachikunqachu, Jerusalenpi runakunawan hinari?

19. Ari, imanaqtinmi Pay mana kay hallp'api qhawachikunqachu, Jerusalen hallp'pi hinari?

20. Ichaqa, yachanchismi millay kreyiy kay kasqanta, taytanchiskunamanta noqanchisman haywasqa, hamunan ancha hatun ancha sumapi kreyichiwananchispaq; mana noqanchis purapichu,

3 NEPHI 1

ichaqa, noqanchismanta kharupi kaq mana reqsisqanchis hallp'api; chhaynataq, mana ima yachaypi kachiwananchispaq; cheqaq kasqankumanta kikin ñawinchiswan mana rikusqanchisrayku.

21. Paykunataq—saqraq atuqrayay kayninwan, mana pakasqa ruwayninkunapiwan ruwanqaku mana hamut'ay atinanchis ancha hatun pakasqa imaymanakunata; chaytaq kachiwasunchis rimayninkunaman warmanku kananchispaq, paykunaq warmanku kananchispaqwan, chay rimayta yachachiwananchispaq paykunamanta suyasqanchisrayku. Khaynatataq mana-ima-yachaypi kachiwasunchis, paykunaman kawsayninchispa llapan p'unchawninkuna haywakuswan chayqa, nispa.

22. Huk askha waq'a, yanqapaqwan imaymanakunatawanmi sonqonkupi runakuna yuyarqanku. Mana qasillataq karqanku, pasaqlataq paykunata saqra inkitarqan millay kaqta ruwanankupaq, ari, rimaykunata, churanakuykunatawan hallp'antinpi mast'arispan saqra rirqan, runakunaq sonqonkuta allin kaq kontra, hamuq kontrapianpa rumiyachinanpa.

23. Wiraqochaq runankuna chawpipi señaalkunataña, ancha hatun imaymanakunataña, askha milagrokunatawanña paykuna ruwarqanku chaypas, hallp'antinpi runakunaq sonqonkumantan allintapuni saqra hap'ipakurqan.

24. Khaynatataq tukukurqan, Nephiq llaqtanpi taripaqqunaq kamachiyninkuq esqon chunka watan.

25. Khaynatataqmi Helamanpa qelqan tukukurqan; Helamanpa, churinkunaqpa ima qelqankuman hina.

KINSAKAQ NEPHI NEPHIQ QELQAN

HELANANPA CHURIN NEPHIQ CHURIN

Helamanpaq Helamanpa churin karqan, paytaq Almaq churin Almaq churin, Almataq Nephiq ch'awchun karqan, paytaq Lehiq churin karqan. Paytaq Jerusalemanta hamurqan, Judaq inkan Sedekiaspa kamachiyninpa ñawpaq watanpi.

1 T'AQA

Helamanpa churin Nephi ripun. Qespichiqa paqarimuyninmanta señaalkuna qosqa. Kontranakuy rimay rikhurimun. Yapamanta Gadiantonpa suwankuna rikhurimunku.

1. Hinataq, isqon chunka hukniyoq wata tukukurqan, soqta

3 NEPHI 1

pachak watataq karqan Jerusalenmanta Lehi lloqsimusqan pachamanta. Kay watapitaq Lachoneus hallp'api hatun taripaq kama-chikuqpiwan karqan.

2. Helamanpa churin Nephitaq, Zarahemla hallp'amanta ripurqan, kurak churin Nephimantaq bronse raphikunata qorqan, waqaychasqa kasqan qelqakunatawan, Jerusalenmanta Lehi lloqsimusqanmantapacha qollanan waqaychasqa imaymanakunatawan.

3. Chay patamantaq kay hallp'amanta ripurqan, manataq pipas yachanchu mayman risqanta; churin Nephitaq paypa rantinta qelqakunata waqaycharqan, ari, kay runakunaq qelqankunata.

4. Hinataq, isqon chunka ishkayniyoq watapi, aswantapuni unanchaqkunaq unanchayninkuna hunt'akuyta qallarirqan; aswan hatun señalkuna aswan hatun milagrokunapiwan runakuna purapi ruwasqa kaspas.

5. Ichaqa, karqanmi huk runakuna, Lamanita Samuelpa rimayninkuna hunt'akunanpaqqa tukukunñan pacha, nispa niqkuna.

6. Wawqenkunamantataq asikuyta qallarirqanku: Tukukunñan pacha, Samuelpa rimayninkunataq mana hunt'akunchu; chhaynaqa, kay imaymanakunamanta kusikuyniykichis, iñiykiykichispiwanqa yanqapaqmi karqan, nispa.

7. Hinataq, hallp'antimpi ancha hatun ch'aqwaytta hatarichirqanku; iñiq runakunataq anchatapuni llakikurqanku, imaynapas chay rimasqa kasqan imaymanakuna mana hunt'akunmanchu, nispa.

8. Ichaqa, mana kuyuqmi huk p'unchaw hinalla mana tuta-yoq kanan chay p'unchawta, chay tutata, chay p'unchawtawan suyarqanku, iñiyinku mana yanqapaqchu kasqanta yachanankupaq.

9. Hinataq, mana kreyiqkuna huk p'unchawta sapaqcharqanku, unanchaq Samuelpa qosqan señalkuna mana hunt'akunmanchu chayqa, chay imaymanakunapi kreyiqkuna wañuchisqa kankupaq.

10. Nephiq churin Nephiq songontaq anchatapuni llakikurqan, runankunaq millay ruwayninkuta rikuspa.

11. Hinataq lloqsispa hallp'a patapi k'umurikurqan, tukuy atiyinwantaq Yayanta llaqtanrayku waqyakurqan; ari, taytankuq kostumbrenkunapi iñisqankurayku yaqaña wañuchisqa kaq runakunarayku.

12. P'unchawnintintaq Wiraqochata llapan kallpanwan waqyarqan; Wiraqochaq aruntaq khaynata payman hamurqan:

3 NEPHI 1

13. Hoqariy umaykita kusirikuytaq; sispallapiñan pacha kashan, kunan tutapitaq señal qosqa kanqa, tutamantanpitaq kay pachaman hamusaq, qollanan unanchaqkunaq siminkuwan llapan rimachisqay hunt'anayta llapan runakunaman qhawachinaypaq.

14. Noqaq kaqkunamanmi hamuni, pachaq kamasqa kasqanmantapacha, runakunaq wawankunaman yachachisqay llapan imaymanakunata hunt'anaypaq; Taytaq munayninta, Churiq munaynintawan ruwanaypaq—Taytamantaqa noqarayku, Churimantataq aychayrayku. Sispallapiñan pacha kashan, kunan tutataq señal qosqa kanqa, nispa.

15. Hinataq Nephiman hamusqan rimaykuna hunt'akurqan, rimasqa kasqanman hina; intiq haykuynin pachapitaq mana tutaq karqanchu; runakunataq utirayayta qallarirqanku, tuta hamuqtin mana laqhayaq kasqanrayku.

16. Askha runakunataq karqan, unanchaqkunaq rimayninkunata ñawpaqta mana kreyiqkuna, panpamantaq paykuna urmarqanku wañusqapas kankuman hina; yacharqankun paykuna, unanchaqkunaq rimayninkunapi kreyiqkunapaq allichasqanku wañuchiy waqllisqanta, señalkunataq qosqa karqan chayqa.

17. Ashllaman Yayaq Churin rikhurimunantataq yachayta qallarirqanku; ari, huk rimaypiqa, lliw hallp'antinpi, intiq haykunanmanta intiq lloqsimunankama, qayllarina hallp'apipas, qheparina hallp'apipas runakunaqa, anchatapunin utirayarqanku, panpamantaq urmarqanku.

18. Yacharqankun kay imaymanakunamanta askha watakuna unanchaqkuna sut'inchasqankuta, qosqanku señalkuna sispallapiña kasqantawan. Millay ruwayninkurayku, mana kreyiyninkurayku imataq manchakuyta qallarirqanku.

19. Hinataq mana laqhayay karqanchu chay tukuy tutantin, ichaqa chawpi p'unchaw hina k'anchayniyoqmi karqan. Pacha paqariqtintaq yapamanta inti lloqsimurqan imayna kananta hina; yacharqankutaqmi chay p'unchawpi Wiraqocha paqarisqanta, señal qosqa kasqanrayku.

20. Hinataq karqan, ari, llapan imaymanakuna, sapanka rimaykuna, unanchaqkunaq rimayninkuman hina.

21. Huk mosoq qoyllurpas rikhurimurqanmi, rimaykunaman hina.

22. Kunan p'unchawmantapachataq, runakuna puraman llullakuykuna sarqaq apachisqan karqan, sonqonkuta rumiyachinankupaq, rikusqanku señalkunata, ancha hatun utirayaykunatawan mana kreyinankupaq; ichaqa, kay llullakuykunaña, yukaykunapi-

3 NEPHI 1

wañña karqan chaypas, runakunamanta aswan askhanmi kreyir-qanku, Wiraqochamantaq t'ikrakurqanku.

23. Hinataq, runakuna chawpinta Nephi huk runakunapiwan rirqanku, yuyayman kutirimuyman unuchaspanku; chaypitaq huchakunapaq ancha hatun panpachay karqan. Chhaynataq yapamanta qasi kawsayniyoq runakuna karqanku.

24. Manataq ima maqanakuypas karqanchu, ichaqa, huk chikan runakunallan qelqakunawan sut'inchaspa yachachiyta qallarirqanku—manañan Moisespa kamachisqa-simin waqaychay nesitakunñachu nispa. Kaypiqa pantarqankun, qelqakunata mana hamut'asqankurayku.

25. Ichaqa asllamanmi wakichisqa paykuna karqanku, pantasqa kasqankumantataq konbensikurqanku; paykunaman yachachisqataq karqan kamachisqa-simi manaraq hunt'asqa kasqanmanta, sapanka rimaypi hunt'akunanmanta; ari, hunt'asqa kananmantan paykunaman simi hamurqan; ari, manan huk ch'iñillanpas utaq seq'ellanpas chinkananchu llapan hunt'akunankama. Chhaynataq chay kikin watapi pantayninku yachayman apamusqa karqanku, huchankutataq willarqanku.

26. Khaynatataq tukukurqan isqon chunka ishkayniyoq wata; runakunaman sumaq willaykunata apamuspa, kasqan señaalkunarayku, llapan qollanan unanchaqqunaq unanchayninkuq rimayninkunaman hina.

27. Hinataq, isqon chunka kinsayoq watapas qasi kawsayllapi pasarqan. Orqokunapi tiyaq Gadiantonpa suwankunallataq hallp'api hunyarqanku; ancha kallpasapa hap'iyninku, maypi pakasqa kanankupiwan kaqtintaq runakunaqa mana paykunata atipayta atirqankuchu. Chhaynataq paykunaqa askha runa wañuchiynakunata ruwarqanku, askhatataq runakuna purapi wañuchirqanku.

28. Hinataq, isqon chunka tawayoq watapi anchatapuni yapakuyta qallarirqanku, nefitakunamanta t'aqakuqkuna paykunaman ayqekuqkunarayku; kaytaq anchatapuni hallp'api qhepaq nefitakunata llakichirqan.

29. Kallarqantaqmi lamanitakuna purapipas askha llakikuy-paq; askhan wawankuna karqan, wiñaspankutaq watakunapi kallpasapa kayta qallarirqanku, sapallankumanta wakispanku; Gadiantonpa suwankunaman huñunakunankupaqtaq llullakuyninkuwan, mishk'i rimayninkupiwan zoramita kaqkunaq waqllichisqan karqanku.

30. Khaynatataq lamanitakunapas muchuchisqa karqanku; iñiyninkupi, chanin kayninkupiwantaq pishiyayta qallarirqanku, wiñaq miraypa millay ruwayninkurayku.

3 NEPHI 8

8 T'AQA

Cristo chakatasqa kasqan yachakun, ñawpaqta rimasqa señaalkunarayku. Sallallallay, pacha chhapchi, muyoq wayra, ninapiwan. Ancha hatun ancha millay qollochiy. Kinsa p'unchaw tutayan.

1. Kunantaq qelqaykuman hina—yachaykutaqmi qelqayku cheqaq kasqanta, chanin runataqmi karqan qelqa waqaychaqqa; cheqaqtapunin askha milagrokunata ruwarqan Jesuspa sutinpi; manataqmi pipas karqanchu Jesuspa sutinpi milagro ruway atiq, huchallikuyninkunamanta lliwtapunin mana maqchisqa kaspaga—

2. Hinataq, tiempoyku yupaypi mana kay runa pantarqanchu chayqa, kinsa chunka kinsayoq wataqa tukukurqanmi;

3. Runakunataq ancha hatun kallpachakuywan unanchaq Lamanita Samuelpa qosqan señaalkunata suyayta qallarirqanku; ari, hallp'antinpi kinsa p'unchaw tutayaq kanan pachata.

4. Runakuna purapitaq ancha hatun ishkayaykuna, churanakuykunapiwan kayta qallarirqan, askha señaalkunaña qosqa karqan chaypas.

5. Hinataq kinsa chunka tawayoq watapi, ñawpaq kaq killaq tawa kaq p'unchawninpi, ancha hatun wayra-para hatarirqan, manataq khaynaniray wayra-paramanta yachakurqanchu llapan hallp'antinpi.

6. Kallarqantaqmi ancha hatun millay sallallallayay, ancha millay qhaqyakunataq karqan, lliw hallp'antintataq chhapchirqan, ch'eqtakunmanpas hinapuni.

7. Ancha k'anchayniyoq illapakunataq karqan, lliw hallp'antinpi mana hayk'aq reqsisqa hinapuni.

8. Zarahemla llaqtataq rawrayurqan.

9. Moroni llaqtataq mamaqocha ukhupi chinkayurqan, chaypi runakunataq wañurqanku.

10. Hallp'ataq Moronihah llaqta pataman apasqa karqan, llaqtaq rantinpitaq ancha hatun orqo rikhurimurqan.

11. Qheparina hallp'apitaq ancha millay taqmay karqan.

12. Ichaqa, aswan millay taqmaymi qayllarina hallp'api karqan; llapan hallp'antinmi t'ikrasqa karqan, sallallallayrayku, muyoq wayrakuna, qhaqyakuna, illapakuna, hallp'antin chhapchikusqanpiwanrayku.

13. Hatun ñankunataq p'akisqa karqan, panpa ñankunataq waqllichisqa; askha sumaq llanp'u hallp'akunataq wank'ayarqan.

14. Askha ancha hatun allin reqsisqa llaqtakunataq chinkayurqanku, askhataq rawrayurqanku, askhataq chhapchisqa karqan chaypa wasinkuna panpaman urmayunankukama, runankunataq

3 NEPHI 8

wañuchisqa karqanku; ch'intaq chay hallp'akuna saquesqa karqan.

15. Karqantaqmi qhepaq llaqtakuna, ichaqa ancha hatunmi chay llaqtakunaq thuñiyin karqan, askhataq runakunamanta wañuchisqa karqanku.

16. Muyoc wayrapitaq wakin runakuna apasqa karqanku, manataq pipas yachanchu mayman apasqa kasqankuta; apasqa kasqallankutan yachanku.

17. Khaynatataq lliw hallp'antinpa uyan waqllichisqa karqan, sallallallayrayku, qhaqyakuna, illapakuna, pacha chhapchikunapiwanrayku.

18. Qaqakunataq ishkaipi ch'eqtakurqanku; llapan hallp'antinpin p'akisqa karqanku, hinataq p'akisqa ch'iptikunapi, k'akra-kunapi, ch'eqtakunapiwan tarisqa karqan.

19. Hinataq qhaqyakuna, illapakuna, wayra-para, sallallallay, pacha chhapchikunapiwan tukukuqtin—yaqa kinsa horaskunan chay karqan, wakin runakunataq nirqanku aswan unay kasqanta; chaypiwanpas kay llapan millay imaymanakunaqa ruwasqa karqan, yaqa kinsa horaspin—hinamantaq lliw hallp'antinpi laqhayaq karqan.

20. Hinataq llapan hallp'antinpi pipu laqhayaq karqan, mana wañuq runakunataq chay laqhayaq pachaphuyuta llamiyta atirqanku.

21. Manataq k'anchay kanmanchu karqan laqhayaqrayku, manataqmi velakunapas ni rawraq k'aspikunapas; nitaq ninatapas ancha qhashñu ch'aki k'aspikunawanpas hatarichiyta atirqankuchu; hinataq mana ima k'anchaypas karqanchu.

22. Manataqmi ima k'anchaypas rikukurqanchu, nitaq ninapas, nitaq llipllipas, nitaq intipas ni killapas ni qoyllurkunapas, hallp'a patapi ancha hatun laqhayaq pachaphuyu kasqanrayku.

23. Hinataq kinsa p'unchaw mana ima k'achaypas rikusqa karqanchu; ancha hatun waqay, anchiy, qaparqachaypiwantaq llapan runakuna purapi pasaqla karqan; ari, ancha hatunpunin runakunaq waqayninku karqan, tutayaqrayku, paykunaman ancha hatun qolluchiy hamusqanraykupiwan.

24. Huk qayllapitaq khayna waqaqta uyarirqanku: Yuyaynin-chisman kutirimuswan karqan, kay ancha hatun millay p'unchawpa ñawpanintaraq, chhaynataq wawqenchiskuna mana wañunku-manchu karqan, manataq chay hatun Zarahemla llaqtapi kanasqachu kankuman karqan, nispa.

25. Huk qayllapitaq khayna waqaqta uyarirqanku: Yuyaynin-chisman kutirimuswan karqan, kay ancha hatun millay p'unchawpa ñawpaqnintaraq, manataq unanchaqqunata rumikunawan

3 NEPHI 11

ch'aqespa wañuchiswanchu karqan, nitaq qarqoswanchu karqan; hinataq mamanchiskuna, sumaq ususinchiskuna, wawanchiskunapas saqesqa kankuman karqan, manataq p'anpasqachu kankuman karqan chay ancha hatun Moronihah Ilaqtapi, nispa. Khaynan runakunaq waqayninkuna ancha hatun millaypuni karqan.

Nephiq Ilaqtanmanta Jesucristo watukurqan, Waleq hallp'api runakuna huñunasqa kashaqtinku, paykunatataq servirqan; khaynatataq paykunawan rikuchikurqan.

11 t'aqamanta 26 t'aqakama.

11 T'AQA

Wiñay Tayta, Jesucristomanta rimarin. Kawsarisqa Jesucristo rikhurimun. K'irinkunata runakuna llaminku. Imayna unuchana. Maqanakuy churanakuypiwan hark'asqa. Cristo, qaqa.

1. Hinataq, Nephiq Ilaqtanmanta askhapuni runakuna huñunasqa karqanku, Waleq hallp'api kaq Wiraqochaq Wasinpa muyureqninpi. Utirayasharqankun, paykuna purataq tapunakusharqanku qhawachinakusharqankupiwan susidisqan ancha hatun ancha sumaq t'ikraykuna kasqanmanta.

2. Wañusqanmanta señal qosqa kaq kay Jesucristomanta imataqmi rimanakusharqanku.

3. Hinataq khaynata paykuna pura rimashaqtinku, hanaqpachamanta hamuqta hina huk aruta uyarirqanku; muyureqnintataq qhawarirqanku, uyarisqanku aruta mana hamut'arqankurayku; manataqmi ch'ila aruchu nitaq wapu kallpayoq aruchu karqan; chaypiwanpas, huch'uy arukalla karqan chaypas, uyariqkunaraq sonqonkukaman haykurqan; hinataq mana karqanchu runa-kurkunkuq ima kaqninpas mana khatatatachisqa; ari, nunankukama-punin haykurqan, sonqonkutataq rawrarichirqan.

4. Hinataq, yapamanta chay aruta uyarirqanku, manataq hamut'arqankuchu.

5. Yapamantataq kinsacaq kutita chay aruta uyarirqanku, ririnkutataq uyarinankupaq kicharirqanku, aru hamusqan qayllamantataq qhawarqanku, mana kuyurispataq aruq hamusqan hanaqpachaneqman qhawarqanku.

6. Kinsacaq kutipitaraq uyarisqanku aruta hamut'arqanku, paykunatataq nirqan:

7. Qhawariychis Ancha-munasqay Churiyta, Paypin allin kuisisqa kani, Paypitaqmi sutiya kusiqellpuchirqani—Payta uyariychis, nispa.

3 NEPHI 11

8. Hinataq hamut'asqankuman hina yapamanta hanaqpachaneqman qhawarirqanku, huk Qharitataq hanaqpachamanta urayamuqta rikurqanku, yuraq p'achawan p'achayusqataq Pay karqan; urayamuspataq paykunaq chawpinkupi sayarqan; llapan runakunaq ñawinkutaq Paypi karqan, manataq paykuna purallapas siminku kichariyta qhariykacharqankuchu, manataq yacharqankuchu ima ninanta; paykunaman huk angel rikhurimusqantataq yuyarqanku.

9. Hinataq makinta chutarispa khaynata runakunata nirqan:

10. Jesucriston kani, pachamanmi hamunqa nispa unanchakunaq sut'inchasqanku.

11. Noqan kani pachaq k'anchaynin kawsayniniwan; Taytaq qowasqan p'oshqo qeromantataqmi ukyarqani, Taytatataq kusi-qellpuchirqani runakunaq huchankunata noqapi apaspa; chaypitataq Taytaq munayninta ñak'arirqani, qallariymantapacha llapa imaymanakunapi, nispa.

12. Hinataq kay simikunata Jesus rimariqtin, llapan runakuna panpaman urmarqanku; yuyarirqankun, hanaqpachaman seqasqan pataman paykunamanta Cristo watukunanmanta paykuna purapi unanchasqa kasqanta.

13. Hinataq paykunaman Wiraqocha nirqan:

14. Sayariychis noqamantaq hamuychis, waqtaypi makiykichista churanaykichispaq; makiykunapi, chakiykunapiwan killay takarpuq k'irisqanta llaminaykichispaq; Israelpa Yayan, llapa pachantinpa Yayanpiwan kasqayta, runakunaq huchankunarayku wañuchisqa kasqaytawan yachanaykichispaq, nispa.

15. Hinataq runakunaqa ñawparispaku waqtanpi makinkunata churarqanku; makinkunapi, chakinkunapiwan killay takarpuq k'irinkunataq llamirqanku. Kaytataq ruwarqanku huk hukmanta rispanku, llapanku rinankukama; ñawinkunawantaq rikurqanku, makinkunawantaq llamirqanku, cheqaqtapunitaq yacharqanku sut'incharqankutaq, hamunanmanta unanchakunaq qelqasqan Pay kasqanta.

16. Llapanku rispanku paykuna kikinkumanta rikuspankutaq, huk kunkallapi qaparirqanku:

17. Hosanna! Saminchasqa kachun Aswan Hatun Yayaq sutin! nispa. Jesuspa chaninkunaman urmaykuspataq Payta yupaycharqanku.

18. Hinataq Nephita rimarirqan (runakuna chawpipin Nephi karqan) paytataq achhuykamunanpaq kamachirqan.

19. Nephitaq sayarista ñawparirqan, Wiraqochaq ñawpaqenpi k'umurikuspataq chakinkunata much'arqan.

20. Wiraqochataq sayarinanpaq payta kamachirqan. Sayaris-pataq ñawpaqenpi Nephi sayarqan.

21. Wiraqochataq payta nirqan: Atiyta qanman qoyki yapamanta hanaqpachaman seqaqtay kay runakunata unuchanayki-paq, nispa.

22. Yapamantataq hukkunata waqyarqan, chhaynallatataq paykunata nirqan; paykunamantaq unuchanankupaq atiyta qorqan. Paytaq paykunata nirqan: Khaynatan unuchankichis; amataq ima churanakuypas qankuna purapi kanqachu.

23. Cheqaqtapunin niykichis, rimayniykichiswan pipas yuyayninman kutirimunqa, sutiypitaq unuchakuyta munanaqa chayqa, khaynatan paykunata unuchankichis—Rispan unupi sayankichis, sutiypitaq paykunata unuchankichis.

24. Kaymi ninaykichis simikuna—paykunata sutinkumanta waqyaspa khaynata ninkichis:

25. Jesucristomanta atiy qowasqa kaspan, noqa unuchayki Taytaq, Churiq, Qollanan Nunaqpiwan sutinpi. Hinataq kachun, nispa.

26. Hinamantaq unupi paykunata winankichis, yapamantataq unumanta lloqsimunkichis.

27. Khaynatan sutiypi unuchankichis; cheqaqtapunitaq niykichis, Tayta, Churi, Qollanan Nunapiwanqa hukllan kanku; Taytapi noqa kani, noqapitaq Tayta; Tayta noqapiwantaq huklla kayku.

28. Kamachisqayman hinataq unuchankichis. Amataq ima churanakuykunapas qankuna purapi kanqachu, kunankama kasqanta hina; nitaq qankuna purapi ima churanakuykunapas kanqachu yachachiyniykunamanta, kunankama kasqanta hina.

29. Cheqaqta cheqaqtapunin niykichis, churanakuy nunayoq kaqqa manan noqamantachu; ichaqa llapan churanakuykunaga taytan saqrami; paytaq runakunaq sonqonkuta qaywirin paykuna pura phiñarikuywan churanakunankupaq.

30. Phiñarikuyman runakunaq sonqonkuta paykuna pura kontra qaywiriyaq manan yachachiyniychu; ichaqa, kaymi yachachiyniy—chay imaymanakuna qollochisqa kanan.

31. Cheqaqta cheqaqtapunin niykichis, willasaykichismi yachachiyniyta.

32. Kaytaqmi yachachiyniy, Taytaq qowasqan yachachiyaqmi kay; noqataq Taytamanta sut'inchani, Taytataq noqamanta sut'inchan, Qollanan Nunataq Taymanta noqamantawan sut'inchan; noqataq sut'inchani tukuy runakunata yuyayman kutirimuspa noqapi kreyinankupaq Tayta kamachisqanta.

3 NEPHI 12

33. Noqapi kreyispa unuchakuqtaq qespichisqa kanqa; paykunataqmi Yayaq qhapaq suyunta chaskinqaku.

34. Noqapi mana kreyiq mana unuchakuq imataq kondenasqa kanqa.

35. Cheqaqta cheqaqtapunin niykichis, kay, yachachiyniy kasqanta, kaymantataq Taytamanta sut'inchani. Noqapi kreyiqtaq kreyillantaq Taytapipas, paymantataq Tayta noqamanta sut'inchanqa, paymantataq ninawan Qollanan Nunapiwan watukunqa.

36. Khaynatataq noqamanta Tayta sut'inchanqa, Qollanan Nunataq payman sut'inchanqa Taytamanta noqamantawan. Tayta, noqa, Qollanan Nunapiwanqa hukllan kayku.

37. Yapamantataq niykichis, yuyayniykichismanmi kutirinaykichis, huch'uy erqe hinataq kanaykichis, sutiypitaq unuchakunaykichis; mana chayqa, manan imaynatapas kaykunata chaskiyta atinkichischu.

38. Yapamantataq niykichis, yuyayniykichismanmi kutirimunaykichis, sutiypitaq unuchasqa kanaykichis, huch'uy erqe hinataq kanaykichis, mana chayqa, manan imaynatapas Yayaq qhapaq suyunta chaskinkichischu.

39. Cheqaqta cheqaqtapunin niykichis, kay, yachachiyniy kasqanta, kay patapi pipas hatarichisqataq qaqay patapi perqan, manataq supay wasiq punkunkuna paykuna kontra sayanqachu.

40. Pipas kaymanta aswan askhata utaq aswan pisitapas willanqa yachachiyniyta hinataq hatarichinqa chayqa, saqramantan hamun, manataqmi qaqaypi perqasqachu; ichaqa, aqopi teqsi-chasqatan perqan; supay wasiq punkuntaq kicharisqa kashan chaykunata chaskinanpaq, unukuna hamuqtin, paykunata wayrakuna soq'aqtin.

41. Chhaynaqa, riychis kay runakuna puraman, rimarisqay simikunataq hallp'aq tukukuyninkunaman willamuychis.

12 T'AQA

Nephitakunaman Qespicheqpa yachachiyninkuna. Chunka ishkayniyoqta waqyan kamachin ima. Runakunaman rimarivninkuna. Orqopi yachachiy yapamanta rimarisqa. Pishqa Mateowan tupachiychis.

1. Hinataq kay simikunata Nephiman, waqyasqa kaqkunamanwan rimareqtin, (unuchanankupaq kallpata atiytawan chaskiq waqyasqakunaqa chunka ishkayniyoqmi karqanku) runakunaman makinta chutarispa nirqan: Saminchasqan kankichis, sirviqniykichis kanankupaq, warmaykichis kanankupaqwan qankuna puramanta kay chunka ishkayniyoq akllasqaykunaq rimayninkunata

uyarinkichis chayqa Unuwan unuchanasuykichispaqmi paykunaman atiyta qorqani; unuwan unuchasqa kasqaykichis patamantaq, ninawan Qollanan Nunawan ima noqa unuchasaykichis; chhaynaqa, saminchasqan kankichis, rikuwasqaykichis pataman, noqa kasqayta yachasqaykichis patamanwan noqapi kreyispa unuchasqa kankichis chayqa.

2. Yapamantataq—aswan saminchasqan kanqaku, rimayniykichispi kreyiqkuna, rikuwasqaykichismanta noqa kasqaymantawan paykunaman sut'inchasqaykichisrayku. Ari, saminchasqan kanku, rimayniykichispi kreyispa llanp'u songo kayman hamuspa unuchasqa kaqkunaqa. Ninawan Qollanan Nunawan iman watukusqa kanqaku, huchanku panpachaytataq chaskinqaku.

3. Ari, saminchasqan kanku noqaman hamuq nunapi wakchakuna, paykunaqmi hanaqpacha qhapaq-suyu.

4. Yapamantataq—saminchasqan kanku lliw waqaqkuna, sonqochasqan paykuna kanqaku.

5. Saminchasqan kanku llanp'u sonqoyoqkuna, hallp'atan paykuna chaskinqaku.

6. Saminchasqan kanku, chaninchayrayku yaraqachikuqkuna ch'akichikuqkunapiwan, Qollanan Nunawanmi hunt'asqa kanqaku.

7. Saminchasqan kanku khuyapakuywan hunt'asqa kaqkuna, khuyapakuytan chaskinqaku.

8. Saminchasqan kanku ch'uya sonqoyoq kaqkuna, Yayatan paykuna rikunqaku.

9. Saminchasqan kanku sumaq kawsay hataricheqkuna, Yayaq wawankuna nispan waqyasqa kanqaku.

10. Saminchasqan kanku, sutiyrayku qatikachasqa kaqkuna, paykunaqmi hanaqpacha qhapaq-suyu kanqa.

11. Saminchasqataqmi kankichis noqarayku runakuna k'ami-suqtiykichis, qatigachasuqtiykichis, mana imamanta imaymana millayta qankuna kontra rimaqtinku.

12. Ancha hatun kusikuyniyog, ancha k'uchikuyniyogtaqmi kankichis; ancha hatunmi hanaqpachapi suñaykichis kanqa; chay hinatan paykuna qatikacharqanku ñawpaqniykichis riq unanchakunata.

13. Cheqaqta cheqaqtapunin niykichis—hallp'aq kachin kanaykichispaqmi qoykichis; ichaqa mishk'iyinta kachi chinkanqa chayri, imawanmi hallp'a kachichasqa kanqa? Chhaynaqa, manan imapaqpas kachi allinchu, ichaqa choqasqa kasperunakunaq sarukachasqan kanallanpaqmi.

14. Cheqaqta cheqaqtapunin niykichis—kay runakunaq k'an-

3 NEPHI 12

chaynin kanaykichispaqmi qoykichis. Moqo patapi kaq llaqtaqa manan pakasqa kayta atikunmanchu.

15. Velata k'ancharichispachu runakunari kanasta ukhupi chayta churanku? Manan, ichaqa, k'aspi patapin churanku, wasipi llapan kaqkunamantaq k'anchayta qon.

16. Chhaynaqa, kay runakunaq ñawpaqenpi k'anchayniykichis k'ancharinanta kachariychis, allin ruwayniykichista rikuspanku hanaqpachapi kaq Taytaykichista yupaychanankupaq.

17. Ama yuyaychischu kamachisqa-simita, utaq unanchaqqunatapaspas chinkachinaypaq hamusqayta. Manan chinkachiqchu hamurqani, ichaqa, hunt'aqmi.

18. Cheqaqtapunin niykichis, manan huk ch'iñillapas ni huk seq'ellapas kamachisqa-simimanta pasarqanchu, ichaqa noqapin llapan hunt'akurqan.

19. Taytaypa kamachisqa-siminta, kamachiyninkunatawanmi qorqaykichis, noqapi kreyinaykichispaq, huchaykichiskunamanta kutirimunaykichispaq; p'akillisqa sonqowan p'akillisqa nunapiwan noqaman hamunaykichispaq. Ñawpaqeykichispin kamachiykuna kashan, kamachisqa-simitaq hunt'asqa kapun.

20. Chhaynaqa, noqaman hamuychis, qespichisqataq kaychis; cheqaqtapunitaq niykichis, kunan pacha qankunaman kamachisqaykunata mana waqaychankichischu chayqa, manan imaynatapas hanaqpacha qhapaq-suyuman haykunkichischu.

21. Uyarirqankichismi, ñawpa pacha runankunaq nisqankuta, qelqastaqmi ñawpaqeykichispi kashan—aman runata wañuchinkichu, pipas runata wañuchinqa chayqa, Yayaq taripayninpa ch'ikinpin rikukunqa, nispa nisqata.

22. Ichaqa noqa niykichis—pipas wawqenwan phiñarisqa kaqqa, taripayninpa ch'ikikuyninpin kanqa. Pipas wawqenta hat'upa nispa ninqa chayqa, konsejoq ch'ikikuyninpin kanqa; pipas ninqa—yaw upa nispa chayqa, supay wasiq ninanpa ch'ikikuyninpin kanqa.

23. Chhaynaqa, noqaman hamunkichis, utaq noqaman hamuyta munankichis, hinaspataq yuyarinkichis qankunawan wawqeykichis phiñarisqa kasqanata chayqa,

24. Riychis wawqeykichisman, ñawpaqtataq wawqeykichiswan allipuranakamuychis, hinamantaq noqaman hamuychis sonqoq hunt'a munayninwan, noqataq chaskisaykichis.

25. Awqaykichiswan usqhaylla rimanakuychis, paywan purishanaykichiskama; ima pachapipasñataq pay hap'isunkichisman, watana wasiman churasqataq kawaqchis.

26. Cheqaqta cheqaqtapunin niykichis, manan imaynatapas

chaymanta lloqsimunkichischu, ichaqa, qhepa senine sayachipus-qaykichis patamanñan. Watana wasipi kanaykichiskamari sayachiwaqchischu huk seninellatapas? Cheqaqta cheqaqtapunin niykichis, manan, nispa.

27. Ñawpa pachapi runankunaq qelqasqankun kashan—aman wasanchakunkichischu, nispa.

28. Ichaqa, noqa niykichis, pipas huk warmita qhawan payta munapakuspa chayqa, ñan sonqon ukhupi wasanchakunña, nispa.

29. Huk kamachiyta qoykichis, kaykunamanta mana imapas sonqoykichisman haykunanta kacharinaykichispaq.

30. Aswan allinmi kay imaymanakunata mananchanaykichis, chaywantaq chakataykichista apankichis, supay wasiman choqasqa kanaykichismantaqa.

31. Qelqasqan qarqan—pipas warminta qarqonqa chayqa, t'aqanakuy qelqata payman qochun, nispa.

32. Cheqaqta cheqaqtapunin niykichis, pipas warminta qarqonqa yoqoy mana kaqtin chayqa, wasanchachinmi payta; pipas chay t'aqasqa warmiwan sawakuqtaq wasanchakun.

33. Qelqasqataqmi kashan—aman qan kikiyki sullullchakunkichu, ichaqa, Wiraqochaman juramentoykikunata ruwanki, nispa.

34. Ichaqa, cheqaqta cheqaqtapunin niykichis—aman jurankichischu, ama hanaqpacharaykupas, Yayaq tiyanan kasqanrayku;

35. Ama kay pacharaykupas, Paypa sarunan kasqanrayku;

36. Amataqmi umarayku jurankichischu, manataq huk chukchatapas yuraqtachu ni yanatachu ruwayta atiwaqchis chayqa.

37. Ichaqa, rimayniykichis kachun—ari, ari, manan, manan nis-palla; kaymanta aswan hamuqqa, millaymi.

38. Qelqasqan kashan—ñawita ñawirayku, huk kirutataq kiru-rayku nispa;

39. Ichaqa noqa niykichis—aman millayta chuchupakunkichischu; ichaqa, pipas paña kaq uya-k'akllaykichispi ch'aqlasunkichis chayqa, huk kaq uya-k'akllaykichista payman kutirichiychis;

40. Pipas kamachisqa-siminan juisiosunkichis, hinaspataq sa-koykichista qechusunkichis chayqa, punchuykichistapas payman qoychis;

41. Pipas huk puriy mitata purichisunkichis chayqa, ishkay mitata paywan riychis.

42. Mañakusoqniykiman qoy, qanmanta mañakuy munaqta-taq ama qarqoychu.

43. Qelqasqallatami kashan—wasimasiykita munakunki, aw-qaykitataq cheqnikunki, nispa.

3 NEPHI 13

44. Ichaqa noqa niykichis—awqaykichista munakuychis, ña-kaqniykichista saminchaychis; cheqnisoqniykichisman allinta ruwaychis; alqochasoqniykichisrayku, qatikachasoqniykichisraykupi-wantaq yayaman-rimarikuychis;

45. Hanaqpachapi kaq Taytaykichispa wawankuna kanaykichispaq. Millay runamanpas allin kaqmanpas intintan Payqa lloqsichimun.

46. Chhaynaqa, ñawpa pachapi kasqan imaymanakuna, kamachisqa-simipi kaqkunaqa, noqapin llapan hunt'akun.

47. Mawk'a imaymanakunaqa pasanñan, llapan imaymanakunataq mosoq wikipun.

48. Chhaynaqa, noqa hina, utaq hanaqpachapi kaq Taytaykichis hina hunt'asqa kanaykichistan munayman.

13 T'AQA

Nephitakunaman Wiraqochaq yachachiyninkuna qatillan. Chunka ishkayniyoqman kamachiyninkuna. Soqta Mateowan tupachiychis.

1. Cheqaqta cheqaqtapunin nini—wakchakunaman qoyta qonaykichispaq; munayman; ichaqa, qhawakuychis qoyniykichista runakunaq rikunankupaq runakunaq ñawpaqenkupi ama ruwayta; hukniraqmantaqa manan hanaqpachapi kaq Taytaykichisman-ta suñayoqchu kankichis.

2. Chhaynaqa, qoyniykichista qoqtiykichisqa, ama ñawpaqeykichispi qeqeriykichista waqachiychischi, ishkay uyakunachu sinagogakunapi k'ikllukunapiwan ruwanku, runakunaq allin nisqan kanankupaq chhaynataqa. Cheqaqtapunin niykichis, suñayoqñan paykuna kanku.

3. Ichaqa, qokuyta qoqtiykichisqa, ama paña makiykichispa ruwasqanta lloq'e makiykichis yachananta kachariychischi,

4. Qoyniykichis pakallapi kananpaq; pakallapi rikuq Taytaykichistaq lliw runa rikushaqtin suñasunkichis.

5. Yayaman-rimarikuqtiykichisqa ama ishkay uyakuna hinachu ruwankichis; paykunaqa wayllunku sinagogakunapi, k'ikllu muyurinakunapiwan sayaspa yayaman-rimarikuytan runakunaq rikusqan kanankupaq. Cheqaqtapunin niykichis—suñayoqñan paykuna kanku.

6. Ichaqa, yayaman-rimarikuqtiykichisqa, wasiykichisman haykuychis, punkuykichista wishq'aspataq pakallapi kaq Taytaykichisman rimarikuychis, pakallapi rikuq Taytaykichistaq llapa runa rikushaqtin suñasunkichis.

7. Yayaman-rimarikuqtiykichisqa, ama yanqakunata yapa-yapamanta rimaychischu, mana kreyiqkuna hina; ashkha rimasqan-kurayku uyarisqa kanankutan paykuna yuyakunku.

8. Chhaynaqa, ama paykuna hinachu kaychis; Taytaykichisqa yachanmi imakuna nesitasqaykichistapas, Paymanta manaraq mañakushaqtiykichis.

9. Khaynata chhaynaqa yayaman-rimarikuychis: Hanaqpachapi kaq Taytayku, qollanachisqa sutiyki kachun.

10. Munayniyki pachapi ruwasqa kachun hanaqpachapi hina.

11. Manu kasqaykuta panpachawayku, manu kawaqniykuta panpachasqaykuta hina.

12. Ama wateqaykunaman pusawaykuchu, ichaqa millayman-ta qespichiwayku.

13. Qanpan suyu, atiypas, kusiqellpupas wiñaypaq. Hinataq kachun, nispa.

14. Runakunaq huchankunata panpachankichis chayqa, panpachasunkichismi hanaqpachapi Taytaykichispas.

15. Ichaqa, runakunaq huchankunata mana panpachankichischu chayqa, manan Taytaykichispas huchaykichiskunata panpachanqachu.

16. Astawanraqtaq—sasiqtiykichisqa ama ishkay-uyakuna hina khuyay uyayoqchu kaychis. Uyankutan allichanku runakunaman sasiq hina rikhurinankupaq. Cheqaqtapunin niykichis, chashkin-kuñan suñankuta.

17. Ichaqa, sasiqtiykichisqa umaykichista hawikuychis, uyayki-chistataq uphakuychis,

18. Runakunaman mana sasiq hina rikhurinaykichispaq, ichaqa pakallapi kaq Taytaykichisman; pakallapi rikuuq Taytaykichis-taq llaqa runakuna rikushaqtinku suñasunkichis.

19. Ama pachapi qhapaqyaykunata waqaychakuychischu, thutan qhoqayaypiwan waqllichin, suwakunataq haykuspanku suwanku.

20. Ichaqa, hanaqpachapi qhapaqyaykunata waqaychakuychis, manataqmi chaypiqa thutapas ni qhoqapas waqllichinchu, manataq suwakunapas haykunkuchu, nitaq suwankupaschu.

21. Maypi qhapaqyayniykichis kasqanpin sonqoykichispas kanqa.

22. Runa-kurkuq k'anchayninqa ñawin; chhaynaqa, ñawiykichis ch'ullalla kanqa chayqa, lliw runa-kurkuykichismi k'anchayniyoq hunt'a kanqa.

23. Ichaqa, ñawiykichis millay kanqa chayqa, lliw runa-kur-

kuykichismi laqhayaywan hunt'a kanqa. Chhaynaqa, qankunapi kaq k'anchay laqhayaq kapun chayri, imayna hatunpunin chay laqhayaq!

24. Manan pipas ishkay kamachikuqkunata serviyta atinmanchu; hunninkaqtan cheqnikunqa hukninkaqtataq munakunqa, utaq, hukninkaqmanta hap'ipakunqa, huknin kaqtataq alqochanqa. Manan Yayata qhapaqyaykunatawan serviyta atiwaqchischu.

25. Hinataq kay simikunata Jesus rimariqtin, akllasqan chunka ishkayniyoqkunata qhawarispay paykunata khaynata nirqan: Yuyariychis rimarisqay simikunata. Qankunatan akllarqani kay runakunata servinaykichispaq. Chhaynaqa niykichis, ama kawsayniykichismanta yuyaychischu, ima mikhunaykichistapas ni ima ukyanaykichistapas; nitaq runa-kurkuykichismantapas, ima churakunaykichismanta. Manachu kawsay mikhunamanta aswan, runa-kurkutaq p'achamanta aswan.

26. Qhawariychis hanaqpi urpikunata, manan paykuna tarpunkuchu nitaq pallankuchu, nitaq taqekunapichu huñunku; chaypiwanpas hanaqpachapi Taytaykichismi paykunata mikhuchin. Manachu paykunamanta aswan allin qankuna kankichis?

27. Pin qankunamanta yuyaspaykichis, sayayniykichisman huk kuartata yapayta atinman.

28. Imaqaintaq p'achamantari yuyawaqchis? Qhawariychis chakrakunapi hamang'aykuna imayna wiñasqankuta; manan llank'ankuchu nitaq pushkankupastaqchu;

29. Chaypiwanpas nisaykichismi, manan Salomonpas llapan kusiqellpunpi kaykuna hinachu p'achakurqan.

30. Chhaynaqa, chay hinata chakrapi yurakunata Yaya p'achan chayri, chaytaq kunan p'unchaw kan paqarintaq ninaman choqasqa kapun, chhaynallatataqmi Pay p'achasunkichis, mana huch'uy iñiyiniyoq kankichis chayqa.

31. Chhaynaqa, ama imatapas yuyaychischu—imatan mikhusunchis, nispa? utaq, imatan ukyasunchis, utaq, imawanmi p'achakusunchis? nispa.

32. Yachanmi hanaqpachapi Taytaykichisqa, kay llapan imaymanakunayoq kanaykichista.

33. Ichaqa, Yayaq qhapaq suyunta chaninkaynintawan ñawpaqta mashkaychis, kay llapan imaymanakunataq qankunaman yapasqa kanqa.

34. Chhaynaqa, ama paqarinpaq yuyaychischu, paqarinqa kikin imaymanankunamantan yuyanqa. Allinñan sapanka p'unchawpaq kikin llakikuyninkuna.

3 NEPHI 14

14 T'AQA

Qespichiqa rimayninkuna qatillan. Runakunaman astawan yachachin. Qanchis Mateowan tupachiychis.

1. Hinataq, kay simikunta Jesus rimariqtin, yapamanta runakunaman kutirirqan, khaynatataq paykunaman siminta kicharirqan: Cheqaqta, cheqaqtapunin niykichis, 'ama taripaychischu mana taripasqa kanaykichispaq.

2. Taripasqaykichis taripaywanmi taripasqa kankichis; tupusqaykichis tupunawantaq yapamanta qankunaman tupusqa kanqa.

3. Imaqtintaq wawqeykichispa ñawinpi kaq k'ullpichata qhawankichis, manataq kikin ñawiykichispi kaq kurkumantari yuyan-kichischu?

4. Imaynatataq wawqeykichista niwaqchis: Ñawiykimanta k'ullpichata horqonaypaq kachariway, nispa, kikin ñawiykichispi huk kurku kashaqtin?

5. Yaw ish kay uya, ñawpaqta kikin ñawiykipi kurkuta horqoy, hinamantaq ch'uyata rikunki wawqeykiq ñawinpi kaq k'ullpichata horqonaykipaq.

6. Ama qollanan kaqta alqokunaman qoychischu, nitaq umi-ñaykichiskunatapas khuchikunaman choqaychischu, mana saruykachakunarpaq, yapamanta kutirispas mana llik'inasuykichispaq.

7. Mañakuychis, qankunaman qosqataq kanqa; mashkaychis, tarinkichistaq; waqyakuychis, kicharisqataq qankunaman kanqa.

8. Sapanka mañakuqkunaqa chashkinqakun; mashkaqtaq tarinqa; waqyakuqmantaq kicharisqa kanqa.

9. Utaq, ima runan qankuna purapi kan, t'antata churin mañakuqtin payman rumi qoq?

10. Utaq, challwata mañakuqtin mach'aqwayta qonqa?

11. Chhaynari, qankuna millay kaspas allin qoykunata wawaykichiskunaman qoyta yachankichis chayri, hayk'a astawanraqtaq hanaqpachapi kaq Taytaykichis allin imaymanakunata qonqa Paymanta mañakuqkunaman?

12. Chhaynaqa, llapan imaymanakunata qankunapaq runakuna ruwanankuta munasqaykichista paykunaman ruwaychis; kaymi kamachisqa-simi unanchaqqunapiwan.

13. K'itku punkunta haykuychis; hatunmi punku hatuntaqmi chinkayman pusaq ñan, ashkhataqmi chayman haykuqkuna kanqaku.

14. Punku k'itku kaqtin, llañullataq kawsayman pusaq ñan kaqtinpiwantaq, chikallan chay tariqkuna kanqaku.

15. Qhawakuychis qankunaman oveja p'achawan hamuq ma-

3 NEPHI 15

na cheqaq unanchaqkunamanta, ukhunkupitaq ichaqa wapu mi-khukuq atoqkunan kanku.

16. Rurusqankupin paykunata reqsinkichis. Kishkakunamanta-chu uvasta runakuna pallanku, utaq higoskunatapas qhana-qhanakunamanta?

17. Chhaynallatataqmi allin sach'akunapas allin ruruta qonku; ichaqa waqllisqa sach'aqa millay rurutan qon.

18. Allin kaq sach'aqa manan millay ruruta qoyta atinman-chu; manataqmi waqllisqa sach'apas allin ruruta qoyta atinman-chu.

19. Allin ruruta mana apamuq sach'akunaqa, wit'usqa kaspan ninaman wikch'usqa kanku.

20. Chhaynaqa, ruruyninkupin paykunata reqsinkichis.

21. Manan llapan Wiraqocha, Wiraqocha nispa niwaqchu hanaqpacha qhapaq-suyuman haykunqa; ichaqa hanaqpachapi kaq Taytaya munayninta ruwaqkunallan.

22. Ashkhan haqay p'unchawpi niwanqaku: Wiraqocha, Wiraqocha, manachu sutiyki unancharqayku, sutiqipitaq saqrakunatapas qarqorqayku, sutillaykipitaq ancha sumaq ruwaykunata ruwarqayku, nispa.

23. Hinamantaq paykunata noqa nisaq: Manan hayk'aqpas reqsirqaykichischu, noqamanta hitiriyichis millay ruwaqkuna, nispa.

24. Chhaynaqa, kay rimayniykunata uyarispa ruwaqkunataqa, qaqa patapi wasin ruwaq yachaysapa runamanmi rikch'achisqa;

25. Parataq urayamurqan, unukunataq hamurqan, wayrakunataq phukumurqan, chay wasitataq soq'arqan; manataq chay wasi urmarqanku, qaqa patapi teqsichasqa kasqanrayku.

26. Kay rimayniykunata uyarispa mana ruwaqkunataq aqo patapi wasin ruwaq upa runaman rikch'achisqa kanqaku.

27. Parataq urayamurqan, unukunataq hamurqanku, wayrakunataq phukumurqan chay wasitataq soq'arqan; chay wasitaq urmarqan, ancha hatuntaq urmaynin karqan.

15 T'AQA

Moisespa kamachisqa-siminpa rantinta huk kamachisqa-simi kan. Kamachisqa-simi qoq kamachisqa-simita hunt'an. Hoq t'aqamanta ovejakuna.

1. Hinataq, kay imaymanakunata Jesus niqtin, runakunaman qhawarirqan, hinaspataq paykunata nirqan: Uyarirqankichismi, Taytayman manaraq seqashaqtiy yachachisqay imaymanakunata;

chhaynaqa, kay rimayniykunata yuyarispa ruwaqtaqa, paytan qhepa p'unchawpi hatarichisaq, nispa.

2. Kay rimaykunta Jesus niqtintaq Payqa rikurqan, paykuna purapi wakin runakuna utirayasqankuta, Moisespa kamachisqa-siminwan ima ruwananta tapukusqankuta; manan paykuna hamut'arqankuchu—mawk'a imaymanakunaqa tukukunmi, llapan imaymanakunataq mosoq wakipunku, nispa nisqata.

3. Paykunatataq Pay nirqan: Ama utirayaychischu qankunaman—mawk'a imaymanakunaqa tukukunmi, llapan imaymanakunataq mosoq wakipun nispa nisqaymanta.

4. Nisaykichis—Moisesman qosqa kamachisqa-simiqa hunt'akunmi.

5. Noqan chay kamachisqa-simi qoq kani, noqataqmi kani Israel llaqtaywan rimanakuq; chhaynaqa, noqapin kamachisqa-simi hunt'akun, kamachisqa-simi hunt'aqmi hamurqani; chhaynaqa, tukukuyniyuqmi.

6. Manan unanchaqqunataqa qolluchinichu; noqapi mana hunt'akuq imaymanakunaqa, cheqaqtapunin niykichis, llapanmi hunt'akunqa.

7. Mawk'a imaymanakunaqa pasanmi nispa qankunaman niqtiyqa, manan chinkachinichu hamunan imaymanakunamanta rimasqa imaymanakunataqa.

8. Llaqtaywan rimanakusqayqa manan llapanchu hunt'akun; ichaqa, Moisesman qosqa kamachisqa-simiqa noqapin tukukun.

9. Noqan kamachisqa-simi k'anchaypiwan kani. Noqata qhawariwaychis, tukukuykamataq takyaychis, hinataq kawsankichis. Tukukuykama takyaqmanmi wiñay kawsayta qosaq.

10. Qankunamanmi kamachiykunata qorqaykichis; chhaynaqa, kamachiykunata waqaychaychis. Kaytaqmi kamachisqa-simi unanchaqqunapiwan, cheqaqtapunin noqamanta sut'incharqanku.

11. Hinataq, kay simikunata Jesus niqtin, chay akllasqan chunka ishkayniyoqkunaman nirqan:

12. Yachachisqaykunan kankichis, Joseq wasinpa puchun kaq kay runakunamanmi k'anchay kankichis.

13. Kaytaqmi chashkikuyniykichis hallp'a, Taytataq kayta qankunaman qorqasunkichis.

14. Manataqmi hayk'aqpas Tayta kamachiwarqanchu kayta Jerusalenpi wawqeykichiskunaman ninaypaq.

15. Manataqmi hayk'aqpas Tayta kamachiwarqanchu, chay hallp'amanta Taytaq horqosqan Israelpa wasinpa hukkaq t'aqa-kunamanta paykunaman willanaypaqqa.

3 NEPHI 16

16. Kaytan Tayta kamachimuwarqan paykunaman ninaypaq;
17. Huk ovejaykunapas kanmi mana kay t'aqamanta kaqkuna; paykunatapas apamunaymi, uyarinqakutaq aruyta; huk t'aqallataq, huk micheqllataq kanqa, nispa.
18. Kunantaq, k'ullu umankurayku, mana kreyiyninkuraykupiwan, mana rimayniykunata hamut'arqankuchu; chayraykutaq Taytaq kamachisqan karqani kay imaymanakunamanta paykunaman mana astawan rimarinaypaq.
19. Ichaqa, cheqaqtapunin niykichis, Taytan kamachimuwarqan, qankunamantaq willaykichis—millay ruwayninkuraykun paykunamanta t'aqasqa karqankichis; chhaynaqa, millay ruwayninkuraykun paykunaqa mana qankunamanta yachankuchu.
20. Cheqaqtapunitaq yapamanta niykichis, hukkaq t'aqakunata paykunamanta Tayta t'aqasqanta; millay ruwayninkunaraykutaq paykunaqa mana paykunamanta yachankuchu.
21. Cheqaqtapunitaq niykichis, qankunan kankichis—kanmi huk ovejaykunapas mana kay t'aqamanta kaqkuna; paykunatapas apamunaymi, uyarinqakutaq aruyta; huk t'aqallataq huk micheqllataq kanqa, nispa nisqay.
22. Manataqmi hamut'awarqankuchu, hawarunakuna kanankupaqtaq yuyarqanku. Manataqmi hamut'arqankuchu paykunaq yachachiyninkuwan hawarunakuna wakichisqa kanankuta.
23. Manataqmi hamut'awarqankuchu—uyarinqakun aruyta paykuna nispa nisqayta; manataqmi hamut'awarqankuchu hawarunakuna mana ima pachapipas aruyta uyarinankuta, paykunamanta noqa kikiy mana watukunayta, ichaqa, Qollanan Nunallawan.
24. Ichaqa, uyarinqankichismi aruyta, rikuwarqankichistaqmi; ovejaykunataq kankichis, Taytaq qowasqankunawantaq yupasqa kankichis.

16 T'AQA

Huk t'aqapas uvarinqan Qespichiqa. Kreyiq hawarunakunapaq saminchaykuna. Yavaq-yachachiynin mana munaqkunaq imayna kayninku. Unanchaq Isaiasmanta rimakun.

1. Cheqaqta cheqaqtapunin niykichis, kanmi huk ovejaykuna mana kay hallp'amanta nitaq Jerusalem hallp'amantapas kaqkuna, nitaq watukusqay hallp'aq muyureqnintinmantapas.
2. Chay rimasqay runakunaqa manaraqmi aruyta uyarinkuraqchu; manataqmi hayk'aqpas paykunamanta watukurqanichu.
3. Ichaqa, Taytamantan huk kamachita chashkirqani, payku-

namanta watukamunaypaq, aruyta uyarinankupaq, ovejaykunawan kushkataq yupasqa kanqaku; huk t'aqalla huk micheqllapiwan kananpaq. Chhaynaqa, rinin paykunamanta watukamunaypaq.

4. Kamachiykichistaq, ripusqay pataman kay rimaykunata qelqanaykichispaq, Jerusalenpi rikuwaq runaykuna, noqawan yachachiyniypi kaqkuna, Taytamanta manapas sutiypi mañakunkumanchu qankunamanta, mana reqsisqanku hukkaq t'aqakunamantapas Qollanan Nunawan yachayta chashkinankupaq; kay qelqanaykichis rimaykuna waqaychasqa kananpaq, hawarunakunaman reqsichisqa kananpaq; hawarunakunaq hunt'a kayninkuwan hallp'a patantinpi mana kreyiyninkurayku ch'eqechisqa kananku ch'awchunkuq puchunku apamusqa kanankupaq, utaq noqa Kutichikapuqninku reqsiyman apamusqa kanankupaq.

5. Hinamantaq hallp'aq tawantin k'uchunkunamanta paykunata huñumusaq, chaymantaq Israelpa wasinmanta llapan runakunaman Taytaq rimanakusqanta hunt'asaq.

6. Saminchasqataq hawarunakuna kanku, noqapi, noqamanta Taytamantawan sut'inchaq Qollanan Nunapi ima kreyisqankurayku.

7. Noqapi kreyisqankurayku—nispan Tayta nin—mana kreyisqaykiraykupiwantaq O Israelpa wasin, qhepa p'unchawkunapi hawarunakunaman cheqaq hamunqa; kay imaymanakunaq hunt'aynintaq paykunaman yachachisqa kanqa.

8. Ichaqa, ay mana kreyiq hawarunakunamanta, nispan Tayta nin—kay hallp'a patamanña hamurqanku chaypas, Israelpa wasinmanta kaq llaqtaytaña ch'eqechirqanku chaypas; Israelpa wasinmanta kaq llaqtaytaq paykuna puramanta qarqosqa paykunaq saruykachasqanpiwantaq karqanku chaypas;

9. Hawarunakunapaq Taytaq khuyapakuyinkunarayku, Israelpa wasinmanta kaq llaqtayman Taytaq taripayninkunaraykupiwantaq, cheqaqta cheqaqtapuni niykichis, kay llapan pataman, Israelpa wasinmanta kaq llaqtayta maqachisqay, ñak'arichisqay, sipichisqay ima pataman; paykuna puramanta qarqosqa kanankuta, paykunaq cheqnisqan kasqankuta ima ruwaspa, mana munasqa, mana allin rimasqa wakisqanku patamantaq—

10. Khaynatataq Tayta kamachimuarqan qankunaman ninaypaq: Yachachiyniy kontra hawarunakuna huchallikuqtinku p'unchawpi, llapa llaqtakuna patapi, lliw hallp'antinpi kaq runakuna patapiwan sonqonkuq anchayayninpi hoqarikuqtiku, imaymana llullakuykunawan, q'otoykunawan, millaykunawan, llapa laya ishkay-uya kaywan, runa wañuchiyykunawan, waqllichisqa ku-

rakkunawan, map'akuykunawan, pakallapi millay-millanakunapiwan hunt'a kaqtinku; kay llapan imaymanakunata ruwanqaku, hunt'a yachachiyntataq qarqonqaku chayqa, hunt'a yachachiyntan paykuna puramanta horqosaq, nispan Tayta nin.

11. Hinamantaq llaqtaywan rimanakusqayta yuyarisaq, O Israelpa wasin, paykunamantaq yachachiynta apamusaq.

12. Qanmantaq qhawachisayki O Israelpa wasin, hawarunakuna qanpi mana atiyniyoq kasqankuta; ichaqa qanwan rimanakusqaytan yuyarisaq, O Israelpa wasin, qantaq yachachiynta hunt'aynin yachayman hamunki.

13. Ichaqa, hawarunakuna yuyayninkuman kutirimuspa noqaman kutirimunqaku chayqa, llaqtaywan kushkan yupasqa kanqaku O Israelpa wasin, nispan Tayta nin.

14. Manataqmi kacharisaqchu, Israelpa wasinmanta kaq llaqtayta, paykuna chawpinta rispa saruykachanankuta, nispan Tayta nin.

15. Ichaqa, noqaman mana kutirmunqakuchu, nitaq aruyta uyaringakuchu chayqa, kacharisaqmi paykunata, ari, llaqtaytan kacharisaq O Israelpa wasin, paykuna chawpinta rispa paykunata saruykachanankupaq, paykunataq kanqaku mishk'iynin chinkaq kachi hina; chhaynaqa, manan imapaqpas chay kachi allinchu, ichaqa, choqasqa kanallanpaq, llaqtaypa saruykachasqa kanallanpaqwan, O Israelpa wasin.

16. Cheqaqta cheqaqtapunin niykichis, khaynatan Tayta kamachimuwarqan—kay runakunaman kay hallp'ata chashkikuyninkupaq qonaypaq.

17. Hinamantaq unanchaq Isaiaspa khayna nisqa rimaykuna hunt'akunqa:

18. Qhamiyaqniykikunan arunta hoqaringaku, kushka aruwanmi takingaku, ñawi purataq rikunqaku, yapamanta Sionta Wiraqocha apamuqtin.

19. Kusirikuyipi phanchiriyichis, kushka takiychis Jerusalenpa purun hallp'ankuna; llaqtantan Wiraqocha kallpacharqan, Jerusalentan kutichikapurqan.

20. Llapa llaqtakunaq ñawpaqenpin makinta Wiraqocha q'alanarqan; pachaq llapan k'uchunkunataq Yayaq qespiyninta rikunqaku.

17 TAQA

Qespichiqpa vachachiyinkuna qatillan. Chirikasqa taqakuna. Onqosqakunata Qespichiq alliyachin, erqekunataq samnchan. Ancha sumaq qhawarina.

3 NEPHI 17

1. Hinataq, kay simikunata Jesus rimariqtin, yapamanta runakunaman qhawarirqan, paykunatataq nirqan: Sispallapiñan pachay kashan.

2. Rikushanin mana ancha kallpayoq kasqaykichista, kay pachapi qankunaman ninaypaq Taytamanta kamachisqa kasqay llapan rimayniykunata mana hamut'ay atisqaykichista.

3. Chhaynaqa, wasiykichisman riychis, rimasqay imaymanakunapitaq yuyaymanamuychis, sutiypitaq Taytamanta hamut'anaykichispaq mañakuychis, paqarinpaqtaq yuyayniykichista alistaychis; yapamantataq qankunaman hamusaq.

4. Kunanqa Taytamanmi rini, Israelpa chinkasqa t'aqankunamanwantaq risaq; manan Taytapaqqa chinkasqachu paykuna kanku, yachanmi mayman paykunata apasqanta, nispa.

5. Hinataq khaynata Jesus rimariqtin, yapamanta runakunaman qhawarirqan, waqashaqtataq paykunata rikurqan, mana kuyuspataq Payta qhawasharqanku, paykunawan astawanraq kanpaq mañakushankumanpas hina.

6. Paytaq paykunata nirqan: Qankunapaq khuyapayakuywan hunt'an ñat'iykuna kashan.

7. Kapsunkichischu onqosqakuna qankuna purapi? Kayman paykunata apamuychis. Kapsunkichischu wist'ukuna, ñawsakuna, such'ukuna, qhorosqakuna, qarachayoqkuna, ch'akisqakuna, upakuna, utaq imawanpas ñak'ariqkuna? Kayman paykunata apamuychis, paykunatataq alliyachisqa; khuyapakuyniyoqmi qankunawan kani, khuyapakuywan hunt'an ñat'iykuna kashan.

8. Rikushanin, Jerusalempi wawqeykichiskunapaq ruwasqayta qankunaman qhawachinaypaq munasqaykichista; rikushanin qankuna alliyachinaypaq iñiykiyichis allin kasqanta, nispa.

9. Hinataq, khaynata Pay rimaqtin, llapan runakuna kushkapuralla onqoyniyoqninkuwan, ñak'ariqninkuwan, wist'unquwan, ñawsankuwan, upankuwan, imaynapipas ñak'arichisqa kapuqninkupiwan rirqanku. Paytaq paykunata alliyachirqan, sapankanku Payman apamusqa kasqankuman hina.

10. Llapankutaq—alliyachisqa kaqkuna qhali kaqkunapiwan—chakinman k'umurikuspanku Payta yupaycharqanku; runakunamanta llapan hamuy atiqkunataq chakinta much'arqanku, weqenkuwantaq chakinta maqchirqanku.

11. Hinataq, huch'uy wawankuna apamusqa kanankupaq paykunata kamachirqan.

12. Chhaynataq, huch'uy wawankunata apamurqanku, Paypa muyuriqnin panpapitaq wawakunata churarqanku, Jestusqa chawpinkupi sayarqan; runakunataq kacharirqanku, llapan erqen-

3 NEPHI 17

kuna Payman apamusqa kanankukama.

13. Hinataq, llapanku apamusqa kaqtinku, Jesustaq chawpin-kupi sayaqtin, runakunata kamachirqan panpapi qhonqorikunan-kupaq.

14. Panpapi qhonqorikuqtinkutaq, kikin ukhunpi Jesus waqar-qan: Taytay llakisqan kashani, Israelpa wasinpa millay ruwaynin-kunarayku, nispa.

15. Kay simikunata niqtintaq Paypas panpapi qhonqorikur-qan; Taytamantaq Pay rimarikurqan; Taytaman rimariyqusqan imaymanakunataq mana qelqasqa kayta atikunmanchu; Pay uya-riq runakunataq chayta sut'incharqanku.

16. Khaynatataq paykuna willanku: Manan hayk'aqpas ñaw-paqqa ñawi rikurqanchu, nitaq rinripas uyarirqanchu, chhayna ancha sumaq imaymanakunataqa, Taytaman Jesus rimareqtin ri-kusqaykuta, uyarisqaykutawan hinaqa.

17. Manataqmi ima simipas rimayta atinmanchu, nitaq ima runaq qelqay atisqanpas kanmachu; manataqmi runakunaq son-qonku yuyata atinmanchu, chhayna ancha hatun ancha sumaq imaymanakunata, Jesuspa rimasqanta rikusqaykuta uyarisqaykuta-wan hinaqa; manataqmi pipas yuyayta atinmanchu, nunaykuta kusikuy hunt'asqanmanta, Taytaman noqaykurayku Pay rimari-kusqan pachapi.

18. Hinataq, Taytaman rimarikuyta tukuqtin Jesus sayarirqan; ichaqa, ancha hatunpuni runakunaq kusikuyninku kaqtin, atipas-qa paykuna karqanku.

19. Paykunamantaq Jesus rimarirqan, sayarinankupaq kama-chispa.

20. Paykunataq panpamanta sayarirqanku, Paytaq paykunata nirqan: Saminchasqan kankichis iñiyniykichisrayku. Kunanqa, hunt'an kusikuyniy, nispa.

21. Kay simikunata niqtintaq Pay waqarqan, runakunataq chaymanta sut'inchanku; Paytaq huch'uy wawankunata -huk-hukmanta hap'ispa samincharqan, Taytamantaq paykunarayku ri-marikurqan.

22. Kayta ruwaspantaq yapamanta waqarqan.

23. Runakunamantaq rimarirqan, khaynatataq paykunata nir-qan: Qhawariychis huch'uychaykichiskunata, nispa.

24. Rikunankupaq qhawariqtinkutaq, hanaqpachaniqman qha-warirqanku, kichakuqtataq hanaqpachata rikurqanku, nina chaw-pipi hina hanaqpachamanta urayamuqtataq angelkunata rikur-qanku; urayamuspataq chay huch'uychakunata muyurirqanku,

3 NEPHI 18

paykunataq ninawan muyurisqa karqanku; angelkunataq paykunata servirqanku.

25. Runakunataq rikurqanku, uyarirqanku, sut'incharqankutaq; yachankutaqmi sut'inchasqanku cheqaq kasqanta; llapankun rikurqanku, uyarirqanku, sapanka runa pay kikinmantapuni; paykunataq karqanku yaqa ishkay waranqa pishqa pachakniyoq nunakuna; qharikuna, warmikuna, wawakunapiwantaq karqanku.

18 T'AQA

T'antamanta vinomantawan qollanan-yuyariy nefitakuna purapi yachachisqa. Yayaman-rimarikuy nesitakusqanmanta anchata rimarikun. Qollanan Nuna qonapaq atiy qosqa.

1. Hinataq, yachachisqankunata Jesus kamachirqan, Payman t'antata vinotawan apamunankupaq.

2. T'antaman vinomanwan paykuna rishanankukamataq, runakunata kamachirqan panpapi tiyarikunankupaq.

3. Yachachisqakuna t'antawan vinopiwana kutirimuqtinkutaq, t'antata hap'irqan, phatmispataq samincharqan; yachachisqakunamantaq qorqan, mikhunankupaq paykunata kamachispa.

4. Mikhuspanku hunt'asqa kaqtinkutaq, runakunaman qonankupaq kamachirqan.

5. Runakuna mikhuspanku saksasqa kaqtinkutaq, yachachisqakunaman nirqan: Hukmi qankuna puramanta kamachisqa kanqa, paymantaq atiyta qosaq, t'antata phatmispa saminchanapaq, iñeqkuna-huñuyamanta kaq runakunaman qonanpaq, sutiypi kreysispa llapan unuchasqa kanqaku chaykunaman.

6. Kaytataq pasaqla ruwankichis, noqa ruwasqayta hina, t'antata phatmispa saminchaspa ima, qankunaman qosqayta hina.

7. Kaytataq ruwankichis qankunaman qhawachisqay runakurkuy yuyariypi. Kaytaq Taytaman sut'inchay kanqa pasaqlapuni yuyariwasqaykichismanta. Pasaqlapuni yuyariwankichis chaytaq, qankunawan Nunay kanqa.

8. Hinataq, kay simikunata niqtin, yachachisqankunata kamachirqan, qeropi vinomanta hap'ispa ukyanankupaq, runakunamanpas chaymanta ukyanankupaq qonankupaq ima.

9. Chhaynatataq ruwarqanku, ukyaqtinkutaq hunt'asqa karqanku. Runakunamantaq qorqanku, ukyaspankutaq paykunapas hunt'asqa karqanku.

10. Yachachisqakuna kayta ruwaqtinkutaq, paykunata Jesus nirqan: Saminchasqan kankichis kay ruwasqaykichismanta; kayqa kamachiyniykuna hunt'aymi, Taytamantaq kay sut'inchan, kamachisqay imaymanakunata ruway munasqaykichismanta.

11. Pasaqllapunitaq kayta ruwankichis, yuyayninkuman kutirimuspa sutiypi unuchakuqkunaman; qankunarayku sut'uchisqa yawarniy yuyariypitaq kayta ruwankichis; Taytaman pasaqllapuni yuyariwasqaykichismanta sut'inchanaykichispaq. Pasaqllapuni yuyariwankichis chaytaq, qankunawan Nunay kanqa.

12. Qankunataq kamachiykichis kaykunata ruwanaykichispaq. Kay imaymanakunata pasaqllapuni ruwankichis chayqa, saminchasqan kankichis, qaqaypi hatarichisqa kasqaykichisrayku.

13. Pipas qankunamanta kaymanta aswanta, utaq pisitapas ruwanqa chayqa, manan qaqaypi sayarichisqachu kanku; ichaqa, aqopi teqsichasqan kanku; para urayamuqtin, unukuna hamuqtin, wayra phukumuqtinpiwan paykunata soq'aqtintaq urmanqaku; supay wasiq punkuntaq kichasqaña kashan paykunata chaskinanpaq.

14. Chhaynaqa, saminchasqan kankichis qankunaman qonaypaq Tayta kamachimuwashan kamachiykunata waqaychankichis chayqa.

15. Cheqaqta cheqaqtapunin niykichis, pasaqlan qhawakunaykichis yayaman-rimarikunaykichis ima saqraq wateqasqan kaspas hark'asqa apasqa mana kanaykichispaq.

16. Qankuna chawpipi Yayaman rimarikusqayta hinataq iñeqkuna-huñupi yayaman-rimarikuychis, yuyayninkuman kutirimusqa sutiypi unuchakuq llaqtay purapi. Noqan k'anchay kani, imaynata ruwanaykichispaqtaq qhawachirqaykichis, nispa.

17. Hinataq, kay simikunata yachachisqankunaman Jesus rimariqtin, yapamanta runakunaman kutirispas nirqan:

18. Cheqaqta cheqaqtapunin niykichis, pasaqllapunin qhawakunaykichis, yayamantaq-rimarikunaykichis wateqaypi mana haykunaykichispaq; hap'iytan saqra munasunkichis trigota hina suyunasuykichispaq.

19. Chhaynaqa, pasaqllapuni sutiypi Taytaman rimarikuychis.

20. Imatapas chanin kaqta Taytamanta sutiypi mañakunkichis chaskinanykichispaq kreyispaykichis chayqa, qankunaman qosqan kanqa.

21. Aylluykichispi sutiypipuni Taytaman rimarikuychis, wariykichiskuna wawaykichiskunapiwan saminchasqa kanankupaq.

22. Pasaqlan huñunakunkichis, amataq pitapas hark'ankichischu huñunakuqtiykichis qankunaman hamunankumanta; ichaqa, kachariychis qankunaman hamunankuta, amataq paykunata hark'aychischu;

23. Paykunaraykun yayaman-rimarikunkichis, amataq paykunata qarqonkichischu; pasaqla qankunaman hamunqaku chay-

taq, sutiypi paykunarayku Taytaman rimarikunkichis.

24. Chhaynaqa, hoqariychis k'anchayniykichista, runakunaman k'ancharinanpaq. Noqan hanaqpi kachinaykichis k'anchay kani—ruwasqay rikusqaykichista. Rikurqankichismi Taytaman rimarikusqayta, llapaykichistaq rikurqankichis.

25. Rikunkichismi qankunamanta mana pipas ripunanpaq kamachisqayta, aswanmá kamachirqani noqaman hamunaykichispaq, llaminaykichispaq rikunaykichispaqwan; chhaynallatataqmi runakunawan ruwankichis. Pipas kay kamachiykunata p'akinqa chayqa, wateqayman pusasqa kananpaqmi kacharin, nispa.

26. Hinataq kay simikunata Jesus rimariqtin, yapamanta ñawinta akllasqan yachachisqankunaman kutirichispa, paykunata nirqan:

27. Cheqata cheqaqtapunin niykichis, huk kamachiytawanmi goykichis, hinamantaq Taytayman risaq, huk qowasqan kamachiykunata hunt'anaypaq.

28. Kaymi qankunaman qonay kamachiy: Aychaymanta yawarniymentawan qonakuqtiykichisqa, aman pitapas kacharinkichischu yachashaspaykichis, chaypaq hina mana kaqtinku aychaymanta yawarniymentawan hoqarinakunankuta.

29. Pipas aychaymanta mikhunqa, yawarniymentawan ukyanqa mana chaypaq hina kaspera chayqa, nunanpaq kondenasiontan mikhun, ukyan ima; chhaynaqa, aychay mana mikhunanpaq hina, yawarniy mana ukyananpaqwan hina huk runa kasqanta yachankichis chayqa, hark'ankichismi payta.

30. Chaypiwanpas aman qankuna chawpimanta payta qarqonkichischu; ichaqa, paymanmi yachachinkichis, sutiypitaq payrayku Taytaman rimarikunkichis; yuyayninman kutirimuspa sutiypi unuchakunqa chaytaq, payta chaskinkichis, aychaymanta yawarniymentawantaq payman qonkichis.

31. Ichaqa, yuyayninman mana kutirimunqachu chayqa, manan llaqtaywanchu yupasqa kanqa, runaykunata mana chinkachinanpaq; reqsinin ovejaykunata, yupasqataqmi paykuna kanku.

32. Chaypiwanpas aman sinagogaykichismanta, utaq maypi yupaychanaykichismantapas payta qarqonkichischu, pay yachachiytataq qatillankichis; manan yachankichischu kutimuspachus yuyayninkuman kutirimunankuta, sonqonkuq llapan munayninwan noqaman hamunankuta, noqataq paykunata alliyachinayta; qankunataq yanapay kankichis paykunaman qespiyta apamuypi.

33. Chhaynaqa, qankunaman qosqay kamachiykunata waqaychaychis, kondenasionman mana haykunaykichispaq; ay Taytaq kondenasqan runamanta.

3 NEPHI 19

34. Kay kamachiykunatataq qoykichis, qankuna purapi churanakuykuna kasqanrayku. Saminchasqataqmi kankichis qankuna purapi churanakuykuna mana kaqtin.

35. Kunanqa Taytamanmi risaq; nesitakunmi qankunarayku Taytaman rinay, nispá.

36. Hinataq, kay niykunata Jesus tukuspa, huk-hukmanta akllasqan yachachisqakunata makinwan llamirqan llapanta llaminankama, llamisqanman hinataq paykunata rimarirqan.

37. Manataqmi runakuna uyarirqankuchu paykunaman rimasqan simikunata, chayraykutaq mana sut'inchankuchu. Ichaqa, yachachisqakunaqa sut'inchankun, Qollanan Nunata qonankupaq paykunaman atiyta qosqanta. Asniqmanñataq qhawachisaykichis, kay willay cheqaq kasqanta.

38. Hinataq, llapankuta Jesus llamisqan pataman, huk phuyu hamurqan, runakunata llanthuqtintaq mana Jesusta rikuyta atirqankuchu.

39. Llanthurisqa kashanankukamataq, paykuna chawpimanta ripurqan, hanaqpachamantaq seqayapurqan. Yachachisqakunataq rikurqanku sut'incharqankutaq hanaqpachaman yapamanta seqayapusqanmanta.

19 T'AQA

Chunka ishkayniyoq nefitakunaq sutinku. Unuchakusqanku. Qollanan Nuna qosqa. Qespicheqpa ishkaykaq hamuvnin. Mana rimariy atina yayaman-rimariy.

1. Hinataq, hanaqpachaman Jesus wichayapuqtin, runakuna ch'eqeripurqanku; sapanka runataq warminta wawankunatawan apayukuspa wasinman kutipurqan.

2. Chay pachapunitaq runakunaman willasqa karqan, manaraq tutayashaqtin, askha runakuna Jesusta rikusqankumanta, paykunata Pay servisqanmanta, runakunaman yapamanta tutamantanpi qhawachikunanmantawan.

3. Ari, tukuy tutantin iman Jesusmanta willasqa karqan; hinataq runakunaman kachasqanku askha karqanku; ari, ancha askhatapunitaq chay tutantin llank'arqanku, runakunawan Jesus maypi qhawachikunanpaq tutamantanpi kanankupaq.

4. Hinataq, tutamantanpi runakuna huñusqa kashaqtinku, Nephi, wañusqakunamanta hatarichisqan wawqen Timoteo sutiyoq, Jonas sutiyoq churinpas; Mathoni, wawqen Mathoniahpiwan, Kumen, Kumenonhi, Jeremiah, Shemnon, Jonas, Sedekiah, Isaiaspiwan—kaymi Jesuspa akllasqan yachachisqakunaq sutinkuna kar-

3 NEPHI 19

qan—hinataq rispanku runa-runapi paykuna sayarqanku.

5. Ancha askhapuni runakuna kaqtinkutaq, chunka ishkayniyoq t'aqakunapi paykunata t'aqachirqanku.

6. Chunka ishkayniyoqkunataq runakunata yachachirqanku; runakunataq panpapi qhonqorichirqanku, Jesuspa sutinpi Taytaman rimarikunankupaq.

7. Yachachisqakunapas Jesuspa sutinpin Taytaman rimarikurqanku. Sayarispataq runakunata servirqanku.

8. Jesuspa rimasqan kikin rimaykunata paykunaman yachachispankutaq—Jesuspa rimasqan simikunamanta mana imata t'ikraspa—yapamanta qhonqorikuspanku Jesuspa sutinpi Taytaman rimarikurqanku.

9. Aswantapuni munasqankuraykutaq Taytaman rimarikurqanku; paykunaman Qollanan Nuna qosqa kanantataq munarqanku.

10. Khaynata Taytaman rimarikuqtinkutaq unu pataman rirqanku, runakunataq paykunata qatikurqanku.

11. Hinataq, unuman Nephi haykurqan, unuchasqataq karkan.

12. Unumanta lloqsimuqtintaq unuchayta qallarirqan. Jesuspa akllasqankunataq unucharqan.

13. Llapanku unuchasqa kspanku, unumanta lloqsimuqtinkutaq paykunaman Qollanan Nuna urayamurqan; Qollanan Nunawan ninawan ima hunt'asqataq karkan.

14. Ninawan hinataq muyurisqa karkan, hanaqpachamantataq chay urayamurqan, runakunataq rikurqanku sut'incharqankutaq. Angelkunataq hanaqpachamanta urayamuspanku paykunata servirqanku.

15. Hinataq, yachachisqakunata angelkuna servishaqtinku Jesus hamurqan, chawpinkupi sayaspataq paykunata servirqan.

16. Hinataq, runakunaman rimarirqan, yapamanta panpapi qhonqorikunankupaqtaq paykunata kamachirqan, yachachisqakunapas panpapi qhonqorikunankupaq.

17. Llapanku panpapi qhonqorikuqtinkutaq, yachachisqakunata yayaman-rimarikunakupaq kamachirqan.

18. Hinataq, paykunaqa yayaman-rimarikuyta qallarirqanku, Jesusmantaq rimarikurqanku, Payta—Wiraqochayku, Yayayku, nispa waqyaspanku.

19. Jesustaq paykuna chawpimanta lloqsirqan, paykunamanta huk chikanta hitirisataq panpaman k'umurikuspa nirqan:

20. Taytay, añaychaykin kay akllasqaykunaman Qollanan Nunata qosqaykimanta; noqapi kreyisqankuraykun paykunata kay runakunamanta akllarqani.

21. Taytay, rimayninkupi llapan kreyiqkunaman Qollanan Nuna qonaykitan mañaykukuyki.

22. Noqapi kreyisqankuraykun paykunaman Qollanan Nunata qorqanki Taytay; rikushankitaqmi noqapi kreyisqankuta paykunata uyarisqaykirayku, noqamantaq rimarikunku; paykunawan kasqayraykutaqmi noqaman rimarikunku.

23. Kunantaq, Taytay, paykunarayku rimarikuyki, rimayninkupi llapan kreyiqkunaraykupiwan, noqapi kreyinankupaq, paykunapi kanaypaq, qan Taytay noqapi kasqaykita hina, huklla kananchispaq, nispa.

24. Hinantaq, khaynata Taytaman Jesus rimarikuqtin, yachachisqankunaman hamurqan, paykunataq Payman rimarikusharqanku mana samaspa; manataqmi askha simikunatachu yapaparqanku; qosqan paykunaman karqan ima rimarikunankupaqpas, munaywantaq hunt'asqa karqanku.

25. Hinantaq, paykunata Jesus samincharqan Payman rimariku-shanankukama; paykunamantaq asirirqan, uyanpa k'anchaynintaq paykunaman k'ancharirqan; hinantaq, paykunaqa yuraqpuni karqanku, Jesuspa uyan hina, p'achan hinapiwan; chay yuraqyaytaq atiparqan llapan yuraqyayta; ari, manataqmi imapas hallp'a patapi kanmanchu chaypa yuraqyaynin hinaqa.

26. Jesustaq paykunata nirqan: Rimarikuyta qatillaychis nispa, chaypiwanpas manan rimarikuyta tatirqankuchu.

27. Paykunamantataq yapamanta kutirirqan, huk chikanta hitirispataq panpaman k'umurikuspa yapamanta Taytaman rimaripurqan:

28. Taytay, añaychaykin akllasqaykunata iñiyininkurayku ch'uyanchasqaykimanta; paykunaraykun, rimayninkunapi kreyiq runakunaraykupiwan rimarikuyki; rimayninkupi iñiywan noqapi ch'uyanchasqa kanankupaq, paykuna noqapi ch'uyanchasqa kasqankuta hina.

29. Taytay, manan pacharaykuchu rimarikuyki, ichaqa, iñiyininkurayku pachamanta qowasqayki runakunaraykun; noqapi ch'uyanchasqa kanankupaq, noqapi kasqaykita hina, Taytay, paykunapi kanaypaq, huklla kananchispaq; paykunapi kusiqellpusqa kanaypaq, nispa.

30. Kay simikunata Jesus rimariqtintaq, yapamanta yachachisqankunaman hamurqan; paykunataq mana samaspa mana sayk'uspa Payman rimarikusharqanku; Paytaq yapamanta paykunaman asirirqan, hinantaq Jesus hinapuni yuraq paykuna karqanku.

31. Hinantaq, yapamanta huk chikanta hitirispataq Taytaman rimaripurqan;

3 NEPHI 20

32. Manataqmi rimayta simi atinmanchu rimarisqan simikunata, manataqmi rimarisqan simikunaqa runaq qelqasqan kayta atikunmanchu.

33. Runakunataq uyarirqanku, sut'inchankutaq; sonqonkutaq kicharisqa karqan, hamut'arqankutaq sonqonkupi Paypa rimarisqan simikunata.

34. Chaypiwanpas, ancha hatun ancha sumaqpuni Paypa rimarisqan simikuna kasqanraykutaqmi, mana qelqasqa kayta atikunmanchu, nitaq runaq rimaqanpas kayta atikunmanchu.

35. Hinataq, rimarikuyta Jesus tukuspa yachachisqankunaman yapamanta hamuspa paykunata nirqan: Chhayna hatun iñiytaqa manan hayk'aqpas llapan judiokuna chawpipi rikurqanichu; chhaynataq mana chhayna hatun milagrokunata paykunaman qhawachiyta atirqanichu, mana kreyiyninkurayku.

36. Cheqaqtapunin niykichis, manan pipas paykunamanta kanchu, rikusqaykichis hina ancha hatun imaymanakunata rikukunaqa; manataqmi uyarisqaykichista hina ancha hatun imaymanakunatapas uyarirqankuchu.

20 T'AQA

T'anta vinopiwan milagrowan apamusqa, yapamanta qosqa. Jakobpa puchun. Qespichiq Pay kikinmanta nin Moises hina rimaqqa unanchaq kasqanta. Askha unanchaqkunamanta rimakun.

1. Hinataq, runakunata yachachisqankunatawan kamachirqan, manaña yayaman-rimarikunankupaq. Kamachillaraqantaqmi, sonqonkupi yayaman-rimarikuyta mana samanankupaq.

2. Paykunatataq kamachirqan hatirispas sayarinankupaq. Paykunataq hatarispanku sayarirqanku.

3. Hinataq, yapamata t'antata phatmirqan samincharqan ima, yachachisqankunamantaq mikhunankupaq qorqan.

4. Paykuna mikhuqtinkutaq, paykunta kamachirqan t'antata phatmispa runakunaman qonankupaq.

5. Runakunaman qoqtinkutaq, vinotapas paykunaman ukyanankupaq qorqan; runakunaman qonankupaqtaq kamachirqan.

6. Kunanqa, manan t'antapas ni vinopas yachachisqakunaq ni runakunaq apamusqanchu karqan;

7. Ichaqa, cheqaqtapunin t'antata mikhunankupaq, vinotapas ukyanankupaq paykunaman qorqan.

8. Paykunatataq nirqan: Kay t'anta mikhuqqa, runa-kurkuy-mantan nunanpaq mikhun; kay vinomanta ukyaqtaq yawarniy-manta nunanpaq ukyan; nunantaq mana hayk'aqpas yarqayni-

yoqchu ni ch'akichikuyniyochu kanqa, ichaqa hunt'asqan kanqa, nispa.

9. Kunantaq, runakunaqa mikhuqtinku ukyaqtinkupiwan, nunawan hunt'a karqanku, huk arullapitaq qaparirqanku, rikusqanku uyarisqankupiwan Jesustataq yupaycharqanku.

10. Hinataq, llapanku Jesusman kusiqellputa qoqtinku, paykunaman Pay nirqan: Kunanqa tukunin Israelpa wasinmanta kaq kay runakunamanta Taytaq kamachiwasqan kamachita.

11. Yuyarinkichismi qankunaman rimarisqayta, nirqanitaq: Isaiaspa rimayninkuna hunt'akuqtin—qhawariychis qelqasqan kashan, ñawpaqeykichispin kashan, hinaqa, chaykunata t'aqwiychis—

12. Cheqaqta cheqaqtapunin niykichis, chaykuna hunt'akuqtinga, chaymi llaqtanman Taytaq rimanakuyninpa hunt'akuynin, O Israelpa wasin.

13. Chaymantaq, hallp'a patapi ch'eqechisqa kanan puchukuna huñusqa kanqaku intiq lloqsimunan kinraymanta, intiq haykunan kinraymanta, qheparinamanta, qayllarinamantawan; paykuna kutichikapuq Wiraqocha Yayanku reqsiyman apamusqataq kanqaku.

14. Taytataq kamachimuwarqan, chaskikuyniykichispaq kay hallp'ata qankunaman qonaypaq.

15. Nisaykichistaq, llaqtayta ch'eqechisqanku pataman, saminchaykunata chaskinanku pataman ima mana hawarunakuna yuyayninkuman kutirimunqakuchu chayqa—

16. Chaymi qankuna, Jakobpa wasinpa puchun kaqkuna, paykuna chawpinta rinkichis; askhapuni paykuna chawpinkupitaq kankichis; sach'a-sach'api uywakuna chawpipi puma hinataq kankichis; ovejakuna chawpipi malta puma hina, chay pumantaq chawpinta rispa sarukachan llik'intaq, manataq pipas hark'ayta atinmanchu.

17. Awqaykikuna patamanmi makiyki hoqarispas kanqa, llapan awqaykikunataq wit'usqa kanqaku.

18. Llaqtaytataq huñusaq, panpapi choqonkunata runa huñusqanta hina.

19. Taytaq rimanakusqan llaqtaytataq ruwasaq, ari, killaymantan waqraykita ruwasaq, bronsemantataq chaki-silluykita. Askha llaqtakunataq ñut'unke; usachikuyninkutataq Wiraqochapaq sapaqchasaq, kapuqninkunataq llapan hallp'aq Wiraqochanman. Noqan chay ruwaq kani.

20. Hinataqmi, ninmi Tayta, haqay p'unchawpi chaninchayniypa q'anchinan paykuna patapi warkurayanqa, yuyayninkuman

3 NEPHI 20

mana kutirimunqakuchu chayqa, paykuna pataman urmanqa, nispan Tayta nin, ari, hawarunakunaq llapan llaqtankunaman.

21. Hinataqmi llaqtayta hatarichisaq, O Israelpa wasin.

22. Kay runakunataq kay hallp'api churasaq, taytaykichis Jakobwan rimanakusqayta hunt'anaypaq; mosoq Jerusalentaq kanqa. Kay runakunaq chawpinpitaq hanaqpachaq atiyinkuna kankqa, ari, noqapunipas chawpiykichispin kasaq.

23. Noqan kani Moisespa khayna rimasqan: Huk unanchaqtan Wiraqocha Yayayki hatarichinqa wawqeykichiskunamanta qankunaman, noqaman rikch'akuqta; Paytan llapan ima nisqa-suykichispipas uyarinkichis. Chay unanchaqtan mana uyariqkunataq runakuna chawpimanta wit'usqa kanqaku.

24. Cheqaqtapunin niykichis, ari, llapan unanchaqqunan Samuelmantapacha payman qatiqkunapiwan, llapan rimaqkuna, noqamanta sut'incharqanku.

25. Unanchaqqunaq wawankunan qankuna kankichis, Israelpa wasinmantataqmi kankichis, rimanakuymantataqmi kankichis; chaytataq taytaykichiswan Tayta ruwarqan, khaynata Abrahamman nispa: Ch'awchuykipin pachaq ayllunkuna saminchasqa kanqaku, nispa.

26. Taytataq hatarichiarqan qankunaman ñawpaqta, qankuna saminchanaypaqtaq kachamuwarqan, millay ruwayniykichismanta sapankaykichista kutirichimunaypaq, kaytaq, rimanakuypa wawankuna kasqaykichisrayku.

27. Saminchasqa kasqaykichis patamantaq khaynata Abrahamwan rimanakusqanta Tayta hunt'anqa: Ch'awchuykipin hallp'aq tukuy ayllunkuna saminchasqa kanqaku nisqanta—Noqa ukhunta hawarunakunaman Qollanan Nunata hich'arimuspa; hawarunakuna pataman chay saminchaytaq llapan runakuna patapi aswan kallpasapata paykunata ruwanqa, llaqtayta ch'eqechinankupaq, O Israelpa wasin.

28. Kay hallp'aq runankunaman hasut'itaq paykuna kanqaku. Chaypiwanpas, yachachiyniypa hunt'ayninta chaskisqanku pataman noqa kontra sonqonkuta rumiyachinqaku chayqa, kikin umanku patamanmi millay ruwayninkunata kutirichisaq, nispan Tayta nin.

29. Llaqtaywan rimanakuyniytataq yuyarisaq; paykunawantaq rimanakurqani chanin pachapi paykunata huñumunaypaq, taytanquq hallp'ankuta chashkikuyninkupaq yapamanta paykunaman qonaypaq—chaytaq Jerusalen hallp'a—chaytaq paykunapaq wiñaypaq prometisqa hallp'a, ninmi Tayta.

3 NEPHI 20

30. Hinataq pacha hamunqa, yachachiyniypa hunt'aynin paykunaman yachachisqa kananpaq.

31. Noqapitaq kreyinqaku, Yayaq Churin Jesucristo kasqayta, sutiypitaq Taytaman rimarikunqaku.

32. Chaymi qhamiyaqninku arunkuta hoqarinqaku, kushka kunkawantaq takingaku, ñawi pura rikusqankurayku.

33. Chaymi yapamanta paykunata Tayta huñunqa, chaskikuy-ninku hallp'ankupaqtaq Jerusalenta paykunaman qonqa.

34. Hinamantaq kusikuypi paykuna phanchiringaku—Kushka takiychis Jerusalenpa purun hallp'ankuna; Ilaqtantan Tayta kallpa-charqan, Jerusalentan kutichikapurqan.

35. Llapa Ilaqtakunaq ñawpaqenpin qollanan mak'anta Tayta q'alanarqan, pachaq llapan k'uchunkunataq Taytaq qespiyninta rikunqaku; Tayta noqapiwantaq hukilla kayku.

36. Hinamantaq chay qelqasqa kaq ruwasqa kanqa: Rikch'ariy rikch'ariy yapamanta, kallpaykitataq churakuy O Sion; sumaq p'achaykita churakuy O Jerusalen qollanan Ilaqta; manañan kunnanmantapacha qanman hamunqachu mana sircumsidasqa, ni qhelli kaqpas.

37. Ñut'u hallp'amanta chapchirikuy; hatariy, tiyarikuytaq O Jerusalen; kunkaykipi chaqnakunata pashkarikuy, O Sionpa har-k'asqa ususin.

38. Khaynatan Wiraqocha nin: Mana chaninpaqmi vemdikurqankichis, mana ima qolqewantaq kutichikapusqa kankichis.

39. Cheqaqta cheqaqtapunin niykichis, Ilaqtayqa reqsinqakun sutiya; ari, chay p'unchawpin paykuna yachanqaku noqa rimaq kasqayta, nispa.

40. Hinamantaq paykuna ninqaku: Ancha sumaqmi orqokuna patapi paykunaman sumaq willaykunata apamuqpa chakinkuna, qasi kawsay willaqkuna; allin kaqmanta paykunaman allin willaykunata apamuqkuna, qespiyta willaqkuna—Yayaykin kamachikun, nispa Sionman niqkuna.

41. Hinataq huk qapariy rinqa: Hitiriychis hitiriychis; kaymantalooqsiychis, ama qhelli kaqta llamiychischu; paypa chawpinmanta llooqsiychis; Wiraqochaq qerunkuna apaqkuna, llunp'aq kaychis.

42. Manan llukullachu rinki, nitaq phawarispachu; Wiraqochan ñawpaqeykita rinqa, Israelpa Yayantaq qhepayki qhawaq kanqa.

43. Allin yuyaywanmi warmaykuna ruwayninkuta ruwanqaku; hatunyachisqa, yupaychasqapiwantaq ancha hanaqpi churasqa imataq Pay kanqa.

44. Qanmantachu askha runakuna utirayarqanku—llapan runamanta aswantan rikuynin qhellichasqa karqan, runa-kurkuntaq runakunaq churinkunamanta astawanraq—

45. Chhaynallatataqmi askha llaqtakunata ch'aqchuringa; paymanmi inkakuna siminkuta wishq'anqaku, paykunaman mana willasqa kasqantataq paykuna rikunqaku, mana uyarisqankutataq yuyaykunqaku.

46. Cheqaqta cheqaqtapunin niykichis, cheqaqtapunin kay llapan imaymanakuna kanqa, Taytaq kamachiwasqan hinapuni. Chaymi llaqtanwan Taytaq rimanakusqan hunt'asqa kanqa; hinamantaq Jerusalenpi yapamanta llaqtay tiyanqa, chaskikuyninku hallp'ataq kanqa.

21 T'AQA

Taytaq ruwayninpa señalnin. Yuyayninkuman kutirimuq hawarunakunaq kusiqellpusqa kayninku. Yuyayninkuman mana kutirimuqkunaq kondensasionninku. Mosoq Jerusalen.

1. Cheqaqtapunin niykichis, huk señaltan qosqaykichis, kay imaymanakuna kananpaq hinaña kanan pachata yachanaykichispaq—Unay ch'eqechisqa kasqankumanta llaqtayta huñumusaq, O Israelpa wasin, yapamantataq Sionniyta paykuna purapi hatarichisqa;

2. Kaytan señalpaq qosqaykichis—Cheqaqtapunin qankunaman niykichis, kay willasqay imaymanakuna, kunan p'unchaw pataman noqa kikiymanta, Taytamanta qankunaman qosqa Qollanan Nunaq atiyinpiwan qankunaman willanay imaymanakuna hawarunakunaman reqsichisqa kaqtin, Jakobpa wasinpa puchun kaq kay runakunamanta, paykunaq ch'eqechinanku kay llaqtaymantawan yachanankupaq;

3. Cheqaqta cheqaqtapunin niykichis, kay imaymanakuna paykunaman Taytamanta reqsichisqa kaqtin, Taytamantataq lloqsimoqtin, paykunamantataq qankunaman;

4. Yachaysapa kaymi Taytapi kan, kay hallp'api paykuna hatarichisqa kananku; Taytaq atiyinwantaq qespi llaqta hatarichisqa kananku, kay imaymanakuna paykunamanta ch'awchuykichispa puchunkuman hamunanpaq, llaqtanwan rimanakusqan Taytaq rimanakuynin hunt'akunanpaq, O Israelpa wasin;

5. Chhaynaqa, kay ruwaykuna, kunanmanta qhepaman qankuna purapi ruwakunan ruwaykunapiwan hawarunakunamanta, millay ruwaykunarayku mana kreyiypi urmaq ch'awchuykichisman lloqsimoqtin;

3 NEPHI 21

6. Khaynatan Tayta munan, hawarunakunamanta lloqsimunanpaq, hawarunakunaman atiynta qhawachinanpaq; kayrayku hawarunakuna sonqonkuta mana rumiyachinqakuchu chayqa, yuyayninkuman kutirimuspa noqaman hamunankupaq, sutiypi unuchasqa kanankupaq, yachachiyniypa cheqaqninkunata yachanankupaq, llaqtaywan yupasqa kayta atinankupaq O Israelpa wasin.

7. Kay imaymanakuna hamuqtintaq, kay imaymanakunata ch'awchuykichis yachayta qallarinqaku—paykunapaq kay señal kanqa, Taytaq ruwaynin ña qallarisqantaña yachanankupaq, Israelpa wasinmanta kaq runakunaman ruwasqan rimanakuynin hunt'akunanpaq.

8. Chay p'unchaw chayamuqtintaq, inkakuna siminkuta wishq'anqaku; paykunaman mana willasqa kasqantan rikunqaku, mana uyarisqankutataq yuyaykunqaku.

9. Haqay p'unchawpin noqarayku huk ruwayta Tayta ruwanqa, chaytaq paykuna purapi ancha hatun ancha sumaq ruwana kanqa; chay imaymanakuna mana kreyiqkunataq paykuna purapi kanqa, huk runaña paykunaman willanqa chaypas.

10. Ichaqa, warmaypa kawsayninqa makiypin kanqa, chhaynataq mana paykuna payta k'irinqakuchu, paykunaraykuña q'oyusqa kanqa chaypas. Chaypiwanpas paytan alliyachisqa, paykunamantaq qhawachisqa saqraq atoqrayayninmanta yachayniy aswan hatun kasqanta.

11. Chhaynataq, noqa Jesucristoq rimayniykunapi mana kreyiqkunaqa—chaytataq Tayta paywan hawarunakunaman apachimunqa, paymantaq atiyta qonqa chaykunata hawarunakunaman apamunanpaq (Moisespa nisqanman hinapunin ruwasqa kanqa)—rimanakuyniypa llaqtay chawpimantan qarqosqa kanqaku.

12. Jakobpa puchun kaq llaqtaytaq hawarunakuna chawpipi kanqaku; ari, sach'a-sach'api uywakuna chawpipi puma hina paykuna chawpipi, huñu ovejakuna chawpipi malta puma hina; paytaq chawpinta rispa sarukachan, llik'intaq, manataq pipas hark'ayta atinmanchu.

13. Makinkun awqanku patapi hoqarisqa kanqa, llapan awqankunataq kuchusqa kanqaku.

14. Ari, ay hawarunakunamanta yuyayninkuman mana kutirimunqakuchu chayqa; haqay p'unchawpin kanqa—nispan Tayta nin—chawpiykichismantan kaballuykichista kuchusqa, karruykichistataq ñut'usqa;

15. Hallp'aykiq llaqtankunatapas thuñisqami, llapan pukaraykikunataq taqmasaq;

16. Hallp'aykimantan layqakuykunata chinkachisaq, manañataq astawan watukuy willaqkuna kapusunkichischu.

17. Rikch'ayniykichiskunatapas wit'usaqmi, qankuna chawpimantataq sayariq rikch'ayniykichista; manañataq astawan yupaychankichu riakiykiq ruwasqankunata;

18. Sach'a-sach'aykikunataq chawpiykimanta t'irasaq, chhaynallatataq llaqtaykikunata thuñisaq.

19. Hinataq, llapan llullakuykuna, yukaykuna, munapakuykuna, churanakuykuna, millay kurak kaykuna, map'akuykunapiwan tukukunqa.

20. Hinataq, haqay p'unchawpi, yuyayninman kutirimuspa Ancha-munasqa Churiyman mana hamuqtaqa, paytan llaqtay chawpimanta kuchusaq, O Israelpa wasin, ninmi Tayta.

21. Aynikuyniyta phiñakuytawanmi paykunaman chayachimusaq mana kreyiqkunaman hinapuni, mana hayk'aq uyarisqankuta hina.

22. Ichaqa, yuyayninkuman kutirimuspa rimayniykunata uyarinqaku, manataq songonkuta rumiyachinqakuchu chayqa, paykuna purapin iñeqkuna-huñuyta hatarichisaq, paykunataq rimanakuyman haykumunqaku, chaskikuyninkupaq kay hallp'a qosqay kay Jakobpa puchunwan yupasqataq kanqaku.

23. Jakobpa puchun llaqtayta, Israelpa wasinmanta llapan hamuqkunatawantaq yanapanqaku huk llaqtata hatarichinankupaq, Mosoq Jerusalem nispa waqyasqataq kanqa.

24. Hinamantaq llaqtayta yanapanqaku, hallp'a patapi ch'eqechisqa kaqkunata Mosoq Jerusalemman huñusqa kanankupaq.

25. Chaymantaq hanaqpachaq atiyin paykuna puraman hamunqa; noqapas chawpipin kasaq.

26. Hinamantaq haqay p'unchawpi Taytaq llank'aynin qallarinqa, kay runakunaq puchunman yayaq-yachachiynin yachachisqa kashaqtin. Cheqaqtapunin niykichis, haqay p'unchawpin Taytaq llank'aynin qallarinqa, llaqtaypa llapan ch'eqechisqakuna purapi; ari, Jerusalemanta Taytaq apasqan chinkasqa t'aqakuna purapipas.

27. Ari, llaqtaypa llapan ch'eqechisqakuna chawpipin llank'ay qallarinqa, Taytataq ñanta allichanqa, chhayna noqaman hamunankupaq, sutiypi Taytaman waqyanankupaq.

28. Ari, chaymi Taytawan ruway qallarinqa, llapan llaqtakuna chawpipi ñanta allichanankupaq, chaywan Paypa llaqtan wasinkuman huñusqa kananpaq, chaskikuyninkuq hallp'anman.

29. Paykunataq llapan llaqtakunamanta lloqsimunqaku; manañataqmi llukullachu lloqsimunqaku, nitaq phawaspachu; noqan

3 NEPHI 22

ñawpaqenkuta risaq, noqataq qhепanku qhawaq kasaq, ninmi Tayta.

22 T'AQA

Isaiaspa unanchayninkunamanta Wiraqocha astawan rimarin. Pishqa chunka tawayoq Isaiaswan tupachiychis.

1. Hinamantaq chay qelqasqa kaq susedenqa: Takiy, mana wawayoq mana wachakuq; takiypi phanchiriy wapu kallpayoq arupitaq qapariy wawawan mana ñak'ariq, aswan askhan sapan kaqpa wawankuna sawasqa warmimantaqa, ninmi Wiraqocha.

2. Hatunyarichiy maypi karpayki kananta, tiyanaykikunaq arapankunata chutarinankuta kachariy; ama panpachaychu, chutariy watanaykikunata, kallpachaytaq takarpuykikunata.

3. Paña qayllapi lloq'e qayllapiwanmi phanchiringaku, ch'awchuykitaq hawarunakunata chaskikuyninkupaq chaskinqaku, ch'in llaqtakunataq runakunawan tiyachinqaku.

4. Ama manchakuychu, manan p'enqachisqachu kanki; amataq pantachisqachu kay, manan p'enqayman churasqachu kanki; wayna kayniyki p'enqakuytan qonqanki, manataqmi yuyarinkichu wayna kayniykiq anyakuyninta, ikma kayniykiq anyaynintataq manaña astawan yuyarinkichu.

5. Kamaqniykiq, qosaykiq sutinqa Awqasuyukunaq Wiraqochanmi; Qespichiqniykitaq, Israelpa Qollanan llapan hallp'aq Yayanmi waqyasqa kanqa.

6. Wiraqochataq waqyarqasunki qonqasqata, nunapi llakisqa warmita hina; wayna kaypa warmita hinan waqyarqasunki anyasqa kaqtiyki, nispan Yayayki nin.

7. Manan unaychu qonqarqayki, ichaqa ancha hatun khuyapakuykunawanmi huñusayki.

8. Huk chikan phiñarikuypin qanmanta huk chikallanta uyayta pakarqani, wiñay-wiñaypaq kaq sumaq sonqowanmi ichaqa qanwan khuyapakuq kasaq, nispan Kutichikapuqniyki Wiraqocha nin.

9. Noeq ununkuna hinan kapuwanqa; Noeq ununkuna manaña hayk'aqpas hallp'ata pakananmanta jurasqayta hinallatataqmi jurarqani qanwan manaña phiñarisqa kanaypaq.

10. Orqokunan ripunqaku, moqokunataq astasqa kanqaku; sumaq kayniymi ichaqa, mana qanmanta hitiringachu, manataqmi llaqtaypa rimanakuyninpas hitirichisqachu kanqa, ninmi qanmanta khuyapakuyniyog kaq Wiraqocha.

11. Yaw ñak'arichisqa, sallallallaywan chhapchisqa, mana son-

gochasqa! Sumaq llinpiwanmi rumiykikunta churasaq, umiñakunawantaq teqsiykita ruwasaq.

12. Agatakunawan ventanaykikunata ruwasaq, punkuykikunataq puka umiñakunawan, sumaq rumikunawantaq llapan pataykikunata.

13. Llapan wawaykikunan Wiraqochamanta yachachisqa kanqaku, ancha hatuntaq wawaykikunaq qasi-kawsayninku kanqa.

14. Chaninchaypin hatarichisqa kanki; kharupin ñit'isqa kaymanta kanki, manataqmi manchakunkichu; kharupin millay manchachiymanapas kanki, sispaykiman mana hamuqtin.

15. Cheqaqtapunin qan kontra huñunakunqaku, ichaqa manan noqaq huñunachisqaychu; pipas qan kontra huñunakuqqa, qankunaraykun urmanqaku.

16. Ninapi sansakunata phukuq herrerotan kamarqani, ruwanataq llank'ananpaq apamun; usuchiqtapas kamarqanin chinkachinanpaq.

17. Manan qankuna kontra ruwasqa ima maqanapas hatunyanqachu; qan kontra taripaypi hatariq sapanka simitaraq qan kondenanki. Kaymi Wiraqochaq warmankunaq chaskikuyninku, chaninchayninkutaq noqamanta, nispan Wiraqocha nin.

23 T'AQA

Nephitakunaq qelqankunapi mana kaq qelqakunata qelqakunanpaq Wiraqocha kamachin. Lamanita Samuelpa unanchaynin yapasqa.

1. Kunantaq qankunata niykichis, kay imaymanakunata mashkanaykichispaq. Ari, huk kamachiytan qankunaman qoykichis, kay imaymanakunata k'uchiy-k'uchi mashkanaykichispaq; ancha hatunpunin Isaiaspa rimayninkuna.

2. Cheqaqtapunin pay rimarqan Israelpa wasinmanta kaq llaqtaypa llapan imaymanankunamanta; chhaynaqa hawarunakunamanpas nesitakunmi rimanan.

3. Llapan rimasqan simikunataq karqan, kanqataq, rimasqan simikunaman hinapuni.

4. Chhaynaqa, uyariychis rimayniykunata; qelqaychis qankunaman nisqay imaymanakunata; Taytaq pachanman munayninmanwan hinataq hawarunakunaman rinqa.

5. Pipas rimayniykunata uyarispa yuyayninman kutiringa unuchakunqataq chayqa, qespichisqan kanqa. Unanchaqkunata mashkaychis, askhan kan kay imaymanakunamanta sut'inchaqkuna, nispa.

6. Hinataq, kay rimaykunata Jesus niqtin yapamanta paykun-

3 NEPHI 24

ta nirqan, paykunaq chaskisqanku llapan qelqakunata paykunaman hamut'achisqan pataman paykunata nirqan: Mana kapusqa-suykichis huk qelqakunata qelqanaykichistan munani, nispa.

7. Hinataq, Nephita nirqan: Apamuy waqaychasqayki qelqakunata, nispa.

8. Qelqakunata Nephi apamuspa ñawpaqenpi churaqtintaq chaykunata qhawarispas nirqan:

9. Cheqaqtapunin niykichis—kamachirqanin warmay Lamanita Samuelman, kay runakunaman sut'inchananpaq, noqapi sutinta Tayta kusiqellpuchisqan p'unchawpi, askha qollanan runakuna wañusqakunamanta hatarispa, askha runakunaman rikhurimunankumanta, paykunata yachachinankumantawan. Paykunatataq nirqan: Manachu chay hina karqan, nispa.

10. Yachachisqankunataq payta kutichirqanku: Ari, Wiraqocha, rimasqaykiman hinan Samuel unancharqan, llapantaq hunt'akurqan, nispa.

11. Jesustaq paykunata nirqan: Imaynataq kayta mana qelqarqankichischu—askha qollanan runakunan hatarimuspanku, askha runakunaman rikhurimurqanku, paykunatataq servirqanku, nispari?

12. Hinataq, Nephiqa yuyarirqan kay mana qelqasqa kasqanta.

13. Jesustaq kamachirqan qelqasqa chay kananpaq; chhaynaqa, qelqasqa kasqan kamachisqanman hina.

14. Hinataq, hukllapi llapan qelqasqa qelqakunata Jesus hamut'achispan paykunata kamachirqan, paykunaman hamut'achisqan imaymanakunata yachachinankupaq.

24 T'AQA

Malakiaspa rimayninkuna nephitakunaman qosqa. Chunkan t'aqakunamanta, munachikuykunamantawan kamachi-simi. Kinsa Malakiaswan tupachiyichis.

1. Hinataq, paykunata Pay kamachirqan, Malakiasman Taytaq qosqan rimaykunata qelqanankupaq, chayta paykunaman Pay nianta. Qelqasqa kasqan patamantaq, chayta paykunaman hamut'achirqan. Kaytaqmi paykunaman nisqan rimaykuna: Khaynatan Malakiasman Tayta nirqan: Willaqniytan kachamusaq, ñawpaqeytataq ñanta allichanqa, mashkasqaykichis Wiraqochataq qonqayllamanta Wasinman hamunqa, Paypi kusikusqaykichis rimanakuy-pa willaqnintapuni; hamunqan Pay, nispan nin Awqasuyukunaq Wiraqochan.

3 NEPHI 24

2. Ichaqa, pin hamunan p'unchawta awantanqa, pitaq sayanqa rikhurimuqtinri? Ch'uyanchaqa ninan hinan Pay, t'aqsaqa ch'aqon hinan Pay.

3. Qolqe allinyachiq ch'uyanchaq hinan Pay tiyanqa; Leviq churinkunataq ch'uyanchanqa, qorita qolqetawan hinataq paykunata maqchinga, chaninchaypi munachiyta Wiraqochaman munachinankupaq.

4. Chaymi Judaq Jerusalenpa ima munachiyninku Wiraqochapaq sumaq kanqa, mawk'a pachakunapi hina, ñawpa watakunapi hina.

5. Taripaypaqtaq sispayniykichisman hamusaq, usqhaylla sut'inchaptaq layqakuna, wasanchaqqkuna, mana cheqaq juraqqkuna ima kontrapi kasaq; mink'asqa runata chaninchayninkupi ñit'iqkuna kontra, ikmakunata, mana taytayoqqkunatawan ñit'iqkuna kontrapiwan; mana reqsisqa runata qarqoqqkuna kontra, noqata mana manchakuq kontrapiwan, nispan Awqasuyukunaq Wiraqochan nin.

6. Noqan Wiraqocha kani, manataqmi kanbiyanichu; chhaynaqa manan ruphasqachu kankichis Jakobpa churinkuna.

7. Taytaykichiskunaq p'unchawninkumantapunin qollanan-rwanaykunamanta hitirirgankichis, manataq chaykunata waqaycharqankichischu. Noqaman kutirimuychis, qankunamantaq noqa kutirimusaq, nispan Awqasuyukunaq Wiraqochan nin. Ichaqa, qankunaga ninkichis—maymanmi kutirisaqku, nispa.

8. Suwakunqachu runa Yayamanta? Chaypiwanpas suwawarqankichismi. Ichaqa ninkichis: Imapin suwakurqaykiku, nispa. Chunkan t'aqapi munachikuykunapiwanmi.

9. Huk ñakaywan ñakasqan kankichis, suwawasqaykichisrayku, kay llapan llaqtantinpas.

10. Llapan chunqan t'aqata apamuychis waqaychana wasiman, wasiypi mikhuna kananpaq; kaywantaq probawaychis, manachus hanaqpachaq ventanankunata kicharimusaykichischu; huk saminchaytataq hich'arimusaykichis, maypi chayta chaskinaykichispaqtaq mana ch'usaq kanqachu.

11. Mikhukuqtataq qankunarayku anyasaq, manataq pay qolluchinqachu chakraykichispa rurunkunata, manataq uvasniykichispa chakrakunapi ruruta qonqachu manaraq ruruna uhu kashaqtinqa, ninmi Awqasuyukunaq Wiraqochan.

12. Llapan llaqtakunataq saminchasqa nispa waqyasunkichis ancha sumaq hallp'a kasqaykichisrayku, ninmi Awqasuyukunaq Wiraqochan.

13. Llasan rimayniykichis noqa kontra karqan, ninmi Wiraqo-

cha. Chaypiwanpas ninkichismi: Imatan qan kontra rimarqayku, nispa.

14. Yanqapaqmi Yaya serviy, imapaqtaq allin kawanchis kamachiyninkuna waqaychasqanchis, Awqasuyukunaq Wiraqochanpa ñawpaqenpi khuyay purisqanchis? nispan nirqankichis.

15. Kunantaq anchayaqta kusiy-kusi nispa waqyanchis; ari, millay ruwaqkunan hatunchasqa kanku, ari, Yaya wateqaqkunapiwanpas kacharisqan kanku.

16. Chaymantaq Wiraqocha manchakuqkuna pasaqlla rimanakurqanku, Wiraqochataq uyarispa uyarirqan; huk yuyarikuna qelqataq ñawpaqenpi qelqasqa karqan Wiraqocha manchakuqkunapaq, sutinpi yuyaqkunapaq.

17. Noqaqtaqmi kanqaku, umiñaykunata ruwanay p'unchawpi, paykunatataq waqaychasaq, serviqnin churinta huk runa panpachasqanta hina, nispan Awqasuyukunaq Wiraqochan nin.

18. Chaymi kutirimuspa riqsinkichis chanin kaqkunata millay kaqkunamanta, Yaya serviqta Pay mana serviqmanta.

25 T'AQA

Malakiaspa rimayninkuna qatillan. Elias, ima ruwananpiwan. Wiraqochaq ancha hatun ancha millay p'unchawnin. Tawa Malakiaswan tupachiychis.

1. Hamushanmi p'unchaw q'oncha hina rawrananpaq; llapan anchayaq, ari, llapan mana allin ruwaqkuna ichhu kanqaku, hamuq p'unchawtaq paykunata ruphanqa, manataq saphitapas ni raphitapas paykunamanta saqenqachu, ninmi Awqasuyukunaq Wiraqochan.

2. Ichaqa, sutiyaq manchakuq qankunataqa, Chaninchaypa Churinmi rapranpi alliyachiyninwan hoqarisunkichis; rispataq, kanchapi malta waka hina wiñankichis.

3. Millay ruwaqkunatataq saruykachankichis; ushpha hinan chakiykichispa pachanpi kanqaku kayta ruwanay p'unchawpi, ninmi Awqasuyukunaq Wiraqochan.

4. Yuyariychis, warmay Moisespa kamachisqa-siminta, chaytaq payman Horebpi kamachirqani llapan Israelpaq, yuyaqakunawan taripaykunawan ima.

5. Unanchaq Elistan kachamusaykichis, Wiraqochaq ancha hatun ancha manchakuna p'unchawnin manaraq hamushaqtin.

6. Paytaq taytakunaq songonkuta wawakunaman kutirichinqa, wawakunaq songonkutataq taytankunaman, mana chayqa, hamuspan hallp'ata huk ñakaywan k'iriyman.

26 T'AQA

Qallariymantapacha llapan imaymanakunata Qespichiq hamut'achin. Ancha sumaq imaymanakunata erqekuna rimarinku. Yachachisqakunaq ruwananku.

1. Hinataq, kay imaymanakunata Jesus willaqtin, runakunaman chayta hamut'achirqan; paykunamantaq, llapan imaymanakunata hatuntapas huch'uytapas hamut'achirqan.

2. Paytaq nirqan: Kay mana kapusqasuykichis qelqakunataqa, Taytan kamachimuwarqan qankunaman qonaypaq; allin yachaymi Paypi karqan, hamuq mirayman qosqa kananpaq.

3. Llapan imaymanakunataq paykunaman hamut'achirqan, qallariymantapachapuni, kusiqellpunpi hamunan pachakama; ari, hallp'a pataman llapan hamunan imaymanakunata, wapu ruphaywan imamanta hallp'a ruwasqa kasqan imaymanakuna chullunankama, hallp'ataq mayt'u raphi hina mayt'ukunankama, hanaqpacha kay pachapiwan pasanankama ima;

4. Ancha hatun qhepa p'unchawkamapuni; llapan runakuna, ayllukuna, llaqtakuna, simikunapiwan Yayaq ñawpaqenpi sayaqtinku; ruwayninkumanta— allinña mana allinña kaqtinpas—taripasqa kanankukamapuni.

5. Allin ruwaykuna kaqtinqa, wiñay kawsaypaq kawsariyman; millay kaqtintaq kondensasionpaq kawsariyman; kushkalla kaspanku, huk huk makipi, hukkaqtaq hukkaq makipi; manaraq pacha qallariqtin kaq Cristopi khuyapakuyma, chaninchayman, qollanan kayninmanwan hina.

6. Manan huk pachaknin t'aqallantapas kay qelqapi qelqakuyta atikunmanchu, runakunaman cheqaqtapuni Jesus yachachisqanmanta;

7. Ichaqa, Nephiq raphinkunapin kashan, runakunaman yachachisqanpa aswan ashkanninkuna.

8. Kaykunataq qelqarqani, runakunaman yachachisqan imaymanakunamanta aswan chikanninta; kaykunataq qelqani, hawarunakunamanta kay runakunaman yapamanta apamusqa kananpaq, Jesuspa rimasqan simikunaman hina.

9. Kayta chaskiqtinkutaq—nesitakuntaqmi qallariypi kaykuna-yoq kananku, iñiyninkuta pruebananpaq—kay imaymanakunata kreyinqaku chaytaq, aswan hatun imaymanakuna paykunaman willasqa kanqa.

10. Kay imaymanakunata mana kreyiqtinkutaq, chay hatun imaymanakuna paykunamanta hark'asqa kanqa, kondensasionninkupaq.

11. Nephiq raphinkunapi llapan qelqasqa kasqanta qelqanay-

paq hinaña kasharqani, ichaqa Wiraqocha hark'awarqan—llaqtaypa iñiyntan pruebasaq, nispa.

12. Chhaynaqa, Wiraqochaq kamachiwasqan imaymanakunatan noqa Mormon qelqani. Kunantaq noqa Mormon rimayniykunata tukuni, kamachisqa kawasqan imaymanakuna qelqaytataq qatillani.

13. Chhaynaqa, cheqaqtapuni runakunata Wiraqocha kinsa p'unchaw yachachisqantan yachanaykichista munayman; chay patamantaq pasaqlla paykunamanta watukamurqan, pasaqllataq t'antata phatmirqan, saminchaspataq paykunaman qorqan.

14. Hinataq, rimasqa runakunaq wawankunaman yachachirqan, servirqanpiwan; qallunkuta pashkariqtintaq ancha hatun ancha sumaq imaymanakunata taytankuman rimarirqanku, runakunaman Pay rimasqanmanta aswan hatuntaraq; qallunkutan Pay pashkarirqan rimayta atinankupaq.

15. Hinataq, hanaqpachaman seqayapusqan pataman—ishkaykaq kutitan paykunamanta watukamusqa karqan, Taytamantaq ripusqa karqan, llapan onqosqankunata weqrunkunatawan alliyachisqan pataman, ñawsankuq ñawinkuta kicharisqan pataman, upakunaq rinrinkuta kicharisqan pataman; imaymana laya hanpiykunata paykuna purapi ruwasqan pataman, wañusqakunamanta huk runata hatarichisqan patamanwan, paykunaman atiynta qhawachisqan, Taytamantaq seqasqan patamanwan—

16. Hinataq tutamantanpi runakuna huñunakurqanku, paykunataq rikurqanku uyarirqanku ima kay erqekunata; ari, wawakunapas siminkutan kicharirqanku, ancha sumaq imaymanakunataq rimarirqanku; erqekunaq rimasqanku imaymanakunataq mana pipas qelqananpaq hark'asqa karqan.

17. Hinataq, Jesuspa akllasqan yachachisqakuna, chay pachamantapacha paykunaman llapan hamuqkunata unuchayta yachachiytawan qallarirqanku. Jesuspa sutinpi llapan unuchasqa kaqkunataq Qollanan Nunawan hunt'a karqanku.

18. Askhataq paykunamanta rikurqanku uyarirqankutaq mana rimay atina imaymanakunata, chaykunataq qelqasqa kananmanta hark'asqa kapun.

19. Paykunataq yachachinakurqanku, servinakurqankupiwan; llapan imaymanakunataq hukllapi kachirqanku paykuna purapi, sapanka runa chaninchaywan paykuna purapi ruwaspanku.

20. Hinataq, llapan imaymanakunata ruwarqanku Jesus kamachisqanman hina.

21. Jesuspa sutinpi unuchasqa kaqkunataq, Cristoq iñeqkunahuñun nispa waqyasqa karqanku.

27 T'AQA

Iñeqkuna-huñunta Jesucristo sutichan. Llapan imaymanakunapas Taytaq qelqasqanmi. Qelqakunapi qelqasqa kasqanmanta runakuna taripasqa kanqaku.

1. Hinataq, Jesuspa yachachisqankuna, uyarisqankuta rikusqankutawan yachachispa, Jesuspa sutinpi unuchaspa ima purishaqtinku, yachachisqakunaqa huñunaykukuspa kasharqanku, ancha hatun yayaman-rimarikuypi sasiypiwantaq hukllanakurqanku.

2. Yapamantataq paykunamanta Jesus watukamurqan, sutinpi Taytaman rimarikusqankurayku. Hamuspataq chawpinkupi Jesus sayarqan, paykunatataq nirqan: Qankunaman ima qonaytan munankichis? nispa.

3. Paykunataq Payta nirqanku: Wiraqocha, kay ñeqkuna-huñuta ima sutiwan waqyanaykuta niwanaykikutan munayku; kaymantan churanakuykuna runakuna purapi kan, nispa.

4. Wiraqochataq paykunata nirqan: Cheqaqta cheqaqtapunin niykichis, imaqtintaq runakunari kaymantari rimapakunkuman, churanakunkuman imari?

5. Manachu qelqakunata paykuna ñawincharqanku, qankunapin churakunaykichis Cristoq sutinta nispa niqta? chaytaqmi suti. Kay sutiwanmi qhepa p'unchawpi waqyasqa kankichis.

6. Sutiya paypi churakuspa tukukuykama takyaq runaqa, qespichisqan qhepa p'unchawpi kanqa.

7. Chhaynaqa, ima ruwasqaykichistapas sutiypin ruwankichis; hinaqa, sutiypin ñeqkuna-huñuta waqyankichis; sutiypitaq Taytaman waqyakunkichis, noqarayku ñeqkuna-huñuta saminchanapaq.

8. Imaynataq ñeqkuna-huñuyri kanman sutiypi mana waqyasqa kaspari? Moisespa sutinpi huk ñeqkuna-huñu waqyasqa kan chayqa, Moisespa ñeqkuna-huñunmi; huk runaq sutinpi waqyasqa kanman chaytaq, chay runaq ñeqkuna-huñun; ichaqa, sutiypi waqyasqa kanqa chayqa, ñeqkuna-huñuyri, yachachiy-niypi hatarichisqa kanqa chayqa.

9. Cheqaqtapunin niykichis, yachachiy-niypin hatarichisqa kankichis. Chhaynaqa, imataña waqyankichis chayqa sutiypin waqyankichis; hinaqa, ñeqkuna-huñuyrayku sutiypi Taytaman waqyakunkichis chayqa, uyarisunkichismi Tayta.

10. Ñeqkuna-huñu yachachiy-niypin hatarichisqa kanqa chayqa, kikin ruwayninkunatan chaypi Tayta qhawachinqa.

11. Ichaqa, mana yachachiy-niypichu hatarichisqa kanqa, runakunaq ruwayninkunapitaq, utaq saqraq ruwayninkunapipas hata-

richisqa kanqa chayqa, cheqaqtapunin niykichis, manan unaychu ruwayninkunapi kusikunku, asllamantaq tukukuy hamun, paykunataq wit'usqa kaspanku ninaman choqasqa kanku, manataq chaymanta kutirimuy kanchu.

12. Ruwayninkun paykunata qatin, ruwayninkuraykutaq wit'usqa kanku; chhaynaqa, yuyariychis qankunaman nisqay imaymanakunata.

13. Yachachiyniytan qorqaykichis, kaytaqmi qankunaman qosqay yachachiyniy— Taytaypa munayninta ruwanaypaqmi pachaman hamurqani, Taytay kachamuwasqanrayku.

14. Taytaytaq kachamuwarqan chakatapi hoqarisqa kanaypaq, chakatapi hoqarisqa kasqay patamantaq llapan runakunata noqaman apamunaypaq; runakunaq hoqarisqan kasqayta hina runakuna Taytaq hoqarisqan kanankupaq, ñawpaqeypi sayanankupaq; allinña, utaq millayña ruwayninku kasqanman hina taripasqa kanankupaq—

15. Kayraykun hoqarisqa karqani; chhaynaqa, Taytaq atiyinman hinan, llapan runakunata noqaman apamusaq, ruwayninkuman hina taripasqa kanankupaq.

16. Hinataq, yuyayninman kutirimuspa sutiypi unuchasqa kaq, hunt'asqa kanqa; tukukuykama takyaqtintaq payta Taytaypa ñawpaqenpi mana ima huchayoqta kachisaq, runakunata taripanaypaq sayanay p'unchawpi.

17. Tukukuykama mana takyaqtaq, payllataqmi wit'usqa kaspa ninaman choqasqa kanqa, manañataqmi chaymanta astawan kutirimuyta atinqakuchu, Taytaq chaninchayninrayku.

18. Kaytaqmi runakunaq wawankunaman Paypa qosqan simi. Kayraykutaqmi qosqan simikunata Pay hunt'an, manataqmi Pay llullakunchu, ichaqa, llapan siminkunatan hunt'an.

19. Manataqmi ima qhelli kaqpas qhapaq suyunman haykuyta atinmanchu; chhaynaqa, manan imapas samariyininman haykunchu, ichaqa, iñiyininkurayku, huchankunamanta kutirimuyninkurayku, tukukuykama iñiysapa kasqankurayku ima yawarniypi p'achankuta maqchiqkunalla.

20. Kunanqa, kaymi kamachiy: Yuyayman kutirimuychis hallp'aq llapan k'uchunkuna, noqaman hamusqpataq sutiypi unuchasqa kaychis, Qollanan Nunaq chaskiyininwan qollanachisqa kanaykichispaq, mana ima qhelliyoq ñawpaqeypi qhepa p'unchawpi sayanaykichispaq.

21. Cheqaqta cheqaqtapunin niykichis, kaymi yachachiyniy; yachankichistaqmi iñeqkuna-huñuyipi ima ruwanaykichiskunata; ruway rikuwasqaykichis ruwaykunallataqmi ruwankichis; ruway

rikuwasqaykichistapunin qankuna ruwankichis.

22. Chhaynaqa, kaykunata ruwankichis chayqa, saminchasqan kankichis; hoqarisqan qhepa p'unchawpi kankichis.

23. Rikusqaykichista uyarisqaykichiskunatawan qelqaychis, hark'asqa kasqallantataq ama.

24. Kay runakunaq ruwayninkunata qelqaychis, chaytaq kanqa, kasqan imaymanakunamanta ña qelqasqa kasqan hinapuni.

25. Qelqasqa kasqan qelqakunamanta, qelqasqa kananmanta-wanmi kay runakuna taripasqa kanqaku, chaykunawanmi paykunaq ruwayninku runakunaq reqsisqan kanqa.

26. Llapan imaymanakunan Taytaq qelqasqan; chhaynaqa, qelqasqa kanan qelqakunamantan runakuna taripasqa kanqaku.

27. Yachaychis kay runakunaq taripasqan kanaykichista, qankunaman taripay qonayman hina, chaytaq chanin kanqa. Hinaqa, imayna hina qharikunan kanaykichis? Cheqaqtapunitaq niykichis—noqa hinapuni, nispa.

28. Kunanqa Taytamanmi risaq. Cheqaqtapunitaq niykichis, imataña Taytamanta sutiypi mañakunkichis chayqa, qankunaman qosqan kanqa.

29. Chhayanaqa, mañakuychis chaskinkichistaq; waqyakuychis kicharisqataq qankunapaq kanqa. Mañakuqqa chaskinmi, waqyakumantaq kicharisqa kanqa.

30. Kunanqa, ancha hatunmi kusikuyniy hunt'ayninkama, qankunarayku, kay runa-mirayraykupiwan; ari, Taytapas kusikunmi, llapan qollanan angelkunapas, qankunarayku, kay runa-mirayraykupiwan; manan mayqenpas chinkasqachu kanku.

31. Hamut'anaykichistan munayman, kunan runa-miraymanta kawsaq kaqkunamantan nini; manataqmi pipas paykunamanta chinkasqachu kanku; paykunapitaq kusikuyniyoch hunt'a kani.

32. Ichaqa, llakichiwanmi kay runa-miraymanta tawakaq runa-mirayrayku; paypa hark'asqa apasqan kanku, waqllisqa churi hina. Qolqerayku, qorirayku suwakuna haykuspa suway atinankurayku, thutaq waqllichisqanrayku iman qhatuwanqaku. Chay p'unchawpitaq paykunamanta watukamusaq, ruwayninkunata paykuna kikinkuq umankuman kutirichispa.

33. Hinataq, kay rimaykunata Jesus tukuqtin, yachachisqankunaman nirqan: k'ikllu punkunta haykuychis; k'ikllun punku, llañutaqmi kawsayman pusaq ñan, chikallantaqmi chayta taringaku; ichaqa, hatunmi punku, p'altataqmi wañuyman pusaq ñan, askhataqmi chayman haykunqaku tuta hamunankama, manataq pipas chaypi llank'ayta atinmanchu.

28 T'AQA

Chunka ishkayniyoqmanta kaq sapanka runaman sonqonkuq munaynin qosqa. Paykunamanta hallp'api qhepanankupaq kinsa akllanku, kusiqellpunpi Wiraqocha hamunankama. Ancha sumaqkunata chay kinsa runakuna rikunku. Paykuna mana wañunankuchu ni ñak'arinankuchu.

1. Hinataq, kay simikunata Jesus niqtin, yachachisqankunaman huk hukmanta rimarirqan: Imatan noqamanta munankichis, Taytaman ripusqay pataman, nispa paykunata nispa.

2. Llapankutaq (kinsallataq mana) rimarirqanku: Runaq kawsayninman hina kawsasqayku pataman, waqyawasqaykiku yachachina tukukuyniyok kaqtin, usqhaylla qhapaq suyuykiman hamunaykutan munayku, nispa.

3. Paytaq paykunata nirqan: Saminchasqan kankichis kayta noqamanta munasqaykichisrayku; chhaynaqa, qanchis chunka ishkayniyoq watayoq kasqaykichis pataman, noqaman qhapaq-suyuyki hamunkichis, noqawantaq samariyta tarinkichis, nispa.

4. Paykunaman rimariqtintaq, kinsa runakunaman kutirispay paykunata nirqan: Imatan qankunapaq ruwanayta munankichis, Taytaman ripuqtiy, nispa.

5. Sonqonkupitaq llakikurqanku, munasqankumanta Payman niyta mana qhariykachasqankurayku.

6. Paytaq paykunata nirqan: Yachanin yuyasqaykichista, manaraq judiokunaq hoqarisqan kashaqtiy ruwayniypi noqawan kaq ancha munasqay Juanpa noqamanta munasqantan munashankichis.

7. Chhaynaqa, aswan saminchasqan qankuna kankichis; mannan hayk'aqpas wañuyta mallinkichischu; ichaqa, runakunaq wawankunaman Taytaq llapan ruwayninkuna rikunaykichispaqmi kawsankichis, Taytaq munayninman hina llapan imaymanakuna hunt'akunankamapuni, hanaqpachaqa atiyinwan kusiqellpuypi hamuqtiy.

8. Manataqmi hayk'aqpas wañuyta nanayninkunata ñak'arin-kichischu; ichaqa, kusiqellpuypi hamuqtiyqa, ñawiq ch'illmiriyinillanpin wañuymanta mana-wañuyman t'ikrasqa kankichis; hinamantaq Taytaypa qhapaq-suyunpi saminchasqa kankichis.

9. Yapamantataq—mana nanayniyoqmi kankichis aychapi tiyanaykichiskama, nitaq llakikuyniyopas, ichaqa, runakunaq huchankunaraykulla. Kay llapantataq ruwasq noqamanta munasqaykichisrayku. Kay pacha kanankama noqaman runakunaq nunankuta apamuytan munarqankichis.

10. Kayraykutaq kusikuyniyok hunt'a kankichis, Taytaypa

qhapaq-suyunpitaq tiyankichis; ari, hunt'an kusikuyniykichis kanqa, noqaman Taytaq qowasqan kusikuy hinapuni; noqa hinapunitaq kankichis, noqataq Tayta hinapuni kani; Tayta noqapiwantaq huklla kayku.

11. Qollanan Nunataq Taytamanta noqamantawan sut'inchan; Taytataq Qollanan Nunata noqarayku runakunaq wawankunaman qon, nispa.

12. Hinataq, kay simikunata Jesus rimariqtin, sapankankuta ruk'ananwan llamirqan, qhepakunanku kaq kinsallataq mana; hinamantaq ripurqan.

13. Hanaqpachataq kicharisqa karqan, paykunataq hanaqpachaman apasqa karqanku, mana-rimay atina imaymanakunataq rikurqanku, uyarirqankupiwan.

14. Rimanankupaq hark'asqataq karqanku; manataqmi paykunaman qosqachu atiy karqan, rikusqanku uyarisqankupiwan imaymanakunamanta rimanankupaq.

15. Runa-kurkunkupichu ichari manachu runa-kurkunkupi kasqankutaqa manan niyta atirqankuchu; paykunaq llihipipisqa hinan paykunaman rikch'akurqan, kay aycha runa-kurkumanta mana wañuqman t'ikrasqa hina, Yayaq imaymanankuna rikuy atinankupaq.

16. Ichaqa, yapamantan hallp'a patapi yachachirqanku; chaypiwanpas manan uyarisqankumantachu, nitaq rikusqankumantawanchu yachachirqanku, hanaqpachapi paykunaman kamachiy qosqa kasqanrayku.

17. Kunanqa, wañuqchu ichari mana wañuqchu karqanku llihipipisqa kasqankumanta chaytaqa manan yachanichu.

18. Ichaqa, kaytan yachani qosqa kasqa qelqaman hina—hallp'a patantan rirqanku, llapan runakunamantaq yachachirqanku; yachachiyninkupi llapan kreyiqkunata iñeqkuna-huñuman huñuspanku, paykunata unuchaspanku; llapan unuchakuqkunataq Qollanan Nunata chaskirqanku.

19. Iñeqkuna-huñumanta mana kaqkunataq watana wasiman paykunata churarqanku. Manataq watana wasikuna paykunata hark'ayta atirqankuchu, ishkaypi ch'eqtakusqankurayku.

20. Hallp'a ukhuman churasqataq karqanku; ichaqa, Yayaq rimayninwanmi hallp'ata k'irirqanku, hinataq Yayaq atiyinwan hallp'a ukhumanta qespichisqa karqanku; chhaynataq, paykuna hark'ananpaq hina t'oqokunata mana hasp'iyta atirqankuchu.

21. Kinsa kutitaq hornuman choqasqa karqanku, manataq k'iriyta chaskirqankuchu.

22. Ishkay kuti salqa uywakunaq wasinman choqasqa karqan-

ku, paykunataq salqa uywakunawan pukllarqanku, uña ovejawan erqeq pukllasqanta hina, manataq k'irisqachu karqanku.

23. Hinataq, Nephiq llapan runankuna purapi purirqanku, hallp'a patapi llapan runakunamantaq Cristoq yachachiyninta yachachirqanku; runakunataq Wiraqochaman t'ikrakurqanku, Cristoq iñeqkuna-huñunman huñunakuspanku. Khaynatataqmi chay runa-miraypa runankuna saminchasqa karqanku, Jesuspa rimayninman hina.

24. Kunantaq noqa Mormon kay imaymanakunamanta rimayta tukuni, huk pachallaqa.

25. Mana hayk'aqpas wañuyta malliqkunaq sutinkuta qelqanaypaqñan kasharqani, ichaqa, Wiraqochan hark'awarqan; chhaynaqa, manan qelqanichu, runakunamanta pakasqan kanku.

26. Ichaqa, rikurqanin paykunata, serviwarqankutaqmi.

27. Hawarunakuna chawpipin kanqaku, manataq paykunata hawarunakuna reqsinqakuchu.

28. Judiokuna chawpipipas kanqakun, manataq paykunata judiokuna reqsinqakuchu.

29. Hinataq, yachaysapa kayninpi allin kasqanta Wiraqocha rikuqtin, Israelpa ch'eqerisqa llapan t'aqankunaman yachachinqaku, llapan llaqtakunaman, ayllukunaman, simikunaman, runakunamanwan; paykunamantataq askha nunakunata Jesusman apamunqaku, munasqanku hunt'anankupaq, konbensinapaq Yayaq atiyin paykunapi kasqanraykupiwan.

30. Yayaq angelninkuna hinan kanku, Jesuspa sutinpi Taytaman paykuna rimarinkuman chaytaq, paykuna kikinku qhawachikunkuman, paykunaman allin rikhurisqanpi runamanpas.

31. Chhaynaqa, ancha hatun ancha sumaq ruwaykunan paykunaq ruwasqan kanqa, Cristoq taripanan-tiyananpa ñawpaqenpi runakuna sayanankupaq hamuq hatun p'unchwapa ñawpaqinta.

32. Ari, hawarunakuna purapipas ancha hatun ancha sumaq ruwaymi paykunaq ruwasqan kanqa, chay taripana p'unchwapa ñawpaqenta.

33. Cristoq llapan ancha sumaq ruwayninkunamanta rimaq llapan qelqakunayoq kawaqchis chayqa, yachawaqchismi Cristoq rimayninman hina kay imaymanakuna cheqaqtapuni wakinanta.

34. Ay! Jesuspa rimayninkunata, Paypa akllasqanta, paykunaman kachasqanpa rimayninkunatawan mana uyariy munaqmanta. Jesuspa rimayninkunata, Paypa kachasqanpa rimayninkunatawan mana chaskiy munaqkunaqa, manan Payta chaskinkuchu; chhaynaqa, manan paykunata qhepa p'unchwapi Pay chaskinqachu.

35. Aswan allinmi paykunapaq kanman karqan mana paqari-

nanku. Qespiy hamunanpaq runakunaq saruykachasqan phiñari-chisqa Yayaq phiñakuyninmanta lloqsiytachu yuyarqankichis?

36. Kunantaq Wiraqochaq akllasqan runakunamanta rimasqayta; ari, hanaqpachaman apasqa kinsamantapuni; manan yachanichu, wañuymanta mana-wañuyman ch'uyanchasqachus kasqankuta.

37. Ichaqa, qelqasqaymantapachaqa Wiraqochatan tapurqani, Paytaq yachachiwarqan, runa-kurkunkupi huk t'ikray kananta, mana chayqa wañuytan mallinanku.

38. Chhaynataq, wañuyta mana mallinankupaq runa-kurkunkupi huk t'ikray ruwasqa karqan; mana nanayniyoq ni llakikuyniyoqpas kanankupaq, ichaqa, runakunaq huchankunaraykulla.

39. Kay t'ikrayqa manan qhepa p'unchawpi kanan t'ikrayman hinachu karqan; ichaqa, paykunapi ruwasqan huk t'iray karqan; hinataq saqraqa mana paykunapi atiyniyoq kayta atinmanchu, paykunata mana wateqananpaq. Aychapi qollanachisqan karqanku, chanintaq karqanku; hallp'aq atiyinkunataq mana paykunata hap'iyta atirqanchu.

40. Khayna kaypin paykuna qhepananku karqan, Cristoq tari-paynin p'unchawkama; chay p'unchawpitaq aswan hatun t'ikrayta chaskinanku karqan, Taytaq qhapaq-suyunpi chaskisqa kanankupaq, manaña astawan lloqsinankupaq; ichaqa, hanaqpachapi Yayawan wiñaypaq tiyanankupaq.

29 T'AQA

Mormonpa anyaynin, Wiraqochaq rimayninkunata ruwayninkunatawan pisi-chaqkunaman.

1. Kunanqa qankunata niykichis, yachaysapa kayninpi Wiraqocha allin kasqanta rikuqtin, kay rimaykuna rimayninman hina hawarunakunaman hamunqa; chaymi qankuna yachanaykichis, chaskikuyninku hallp'aman yapamanta churasqa kanankumanta Israelpa wawankunawan Taytaq rimanakuynin hunt'akuytaña qallarisqanta;

2. Qollanan unanchaqkunaq rimasqanku Wiraqochaq rimayninkuna llapan hunt'akunanta yachanaykichispaqwan; manataqmi ninaykichischu—Israelpa wawankunamanta watukuyninta Wiraqocha unayyachin nispaqa.

3. Manataqmi sonqoykichispi yuyayta nesitankichischu, yanqapaqmi karqan rimasqan rimaykuna, nispa; yuyaringan Wiraqocha, Israelpa wasinpa llaqtanwan rimanakusqanta.

4. Qankuna puraman kay rimaykuna hamusqanta rikuspaykichisqa, manañan astawan nesitankichischu Wiraqochaq ruwayninkuna pisichayta; paña makinpin chaninchayninpa q'anchinan kashan. Haqay p'unchawpi ruwayninkunata pisichankichis chayqa, usqhayllan qankunaman aypachimusunkichis.

5. Ay, Wiraqochaq ruwayninkuna alqochaq runamanta; ari, ay Cristota ruwayninkunatawan mananchaq runamanta!

6. Ari, ay Wiraqochaq rikuchiyninkunata mananchaq runamanta—Wiraqochaqa manañan rikuchiyninkunawan, unanchaykunawan, qoykunawan, simikunawan, alliyachiyninkunawan, utaq Qollanan Nunaq atiyinwanpas llank'anñachu niq runamanta!

7. Ari, ay haqay p'unchawpi mirachikuyniyuq kananraykumanan ima milagropas Jesucristoq ruwasqanqa kanmanchu, nispa niq runamanta. Khayna ruwaq runaqa waqllisqa churi hinan wakinqa, manataq khuyapakuy paypaq karqanchu Cristoq rimayninman hina!

8. Ari, manañan astawan judiokunata nitaq Israelpa wasinpa puchuntapas pisichayta, alqochayta ni cheqniytapas nesitankichisñachu; Wiraqochaqa yuyarinmi paykunapaq rimanakuyninta; paykunapaqtaq ruwanqa jurasqanman hina.

9. Chhaynaqa, manan Wiraqochaq paña makinta lloq'e qayllaman t'ikrayta atinaykichista yuyanaykichischu, Israelpa wasinwan rimanakusqanta hunt'anapraq chaninchayta mana llank'a-chinanpaq.

30 T'AQA

Yuyayninkuman kutirimunankupaq hawarunakunata Mormon waqyan.

1. Rinrichakuychis hawarunakuna, uyariychistaq kawsaq Yayaq Churin Jesucristoq rimayninta; kaytataq Pay kamachimuwarqan qankunamanta rimarinaypaq; khayna qelqanaypaqmi Pay kamachiwan:

2. Llapan hawarunakuna millay ñanniykichismanta kutiriychis; yuyayniykichisman kutiriychis millay ruwayniykichiskunamanta, llullakuyniykichiskunamanta, yukanaykichiskunamanta, map'akuyniykichiskunamanta, pakallapi millay-millanaykichiskunamanta, waka much'anaykichiskunamanta, runa-wañuchinaykichiskunamanta, millay-kurak kayniykichiskunamanta, munapakuyniykichiskunamanta, churanakuyniykichiskunamanta, llapan millay ruwayniykichiskunamanta, millay-millanaykichiskunamantawan; noqamantaq hamuychis, sutiypitaq unuchakuychis huchaykichiskuna panpachayta chaskinaykichispaq; Qollanan Nunawan hunt'a ka-

4 NEPHI

naykichispaq, Israelpa wasinmanta kaq Ilaqtaywan yupasqa kanaykichispaq, nispa.

TAWAKAQ NEPHI NEPHIQ QELQAN

NEPHIQ CHURIN
JESUCRISTOQ YACHACHISQANKUNAMANTA HUKNIN KAQ

Qelqanman hina Nephiq Ilaqtanpa willaynin.

Cristoq Iñeqkuna-huñun t'ikarin. Nephitakuna lamanitakunapiwan iñeqmasikuna tukunku. Llapan tukuy imaymanakunata rakinakunku. Ishkay pachak wata chanin kayman, t'aqanakuy waqlliypiwan qatin. Amos Ammaronpiwan qelqakunata hap'inku.

1. Hinataq, kinsa chunka tawayoq wata tukukurqan, kinsa chunka pishqayoqpas; Jesuspa yachachisqankunataq Cristoq iñeqkuna-huñunta hatarichirqanku, muyureqnintin hallp'api. Paykunaman hamuspa cheqaqtapuni huchankunamanta kutirimuqkunataq Jesuspa sutinpi unuchasqa karqanku, Qollanan Nunatawantaq chaskirqanku.

2. Kinsa chunka soqtayoq watapitaq hallp'antinpi llapan runakuna Wiraqochaman t'ikrakurqanku, nephitakunapas, lamanitakunapas; manataq ima maqanakuy pas ni churanakuy pas paykuna purapi karqanchu, sapanka runataq chaninta runamasinwan imatapas ruwarqan.

3. Llapan tukuy imaymanakunataq hukllapi paykuna purapi kachirqanku; hinataq, mana qhapaqpas ni wakchapas, ni hark'asqapas, ni qespipas karqanchu; ichaqa, llapankun qespi qarqanku, hanaqpacha qoymanta malliqkuna.

4. Hinataq, kinsa chunka qanchisniyoq watapas tukukullarqantaq, qatillarqantaq hallp'api qasi kawsay kay.

5. Ancha hatun ancha sumaq ruwaykunataq Jesuspa yachachisqankunaq ruwasqan karqan; hinataq, onqoqkunata alliyachirqanku, wañusqakunata hatarichirqanku, weqrukunata purichirqanku, ñawsakuna rikuyninkuta chaskirqanku, upakuna uyarirqanku. Imaymana milagrokunatan paykuna ruwarqanku runakunaq wawankunaq chawpinpi, manataq imapipas milagrokunata ruwarqankuchu, ichaqa Jesuspa sutillanpi.

6. Hinataq, kinsa chunka pusaqniyoq wata tukukurqan, hinallatataq kinsa chunka isqonniyoqpas, tawa chunka hukniyoqpas,

4 NEPHI

tawa chunka ishkayniyoqpas; ari, tawa chunka isqonniyoq tukukunankama, pishqa chunka hukniyoqpas, pishqa chunka ishkayniyoqpas; ari, pishqa chunka isqonniyoq wata tukukunankama.

7. Anchatapunitaq hallp'api paykunata Wiraqocha qhapaqyachirqan; hinataq, Ilaqtakunata yapamanta ruwarqanku, kanasqa Ilaqtakunaq kasqanpi.

8. Ari, chay hatun Zarahemla Ilaqtatapas yapamantan ruwachirqanku.

9. Ichaqa, askha Ilaqtakunan chinkayurqan, unukunataq chaykunaq rantinta hamurqan; chayraykutaq chay Ilaqtakunaqa mana mosoqyachisqa kayta atikurqanchu.

10. Hinataq, Nephiq Ilaqtan kallpachakurqan, usqhayllataq mirarqanku, ancha sumaq munay Ilaqtataq wakirqanku.

11. Sawakurqankutaq, sawakuypi qosqataq karqanku; saminchasqataq karqanku, Paykunapaq Wiraqochaq ruwasqan ancha askha promesankunaman hina.

12. Manañataqmi purirqankuchu Moisespa kamachisqa-simipawa warachikuyninkunaman, qollanan-ruwanankunamanwan hinaqa; ichaqa, Wiraqochankumanta, Yayankumanta chaskisqanku kamachiykunaman hinan purirqanku, sasiypi, yayaman-rimarikuy-piwan qatispa; yayaman-rimarikunankupaq, Wiraqochaq rimaynin uyarinankupaqwantaq pasaqlla huñunakuspaku.

13. Hinataq, mana ima maqanakuyipas llapan runakuna purapi karqanchu, lliw hallp'antinpi; ichaqa, ancha hatun milagroknanan ruwasqa karqan Jesuspa yachachisqankunapurapi.

14. Hinataq, qanchis chunka hukniyoq wata tukukurqan, qanchis chunka ishkayniyoq watapas, ari, qanchis chunka isqonniyoq wata tukukunankama; ari, pachak watapas tukukurqanmi, Jesuspa akllasqan yachachisqankunataq llapanku Yayaq kusipawqar-ninman rirqanku, qhepanankupaq kinsa yachachisqakunallataq mana. Hukkunataq paykunaq rantinta churasqa karqanku, chay miraymantapas askhan wañurqan.

15. Hinataq, mana ima churanakuypas hallp'api karqanchu, runakunaq sonqonkupi Yayaq munakuynin kasqanrayku.

16. Manataq ima munapakuykunapas, churanakuykunapas, ni ima qotunakuykunapas ni map'akuykunapas, ni llullakuykunapas, ni runa wañuchiykunapas ni ima aychakaq munapakuykunapas karqanchu. Cheqaqtapuniqa, manan aswan kuisamiyoq Ilaqtaqa kanmanchu Yayaq makinpa kamasqan llapan runakuna purapiqa.

17. Manan suwakuna karqanchu, ni runa wañuchi-qkunapas; manataq lamanitakunapas ni ima laya -itakunapas karqanchu;

4 NEPHI

hukllapin karqanku Cristoq wawankuna, Yayaq qhapaq-suyun chashkiqkuna.

18. Hayk'a saminchasqan karqanku! Llapan ruwayninkupin paykunata Wiraqocha samincharqan; ari, saminchasqan karqanku, t'ikarirqankutaq pachak chunkayoq wata tukukunankama. Cristomanta ñawpaq kaq miraytaq tukukurqan; manataq ima churanakuypas hallp'antinpi karqanchu.

19. Kay qhepa qelqakuna waqaychaq, Nephiq raphinkunapi qelqaq Nephi wañurqan, churin Amostaq paypa rantinta qelqakunata waqaycharqan; paypas Nephiq raphinkunapin qelqarqan.

20. Kaytataq pay waqaycharqan pusaq chunka tawayoq wata, kallaraqantaqmi hallp'api qasi kawsay; runakunamanta huk chikallantaq iñeqkuna-huñumanta t'aqakurqanku, paykunataq lamanita sutita churakurqanku; chhaynataq yapamanta lamanitakuna hallp'api kayta qallarirqan.

21. Amospas wañurqanmi (Cristoq hamusqanmantataq pachak isqon chunka tawayoq wata karqan), churin Amostaq paypa rantinta qelqakunata waqaycharqan; paypas Nephiq raphinkunapin qelqarqan; Nephiq qelqanpi imataq qelqasqa karqan, chaytaq kay qelqa.

22. Hinataq, ishkay pachak wata tukukurqan; ishkay kaq miraytaq wañurqan, huk chikallantaq mana.

23. Kunantaq noqa Mormon yachanaykichista munayman, runakuna mirasqankuta, hinaspa lllapan hallp'antinpi mast'arikurqankuta, ancha qhapaqtaq wakisqankuta, Cristopi hatunyayninkurayku.

24. Kunantaq kay ishkay pachak hukniyoq watanpi paykuna purapi anchayaypi hoqarikuqkuna kayta qallarirqan, ancha channiniyoq p'achayukuypi, imaymana laya sumaq umiñakunawan, pachaq ancha sumaq imaymanankunapiwan.

25. Chay pachamantapachataq manaña astawan hukllapichu kapuqninkunata mikhuyninkunatawan kachirqanku.

26. Sanakunapi t'aqanakuyta qallarirqanku; qolqeyoq kanan-kupaqtaq paykuna kikinkupaq iñeqkuna-huñukunata hatarichiyta qallarirqanku; Cristoq cheqaq iñeqkuna-huñuntataq mananchayta qallarirqanku.

27. Hinataq, ishkay pachak chunkayoq wata tukukuqtin, hallp'api askha iñeqkuna-huñukuna karqan; ari askha iñeqkuna-huñukunan karqan Cristo reqseq nikuqkuna, yachachiyinpa aswan askha partenkunataq manancharqanku; hinataq, imaymana laya millay ruwaykunata chaskirqanku, qollanan kaqtataq millay kasqankurayku hark'asqa kaqkunaman qoqku.

4 NEPHI

28. Kay iñeqkuna-huñutaq waputapuni mirayta qallarirqan, millay ruwaykunarayku, sonqonkumanta allinta hap'ipakuq saqraq atiyinrayku ima.

29. Karqantaqmi Cristo mananchaq iñeqkuna-huñu, Cristoq cheqaq iñeqkuna-huñuntataq qatikacharqanku, llanp'u sonqo kasqankurayku, Cristopi kreyisqankuraykupiwan; paykunatataq cheqnikurqanku, paykuna purapi askha milagrokuna ruwasqa kasqanrayku.

30. Hinataq, paykunawan kaq Jesuspa yachachisqankunapi kallpata atiytawan llank'achirqanku, watana wasikunamantaq paykunata churarqanku; ichaqa paykunapi kaq Yayaq rimayninpa atiyinwan, watana wasikuna ishkaypi ch'eqtakurqanku, paykuna purapi ancha hatun milagrokunata ruwaspataq purirqanku.

31. Chaypiwanpas, kay llapan milagrokunaña karqan chaypas, sonqonkutan runakunaqa rumiyachirqanku; yachachisqakuna sipiytataq mashkarqanku, Jerusalenpi judiokuna Jesusta sipiyta munasqankuta hina, Paypa rimayninman hina.

32. Nina hornokunaman paykunata choqarqanku, mana ima k'iriyotaq paykuna lloqsimurqanku.

33. K'ita uywakunaq wasinmanpas choqarqankun paykunata, chay k'ita uywakunawantaq paykunaqa pukllarqanku, uña ovejawan erqeq pukllasqanta hina; chay uywakuna chawpimantataq lloqsimurqanku mana ima k'irita chaskispa.

34. Chaypiwanpas, sonqonkuta runakuna rumiyachirqanku; askha kurakkunaq, mana cheqaq unanchaqkunaq ima pusasqan kspanku, askha iñeqkuna-huñukuna hatarichinankupaq, imaymana laya millaykunata ruwanankupaqwan. Jesuspa runankunataq maqarqanku, ichaqa Jesuspa llaqtanqa manan chay maqaykunata kutichirqankuchu. Khaynatan mana kreyiypi, millay ruwaykunapiwan urmarqanku watamanta wataman, ishkay pachak kinsa chunka wata tukukunankama.

35. Hinataq, kay watapi, ari, ishkay pachak kinsa chunka hukniyoq watapi, ancha hatun t'aqanakuy runakuna purapi karqan.

36. Hinataq, kay watapi huk llaqta hatarirqan, nephitakuna nispa waqyasqakuna; Cristopi cheqaqpuni iñeqkun paykuna karqanku, paykuna chawpipitaq lamanitakunaq waqyasqan karqan—jakobitakuna, josefitakuna, zoramitakunapiwan.

37. Chhaynataq, Cristopi cheqaq kreyiqkuna, Cristota cheqaq yupaychaqkuna (paykuna chawpipitaq karqan qhepakunankupaq kaq Jesuspa yachachisqankuna) nephitakuna, jakobitakuna, josefitakuna, zoramitakunapiwan nispa waqyasqa karqanku.

38. Yayaq yachachiyninkuna mana munaqkunataq, lamanita-

4 NEPHI

kuna, lemuelitakuna, ismaelitakunapiwan waqyasqa karqanku. Manan paykunaqa mana kreyiypichu urmarqanku, ichaqa munaspankun Cristoq yachachiynin kontra ankallikurqanku, wawan-kunataq yachachirqanku mana kreyinankupaq, qallariymantapacha mana kreyiypi urmaq taytanku hina.

39. Taytankunaq millay ruwayninkurayku, millay-millanankurayku imataq kay karqan, qallariypi kasqan hinapuni. Yayaq wawankuna cheqninankupaq yachachisqataq karqanku, qallariymantapacha Nephiq wawankunata cheqnikunankupaq lamanitakuna yachachisqa kasqankuta hina.

40. Hinataq, ishkay pachak tawa chunka tawayoq wata tukukurqan, khaynataq runakunaq ruwayninkuna karqan. Runakunaq aswan millay kaqkunataq kallpasapa karqanku, Yayaq llaqtanmanta aswan askhataq wakirqanku.

41. Paykuna kikinkupaq iñeqkuna-huñukunata hatarichiyta qatillarqanku, imaymana sumaq imaymanakunawantaq chayta achalarqanku. Khaynatataq ishkay pachak pishqa chunka wata, ishkay pachak soqta chunka watapas tukukurqan.

42. Hinataq, runakunaq millay kaqninkuna Gadiantonpa pakallapi juraykunata allchanakuyninkunata ima yapamanta hatari-chiyta qallarirqanku.

43. Nephiq llaqtan nispa waqyasqa runakunapas sonqonkupi anchayayan qallarirqanku, ancha askha qhapaqyayninkunarayku; wawqenku lamanitakuna hinataq yanqa-yanqa wakirqanku.

44. Kay pachamantapachataq runakunaq huchankunaryaku, yachachisqakuna llakikuyta qallarirqanku.

45. Hinataq, kinsa pachak wata tukukuqtin, nephitakunapas, lamanitakunapas, huk hukkaq hina ancha millaypuni wakipurqanku.

46. Gadiantonpa suwankunataq hallp'antimpi mast'arikurqanku, manataq pipas chanin runa karqanchu, ichaqa Jesuspa yachachisqankunalla. Ashkhatapunitaq qorita, qolqetawan waqaycharqanku, imaymana laya qhatukuykunapitaq purirqanku.

47. Hinataq, kinsa pachak pishqayoq wata tukukuqtin Amos wañurqan (runakunataq millay kayllapi karqanku); wawqen Ammarontaq paypa rantinta qelqakunata waqaycharqan.

48. Kinsa pachak ishkay chunka wata tukukuqtintaq, Ammaronqa, Qollanan Nunaq kamachisqan kaspá, qollanan qelqakunata pakarqan; ari, miraymanta mirayman haywasqa qollanan qelqakunata, Cristoq hamusqanmanta kinsa pachak ishkay chunka watakama.

49. Paytaq chay qelqakunata Wiraqochapaq pakarqan, Jakob-

MORMON 1

pa wasinpa puchunman yapamanta hamunanpaq, unanchaykunanaman, Wiraqochaq promesankunamanwan hina. Khaynan Ammaronpa qelqanpa tukukuynin.

MORMONPA QELQAN

1 T'AQA

Ammaron Mormonman rimarin qollanan qelqakunamanta. Awqanakuy, millay ruwaykunapiwan. Nephitakunamanta kinsa yachachisqakuna ripunku. Yachachinanmanta Mormon hark'asqa. Abinadiq unanchayninkuna, Lamanita Samuelpa unanchayninkunapiwan hunt'akun.

1. Kunantaq noqa Mormon huk willayta qelqani, rikusqaymanta uyarisqaymantawan, Mormonpa Qelqan nispataq waqyani.

2. Wiraqochapaq qelqakunata pakasqan pachapi hinataq Ammaron noqaman hamurqan (noqataq chunka watayoq hinalla karqani, llaqtaypa yachayninman hinataq huk chikan yachayniyoq kayta qallarirqani), Ammarontaq niwarqan: Rikushanin allin yuyayniyoq kasqaykita, qhawanaykipaq k'uchi erqe kasqaykita.

3. Chhaynaqa, ishkay chunka tawayoq watayoq hina kaqtiyki, kay runakunamanta rikusqayki imaymanakunata yuyarinaykita munayman; chhayna watayoq kaspaykitaq Antum hallp'aman riy, Shim nispa waqyasqa kanqa chay orqoman; chaypin Wiraqochapaq pakarqani kay runakunamanta llapan qollanan qelqakunata.

4. Nephiq raphinkunata horqonki, wakintataq chay kasqallanpi saqenki; Nephiq raphinkunapitaq qelqanki, kay runakunamanta llapan rikusqayki imaymanakunata, nispa.

5. Noqa Mormontaq, Nephiq ch'awchun karqani (taytaya sutintaq Mormon karqan), yuyarirqanitaq Ammaronpa niwasqan imaymanakunata.

6. Hinataq, chunka hukniyoq kashaqtiy, qheparina hallp'aman taytay apawarqan Zarahemla hallp'amanpuni.

7. Tukuy hallp'antintaq wasikunawan pakasqa karqan, runakunataq yaqaraq mamaqochaq aqonkuna hina karqanku.

8. Hinataq, kay watapi awqanakuy kayta qallarirqan, nephitakuna purapi purapi—paykunataq karqanku nephitakuna, jakobitakuna, josefitakuna, zoramitakunapiwan—chay awqanakuytaq karqan nephitakuna lamanitakunawan, lemuelitakunawan, ismaelitakunapiwan.

9. Lamanitakuna, lemuelitakuna, ismaelitakunapiwanqa lamanitakuna nispan waqyasqa karqanku; ishkaynin t'aqakunataq karqanku nephitakuna lamanitakuna ima.

MORMON 4

10. Hinataq, awqanakuyqa paykuna purapi qallarirqan Zarahemla hallp'aq kantunpi, Sidon unukunaniqpi.

11. Nephitakunataq huñusqaku karqan ancha askha runakunata, kinsa chunka waranqamanta aswantaraq; kay kikin watapitaq askha maqanakuykuna karqan, chaypitaq nephitakunaqa lamanitakunata atiparqanku, askhatataq paykunamanta wañuchirqanku.

12. Hinataq, lamanitakunaqa yuyakusqankuta qonqapurqanku, qasi kawsaytaq hallp'api karqan. Qasi kawsaytaq yaqa tawa wata hallp'api karqan, manataqmi yawar sut'uchiy karqanchu.

13. Ichaqa, lliw hallp'antinpin millay ruway karqan, chayraykutaq Wiraqochaqa ancha munasqan yachachisqankunata horqorqan; milagro ruwaykuna, alliyachiyaq imataq tukukapurqan, runakunaq millay-kayninkurayku.

14. Manataq ima qoykunapas Wiraqochamanta karqanchu, manataq pimanpas Qollanan Nuna hamurqanchu, millay ruwayninku, mana kreyininkuraykupiwan.

15. Noqataq chunka pishqayoq watayoq karqani, allin yuyayniyoq kaqtiyaq Wiraqochaq watukusqan karqani, Jesuspa sumaq-kayninmantataq mallirqani yacharqani ima.

16. Kay runakunaman yachachinaypaqtaq kallpachakurqani, ichaqa, wishq'asqan simiy karqan, paykunaman yachachinaypaqtaq hark'asqa karqani; munaspankun Yayanku kontra ankallikusqaku karqan; ancha munasqa yachachisqakunataq kay hallp'amanta horqosqa karqanku, runakunaq millay ruwayninkurayku.

17. Ichaqa, paykuna purapin qheparqani, hark'asqataq karqani paykunaman yachachinaymanta, sonqonkuq rumiyayninrayku; rumi sonqonkuraykutaq hallp'a ñakasqa karqan, paykunarayku.

18. Lamanitakuna purapi kaq Gadiantonpa suwankunataq hallp'api hunyarqanku, chayraykutaq qhapaqyayninkunata panpapi pakayta runakuna qallarirqanku, chay qhapaqyaykunataq ilushk'ayarqan hallp'ata Wiraqocha ñakasqanrayku; chhaynataq paykunaqa mana qhapaqyayninkuta hap'iyta ni yapamanta qhepachiytapas atirqankuchu.

19. Hinataq, watuykuna, layqakuykuna, wahiykunapiwan karqan; saqraq atiyintaq llapan: hallp'antinpi karqan, Abinadiq, Lamanita Samuelpa ima rimayninku hunt'akunanpaq.

4 T'AQA

Nephitakuna aynikuy maqanakuyta lamanitakuna kontra qallarinku. Nephitakuna manaña astawan atipankuñaachu. Shim orqomanta qollanan qelqakuna horqosqa.

1. Hinataq, kinsa pachak soqta chunka kinsayoq watapi, nephitakuna awqasuyunkunawan Ch'in hallp'amanta rirqanku lamanitakuna kontra maqanakunankupaq.

2. Nephitakunaq awqasuyunkunataq, yapamanta Ch'in hallp'aman kutichimusqa karaqanku. Sayk'usqaraq kashaqtinkutaq, paykuna pataman lamanitakunamanta mana sayk'usqa awqasuyu hamurqan; ancha millay awqanakuytaq karqan, hinataq lamanitakuna Ch'in llaqtata hap'ikurqanku, askhata nephitakunata wañuchirqanku, askha piñaschasqa runakunatawantaq hap'ikurqanku.

3. Puchuq nephitakunataq ayqekurqanku, Teankum llaqtaq runankunawantaq huñunakurqanku. Teankum llaqtaqa mamaqochacha patapin karqan, Ch'in llaqtaq sispayuyninpi imataq karqan.

4. Lamanitakunaman nephitakunaq awqasuyunkuna risqankuraykun atipachikuyta qallarirqanku; mana chay hinachu kanman karqan chayqa, manan lamanitakunaqa paykunapi atiyniyoqchu kankuman karqan.

5. Ichaqa, Yayaq taripayninkunan millay ruwaqkunata atipanqa; millay ruwaqwantaqmi millay ruwaq muchuchisqa. Millay ruwaqkunawan yawar sut'uchiyman runakunaq wawankuq songonkuta phiñarichinku.

6. Hinataq, Teankum llaqta kontra hamunankupaq lamanitakuna alistakurqanku.

7. Kinsa pachak soqta chunka tawayoq watapi Teankum llaqta kontra, lamanitakuna hamurqanku, Teankum llaqtatapas hap'ikunankupaq.

8. Nephitakunaq qarqosqan kutichisqantaq lamanitakuna karaqanku. Lamanitakunata qarqosqankuta rikuspankutaq kallpankumanta nephitakuna alabakurqanku; paykuna kikinkuq tukuy kallpankuwan rispataq, yapamanta Ch'in llaqtata hap'ikapurqanku.

9. Kaykunataq ruwasqa karqan, waranqa-waranqakunataq ishkaynin qayllapi wañuchisqa karaqanku, nephitakuna purapipas, lamanitakuna purapipas.

10. Hinataq, kinsa pachak soqta chunka soqtayoq wata pasargan, lamanitakunataq yapamanta nephitakuna kontra maqanakuq hamurqanku; chaypiwanpas, manan millay ruwasqankumantata nephitakuna kutirimurqankuchu, ichaqa, pasaqlan millay ruwaykuna ruwaypi atipakurqanku.

11. Manataqmi simi willayta atinmanchu, ni runapas hunt'atapuni qelqayta, yawar sut'uchiyman, wañuchinakuymantawan imayna millaypuni runakuna purapi kasqanta, nephitakuna purapipas, lamanitakuna purapipas. Sapanka songon rumiyasqa karqan, hinataq pasaqla kusikurqanku yawar sut'uchiypi.

MORMON 4

12. Manataqmi Wiraqochaq rimayninman hina, Lehiq llapan wawankuna chawpipi chay hina hatun millay ruwaykuna karqanchu, manan Israelpa llapan wasin purapipas karqanchu kay runakuna purapi hinaqa.

13. Hinataq, Ch'in llaqtata lamanitakuna hap'ikurqanku, kaytaq karqan, nephitakunamanta aswan askha kasqankurayku.

14. Teankum llaqta kontrapas rirqankun, runakunataq chaymanta qarqorqanku, askhatataq piñaschasqa runata hap'irqanku, warmitapas erqekunatapas; yaya rikch'ayninkumantaq paykunata arpayta hina munachirqanku.

15. Hinataq, kinsa pachak soqta chunka qanchisniyoq watapi, warminkuta wawankunatawan lamanitakuna munachisqankurayku nephitakuna phiñarikuspanku, ancha hatun phiñarikuywan lamanitakuna kontra rirqanku, hinaspataq lamanitakunata yapamanta atiparqanku, hallp'ankunamantataq qarqorqanku.

16. Kinsa pachak qanchis chunka pishqayoq watakamataq lamanitakunaqa mana yapamanta nephitakuna kontra hamurqankuchu.

17. Kay watapitaq nephitakuna kontra llapan kallpankuwan urayamurqanku; manataqmi yupasqachu karqanku, sinchi askha-puni kasqankurayku.

18. Kay pachamantapachataq nephitakunaqa mana lamanitakunata atiparqankuñachu; ichaqa, paykunaq pichasqan kaytan qallarirqanku, intiq ñawpaqenpi shulla hina.

19. Hinataq, Ch'in llaqta kontra lamanitakuna urayamurqanku; ancha millay maqanakuytaq karqan Ch'in hallp'api, chaypitaq nephitakunata atiparqanku.

20. Ñawpaqenkuta yapamanta ayqekuspankutaq Boaz llaqtaman hamurqanku; chaypitaq lamanitakuna kontra qharillaña sayapakurqanku; chhaynataq, lamanitakunaqa mana nephitakunata atiparqankuchu, ichaqa, ishkay kuti hamuqtinkuña.

21. Ishkay kuti hamuqtinkutaq nephitakunaqa qarqosqa, ancha hatun wañuchiywan sipisqapiwan karqanku. Warminku, wawankunapiwantaq yapamanta rikch'aykunaman apasqa karqanku.

22. Hinataq, ñawpaqenkumanta nephitakuna ayqekurqanku, hatun llaqtakunapi, huch'uy llaqtakunapipas kaq llapan runakunata paykunawan apayukuspanku.

23. Kunantaq noqa Mormon, hallp'ata hap'ikunankupaq hinaña lamanitakuna kasqankuta rikuspa, Shim orqoman rirqani; Wiraqochapaq Ammaronpa pakasqan llapan qelqakunataq horqorqani.

MORMON 6

6 T'AQA

Kumorah moqo qelqakunapiwan. Ishkaynin llaqtakunaq qhepa kaq awqanakuyninku. Lamanitakuna atipaqquna kanku. Ishkay chunka tawayoq nephitakuna mana wañuchisqachu kanku.

1. Kunanqa, tukunin qelqayta, nephita llaqtaypa chinkachisqa kasqankumanta. Hinataq lamanitakunaq ñawpaqenta purirqayku.

2. Noqa Mormontaq, lamanitakunaq inkankuman huk qelqata qelqarqani, paymantataq munarqani Kumorah hallp'api, Kumorah nispa waqyasqa moqopi llaqtaykuta huñunaykupaq kachariwanankupaq; chaypi paykunawan awqanakunaykupaq.

3. Hinataq, lamanitakunaq inkan munasqayta qowarqan.

4. Kumorah hallp'amantaq purirqayku, Kumorah moqoq muyurinqinipitaq karpaykuta hatarichirqayku; kaytaq karqan askha unukunayoq, mayukunayoq, pukyukunayoq ima hallp'api; kaypitaq suyakuyniyoy karqayku lamanitakuna atipanaykupaq.

5. Kinsa pachak pusaq chunka tawayoq wata tukukuqtintaq, llaqtaykuq llapan puchunta huñurqayku Kumorah hallp'api.

6. Hinataq, hukllapi llapan runaykuta Kumorah hallp'api huñuqtiyku, noqa Mormon machuyayta qallarirqani. Llaqtaypa qhepa kaq awqanakuyninku kasqanta yachaspa, taytanchiskunaq haywasqa kasqan qollanan qelqakunata lamanitakunaq makinkupi urmananmanta hark'anaypaq (lamanitakunaqa chinkachinkumanmi kay qelqakunataqa) Wiraqochaq kamachisqan kaspataqmi, Nephiq raphinkunamanta kay qelqata ruwarqani, Kumorah moqopitaq pakarqani Wiraqochaq makinpa konfiyawasqan llapan qelqakunata, kay chikan raphikunallatataq mana, churiy Moronimantaq kaykunata qorqani.

7. Hinataq llaqtayqa, warminkuwan wawankunapiwan kunanqa, lamanitakunaq awqasuyunkunata paykuna kontra hamusqankuta rikurqanku; llapa millay ruwaqkunaq songonku hunt'aq wañuyta ancha millay manchakuywantaq paykuna chaskiyta suyaraqanku.

8. Hinataq noqayku kontra maqanakuy hamurqanku, sapanka nunataq manchakuywan hunt'a karqanku, ancha askhapuni paykuna kasqankurayku.

9. Llaqtay kontrataq q'anchinawan, peqtawan, wach'iwan, hachawan, awqanakunapaq imaymana laya maqanakunapiwan urmamurqanku.

10. Hinataq, runaykuna wit'usqa karqanku, ari, noqawan kaq chunka waranqa, chawpipitaq k'irisqa urmarqani; sispaytataq rirqanku manataq kawsayniyta tukuchirqankuchu.

11. Noqayku chawpinta rispanku, llapan llaqtayta wañuchiqtinkutaq—ishkay chunka tawayoqllataq mana, churiy Moronitaq kaykunaq hukninkaq karqan— llaqtaykuq wañuyninmanta qespis-paykutaq, lamanitakuna karpankuman kutipuytinku, tutamantampi Kumorah moqo patamanta rikurqayku, ñawpaq pusasqay chunka waranqa runaykuna wañuchisqa kasqankuta.

12. Rikurqallaykutaqmi llaqtaymanta churiy Moroniy pusaqan chunka waranqata.

13. Gidgiddonahq chunka waranqanpas urmasqan karqan, paytaq paykunaq chawpinpi.

14. Lamahpas chunka waranqanwan urmasqa karqan. Gilgalpas urmasqan karqan chunka waranqanwan. Limhapas urmasqan karqan chunka waranqanwan. Joneampas chunka waranqanwan usmasqa karqan; Kamenihahpas, Moronihahpas, Antionumpas, Shiblompas, Shempas, Joshpas, sapankanku chunka waranqankunawan urmasqaku karqan.

15. Chunka runakunapiwanmi karqan, sapankankutaq chunka waranqankunawan q'anchinawan wañurqanku; ari, llapan llaqtaymi urmarqan, noqawan kaq ishkay chunka tawayoqllataq mana, qheparina llaqtakunaman ayqekuq huk chikan runakuna, lamanitakunaman huñunakuq huk chikan runakunallapiwanmi mana. Aychanku, tullunkuna, yawarninkupiwantaq hallp'a patapi chutayayan, hallp'a patapi ismunankupaq, ñut'ukuspa mamapachankuman kutiripunankupaq, paykuna wañuchiqtinkunaq makinpa saquesqan.

16. Nunaytaq llakikuywan p'akisqa karqan, llaqtay wañuchisqa kasqanrayku, hinataq qaparirqani:

17. Ancha sumaqkuna, imaynatan t'aqakuyta atiwaqchis karqan Wiraqochaq ñanninkunamanta! Ancha sumaqkuna, imaynataq pisichawaqchis karqan qankuna chaskinanpaq kicharisqa malkinkunawan sayariq Jesusta!

18. Kayta mana ruwawaqchischu karqan chayqa, manan urmawaqchischu karqan. Ichaqa, urmasqan kankichis, waqanitaq chinkasqaykichismanta.

19. Ancha sumaq churikuna, ususikuna, taytakuna, mamakuna, qosakuna, warmikuna, ancha sumaqkuna, imaynatan urmarqankichis!

20. Ichaqa, ripunkichisñan, manataqmi llakikuyniykuna kutichimusunkichismanchu.

21. Asllamantaqmi p'unchaw hamushan, wañuqniykichis mana wañuqwan churakunankupaq; ismuyipi waqlliq kay runa-kurkukunataq asllaman mana waqlliq runa-kurkuman wakinqaku; hi-

namantaq Cristoq taripanan tiyananpa ñawpaqenpi sayanaykichis, ruwayniykichiskunaman hina taripasqa kanaykichispaq. Chanin kankichis chaytaq, ñawpaqeykichista ripuq taytaykichiskunawan saminchasqa kankichis.

22. Qankunaman kay ancha hatun wañuchiy manaraq hamushaqtin yuyayniykichisman kutirimuwaqchis karqan. Ichaqa ripunkichisñan, Taytataq, ari, hanaqpachaq Wiñay Taytantaq imayna kanaykichista yachan, Paytaq qankunawan ruwan chaninchayninman, khuyapakuyninmanwan hina.

7 T'AQA

Sut'inta lamanitakunaman Mormon nin, Israelpa wasinmanta kasqankuta. Paykunata anyan qespiyninkurayku.

1. Kunantaq kay llaqtamanta mana wañuchisqa puchuman huk chikanta rimayta munayman, paykunaman rimayniykunata Yaya qonman chayqa, taytankuq imaymanankunamanta yachanankupaq; ari, qankunamanmi rimarini Israelpa wasinpa puchun; kaytaqmi rimasqay simikuna:

2. Yachaychis Israelpa wasinmanta kasqaykichista.

3. Yachaychistaq yuyayman kutirimuyman hamunaykichista, mana chayqa, manan qespichisqa kayta atiwaqchischu.

4. Yachaychis awqanakunapaq maqanaykichiskunata panpaman churanaykichista, manaña yawar sut'uchiypi astawan kusikunaykichista, manañataq yapamanta chaykunata hap'inaykichista-wan, ichaqa Yaya kamachisoqtillaykichis.

5. Yachaychis taytaykichis reqsiyman hamunaykichista, llapan huchaykichiskunamanta, millay ruwayniykichiskunamantawan kutirimunaykichista, Yayaq Churin Jesucristo kasqanta kreyinaykichista; judiokunaq wañuchisqan kasqanta, Taytaq atiyinwantaq yapamanta hatarisqanta; chaywantaq ayapanpapi atipayniyoq karqan, Paypitaqmi wañuypa qepun millp'usqa kapun.

6. Paymi wañuqkunaq kawsariyninta wakichin; chaywantaq runakuna hatarichisqa kananku taripay tiyananpa ñawpaqenpi sayanankupaq.

7. Runakunamanmi qespiyta Pay apamurqan, chaywantaq, taripana p'unchawpi mana huchayoq ñawpaqenpi tarisqa kaqman, Yayaq ñawpaqenpi suyunpi tiyananpaq qosqa kanqa; hanaqpi takiqkunawan mana tukukuq takikunata Taytaman, Churiman, Qollanan Nunamanwan (paykunataq huk Yayalla kanku) mana tukukuyniyoq kusikuypi takinankupaq.

8. Chhaynaqa, yuyayman kutiriyichis Jesuspa sutinpitaq unu-

MORMON 8

chasqa kaychis; Cristoq yachachiynintataq hap'iyichis, chaytaq ñawpaqeykichispi churasqa kanqa, mana kay qelqallapichu, ichaqa, judiokunamanta hawarunakunaman hamunan qelqapiwan; chay qelqataq hawarunakunamanta qankunaman hamunqa.

9. Chayta kreyinaykichispaqmi kay qelqasqa; chayta kreyiqtiykichistaq kayta kreyinkichis; kayta kreyinkichis chaytaq, taytaykichiskunamanta yachankichis, paykuna purapi ancha sumaq ruwaykunata Yayaq atiyinwan ruwakusqanmantawan.

10. Yachankichistaqmi Jakobpa ch'awchunpa puchun kasqaykichista; chhaynaqa, qallariypi rimanakuypa runankunawan kushkan yupasqa kankichis; Cristopi kreyinkichis, unuchasqataq kankichis chayqa, qallariypi unuwan, hinamantaq ninawan Qollanan Nunapiwan, Qespicheqninchispa qhawachiwasqanchista qatispa, chay kamachiwasqanchisman hina chayqa, allillanmi qankunawan kanqa taripana p'unchwipi. Hinataq kachun.

8 T'AVA

Moroni tukun taytanpa qelqanta. Kumorahpi wañuchiy pataman. Mormon wañuchisqakuna purapi. Lamanitakuna suwakuna ima hallp'ata hap'ikunku. Mormonpa qelqan hallp'amanta llusqsimunan. Qhepa p'unchwakuna imayna kananmanta rimakun.

1. Noqa Moroni taytay Mormonpa qelqanta tukuni. Huk chikallantaqmi qelqanaypaq kan, chaykunatataq taytay kamachiwarqan.

2. Hinataq, ancha hatunkaray Kumorah awqanakuy pataman, qheparina hallp'aman ayqekuq nephitakuna lamanitakunaq qatikachasqan karqanku, llapanku sipisqa kanankukama.

3. Taytaypas paykunaq wañuchisqanmi karqan, noqataq sapallay qhepani, llaqtaypa qolluyninpa khuyay willayninta qelqanaypaq. Ichaqa, ripunkuñan paykuna, noqataq taytaypa kamachiyninta hunt'ani. Sipiwanqakuchus chaytaqa manan yachanichu.

4. Chhaynaqa qelqasaqmi, hallp'apitaq qelqakunata pakasaq; manataqmi imapas qokuwanchu mayman rinaypas.

5. Taytaymi kay qelqakunata ruwarqan, chaypi kasqantataq pay qelqarqan. Noqapas qelqaymanmi, raphikunapi maypi qelqanaypaq kanman chayqa; ichaqa, manan kanchu; manataqmi choqey kanchu, sapallaytaq kashani chayqa. Maqanakuy pin taytaypas llapan aylluykunapas wañuchisqa karqanku, manataqmi qochuykuna kanchu ni mayman rinaypaqpas; hayk'a pachata kawsanaypaq Wiraqocha qowanantaqa manan yachanichu.

6. Tawa pachak watañan tukukurqan Qespicheqninchis Wiraqochanchis hamusqan pachamantapacha.

7. Llaqtay nephitakunata lamanitakuna qatikacharqanku llaqta-llaqtanta, hallp'a-hallp'anta, manaña astawan kanankukama; ancha hatuntaqmi urmayninku karqan, ari, ancha hatun ancha utirayaymi llaqtay nephitakunaq qolluyninku.

8. Wiraqochaq makinmi kayta ruwarqan. Lamanitakunapas paykuna purapin maqanakuypi kashanku; kay hallp'aq lliw uyanpitaq pasaqlla wañuchiy, yawar sut'uchiypiwan kashan; manataqmi pipas yachanchu awqanakuyta tukukuyninta.

9. Kunanqa, manañan astawan paykunamanta ninichu; manan pipas kanchu, ichaqa lamanitakuna suwakunallapiwanmi kay hallp'a patapi kanku.

10. Manataqmi pipas kanchu cheqaq Yaya reqsiqqa, ichaqa Jesuspa yachachisqankunalla; paykunataq hallp'api karqanku, runakunaq huchallikuyninku ancha hatunpuni kaqtintaq Wiraqochaqa mana kacharirqanchu runakunawan paykuna qhepanankuta; kay hallp'a patapi kankumanchu chaytaqa manan pipas yachanchu.

11. Ichaqa, taytay noqapiwanqa, rikurqaykun paykunata; paykunataq noqaykuta serviwarqanku.

12. Pipas kay qelqata chaskispa mana kondenanqachu kaypi kaq mana hunt'asqa kaqkunarayku chayqa, chay kikin runan kaykunamanta aswan hatun imaymanakunata reqsiqqa. Moronin kani, atikunman chaytaq llapan imaymanakunata reqsichiykichisman.

13. Tukunin kay runakunamanta rimayta. Mormonpa churinmi kani, taytaytaq Nephiq ch'awchun karqan.

14. Noqataqmi kani kay qelqakunata Wiraqochapaq waqaychaq; kay qelqakunaq raphinkunaqa mana ima chaninniyuqmi Wiraqochaq kamachiyninrayku. Cheqaqtapunin Pay nin, manan pipas qhapaqyananpaq chayta hap'inankumanta. Ichaqa, chaypi kaq qelqakunaqa ancha hatun chaninniyuqmi; chayta k'anchayman apamuqtataq Wiraqocha saminchanqa.

15. Manan pipas chayta k'anchayman apamunanpaq atiyniyoqchu kanqa, ichaqa, payman Yayamanta qosqa kaqtillanmi. Yayaqa munan, kusiqellpunman ch'ullalla ñawillayoq chay ruwakunanta, utaq Wiraqochaq rimanakuyninpa ñawpa unay ch'eqerichisqa llaqtanpa allin kayninpaqpas.

16. Saminchasqataq kachun, kayta k'anchayman apamuq runa; tutayaqmanta k'anchayman apamusqan kanqa, Yayaq rimayninman hina; ari, hallp'amanta horqomusqan kanqa, tutayaqman-

MORMON 8

tataq k'ancharimunqa, runakunaq yachayninkuman apamusqataq kanqa; Yayaq atiyinwan ruwasqataq kanqa.

17. Pantaykuna kan chayqa, runaq pantayninmi. Ichaqa, manan ima pantaymantapas yachaykuchu; chaypiwanpas, llapan imaymanakunatan Yaya yachan; chhaynaqa, pi kondenaqtapas qhawakunanta saqeychis, supay wasiq ninanpa ch'ikinpi imañataq kankuman.

18. Noqaman qhawachiway, mana chayqa k'irisqan kanki-nispa neqqa, qhawakuchun, Wiraqochaq hark'asqanta imañataq kamachishanman.

19. Sinchi usqhaylla taripaqa, yapamantan usqhaylla taripasqa kanqa; ruwayninkunaman hinan chaninchaynin kanqa; chhaynaqa, k'iriy runaqa, Wiraqochaq k'irisqanmi yapamanta kanqa.

20. Qhawariychis qelqaq nisqanta: Runaqa manan maqananchu, manataqmi taripanqachu; taripayqa noqaqmi, aynipi kutichiyas noqaqtaqmi, yapamantataq qosaq, nispan Wiraqochanin.

21. Phiñarikuykunata, churanakuykunatawan Wiraqochaq ruwaynin kontra samariq, Wiraqochaq rimanakusqan Israelpa wasin kontrapiwan samariq: Wiraqochaq ruwayninta thufisun, Wiraqochataq mana yuyarinqachu Israelpa wasinwan rimanakuy ruwasqanta, nispa niqqa, wit'usqa kaspas ninaman churasqa kananpaq ch'ikipin kashan.

22. Wiraqochaq wiñay-wiñaypaq ima ruwanankunaqa ruwakuytaqa qatillanqan, llapan promesankuna hunt'akunankama.

23. T'aqwiychis Isaiaspa unanchayninkunata. Manan chaykunata qelqayta atiymanchu. Ari, qankunata nisaykichis-ñawpaqeyta riq qollanankuna, kay hallp'ayoq kaqkunaqa qaparinqakun, ari, ñut'u hallp'amantan Wiraqochaman qaparimunqaku; Wiraqochaq kawsasqanman hinataq paykunawan rimanakuy ruwasqanta yuyarinqa.

24. Yachantaqmi Pay, wawqenkunarayku Yayaman rimariyninku kasqanta. Yachantaqmi iñiyinkuta; Paypa sutinpin orqokunata hitirichiyta atiqku, sutinpitaq hallp'ata chhapchiriyta atirqanku; rimayninpa atiyinwantaq watana wasikunata panpaman urmachirqanku; ari, manan ninasapa hornokunapas paykunata k'iriyta atirqanchu, nitaq k'ita uywakunapas, ni miyuyoq mach'aqwaykunapas, rimayninpa atiyinrayku.

25. Kay imaymanakunata horqomunanpaq Wiraqocha kacharinan runaraykupiwantaqmi yayaman-rimarikuyninku karqan.

26. Manataqmi pipas, manan chaykuna hamunqachu, nispa niyta nesitanachu; cheqaqtapunin hamunqa, Wiraqochan chayta

rimarqan. Hallp'amantan lloqsimunqa Wiraqochaq makinwan, manataq pipas hark'ayta atinmanchu; manan milagrokunaqa kanñachu nispa nikunan p'unchawpin hamunqa; wañusqakunamanta rimariq hinataq hamunqa.

27. Pakallapi allchanakuykuna, tutayaqpi ruwaykunaraykupiwan chaninkunaq yawarnin Wiraqochaman qaparinan p'unchawpin hamunqa.

28. Ari, Yayaq atiyin mananchakunan p'unchawpi, iñeqkuna-huñukuna waqllisqa kaqtinku, sonqonkuq anchayayninpi hoqarikunanku p'unchawpiwanmi hamunqa; ari, iñeqkuna-huñukunaq kamachikuqninkuna, yachacheqkunapiwan sonqonkuq anchayayninkupi hoqarikunanku p'unchawpi, iñeqkuna-huñunkumanta kaq runakunamanta chikikuq kananku p'unchawpi.

29. Ari, waq hallp'akunapi ninakunamanta, sallallallaykunamanta, q'osñi phuyukunamantawan uyarikunan p'unchawpin hamunqa.

30. Uyarikullanqataqmi awqanakuykunamanta, awqanakuy-manta rimaykunamanta, askha hallp'akunapi pacha chhapchikunamantawan.

31. Hallp'api ancha hatun qhellichaykuna, runa wañuchiykuna, suwakuykuna, llullakuykuna, yukaykuna, map'akuykuna, imaymana laya millay-millanakunapiwan kanan p'unchawpin hamunqa; kayta ruway utaq haqayta ruway, manan imapas kanqachu, chhayna runataqa qhepa p'unchawpin Wiraqocha sayarichinqa, nispa askha ninanku p'unchawpi. Ichaqa, ay chay runakunamanta, p'oshqo hayaqepi, millay ruwaypa wataynin ima paykuna kashanku.

32. Noqaman humuychis, qolqeykiraykutaq huchaykichiskuna panpachasqa kanqa, nispa niq iñeqkuna-huñukuna ruwakunan p'unchawpin hamunqa.

33. Yaw millay waqllisqa k'ullu umayoq runakuna, imaqtinmi iñeqkuna-huñukunata hatarichikurqankichis qhapaqyanaykichispaq? Imaqtinmi Yayaq qollanan rimayninta waqllichirqankichis, nunaykichispaq kondensasionta apamunaykichispaq? Qhawariychis Yayaq qhawachiyninkunata; hamushanmi pacha, chay p'unchawpi kay llapan imaymanakuna hunt'akunanpaq.

34. Ancha hatun ancha sumaq imaymanakunatan Wiraqocha qhawachiwarqan, qankuna purapi kay imaymanakuna hamunan p'unchawpi asllaman hamunan imaymanakunamanta.

35. Kunanpas kashawaqchis hinan qankunaman rimariykichis, chaypiwanpas manan kankichischu. Ichaqa, Jesucriston qankunata rikuchiwarqan, yachanitaqmi ruwayniykichiskunata.

36. Yachanin sonqoykichispa anchayayninpi purisqaykichista; manataqmi pipas kanchu ichaqa huk chikallan, sonqonkuq anchayayninpi mana hoqarikuqkuna, ancha sumaq p'achakunawan p'achakunankupaq, munapakunankupaq, churanakuyipi, millay yuyaypi, qatikachaypi, imaymana laya millay ruwaykunapiwan. Iñeqkuna-huñuykichiskunataq, ari, sapankankun qhellichasqa wakinku, sonqoykichispa anchayayninrayku.

37. Qolqeta, kapuqniykichista, ancha sumaq p'achaykichiskunata, iñeqkuna-huñuykichis achalaytawanmi mayta munakunkichis; wakchata, nesitaqta, onqoqta, llakichisqatawan munakusqaykichismanta aswanta.

38. Yaw qhellikuna, ishkay uyakuna, ismuqrayku qhatukuq yachacheqkuna, imaqtinmi qhellicharqankichis Yayaq qollanan iñeqkuna-huñunta? Imanaqtinmi p'enqakunkichis Cristoq sutin churakuyta? Imanaqtinmi mana yuyankichischu mana tukukuyniyoq kusikuypa chaninnin, runakunaq hatunchayninkurayku mana hayk'aq wañuq muchuymanta aswan hatun kasqanta?

39. Imanaqtinmi achalakunkichis mana kawsayniyoq kaqwan, chaykamataq yarqayniyoqkunata, nesitaqkunata, q'alalla kaqkunata, onqoqkunata, muchuqkunatawan ñawpaqeykichista pasachinkichis mana paykunata reparaspa?

40. Ari, imanaqtinmi pakallapi allchanakuyniykichiskunata hatarichinkichis qhapaqyanaykichispaq, ikmakunataq Wiraqochaq ñawpaqenpi waqachinkichis, mana tayta-mamayoqkunatapas Wiraqochaq ñawpaqenpi waqachinkichis; taytankuq, qosankuq yawarnintapas panpamanta Wiraqochaman qaparichinkichis, umaykichis pataman aynipi kutichiyayku?

41. Ayni qoq q'anchinaqa qankuna patapin warkurayashan; asllamantaq pacha hamunqa, qankuna patapi chaninkunaq yawarninta aynipi kutirichinanpaq; manan Payqa astawan awantanqachu waqayninkuta.

9 T'AQA

Mana kreyiqkunaman Moroni rimarin. Cristomanta cheqaqchaynin. Allchapasqa egipsio nispa nephitakunaq siminku reqsisqa.

1. Kunanqa rimarillanitaqmi, Cristopi mana kreyiqkunamanta.
2. kreyinkichischu hamunasuykichis p'unchawpi? Wiraqocha hamuqtin, ari, chay hatun p'unchaw, papel hina hallp'a mayt'ukuqtin, hallp'a imamanta ruwasqa kasqantaq wapu ruphawan chulluqtin; ari, chay hatun p'unchawpi Yayaq Chitanpa ñawpa-

qenpi sayanaykichispaq apamusqa kaqtiykichis, manan Yaya kanchu ninkichischu?

3. Astawanraqchu Cristota mananchankichis, ichari qhawayta atiwaqchischu Yayaq Chitanta? Yuyankichischu Paywan tiyanaykichista huchayoq kasqaykichista yachaspaykichis? Yuyankichischu kusiy-kusi chay qollanan Kaqwan tiyanaykichista, wiñaypuni kamachisqa-siminkunata p'akisqaykichismanta yachasqaykichiswan nunaykichis muchuchisqa kashaqtin?

4. Qankunata nisaykichis—aswan usurin kawaqchis qollanan chanin Yayawan tiyaspaykichis, Paypa ñawpaqenpi qhelli kayniykichismanta yachashaspaykichis, kondenasqa nunakunawan supay wasiq tiyanaykichismantaqa.

5. Yayaq ñawpaqenpi q'alalla kasqaykichista, Yayaq kusiqellpunta, Jesucristoq qollanan kaynintawan rikunaykichispaq apamusqa kaqtiykichisqa, mana qolluchiy atina ninatan qankunapi rawrarichinqa.

6. Chhaynaqa mana-kreyiqkuna, Wiraqochaman kutiriyichis; llapa kallpaykichiswan Taytaman waqyakuyichis Jesuspa sutinpi; ichapas mana ima qhelliyoq, ch'uya, sumaq, yuraq tarisqa kawaqchis; chay qhepa p'unchawpi Chitaq yawarninwan maqchisqa kaspas.

7. Yayaq rikuchiyninkunata mananchaqkunaman—manañan kanñachu, manan rikuchiy kanchu, nitaq unanchaykunapas, ni qoykunapas, ni alliyachiypas, ni huk simikunapi rimaypas, ni huk simikuna sut'inchaypas—nispa niqkunaman yapamanta rimarini.

8. Qankunata niykichis, kay imaymanakunata mananchaqqamanan Cristoq yachachiyninta reqsinchu; ari, manan qelqakunata ñawincharqanchu; ñawincharqan chayqa manan chayta hamut'ankuchu.

9. Manachu ñawinchanchis, Yaya kaqlla qayna p'unchawpas kunan p'unchawpas, wiñaypaqpas kasqanta; manataq Paypi ima t'ikrakuypas, ni t'ikrakuypa llanthunpas kasqanta.

10. T'ikarakuq yayata qankuna kikiykichispaq yuyarqankichis, t'ikrakuq llanthutaq paypi kan chayqa, mana milagrokunayoq Yayatan qankuna kikiykichispaq yuyarqankichis.

11. Ichaqa, milagrokunayoq Yayatan qankunaman qhawachisaykichis, ari, Abrahampa, Isaakpa, Jakobpa ima Yayanta. Chay kikin Yayallataqmi hanaqpachata kay pachatawan, kaykunapi kaq imaymanakunatawan kamarqan.

12. Paymi Adanta kamarqan, Adanwantaq runaq urmaynin hamurqan. Runaq urmasqanraykutaq Jesucristo hamurqan, Taytapas Churipas; Jesucristoraykutaq runaq qespiynin hamurqan.

13. Jesucristowan hamusqan chay runakunaq kutichikapuy-wantaq yapamanta Wiraqochaq ñawpaqenman apamusqa kanku; ari, kaypin llapan runakuna kutichikapusqa kanku, Cristoq wañuynin kawsarimuyta apamusqanrayku, kay kawsarimuytaq waki-chin mana tukukuyniyuq puñuymanta kutichikapuyta; chay puñuymantataq llapan runakuna rikch'arichisqa kanqaku, Yayaq atiyinwan qeqeri waqaqtin. Paykunataq lloqsimunqaku, huch'uypas, hatunpas, taripananpa ñawpaqenpitaq sayanqaku; kay pachapi wañuypa wiñay-wiñaypaq watayninmantataq kutichiskapusqa, pashkarisqa ima kaspanku.

14. Hinamantaq Qollanan Kaqpa chaninchaynin paykunaman hamunqa, chay patamantaq pacha hamunqa, qhelli kaqtaq qhellilla qhepanqa; chanin kaqtaq chaninlla kanqa; kusiy-kusi kaqtaq kusiy-kusilla kanqa, mana kusiy-kusi kaqtaq llakikuypi kanqa.

15. Kunantaq qankuna kikiykichispaq mana milagro ruway atiq yayata yuyaqkunaman tapusaykichis: Pasarqanñachu kay rimasqay imaymanakuna? Hamunrqanñachu tukukuy? Manan nisaykichismi; manataqmi Yayaqa milagrokunayoq Yaya kayta tatir-qanchu.

16. Manachu Yayaq ruwasqan imaymanakuna ñawiykichispi ancha sumaq? Ari, pitaqmi hamut'ayta atinman Yayaq ancha sumaq ruwasqankunata?

17. Pitaq ninqa, rimayninwan hanaqpacha kay pachapiwan kananta, rimayninpa atiyinwantaq ñut'u hallp'amanta runa kamasqa kasqanta, rimayninpa atiyinwantaq milagrokuna ruwasqa kasqantawan, manan milagrochu nispari?

18. Pitaq ninqa: Manan Jesucristoqa askha ancha hatun milagrokunataqa ruwarqanchu nispari? Apostolkunaq makinkunawantaq askha hatun milagrokuna ruwasqa karqan.

19. Chay p'unchawpi milagrokuna ruwasqa karqan chayri, imanaqtintaq Yayari tatinman milagrokunayoq Yaya kaytari, hinasparaqtaq mana t'ikrakuq Yayari kanman? Manan Payqa kambiyanchu nispan nisaykichis; chhayna kanman chayqa, Yaya kaytan Pay tatinman. Manan Payqa Yaya kayta saqenchi, milagrokunayoq Yayataqmi.

20. Runakunaq wawankunaq chawpinpi milagrokunata ruwaytaqa tatin, mana kreyiypi urmasqankurayku, chanin ñanmanta hitirisqankurayku, konfiyananku Yayata mana reqsisqankurayku-piwan.

21. Nisaykichismi, pipas Cristopi kreyispa, mana imatapas ish-kayaspa Taytamanta Cristoq sutinpi imatapas mañakunqa chay-

qa, payman qosqan kanqa. Llapapaqmi kay rimay, hallp'aq tukukuyninkamapuni.

22. Khaynatan, Yayaq Churin Jesucristo nirqan, qhepakunanku kaq yachachisqakunaman, ari llapan yachachisqankunamanwan, runakuna uyarishaqtinku: Llapan hallp'antinman riyichis, lliw runakunamantaq yachachiyniyta yachachimuychis;

23. Kreyispa unuchakuq runataq qespichisqan kanqa, mana kreyiqtaqmi ichaqa, kondenasqan kanqa;

24. Kay señalkunataq kreyiqkunaman qatinga: sutiypin supaykunata qarqonqaku; mosoq simikunapin rimanqaku, mach'aqwaykunatan hoqarinqaku; ima wañuchiqtapas ukyanqaku chaytaq mana paykunata k'irinqachu; onqosqakunamanmi makinkuta churanqaku, unqosqakunataq allianqaku;

25. Pipas sutiypi kreyinqa mana imatapas ishkayaspa chayqa, paymanmi llapan rimayniykunata takyachisq, hallp'aq tukukuy-ninkunakamapuniraq, nispa.

26. Kunanri, pin Wiraqochaq ruwayninkuna kontra sayanqa? Pin rimayninkunata mananchanqa? Pin Wiraqochaq llapa kallpayoq atiyenin kontra ankallikunqa? Pin Wiraqochaq ruwayninkunata alqochanqa? Pin Cristoq wawankunata alqochanqa? Wiraqochaq ruwayninkuna alqochaqkuna, muyupakuspan qollunkichis.

27. Chhaynaqa ama alqochaychischu, amataq utirayaychischu; ichaqa, Wiraqochaq rimayninkunata uyariychis, Taytamantaq Cristoq sutinpi mañakuychis ima nesitasqaykichistapas. Ama ishkayaychischu, kreyiqkuna kaychis, ñawpa pachakunapi hinataq qallariychis, Wiraqochamantaq tukuy sonqoykichiswan hamuychis, kikin qespiyniykichistataq manchakuywan, khatatataypiwan Paypa ñawpaqenpi llank'ayta qallariychis.

28. Yachaysapa kaychis probasion p'unchawniykichispi; llapa qhelli kaymanta maqchikuychis. Munapakuyniykichispi tukukunanapaqqa ama mañakuychischu, ichaqa, mana kuyuchisqa kaywan mañakuychis mana ima wateqayman qokunaykichispaq, cheqaq kawsaq Yayata servinaykiçhispaq.

29. Qhawakuychis chaypaq hina mana kaspera mana unuchakuyta; qhawaychis Cristoq qollanan-yuyayninta chaskinaykichispaq hina mana kaspaykichis mana mallinaykichispaq; ichaqa, qhawaychis llapa imaymanakunata chaypaq hina kaspera ruwayta; kawsaq Yayaq Churin Jesucristoq sutinpitaq ruwaychis. Kayta ruwankichis, tukukuykamataq takyankichis chayqa, manan imaynapas qarqosqa kankichischu.

30. Qankunamanqa rimarini, wañusqakunamantapas rimarimushayman hinan; yachanin rimayniykunata uyarinaykichista.

MORONI 1

31. Ama kondenawaychischu mana hunt'asqa kasqayrayku, amataq taytaytapas mana hunt'asqa kasqanmanta, amataq paypa ñawpaqenta qelqaqkunatapas; aswanmá Yayata añaychakuychis, mana hunt'a kayniykuta qankunaman qhawachisqasuykichismanta, noqayku kasqaykumanta aswan yachaysapa kayta yachanaykichispaq.

32. Kay qelqakunataqa qelqarqayku yachayniykuman hinan, allchapasqa egipsio nispa noqayku purapi waqyasqayku seq'ekunapi, noqaykuq haywasqaykutaq allchapasqaykutaq karqan, rimayniyku imayna kasqanman hina.

33. Aswan hatun raphiyku kanman karqan chayqa, Hebreopin qelqaykuman karqan; ichaqa, Hebreotapas allchaparqaykun. Hebreopi qelqaykuman karqan chayqa, mana ima mana-hunt'asqayoqmi qelqakupi kawaqchis karqan.

34. Ichaqa, Wiraqochan yachan qelqasqayku imaymanakunata, manataqmi huk llaqtakunaqa simiykuta yachankuchu; chay hinaqa, Paymi ñanta allicharqan, kay simi t'ikrasqa kananpaq.

35. Kay imaymanakunataq qelqasqa kan, mana kreyiypi urmaq wawqeykuq yawarninmanta maqchisqa kanaykupaq.

36. Wawqeykumanta munasqaykuqa, ari, Cristo reqsiyman paykunata kutirichimuyqa, kay hallp'api tiyaq llapa qollanankunaq yayaman-rimarikuyninkuman hinan.

37. Wiraqocha Jesucristoñayá qochun, iñiyninkuman hina yayaman-rimarikuyninku kutichisqa kananpaq; Tayta Yayataqyá yuyariykuchun Israelpa wasinwan ruwasqan rimanakuyta; Paytaqyá wiñaypaq paykunata saminchaykuchun, Jesucristoq sutinpi iñiyan. Hinataq kachu.

MORONIQ QELQAN

1 T'AQA

Moroniq sapan kaynin. Lamanitakunaq allin kavnikuta suyaspa qelqan.

1. Kunantaq noqa Moroni, Jaredpa llaqtanpa willayninta huch'uyyachisqayta tukuqtiy, manaña astawan qelqanaypaqmi yuyarqani, ichaqa, manaraqmi wañurqanichu; manataqmi lamanitakunawan rikuchikunichu mana wañuchiwanankupaq.

2. Awqanakuyinkunaqa, ancha millaypunin paykuna purapi; cheqnikuyinkuraykutaq, Cristo mana mananchaq nephitakunata wañuchinku.

3. Noqa Moronitaq mana Cristota mananchasaqchu; chhay-

MORONI 2, 3

naqa, may atisqaymanmi kawsayniy qespichinaypaq puripakuni.

4. Chhaynaqa, huk chikantawanmi qelqani, yuyakusqayman kontrata; manaña astawan qelqanaypaqmi yuyakurqani; ichaqa, huk chikantawanmi qelqani, ichapas hamuq p'unchawkunapi wawqeykuna lamanitakunapaq allin kanman, Wiraqochaq munayninman hina.

2 T'AQA

Chunka ishkaayniyoq nephitakuna, Qollanan Nunata imayna qosqankumanta.

1. Cristoq rimayninkuna, chunka ishkaayniyoq akllasqan yachachisqankunaman makinta churashaqtin—

2. Sutinkumanta paykunata waqyaspataq nirqan: Sutiypin Taytata waqyankichis kallpasapa yayaman-rimarikuypi; kayta ruwasqaykichis patamantaq atiyniyoq kankichis, makiykichista churanaykichis runaman Qollanan Nunata qonaykichispaq; sutiypitaq qonkichis; chhaynatan yachachisqaykuna ruwanku, nispa.

3. Kay rimaykunataqa paykunaman rimarqan, ñawpaq kutipi rikhurimuqtinmi; manataqmi runakunaqa uyarirqankuchu, ichaqa yachachisqakunaqa uyarirqankun. Makinkuta churasqanku runakunamantaq Qollanan Nuna hamurqan.

3 T'AQA

Kurakkuna, yachacheqkunapiwan imayna sapaqchasqa kasqankumanta.

1. Iñeqkuna-huñuq hamawt'ankuna nispa waqyasqa yachachisqakuna, kurakkunata, yachacheqkunatawan imaynata sapaqchasqanku—

2. Cristoq sutinpi Taytaman rimarikusqanku patamantaq, paykuna pataman makinkuta churarqanku, hinaspataq nirqanku:

3. Jesucristoq sutinpi kurak kanaykipaq sapaqchayki (yachacheq kanman chaytaq) yachacheq kanaykipaq sapaqchayki, Jesucristoq ukhunta yuyayman kutirimuyta, hucha panpachaytawan yachachinaykipaq, sutinpi iñiywan tukukuykama takyanawan. Hinataq kachun, nispa.

4. Khaynatan kurakkunata, yachacheqkunatawan paykuna sapaqcharqanku, runakunaman qosqan Yayaq qoyninman waqyayninmanwan hina; paykunapi kaq Qollanan Nunaq atiyinwantaq paykunata sapaqcharqanku.

MORONI 4, 5, 6

4 T'AQA

Qollanan-yuyariy t'antata imaynata saminchana.

1. Hamawt'akuna kurakkunapiwan, Cristoq aychanta yawar-nintawan iñeqkuna-huñuman servisqanku; Cristoq kamachiynin-kunaman hinataq chayta servirqanku. Chhaynaqa, yachaykun chhayna ruway cheqaq kasqanta; hamawt'a, utaq kurakpas kayta sevirqanku—

2. Paykunataq iñeqkuna-huñuwan qhonqorikurqanku, Tayta-mantaq rimarikurqanku Cristoq sutinpi:

3. O Yaya Wiñay Tayta, Churiyki Jesucristoq sutinpi maña-kuykiku, kay t'antata saminchanaykipaq qollanachinaykipaqwan, kaymanta llapa rakinakuqkunaq nunankupaq, Churiykiq runa-kurkun yuyariypi mikhunankupaq; Churiykiq sutinta paykunapi apanankupaq munasqankuta qanman sut'inchanankupaq O Yaya Wiñay Tayta; wiñaypaqpuni Payta yuyarinankupaq, paykunaman qosqan kamachikunataq waqaychanankupaq, paykunawan wiñaypaqpuni Nunan kananpaq. Hinataq kachun.

5 T'AQA

Qollanan-yuyariy vinota imaynata saminchana.

1. Vinoq imayna servisqa kasqan—qeruta hoqarispanku nir-qanku:

2. O Yaya Wiñay Tayta, Churiyki Jesucristoq sutinpi maña-kuykiku, kay vinota saminchanaykipaq qollanachinaykipaqwan, kaymanta llapan ukyaqkunaq nunankupaq; paykunapaq sut'u-chisqa Churiykiq yawarnin yuyariypi ruwanankupaq; wiñaypaq-puni Payta yuyarisqankuta qanman sut'inchanankupaq O Yaya Wiñay Tayta; paykunawan Nunan kananpaq. Hinataq kachun.

6 T'AQA

Unuchanapaq ruwanakuna, imayna unuchaypiwan. Iñeqkuna-huñupi ima ruwanakuna.

1. Kunantaq unuchanamanta rimarisaq. Hamawt'akuna, kurakkuna, yachacheqkunapiwan unuchasqa karqanku; manataqmi unuchakurqankuchu allin ruruta apamuspanku chaypaq hina mana kaqtinkuqa.

MORONI 7

2. Manataqmi pitapas unuchanapaq chaskirqakuchu, p'akillisqa sonqowan p'akillisqa nunapiwan mana hamuqtinkuqa; llapan huchankunamanta kutirimusqankuta iñeqkuna-huñuman sut'inchaqtinku.

3. Manataq pipas unuchaypi chaskisqachu karqan, ichaqa, Cristoq sutinta churakuspanku tukukuykama Pay serviyta churaquqtillanku.

4. Unuchayman chaskisqa kasqanku pataman, Qollanan Nunaq atiyinwan llank'asqa maqchisqa ima kasqanku patamantaqmi, Cristoq iñeqkuna-huñunpa runankunawan yupasqa karqanku; sutinkutaq qelqasqa karqan; Yayaq allin rimayninpa yuyarisqan mikhuchisqanpiwan kanankupaq; cheqaq ñanpi paykunata kachinapaq, pasaqllapuni yayaman-rimarikunankupaq, iñiyininku ruwaq tukuqpiwan Cristoq ruwasqankunallapi k'irarikunankupaq.

5. Pasaqllataq iñeqkuna-huñu huñunakurqan, sasinankupaq, yayaman-rimarikunankupaq, nunankuq alli-kayninmanta rimanakunankupaqwan.

6. Pasaqllataq huñunakurqanku Wiraqocha Jesus yuyariypi, t'antamanta vinomantawan qonakunankupaq.

7. Allintapunitaq qhawakurqanku paykuna purapi mana millay ruway kananpaq; millay ruwashaqta tariqkunatataq, iñeqkuna-huñumanta kinsa runakuna paykunata hamawt'akunaq ñawpaqenpi huchacharqanku, manataq yuyayninkuman kutirimurqankuchu, nitaq huchankuta willarqankuchu chayqa, pichasqan sutinku karqan, manañataq Cristoq llaqtanwan yupasqachu karqanku.

8. Ichaqa, sapa kutin yuyayninkuman kutirimuqtinku, panpachaytataq cheqaqtapuni mashkarqanku chayqa, panpachasqan karqanku.

9. Huñunakuyninkutaq iñeqkuna-huñuq pusasqan karqan, Nunaq ruwayninkunaman, Qollanan Nunaq atiyinman hina. Yachachinankupaq, anyanankupaq, yayaman-rimarikunankupaq, mañakunankupaq, takinankupaqwan hina Qollanan Nunaq atiyin paykunata pusasqanman hinan ruwasqa karqan.

7 T'AQA

Moroni qhawachin iñiyimanta, suyakuymanta khuyapakuymantawan Mormonpa yachachiyninkunata.

1. Kunantaq noqa Moroni huk chikan simikunata qelqani, iñiyimanta, suyakuyniyuq kaymanta, khuyapakuymantawan taytay

MORONI 7

Mormonpa rimasqanmanta; khaynatan runakunaman rimarirqan, yupaychanankupaq ruwasqanku sinagogapi paykunaman yachachishaqtin:

2. Kunantaq noqa Mormon, qankunaman rimariykichis ancha munasqay wawqeykuna; Tayta Yayaq, Wiraqochanchis Jesucristoq ima grasiawan, qollanan munayninpiwan, noqaman qoyinpa waqyayninrayku kay pachapi qankunaman rimarinaypaq kacharisqa kani.

3. Chhaynaqa, qankunaman, iñeqkuna-huñumanta kaqkunaman rimariyman, sumaqlata Cristota qatikuqkunaman, kunan pachamanta ñawpaqman hanaqpachapi paywan samanaykichiskama, Wiraqochaq samariyninman haykuyta atinaykichispaq, channin suyakuyta chaskiqkunaman.

4. Kunanqa wawqeykuna, kaykunataqa qankunamanta taripani, runakunaq wawankunawan sumaqla purisqaykichisrayku.

5. Yuyarishanin Yayaq rimayninta: Ruwayninkunapin paykunata reqsinkichis; ruwayninku allin kan chayqa, paykunapas allinmi kanku, nispa nisqanta.

6. Yayataq nirqan, huk runa millay kaspaga, manan allin kaqta ruwayta atinmanchu; huk qokuyta munachin utaq Yayamapas rimarikun mana cheqaq sonqowan chayqa, manan imatapas payman qonchu.

7. Manan chaninchaypaqchu paypaq yupasqa.

8. Huk runa millay kaspaga qokuyta qon chayqa, rimapakuspan qon; chhaynaqa, qoytapas qhepachikapunman karqan hinan paypaq yupasqa, hinataq Yayaq ñawpaqenpi millay pay yupasqa.

9. Chhaynallataqmi huk runapaq millaypaq yupasqa, mana cheqaq sonqowanchu yayaman-rimarikunqa chayqa; ari, manataqmi imatapas payman qonchu; manan chhayna runataqa Yaya chaskinchu.

10. Chhaynaqa, huk runa millay kaspaga manan allin kaqta ruwayta atinmanchu, manataqmi allin qoyta qonqachu.

11. Huk p'oshqo pukyuqa, manan allin unuta qoyta atinmanchu, manataqmi huk allin pukuyupas p'oshqo unuta qoyta atinmanchu; chhaynaqa, saqraq warman huk runa kaspaga manan Cristota qatikuyta atinmanchu; Cristota qatikuqtintaq, mana saqraq warman kayta atinmanchu.

12. Chhaynaqa, llapan allin imaymanakunaqa Yayamantan hamun; millay kaqtaq supaymanta. Yayaq awqanmi saqraqa, pasaqllataq Pay kontra maqanakun, inkitantaq munachintaq huchallikuyman, pasaqlla chay millay kaqta ruwanapaqwan.

13. Ichaqa, Yayamanta kaqqa, allin kaq ruwaymanmi pasaqlla

munachin inkitantaq; hinataq, allin ruwayman, Yaya munayman, Pay serviymanwan munachiq inkitaqpiwanqa, Yayaq qosqanmi.

14. Chhaynaqa, ancha munasqay wawqeykuna, Yayamantan nispa millay kaqta taripayta, utaq Yayamanta allin kaqta saqramantan nispa taripaytawan qhawakuychis.

15. Qhawariychis wawqeykuna, qankunamanmi qosqa kan taripanaykichispaq, allinta millay kaqmanta yachanaykichispaq. Imayna taripaytaq sut'ipuni, p'unchawpa k'anchayninchu laqha tutamanta sut'in hinapuni, k'apak yachaywan yachanaykichispaq.

16. Sapanka runamanmi Cristoq nunan qosqan, allinta mana allinmanta yachananpaq; chhaynaqa, qhawachiykichismi imayna taripanata. Allin ruwayman munachiq, Cristopi iñiymanwan inkitaq imaymanaqa, Cristoq atiyninwan qoyninpiwan apachisqan; chaywan Yayamanta kasqanta hunt'asqa yachaywan yachanaykichispaq.

17. Ichaqa, millay ruwayman, Cristopi mana kreyiyman, Pay mananchayman, Yayata mana serviymanwan runata imapas inkitan chayqa, hunt'asqa yachaywanmi yachawaqchis supaymanta kasqanta. Khaynatan supay llank'an, manan pitapas allin kaq ruwayman inkitanchu, manan, manan hukllatapas; nitaq angelninkunapas, nitaq payman watasqa kaqkunapas.

18. Kunanqa wawqeykuna, Cristoq k'anchayninwan taripanaykichispaq k'anchayta reqsisqaykichista rikuspaqa, pantasqa taripayta ama ruwanaykichispaq qhawakuychis; chay taripasqaykichis kikin taripaywan taripasqan kankichis.

19. Chhaynaqa, mañakuykichis wawqeykuna, Cristoq k'anchayninpi k'uchiy-k'uchi mashkanaykichista, allin kaqta millay kaqmanta yachanaykichispaq; sapanka allin kaqmanta hap'ipakunkichis, manataq chayta kondinankichischu chayqa, cheqaqtapunin Cristoq wawan kankichis.

20. Kunanri wawqeykuna imaynan atikunman, sapanka allin kaqmanta hap'ipakunaykichispaq?

21. Kunanqa, chay iñiyman hamuni, chaymanta rimarisaq nispa nisqayman. Nisaykichismi imaynata sapanka allin kaqmata hap'ipakuy atinaykichista.

22. Llapan imaymanakunata Yaya yachaspa, wiñay-wiñaymanta wiñay-wiñaypaq kaspera, runakunaq wawankunaman sirvinanpaq angelkunata kachamurqan, Cristoq hamunanmanta willananpupaq; Cristopi llapan allin imaymanakuna hamunanmanta.

23. Yayapas, kikin siminwan unanchaqqunaman willarqan, Cristoq hamunanmanta.

24. Imaymana manerakunapin Pay willarqan runakunaq wa-

wankunaman allin kaq imaymanakunata; llapan allin kaqkunataq Cristomanta hamun, mana chayqa, urmasqan runakuna karqanku, manataq ima allin kaqpas paykunaman hamuyta atinmanchu.

25. Chhaynataq, angelkunaq sirviyinwan, Yayaq siminmanta llapan lloqsimuq rimayninkunapiwan, Cristopi iñiyniyoq kayta runakuna qallarirqanku. Khaynatataq iñiywan sapanka allin imaymanakunata hap'irqanku; khaynataq karqan Cristoq hamunankama.

26. Pay hamusqan patamanpas, sutinpi iñiywan runakuna qespichisqa karqanku, iñiywantaq Yayaq churinkuna wakinku. Cristochu cheqaqtapuni kawsan chhaynatan kay rimaykunata taytanchiskunaman rimarirqan: Imatapas allin kaqta iñiywan sutiypi Taytamanta mañakunkichis, chaskinaykichispaq kreyispa chayqa, qankunapaq ruwasqan kanqa, nispa.

27. Chhaynaqa ancha munasqay wawqeykuna, qollurqanchu milagrokuna, hanaqpachaman Cristo wichapusqarayku, Yayamanta runakunaq wawankunawan khuyapakuyniyoq kasqan derechuta Yayaq paña makinpi tiyaspa mañakunanpaq?

28. Kamachisqa-simiq imapaq kasqantan Pay kutichirqan, Paypi iñiyniyoq llapan kaqkunataq mañakun; Paypi iñiyniyoq kaqkunataq sapanka allin kaqman ratakunqaku; chhaynaqa, runakunaq wawankunaq imarayku sayasqankutan Pay amachan, wiñaypaqtaq hanaqpachakunapi Pay tiyan.

29. Kayta Pay ruwaqtinchu milagrokuna qollurqan ancha munasqay wawqeykuna? Manan nisaykichismi; manataqmi angelkuna runakunaq wawankunaman serviya tatirqankuchu.

30. Payman watasqan paykuna kanku, kamachiyinpa rimayninkunaman hina servinankupaq, iñiysapakunaman, yaya hina imaymanapi yuyaypiwan kaqkunaman qhawachikuspanku.

31. Paykunaq ima ruwanankutaq, yuyayman kutirimunankupaq runakunaman waqyananku, runakunaq wawankunaman Taytaq rimanakuyninta hunt'anankupaq ruwanantawan ruwanankupaq; runakunaq wawankunaq chawpinpi ñanta allichanankupaq, Wiraqochaq akllasqankunaman Cristoq rimayninta willaspa, Paymanta sut'inchanankupaq.

32. Khaynata ruwaspataq Wiraqocha Yaya ñanta allichan, runakunaq puchun Cristopi iñiyniyoq kanankupaq, atiyinman hina paykunaq songonkupi Qollanan Nuna kananpaq ch'usaq kananpaq. Khaynatan Tayta wakichin, runakunaq wawankunawan ruwasqan rimanakuyninkunata.

33. Cristotaq nirqan: Noqapi iñiyniyoq kankichis chayqa, no-

qapi chanin kasqan imatapas ruwanaykichispamqi atiyniyoq kanchichis, nispa.

34. Nillarqantaqmi: Yuyayman kutirimuychis hallp'aq llapan k'uchunkuna, noqamantaq hamuychis sutiypitaq unuchakuychis, noqapitaq iñiychis qespichisqa kanaykichispaq, nispa.

35. Kunantaq, ancha munasqay wawqeykuna, qankunaman kay rimasqay imaymanakuna cheqaq chayqa, qhepa p'unchawpitaq Yaya qhawachikusunkichis atiywan, ancha hatun kusiqellpu-piwan kay imaymanakuna cheqaq kasqanta, cheqaqtaq chayri, tukukurqanchu milagrokunayoq p'unchaw?

36. Qollurqankuchu angelkuna runakunaq wawankunaman rikhurimuyanta? Utaq, qhepachirqanchu paykunamanta Qollanan Nunaq atiyanta? Utaq, Paychu, pacha kanankama, utaq hallp'a sayanankama, utaq kay pachapi huk runa kaqtin qespichisqa kananpaq?

37. Manan nisaykichismi; iñiywanmi milagrokuna ruwakun; iñiywanmi runakunaq wawankunaman angelkuna rikhurimunku, servinku ima; chhynaqa, kay imaymanakuna kayta tukukapun chayqa, ay runakunaq wawankunamanta, mana kreyiraykun kay, yanqapaqtaq llapanpas.

38. Cristoq rimayninman hinaqa, manan pipas qespichisqa kayta atinmanchu, sutinpi mana iñiyniyoq kaspaqa; chhynaqa, kay imaymanakuna tukukapun chayqa, tukukapurqanmi iñiypas; millaytaqmi runaq imayna kaynin, manapas qespichiy kanmanchu karqan hinan paykuna kanku.

39. Ichaqa, ancha munasqay wawqeykuna, aswan allin imaymanakunatan qankunamanta suyani, Cristopi iñiyniyoq kasqaykichistan yuyani llanp'u sonqoyoq kasqaykichisrayku; Paypi mana iñiyniyoq kaqtiykichisqa, manan allinchu kankichis iñeqkuna-hunpa runankunawan yupasqa kanaykichispaq.

40. Yapamantataq ancha munasqay wawqeykuna, suyakuyanta qankunaman rimayta munayman. Imaynataq iñiyniyoqri kawaqchis, mana suyakuyniyoq kaspaykichisri?

41. Imapitaq suyakuyniyoqri kanaychis? Nisaykichismi, Cristoq ñak'ariyninwan, kawsariyninpa atiyinpiwan suyakuyniyoqmi kanaykichis wiñay kawsayman hatarichisqa kanaykichispaq; kaytaq Paypi iñiykiykichisrayku, promesaman hina.

42. Chhynaqa, iñiyniyoq huk runa kan chayqa, suyakuyniyoq kaytan nesitan; mana iñiywanqa manan ima suyakuypas kanmanchu.

43. Yapamantataq niykichis, manan runaqa iñiyniyoq ni suya-

MORONI 8

kuyniyopas kanmanchu, k'umurikuq, llanp'u songoyoqpiwan mana kaspaga.

44. Chhayna kaqtinqa, yanqapagmi iñiyin suyakuynipas, manan pipas Yayaq ñawpaqenpi chaskisqachu, ichaga k'umurikuq, llanp'u songoyoqllapiwan. Huk runa k'umurikuq, llanp'u songoyoq ima kan, Qollanan Nunaq atiyinwantaq rimarin Jesus Cristo kasqanta chayqa, khuyapakuyniyogmi pay kanan; mana khuyapakuyniyogchu chay runa chayqa, manan imapaschu pay; chhaynaqa, khuyapakuyniyogmi pay kanan.

45. Unaytapunin khuyapakuy ñak'arin, sumaq songoyoqmi, manan chikikunchu, manataq punkipakunchu, manataq paypatachu mashkan, manataq usqhaylla phiñarichisqachu, manataq ima millaytapas yuyaykunchu, manataqmi millay ruwaypipas kusikunchu, ichaga, cheqaqpin kusikun; llapan imaymanakunata ñak'arin, llapan imaymanakunata kreyin, llapan imaymanakunata suyan, llapan imaymanakunataq awantan.

46. Chhaynaqa, ancha munasqay wawqeykuna, mana khuyapakuyniyog kankichis chayqa, mana imayogmi kankichis; khuyapakuyqa manan hayk'aqpas kayta qollunchu. Chhaynaqa, llapanmanta aswan hatun kaq khuyapakuymant rataychis; llapanmi urmanan—

47. Ichaga, khuyapakuyqa Cristoq ch'uya munakuyninmi, wiñaypaqtaq qhepan; qhepa p'unchawpi chay khuyapakuyniyogwan tarisqa kaqqa, allillanmi paywan kanqa.

48. Chhaynaqa ancha munasqay wawqeykuna, Taytaman rimarikuychis songoykichispa llapan atiyinwan, Churin Jesucristoq cheqaq qatikuqkunaman qosqan kay munakuywan hunt'asqa kanaykichispaq; Yayaq churinkuna wakinaykichispaq; rikhurimuqtin Pay hina kananchispaq, imayna kasqanta hinan Payta rikusun; kay suyakuyniyog kananchispaq, Pay ch'uya kasqanta hina ch'uyanchasqa kananchispaq. Hinataq kachun.

8 T'AQA

Moroniman Mormonpa qelqan. Huch'uy erqechakuna manan yuyayman kutirimuyta utaq unuchakuytapas nesitankuchu.

1. Taytay Mormonpa qelqan, noqa Moroniman qelqasqan; serviyniman waqyasqa kasqay pataman hinan noqaman qelqasqa karqan. Khaynatataq noqaman pay qelqamuwarqan:

2. Ancha munasqay churiy Moroni, anchatapunin kusikuni, Wiraqocha Jesucristoyki qanmanta yuyarisqanmanta; serviyninman, qollanan llank'ayninman ima waqyasqasuykimantawan.

3. Pasaqllataqmi yayaman-rimarikuyniykunapi qanmanta yuyarini, pasaqllataq Taytaman rimarikuni, Qollanan Churin Jesuspa sutinpi, mana-tukukuyniyoch sumaq kayninwan, grasiampiwan waqaychanasuykipaq, sutinpi iniyipi tukukuykama takyanaykipaq.

4. Kunantaq churiy, anchatapuni llakichivasqanmanta rimariyki, llakichivanmi qankuna purapi churanakuykuna hatarisqan.

5. Cheqaq kaqta yacharqani chayqa, churanakuykunan qankuna purapi kasqa karqan, huch'uy erqeykichiskuna unuchakunankumanta.

6. Kunanqa churiy, k'uchiy-k'uchi llank'anaykitan munani, qankuna puramanta kay millay pantay horqosqa kananpaq; khayna kananpaqmi kay qelqata qelqarqani.

7. Qanmanta kaymanta yachasqay patamanmi Wiraqochata kaykunamanta tapurqani. Wiraqochaq rimaynintaq noqaman chayamuwarqan Qollanan Nunaq atiyinwan:

8. Cristoq, Qespicheqniykiq, Wiraqochaykiq Yayaykiq ima rimayninta uyariy. Pachamanqa hamurqani manan chaninkunata yuyayman kutirimunankupaq waqyaqchu, ichaqa, huchasapakunatan. Qhali kaqkunaga manan hanpikamayochta nesitankuchu, ichaqa onqoqkunallan; chhaynaqa, huch'uy erqekunaga qhalin kanku, manan huchallikuyta atinkumanchu; chhaynaqa, noqapin Adanpa ñakaynin paykunamanta horqosqa, manataq paykunapi ima kallpayochu; sirkumsision kamachisqa-simitaq noqapi tukukun, nispa.

9. Khaynatan Yayaq rimayninta Qollanan Nuna willawarqan; chhaynaqa, ancha munasqay churiy, yachanin Yayaq ñawpaqenpi huch'uy erqekunata unuchay ancha millay kasqanta.

10. Kayta yachanaykipaqtaq nisayki—yuyayman kutirimuyta, unuchakuytawan umallikuqkunaman, huchallikuq atiqkunaman ima yachachiyta; ari, tayta-mamakunata yachachiy yuyayninkuman kutirimunankupaq, unuchasqa kanankupaq, huch'uy erqechankuna hina ullpuykukuq kanankupaq, hinataq huch'uy erqechankunawan llapanku qespichisqa kanqaku.

11. Manataqmi huch'uy erqechankunaqa yuyayman kutirimuyta, nitaq unuchakuytapas nesitankuchu. Unuchayqa, yuyayman kutirimunapaqmi, kamachiykuna hunt'anapaq, huchakuna panpachanapaq.

12. Ichaqa, huch'uy erqechakunaqa Cristopin kawsanku, kay pachaqa qallariyinmantapacha; mana chay hinaqa wakin runakunaman k'irarikuq Yayan Yaya, kambiyaq Yayataq, runakuna akllaq. Hayk'a huch'uy erqechakunan mana unuchayniyoq wañurqanku!

13. Chhaynaqa, huch'uy erqechakuna mana unuchakuyniyoc mana qespichisqa kayta atinkumanchu chayqa, mana tukukuyniyoc supay wasimanchá rirqanku.

14. Qanta nisayki—unuchakuyta huch'uy erqechakuna nesitanankuta yuyaqa, p'ushqo hayaqepi, millay ruwaypa watayninpiwanmi kashan; mana iñiyunyoqmi, mana suyakuyniyoc, ni khuyapakuyniyoc ima; chhaynaqa, chay hinata yuyashaqtin wañunqa chayqa, supay wasimanmi rinqa.

15. Ancha millaypunin chay millay ruway, unuchanarayku huch'uy erqechata Yaya qespichinan yuyay, hukkaqtaq wañunan mana unuchayniyoc kaqtin.

16. Ay! khaynata Wiraqochaq ñanninkunata waqllichi runamanta; chinkanqan pay, yuyaninman mana kutirimunqachu chayqa. Mana manchakuspan rimarini Yayamanta atiyuniyoc kaspá; manataqmi manchakunichu runa imatapas ruwayta atisqanmanta; hunt'asqa munakuyqa llapan manchakuytan qarqon.

17. Khuyapakuyniyoc hunt'ataq kashani, chaytaq wiñay-wiñaypaq munakuy; chhaynaqa, llapan erqekunaqa rikcha'y purallan kawanku; hinaqa hunt'asqa munakuywanmi huch'uy erqechakunata munakuni; rikch'ay purallataq llapanku kanku, qespiymanta malliqkuna.

18. Yachanin Yaya mana wakin runakunaman k'irarikuq Yaya kasqanta, nitaq kambiyac kasqanta; ichaqa, mana kambiyacmi, wiñaymanta wiñayman.

19. Huch'uy erqechakunaqa, manan yuyayman kutirimuyta atinkumanchu; chhaynaqa, ancha millay millaypunin paykunaman Yayaq ch'uya khuyapakuyninkuna mananchay; Paypin llapanku kawsanku khuyapakuyninrayku.

20. Huch'uy erqechakunaqa unuchakunankun nispa niqqa, Cristoq khuyapakuynintan mananchan, yanqapaqtaq Cristoq ñak'ariyninta, qespichiyinpa atiyinta ima kachin.

21. Ay! chhayna runakunamanta, wañuyta, supay wasiq ima ch'ikinpi, mana kutirimuyniyoc muchuyninpi iman kashanku. Mana manchakuspan rimani, Yayan kamachimuwarqan. Chaykunata uyariy kasuytaq, mana chayqa, qan kontran sayanqaku Cristoq taripanan tiyananpi.

22. Llapa huch'uy erqechakunaqa Cristopin kawsanku, mana kamachisqa-simiyoc kaqkunapas. Kutichikapuyta atiyinqa hamunmi, llapa mana kamachisqa-simiyoc kaqkunaman; chhaynaqa, mana kondenasqa kaq, utaq mana kondensacionpa ukhunpi kaqqa, manan yuyayman kutirimuyta atinmanchu; hina kaqmanqa manan imapaqpas unuchay servinchu—

MORONI 9

23. Ichaqa, asikuymi Yayaq ñawpaqenpi Cristoq khuyapakuy-ninkunata, Qollanan Nunaq atiyntawan mananchay, wañusqa ruwaykunapi kunfiyansata churaypiwan.

24. Churiy, manan kayqa kananchu; yuyayman kutirimuyqa, kondensacion, ukhupi kaqkunapaq, p'akisqa kamachisqa-simiq ñakaynin uhkupi kaqkunapaqwanmi.

25. Yuyayman kutirimuyqa ñawpaq kaq rurunqa unuchakuy-mi; unuchakuytaq hamun iñiywan kamachiykuna hunt'ayman; kamachiykuna hunt'aytaq huchakuna panpachayta apamun.

26. Huchakuna panpachaytaq k'umurikuyta, llanp'u sonqotawan apamun; k'umurikuy llanp'u sonqoraykupiwanataq Qollanan Nunaq visitaynin hamun; chay Kallpachaqtaq suyakuywan, hunt'asqa munakuypiwan hunt'an; chay munakuytaq takyan k'uchi kaywan yayaman-rimarikuyman, Yayawan llapan qollanankuna tiyanankupaq tukukuy hamunankama.

27. Churiy, yapamantan qelqamusayki, asllaman lamanitakuna kontra mana risaqchu chayqa. Kay llaqtaq utaq nephitakunaq anchayayninkun qolluyninkuta apamunqa, yuyayninkuman mana kutirimunqakuchu chayqa.

28. Paykunarayku yayaman-rimarikuy churiy, paykunaman yuyayman kutirimuy hamunanpaq. Ichaqa, manchakunin paykunawan churanakuyta Nuna qollusqanta; kay hawa hallp'apitaq paykunaqa mashkashanku, Yayamanta hamuq kallpata atiytawan urmachiyta; Qollanan Nunatataq mananchashanku.

29. Chhayna hatun yachayta qarqospankuqa churiy, usqhayllan wañunanku, unanchaqkunaq rimasqanku unanchaykuna, kikin Qespicheqninchispa rimasqanpiwan hunt'akunanpaq.

30. Qanñayá allinlla churiy, qanman qelqanay utaq yapamanta qanwan tupanaykama. Hinataq kachun.

9 T'AQA

Churin Moroniman Mormonpa ishkavkaq qelqan.

Lamanitakunaq, nephitakunaqpiwan millay ruwasqanku. Huk taytaq qhepa kaq sumaq anyakuynin.

1. Ancha munasqay churiy, yapamantan qanman qelqamuni, kawsashaqraq qasqayta yachanaykipaq; ichaqa, huk chikantan qelqamuni chay millay kaqmanta.

2. Ancha millay maqanakuytan lamanitakunawan maqanakurqani, manataq chaypi atiparqaykuchu. Archeantus q'anchinawan

urmarqan, Lurampas, Emronpas; ari, ancha askhatan akllasqa runanchiskunamanta chinkarqayku.

3. Kunanqa churiy, manchakunin kay llaqtata lamanitakuna qolluchinankumanta; manan yuyayninkuman kutirimunkuchu, paykuna pura phiñarikuymantaq paykunata pasaqlla supay inkitan.

4. Pasaqllan paykunawan llank'ashani; k'araqtapuni Yayaq rimayninta paykunaman rimariqtiytaq khatatatanku noqa kontrataq phiñarikunku; mana k'araqta rimariqtiytaq sonqonkunta chay kontra rumiyachinku; chhaynaqa, manchakunin Wiraqochaq Nunan paykunawan tupapakuyta qollusqanta.

5. Anchatapunin phiñarikunku, chhaynataq noqaman rikch'ariwan, manapas wañuyta manchakunkumanchu hina; paykuna pura munanakuytapas chinkachirqankun; yawarmanta, ayniypi qoymantawantaq ch'akisqalla kanku.

6. Kunanqa ancha munasqay churiy, rumiyarqankuña chaypas, haku k'uchiy-k'uchi llank'asun; llank'ayta tatisun chayqa kondensationmanmi apamusqa kaswan; kanmi ruwananchis ruwana, kay llink'i wasipi kananchiskama, llapan chaninchaypa awqanta atipananchispaq, Yayaq qhapaq-suyunpi nunanchista samachinanchispaq.

7. Kunanqa huk chikantan qelqani kay runakunaq ñak'ariy-ninkunamanta. Amoronmanta yachayta chaskisqayman hinaqa, Sherrisah pukaramanta apasqanku askha piñaskunayoqmi lamanitakuna kanku; chaypitaq karqan qharikuna, warmikuna, wawakunapiwan.

8. Chay warmikunaq qosankuta, wawankunaq taytankutataq paykuna wañuchisqaku karqan; warmikunamantaq qosankuq aychanta mikhuchinku, wawakunamantaq taytankuq aychanta; manataq unuta paykunaman qonkuchu, ichaqa, huk chikallanta.

9. Kay lamanitakunaq ancha hatun millay millayña kaqtinpas, manan atipanchu Moriantumpi kaq runanchiskunaqta. Askhatan lamanitakunaq ususinkunamanta piñasta hina hap'isqaku karqan; llapan imaymanakunamanta aswan sumaq aswan munasqa kasqan ch'uya-kayta, llunp'aq-kaytawan paykunamanta qechusqanku patamantaq—

10. Kay ruwasqanku patamantaq, aswan millaytapuni paykunata wañuchirqanku, wañunankukama runa-kurkunkuta ñak'arichispanku; kay ruwasqanku patamantaq, k'ita uywakuna hina aychankuta rakrarqanku, rumiyasqa sonqonkurayku. Kaytataq ruwanku qharillaña kasqankuta qhawachinankupaq. 11. Ancha mu-

MORONI 9

nasqay churiy, imaynatan khaynanirraq runakuna, mana ima runa-
yasqa kaqkuna—

12. (Huk chikan watakunallataq pasarqan, paykunataq runa-
yasqa, ancha sumaq runakuna karqanku).

13. Ichaqa churiy, imaynatan ancha hatun millay-millanapi
kusikuyninku kaq kay hina llaqta atinman—

14. Imaynatan suyaswan, taripanapi noqanchis kontra Yaya
makinta samarichinanta?

15. Waqanmi songoy: Ay kay llaqtamanta. Taripaypi lloqsi-
muy O Yaya, huchankunata, millay ruwayninkunata, millay-milla-
nankunatawantaq uyaykimanta pakay!

16. Yapamanta churiy—askha ikmakuna ususinkunapiwanmi
kan, Sherrisahpi qhepaqkuna; lamanitakunaq mana apasqanku
puchu mikhuykunapiwan, hinataq Zenephiq awqasuyun payku-
nata apasqa karqan, may atisqankumanpas mikhunarayku puri-
pakunankupaq paykunata saqespa; askha paya warmikunataq
ñanpi yuyayninkuta chinkachispanku wañunku.

17. Noqawan kaq awqasuyutaq mana ancha kallpayoqchu;
lamanitakunaq awqasuyunkunataq Sherrizah noqa ima chawpipi
kashan; Aaronpa awqasuyunman ayqekuqkunataq millay-millay
kayninkupi urmarqanku.

18. O llaqtaypa qhelli kayninku. Mana qallalla kayniyoq mana
khuyapakuyniyopiwan paykuna kanku. Huk qharillan kani, huk
qhariq kallpanllayoqtaq kani, manañataqmi astawan kamachiy-
niykunata kallpaychayta atinichu.

19. Kallpasapan millay ruwayninkupi wakipunku, kushka pu-
rataq uywa hina kanku, mana pitapas saqespa, ni machutapas ni
waynatapas; imaymanapitaq kusikunku, allin kaqllapitaq mana;
kay hallp'a patapi warminchiskuna wawanchiskunaqpiwan ñak'a-
riyninkutaq imaymanata atipan; ari, manan simi willayta atinman-
chu, manataqmi qelqakuyta atikunmanchu.

20. Kunanqa churiy, manañan astawan kay millaymanta rima-
rinichu. Yachankin kay runakunaq millay-kayninkuta; yachankin
mana ima teqsiyoq kasqankuta, mana munayniyoq; millay ru-
wayninkutaq lamanitakunaqta atipan.

21. Qhawariy churiy, manan paykunarayku Yayamanta maña-
kunichu, Paypas k'irikuwanman.

22. Ichaqa churiy, Yayamanmi qanta rekomendayki, Cristopi-
taq konfiyani qespichisqa kanaykimanta; Yayamantaq rimarikuni
kawsayniykita qhepachinanpaq, kay runakuna Payman kutinan-
kuta rikunaykipaq, utaq lliwtapuni qollunankutapas rikunaykipaq;

MORONI 10

yachanin paykuna wañunankuta, yuyayninkuman kutirispá Payman mana kutirikuqtinkuqa.

23. Paykuna chinkanqaku chayqa, Jareditakuna hinan kanqa, sonqonkuq munapakuyinkurayku, yawarta, aynipi kutichiytawan mashkaspanku.

24. Wañunqaku chayqa, yachanchismi askha wawqenchiskunamanta lamanitakunaman huñunakusqankuta, askhapiwantaq paykunaman huñunakunqaku; chhaynaqa, huk chikallantapas qelqay mana wañuchisqa kanki, noqataq wañuchisqa kasaq manañataq rikusaykiñachu chayqa; ichaqa, konfiyanin asllaman qan rikuyta, qollanan qelqakunan kan qanman haywanaypaq.

25. Churiy, iñiysapa Cristopi kay, amataqyá qelqasqay imaymanakuna qanta llakichichunchu, wañuyman urayachinasuykipaq; ichaqa, Cristoñayá qanta hoqarichun, ñak'ariyninkuna wañuyinpiwantaq, taytanchiskunaman runa-kurkun qhawachiy, khuyapakuynin, unay ñak'ariyninpiwan kusiqellpunpi wiñay kawsaynipi ima suyakuypiwán umaykipi wiñaypaq samachun.

26. Hanan hanaqpachapi tiyanayoq Taytanchis Yayaq grasián, llapan imaymanakuna Payman watasqa kanankama paña makinpi tiyaq Wiraqocha Jesucristonchispa grasiánpiwan qanwan kachun, wiñaypaqtaq qanwan tiyachun. Hinataq kachun.

10 T'AQA

Lamanitakunamanta Moroni kacharparikun. Mormonpa Qelqan cheqaq kasqanmanta imaynata sut'inchay hap'ina. Llaqtanpa qelqanta Moroni intuykun.

1. Kunantaq, noqa Moroni huk chikanta qelqani allin rikch'ariwasqanta; wawqeykuna lamanitakunamantaq qelqani. Cristoq hamusqanmanta señal qosqa kasqanmanta tawa pachak ishkay chunka watamanta aswanña pasasqanta yachanankutan munayman.

2. Kay qelqakunatatáq intuykusaq, qankunaman anyakuypi chikan simikunata rimarisqay pataman.

3. Qankunata anyakuymán, kay imaymanakunata ñawinchaqtiykichis, Yayapi kay ñawinchanaykichisqaq allin yuyay kanqa chayqa, Adan kamasqa kasqanmantapacha, kay imaymanakunata chaskinaykichis p'unchwakama runakunaq wawankunawan imayna khuyapakuq Wiraqocha kasqanta yuyarinaykichispaq; soqoykichispitaq kayta yuyaymanaychis.

4. Kay imaymanakunata chaskiqtiykichistaq, Wiñay Tayta Yaya, Cristoq sutinpi tapunaykichista anyaykichisman, manachus

cheqaq kay imaymanakuna kasqanmanta; cheqaq sonqowan tapunkichis, cheqaqtapuni munaspa, Cristopi iñispa chayqa, Paymi chaypa cheqaqninta yachachisunkichis Qollanan Nunaq atiyinwan.

5. Qollanan Nunaq atiyinwantaq, llapa imaymanakunaq cheqaqninta yachayta atinkichis.

6. Imapas allin kaqqa, chaninmi cheqaqtaqmi; chhaynaqa, manan imapas allin kaqqa Cristota mananchanchu, ichaqa Pay kasqantan reqsichin;

7. Qollanan Nunaq atiyinwan Pay kasqanta yachanaykichispaq; chhaynaqa, qankunatan anyaykichis Yayaq atiyinta mana mananchanaykichispaq; atiywanmi Pay llank'an, runakunaq wawankunaq iñiyinkuman hina, kaqlataq kunan p'unchawpas, paqarinpas wiñay-wiñaypaqpas.

8. Yapamantataq anyakuykichis wawqeykuna, Yayaq qoyninkunata ama mananchanaykichispaq; askhan qoyninkuna, kaq Yayallamantataqmi hamunku. Askha manerakunapitaqmi kay qoykuna qokun, ichaqa kaq Yayallan llapanpi llank'an; Yayaq Nunanpa watukuyninwantaq runakunaman qosqa, paykunapaq allin kananpaq.

9. Hukman Yayaq nunanwan qosqa kan, yachaysapa simita yachachinanpaq;

10. Hukmantaq yachay rimayta kikin Nunawan yachachinanpaq;

11. Hukmantaq ancha hatun iñiyta; hukmantaq alliyachiy qoykunata kikin Nunawan.

12. Yapamantataq, hukman ancha hatun milagrokunata ruwananpaq;

13. Hukmantaq llapan imaymanakunamanta unanchananpaq;

14. Hukmantaq angelkuna rikuyta, sirviq nunakunatawan;

15. Hukman imaymana laya simikunata;

16. Hukmantaq simikuna hamut'ayta, imaymana simikunapiwan;

17. Kay llapan qoykunataq Cristoq Nunanmanta hamun; sapanka runakunamantaq chaykuna hamun askha kutin, Paypa munasqanman hina.

18. Anyaykichismantaq ancha munasqay wawqeykuna, Cristomanta sapanka allin qoykuna hamusqanta yuyarinaykichispaq.

19. Anyaykichismantaq ancha munasqay wawqeykuna, qayna p'unchawpas kunan p'unchawpas, wiñaypaqpas kaqla Pay kasqanta yuyarinaykichista; kay rimarisqay nunapi llapan qoykunataq, mana hayk'aqpas qollunqachu, pacha sayanankamapuni,

ichaqa, runakunaq wawankunaq mana kreyiyninkuraykulla.

20. Chhaynaqa, kananpunin iñiy; iñiy kananpuni chayqa, suyakuypas kananpunin; suyakuypas kananpuni chayqa, khuyapakuypas kananmi.

21. Mana khuyapakuyniyuq kaqtiykichisqa, manan imaynatapas Yayaq qhapaq-suyunpi qespichisqa kawaqchischu; manataqmi Yayaq qhapaq suyunpi qespichisqa kayta atiwaqchischu mana iñiyuniyoq kaqtiykichisqa; nitaq atiwaqchischu mana suyakuyniyuq kaqtiykichisqa.

22. Mana suyakuyniyuq kaspaykichisqa llakikuypin kankichis; millay ruwaykunaraykutaqmi llakikuy hamun.

23. Cheqaqtapunin taytanchiskunata Cristo nirqan: Iñiyuniyoq kankichis chayqa, noqapaq allin kasqan llapan imaymanakunatan ruwayta atiwaqchis, nispa.

24. Kunantaq hallp'aq llapan k'uchunkunaman rimarini—p'un-chaw chayamunqa qankuna puramanta Yayaq atiyin horqosqa kananpaq chayqa, mana kreyiyraykun kanqa.

25. Ay! runakunaq wawankunamanta khayna kanqa chayqa; manan pipas allin ruwaq qankuna purapi kanqachu, manan hukllapas. Qankuna purapi allin ruwaq huk runa kanqa chayqa, Yayaq atiyinwan qokuyninpiwanmi llank'anqa.

26. Ay! kaykunata wikch'uspanku wañuqkunamanta, huchankupin wañunku, manataq Yayaq qhapaq-suyunpi qespichisqa kayta atinkumanchu; Cristoq rimayninkunaman hinataq rimarini, manataqmi llullakunichu.

27. Kay imaymanakuna yuyarinaykichispaqtaq anyakuykichis; usqhayllan pacha hamushan mana llullakusqayta yachanaykichispaq. Yayaq taripana tiyananpin rikuwankichis; Wiraqocha Yayaq nisunkichis: Manachu qankunaman rimayniyta willarqaykichis, kay runaq qelqasqan kaqta? wañusqakunamanta qaparimuq hina, ari, ñut'u hallp'amanta rimariq hinapuni? nispa.

28. Unanchaykuna hunt'akunanpaqmi kay imaymanakunata willani. Wiñay Yayaq siminmantataq lloqsimunqa, rimaynintaq khuywimunqa rimarimunqa huk miraymanta huk mirayman.

29. Yayataq qhawachisunkichis chay qelqasqay cheqaq kasqanta.

30. Yapamantataq anyakusaykichis, Cristoman hamunaykichispaq, sapanka allin qoymantataq hap'ipakuychis, amataq llamiychischu millay qoyta, nitaq qhelli kaqtapas.

31. Rikch'ariy, ñut'u hallp'amantataq sayariy O Jerusalen; ari, ancha sumaq p'achaykikunataq churakuy O Sionpa ususin; tatarpuykikunata kallpachay, wiñaypaqtaq lindaykikunata hatunya-

MORONI 10

chiy, manaña astawan tutayachisqa kanaykipaq, qanwan Wiñay Taytaq ruwasqan rimanakuykuna hunt'akunanpaq, O Israelpa wasin.

32. Ari, Cristoman hamuychis, Paypitaq hunt'achisqa kaychis, llapan mana-yaya-kaymantataq mananchakuychis. Llapan mana-yaya-kaymanta mananchakunkichis, llapan atiykiykichiswan, yuyaykiykichiswan, kallpaykiykipiwantaq Yayata munakunkichis chayqa, chaninmi qankunapaq grasiyan chanin kanqa; grasiyanwantaq Cristopi hunt'asqa kanaykiykipaq. Yayaq grasiyanwan hunt'asqa Cristopi kankichis chayqa, manan imaynatapas atiykin mananchayta atiwaqchischu.

33. Yapamantataq—Yayaq grasiyanwan Cristopi hunt'a kankichis, manataq atiykinta mananchankichischu chayqa, Cristopi qollanachisqan kankichis Yayaq grasiyanwan, Cristoq yawarnin sut'uchiywan; chaytaq Taytaq rimanakuyninpi huchaykiykipiskuna panpachanapaq, qollanantaq wakinaykiykipaq, mana qhelliyoq.

34. Kunanqa llapamantan kacharparikuni. Asllamanmi Yayaq kusi-pawqarninpi samaq risaq, nunay runa-kurkuywan huñunakunankama; atipayniyoqtaq wayranta apamusqa kasaq, ancha hatun Jehovaq, kawsaqpa wañusqakunaqpiwan Wiñay Taripaqpa sumaq taripanampa ñawpaqenpi qankunawan tupanaypaq. Hina-taq kachun.

QUECHUA (PERU)



4 02335 68061 0

33568 061